



ZIMBABWE

KKATA LYAMULAWU WAZIMBABWE

Kkata lyaMulawu waZimbabwe lyakasimbwa mbuuli Mpampikwa yaKkata lyaMulawu waZimbabwe Mbambululo (No. 20) Mulawu, 2013 (Mulawu 1 wa2013). Lyakabambululwa aMilawu itobela—

<i>Mweelwe amwaaka</i>	<i>Mutwe wamakanii</i>	<i>Buzuba Bwakatalika</i>
10 wa2017	Kkata lyaMulawu waZimbabwe (No.1) Mulawu, 2017	7.9.17
2 wa2021	Kkata lyaMulawu waZimbabwe (No.2) Mulawu, 2021	7.5.21

BWIIME BWAZIBEELA

Ntalisyo

CHAANDAANO 1
BWAALO BWAMILAWU

Chibeela
1. Ripabbuliki.

Printed by the Government Printer, Harare.

Chibeela

2. Bupati-kampatila bwaKkata lyaMulawu.
3. Bwaalo Bwandemeko.
4. Ndembela Yachisi, Lwiimbo lwaChisi, Chidindo chaChisi antoomwe aPande lyaChisi .
5. Zibeela zyafulumende kuzwa kujulu kuloosika aansi.
6. Milaka.
7. Kusungwaazya luundu kuti luzibe zili muKkata lyaMulawu.

CHAANDAANO 2

MPALAMO ZYACHISI

8. Mpalamo zizulwida fulumende antoomwe atoonse tubunga-bunga amitabi yafulumende.
9. Buzuluzi buzikitide.
10. Lukamantano lwachisi, Luumuno akunzinzama kwachisi.
11. Kusumpula zyeelo zyaampandamunsaka antoomwe angwangunuko.
12. Bulidilano bwazisi.
13. Lusumpuko lwachisi.
14. Kusumpulwa kwabantu antoomwe akupangwa kwamilimu.
15. Kubawo kwachakulya.
16. Tunsiyansiya.
17. Kupana myeenya yeelene yabaalumi abanakazi.
18. Kwiimikililwa kweelene kwazilawu munyika.
19. Bana.
20. Bakubusi.
21. Bantu bakachembaala
22. Bantu balemene
23. Bakalwana nkondo yakulilela
24. Zyabublesi akubelekelana
25. Kukwabililwa kwampuli
26. Lukwatano
27. Lwiyo.
28. Chiyusilo
29. Zyabulondozi
30. Zyalugwasyo abukkale bwabantu
31. Lugwasyo lwakwiimikililwa munkuta asimulawu
32. Zyamisobaano akulisangalizya
33. Kubambwa kwaluzibo lwansiku
34. Kweetwa kwamilawu yamanyika aandeene mumilawu yanyika yaZimbabwe.

CHAANDAANO 3

BWENICHISI

35. Bwenichisi bwaZimbabwe.
36. Bwenichisi mukuzyalwa.
37. Bwenichisi kwiinda mubuzukululu.
38. Bwenichisi kwiinda mukulembesya.
39. Kunyangwa bwenichisi.
40. Kutabunda kwabwenichisi kwiinda mulukwatano naakuti kulekana.
41. Bwenichisi aMbunga ilanga Banjila akuzwa muChisi.
42. Manguzu aPalyamenti aatala azyabwenichisi.
43. Kweendelela nembo abwenichisi antoomwe akuboozegwa kwabunichisi bwakali bwanyangwa.

CHAANDAANO 4

MOOMPLOLO WAZYEELELO

CHIBAKA 1

MABELESEZYO ABUPANDULUZI BWACHAANDAANO 4

Chibeela

44. Mukuli wakulemeka zyeelelo zyabantu zyaampandamunsaka angwanganuko
45. Mabelesezyo aChaandaano 4
46. Mvwisisisyo abupanduluzi bwaChaandaano 4
47. Chaandaano 4 tachikasyi pe kuzuzikizigwa akubawo kwazimwi zyeelelo.

CHIBAKA 2

ZYEELELO ZYABANTU ZYAMPANDAMUNSAKA ANGWANGUNUKO

48. Cheelelo chakupona.
49. Cheelelo chakwaangunuka kwakwe mwini.
50. Zyeelolo zyabaange abali muchitookesi.
51. Cheelelo chakujatwa aabulemu.
52. Cheelelo chakujana lukwabililo lwakwe muntu.
53. Kwaangunuka kuzwa mukusonsegwa, kusubulwa akujatwa bunkala munzila iigwisya bulemu bwamuntu.
54. Kwaangunuka kuzwa kubuzike akujatwa bunkala.
55. Ngwanganuko kuzwa kukwaangilwa kubeleka mulimu kutayandi.
56. Kweelana antoomwe akutasaluulana.
57. Cheelelo chakuba aansiswa.
58. Kwaangunuka kwakuswaanana, kulyidilana akubungana kwabantu.
59. Kwaangunuka kwamuntu kuti atongawuke antoomwe akulemba aaapepa eezyo zyamuchima.
60. Kwaangunuka muli zyakulibeteka akulilya moyo.
61. Ngwanganuko yakulyaambwiida zilaamoyo angwanganuko mukubelesegwa kwazibelezyo. zyakumwaya milumbe/twaambo zisiyene.
62. Kujana luzibo antoomwe amilumbe.
63. Mulaka antoomwe atunsiyansiya.
64. Ngwanganuko yakulisalila milimu iiyiilwa, zyamabbindawuko naa imwi biyo milimu.
65. Zyeelolo zyababelesi ababelekelwa.
66. Ngwanganuko yakweendeenda akukkala munyika.
67. Zyeelolo zyameendeleyzo aanyika.
68. Cheelelo chakwendelezegwa kwazyabululami.
69. Cheelelo chakubetekwa chooma.
70. Zyeelolo zyabantu batamizigwa milandu.
71. Zyeelolo zyaatala alubono.
72. Cheelelo chakujana nyika yakulima akuvuba mbono.
73. Zyeelolo zyazituzyungulukide.
74. Ngwanganuko yakutayandogwisigwa mpubede achanguzu.
75. Cheelelo chakujana lwiyo.
76. Cheelelo chakujana kusilikwa muzibbadela.
77. Cheelelo chakujana chakulya antoomwe ameenda.
78. Zyeelolo zyaatala alukwatano.

CHIBAKA 3

BUPANDULUZI BUZWIDE BWAZIMWI ZYEELELO

79. Mabelesezyo aachibeela 3.
80. Zyeelolo zyabanakazi.
81. Zyeelolo zyabana.
82. Zyeelolo zyabantu bakachembaala.
83. Zyeelolo zyabantu balemene.
84. Zyeelolo zyabantu bakalwana nkondo yakulilela.

CHIBAKA 4

KUZUZIKIZIGWA KWAZYEELELO ZYABANTU ZYAMPANDAMUNSAKA ANGWANGUNUKO

Chibeela

85. Kuzuzikizigwa kwazyeelo zyaampandamunsaka angwangunuko.

CHIBAKA 5

MPUZYEELEDE KULEKWA KUZUZIKIZIGWA ZYEELELO ZYAMPANDAMUNSAKA

86. Mpuzigolela kulemekwa zyeelelo zyaampandamunsaka angwangunuko.

87. Zyeelelo mbuzilekwa kulemekwa muchiimo chalupyopyongano

CHAANDAANO 5

BASILUTWE BAFULUMENDE

CHIBAKA 1

MANGUZA AABASILUTWE

88. Manguzuaabasilutwe.

CHIBAKA 2

MUZULWIDI WAN YIKA ABAMUTOBELA

89. Muzulwidi waNyika.
90. Milimu yaMuzulwidi waNyika.
91. Nzyayelete kubaazyo kuti muntu asalwe kuba Muzulwidi waNyika akuba mutobeli waMuzulwidi waNyika.
92. Kusalwa kwaMuzulwidi waNyika aBamutobela Muzulwidi waNyika.
93. Kutondeeza kutakkutikana kumasalilo aMuzulwidi waNyika.
94. Katalika mulimu kwaMuzulwidi waNyika aBamutobela.
95. Bulamfu bwachiindi chakubeleka mulimu kwa Muzulwidi waNyika antoomwe aBamutobela.
96. Kusiya mulimu kwa Muzulwidi waNyika naakuti Bamutobela.
97. Kugwisigwa kwa Muzulwidi waNyika naakuti Bamutobela.
98. Kukwabililwa kwa Muzulwidi waNyika kuli zyakwaangwa.
99. Milimu yaBatobela Muzulwidi waNyika.
100. Ujisilidi Muzulwidi waNyika.
101. Kutolwa kwachuuno cha Muzulwidi waNyika aBamutobela kuti wafwa, wasiya mulimu naakuti katachikonyi kubeleka.
102. Mufolo wa Muzulwidi waNyika aBamutobela.
103. Muzulwidi waNyika aBamutobela abamwi bakali bajata zyuuno eezi tabeelede kubeleka uumbi pe mulimu nibasiya zyuuno zyabo.

CHIBAKA 3

BASILUTWE BAMITABI YAFULUMENDE, BABATOBELA ANKAMU YABASILUTWE BAMILABI
YAFULUMENDE

104. Kugalwa kwaBasilutwe baMitabi yaFulumende aBamutobela.
105. Nkamu yaBasilutwe bamitabi yafulumende.
106. Mbubeede kubeleka akulijata Batobela Muzulwidi waNyika, Basilutwe baMitabi yaFulumende abaBatobela.
107. Kufolomwa kwa Batobela Muzulwidi waNyika, Basilutwe baMitabi yaFulumende aba Batobela.
108. Bulamfu bwachiindi chakubeleka mulimu kwaBasilutwe baMitabi yaFulumende abaBatobela.

Chibeela

109. Vooti yakutondeezya kubula lusyomo muli Fulumende.

CHIBAKA 4

MILIMU YABASILUTWE BAFULUMENDE

110. Milimu ya Muzulwidi waNyika aNkamu yaBasilutwe baMitabi yaFulumende.
111. Nkondo aluumuno.
112. Nguzu zyakulekelela.
113. Chiimo chalupyopyongano lwaluundu.

CHIBAKA 5

NABBATULE WABASIKUSOSELAMILANDUMUNKUTA

114. Nabbatule waBasikusosela Milandu muNkuta.
115. Kugwisigwa kwaNabbatule waBasikusosela Milandu muNkuta.

CHAANDAANO 6

BASIKUPANGAMILAWU

CHIBAKA 1

NGUZYAKUPANGAMILAWU

116. Basikupanga Milawu.
117. Bube abwiime bwanguzu zyakupanga milawu.

CHIBAKA 2

PALYAMENTI

118. Palyamenti.
119. Mulimu waPalyamenti.

CHIBAKA 3

NG'ANDAYAAJULUYAMILAWU

120. Bubumbwe bwa Ng'anda Yaajulu Yamilawu.
121. Ziyandikana kuti muntu asalwe antoomwe azinga zilapa kuti akakilwe kuba mwiimikili mung'anda yaajulu yamilawu.
122. Muzulwidi waNg'anda Yaajulu Yamilawu.
123. Mutobeli waMuzulwidi waNg'anda Yaajulu Yamilawu.

CHIBAKA 4

NG'ANDAYAANSIYAMILAWU

124. Bubumbwe bwaNg'anda Yaansi Yamilawu.
125. Ziyandikana kuti muntu asalwe antoomwe azinga zilapa kuti akakilwe kuba mwiiminini wabantu mu Ng'anda Yaansi Yamilawu.
126. Sichuuno waNg'anda Yaansi Yamilawu.
127. Mutobeli wa Silutwe/Sichuuno waNg'anda Yaansi Yamilawu.

CHIBAKA 5

BULAMFU BWACHIINDI NCHIBEELEDE KUBAMUWOFESIBAYIMININAMASENAANSALUUZYOMUPALYAMENTI

128. Chikonke chaMwiiminini wabusena bwansaluuzyo muPalyamenti.

Chibeele

129. Bulamfu bwachiindi nchibeelede kuba mu-ofesi bayiminina masena mupalyamenti.

CHIBAKA 6

NGUZU ZYAKUPANGA MILAWU AZIMWI NGUZU

130. Manguzu antoomwe amilimu yamaanda obile aPalyamenti (Ng'anda Yaajulu aYaansi).
131. Milawu iPangwa aPalyamenti antoomwe anzila zitobelezegwa mukwiipanga.
132. Katalika kubeleka kwaMilawu ipangwa aPalyamenti.
133. Kunjizigwa kwamilawu ipangwa aaPalyamenti .
134. Imwi milawu iigwasizya.

CHIBAKA 7

MEENDELEZYO AAMILIMU MUPLYAMENTI

135. Silutwe waPalyamenti.
136. Bantu bazulwida mbandiko muPalyamenti.
137. Buvule bwabantu beelete katalika mbandiko muPalyamenti.
138. Kuvoota acheelalo chakumvwigwa muPalyamenti.
139. Nzila Zyameendelezyo aPalyamenti.
140. Milumbe izwa kuMuzulwidi waNyika kiiya kuPalyamenti.
141. Kubelekelaamwi kwaPalyamenti abulumbu bwaZimbabwe.
142. Butambulwe abukakwe bwambandiko zyaPalyamenti.

CHIBAKA 8

BULAMFU BWAKUKKALA, KUMWAYIGWA AKUBELEKA KWAPALYAMENTI

143. Bulamfu bwakukkala akumwayika kwaPalyamenti.
144. Nsaluuzyo zyakusala bazulwidi basiyenesiyene nikwamwayika Palyamenti.
145. Kuswaanana kutaanzi kwaPalyamenti nizyamana nsaluuzyo zyakusala bazulwidi basiyenesiyene.
146. Chiindi chakuswaanana akulyookezya kwaPalyamenti.
147. Kuyangala kwamaBbili, mitwe yanjoomo azimwi mbandiko zyakali kuchitwa kitana mwayika Palyamenti.

CHIBAKA 9

ZIMWI BIYO ZYEENDELENE AAPALYAMENTI

148. Lukwabililo anzibeelede kuchitilwa Bayiminini baPalyamenti.
149. Cheelalo chakutongawuka Palyamenti kwiinda mumalembe.
150. Mpuyiswananila Playamenti.
151. Kkomiti yaNzila zyamendelezyo aPalyamenti.
152. Kkomiti yakulangwalangwa kwaMilawu yaPalyamenti.
153. Mufolo waMuzulwidi waNg'anda Yaajulu yaMulawu, Sichuuno waNg'anda Yaansi yaMulawu aBiiminini baPalyamenti.
154. Mulembi Mupati waPlayamenti abamwi babelesi.

CHAANDAANO 7

N SALUUZYO

CHIBAKA 1

NZILA ZYAKWEENDELEZYA NSALUUZYO

Chibeela

155. Ndemeko zyanzila zyansaluuzyo.
156. Meedelezyo aansaluuzyo antoomwe amalefelendamu.
157. Mulawu waNsaluuzyo.

CHIBAKA 2

CHINDI CHAKUCHITWA KWANSALUUZYO

158. Chiindi chakuchitwa kwansaluuzyo.
159. Kuzuzikizigwa kwazyuuno kwiinda munsaluuzyo.

CHIBAKA 3

KWEENGWA KWAMIGAANO YAZYANSALUUZYO

160. Buvule bwamakkonsitichwensi amawaadi.
161. Kweengwa kwamigaano yazyansaluuzyo.

CHAANDAANO 8

BUBETESI BOONSE ANTOOMWE ANKUTA

CHIBAKA 1

BWIIME BWAZYANKUTA

162. Manguzu aaBubetesi.
163. Bubetesi Boonse.
164. Kulyiimikilila akulisanta kwaBubetesi Boonse.
165. Ndemeko zizulwida bubetesi.
166. Nkuta yazyakata lyaMulawu.
167. Nzyiibeleka Nkuta yazyakata lyaMulawu.
168. Nkuta Yaajuluju.
169. Nzyiibeleka Nkuta Yaajuluju.
170. Nkuta Yaajulu.
171. Nzyiibeleka Nkuta Yaajulu.
172. Nkuta Yambelekelano.
173. Nkuta Yanjendeleyo.
174. Zimwi nkuta atubunga tubeteka.
175. Nguzu zyankuta kuzyaambo zilachakuchita azyaKkata lyaMulawu.
176. Nguzu zjiswi aaNkuta yazyakata lyaMulawu, Nkuta Yaajuluju aNkuta Yaajulu.
177. Nzibeelede kubaazyo bantu kuti bagalwe kuba maJaji baNkuta yazyakata lyaMulawu.

CHIBAKA 2

KUGALWA KWABABETESI AACHIINDI NCHIBEELEDE KUKKALA MUZYUNO ZYABO

178. Nzibeelede kubaazyo bantu kuti bagalwe kuba maJaji baNkuta Yaajuluju.
179. Nzibeelede kubaazyo bantu kuti bagalwe kuba maJaji baNkuta Yaajulu, Nkuta Yambelekelano aNkuta yanjendeleyo.
180. Kugalwa kwamaJaji.
181. Kugalwa kwaBabtesi bajisilidi zyuuno.
182. Kugalwa kwabaMejastiliti abamwi babeleka mububetesi.
183. Babelesi babubetesi tabeeli kugalwa kubelekela nkuta zyiinda iimwi.
184. Kugalwa kwababelesi babubetesi kweelede kutondeezya bwiime bwachisi.
185. Chikonke chamulimu.
186. Chiindi nchibeelede kukkan muzyuuno maJaji.

Chibeela

187. Kugwisigwa kwamaJaji amulimu.
188. Bwiime bwamulimu wabubetesи achiindi nchibeelede kukkanla muzyuno zyabo.

CHIBAKA 3

KKOMISHINI YABUBETESI

189. Kubumbwa abwiime bwaKkomishini yaBubetesi.
190. Milimu yaKkomishini yaBubetesi.
191. Bubalangale mumabelekelo aKkomishini yaBubetesi.

CHIBAKA 4

ZYABIYOBIOYO

192. Mulawu weelede kweendelezegwa.
193. Nkuta zyeede kubeteka milandu yachakuchita aatala abasimilandu.

CHAANDAANO 9

NDEMEKO ZYAKWEENDELEZYA BULUMBU ANTOOMWE ABUZULUZI

194. Ndemeko mpati zizulwida kweendelezegwa kwabulumbu.
195. Mabbindawuko aMakkapani afulumende.
196. Mikuli yaBabelesi Baluundu andemeko zyabuzuluzi.
197. Chiindi cheelede kukkalwa abasilutwe batutabi tusiyenesiyene twafulumende muzyuno zyabo.
198. Mulawu weelede kuzuzikizya Chaandaano 9.

CHAANDAANO 10

BABELESI BALUUNDU

199. Babelesi Baluundu.
200. Kulijata kwaBabelesi Baluundu.
201. Silutwe waMutabi waFulumende uubona zyaBabelesi Baluundu.
202. Kupangwa abubumbwe bwaKkomishini yaBabelesi Baluundu.
203. Milimu yaKkomishini yaBabelesi Baluundu.
204. Bayiminini baNyika yaZimbabwe kulaamwi maNyika.
205. Beendelezi baMitabi yaFulumende.

CHAANDAANO 11

BAKWABILILA NYIKA

CHIBAKA 1

ZWAKALINGISANA NEDZIBILIGWA KWEHANGO

206. Kukwabililwa Kwanyika.
207. Tubunga tukwabilila nyika.
208. Kulijata kwababelesi batubunga twakukwabilila nyika.
209. Kkansili yaKukwabililwa Kwanyika.
210. Nzila ilyimkilide yakutambula ntongawuko.

CHIBAKA 2

BASILUMAMBA

211. Basilumamba.

Chibeela

212. Milimu yaBasilumamba.
213. Kutumwa kwaBasilumamba kumulimu/kunkondo.
214. Beelede kuzibisigwa bazyameendeleyzo aanyika nikwatumwa Basilumamba.
215. Silutwe waMutabi waFulumende uubona zyaBasilumamba.
216. Kuzulwidwa kwaBasilumamba.
217. Kupangwa abubumbwe bwaKkomishini yaBasilumamba.
218. Milimu yaKkomishini yaBasilumamba.

CHIBAKA 3

BAKAPOKOLA

219. Bakapokola amilimu yabo.
220. Silutwe waMutabi waFulumende uubona zyaBakapokola.
221. Nabbatule waBakapokola.
222. Kupangwa abubumbwe bwaKkomishini yaBakapokola.
223. Milimu yaKkomishini yaBakapokola.

CHIBAKA 4

BUFUMFUUZYI

224. Kupangwa kwakabunga Bufumfuuzyi.
225. Silutwe waMutabi waFulumende ubona zyaBufumfuuzyi.
226. Kweendelezegwa kwakabunga kaBufumfuuzyi.

CHIBAKA 5

NTOLONGO/MAJELE A KUZYOTOLOLWA KWABAANGE

227. Milimu yakabunga kaNtolongo/Majele aKuzyotololwa Kwabaange.
228. Silutwe waMutabi waFulumende ubona zyaNtolongo/Majele aKuzyotololwa Kwabaange.
229. Nabbatule waNtolongo/Majele aKuzyotololwa Kwabaange.
230. Kupangwa abubumbwe bwaKkomishini yaNtolongo Majele aKuzyotololwa Kwabaange.
231. Milimu yaKkomishini yaNtolongo/Majele aKuzyotololwa Kwabaange.

CHAANDAANO 12

MAKKOMISHINI A ALYIIMVWILIDI A ASUMPULA JANDABANJI

CHIBAKA 1

ZYABIYOBIYO

232. Makkomishini Aalyiimvwilidi.
233. Mpalamo zyamaKkomishini Aalyiimvwilidi.
234. Babelesi bamaKkomishini alyiimvwilidi.
235. Kulyiimkilila akulisanta kwamaKkomishini.
236. Bantu bajanika mumakkomishini alyiimkilide tabeelede kunjila mutubunga twakweendezya nyika.
237. Kunjila akugwisigwa mulimu kwabantu bali muMakkomishini alyiimvwilidi.

CHIBAKA 2

KKOMISHINI YAN SALUUZYO MUZIMBABWE

238. Kupangwa abubumbwe bwaKkomishini yaNsaluuzyo muZimbabwe.

Chibeela

239. Milimu yaKkomishini yaNsaluuzyo muZimbabwe.
240. Kusiigwa aanze kwabantu bayanda kunjila muKkomishini yaNsaluuzyo muZimbabwe
241. Kkomishini yaNsaluuzyo muZimbabwe yeelede kupa Ngambo yabweendelezi bwansaluuzyo amalefelendamu.

CHIBAKA 3

KKOMISHINI YAZYEELELO ZYABANTU MUZIMBABWE

242. Kupangwa abubumbwe bwa Kkomishini yaZyeelelo Zyabantu muZimbabwe.
243. Milimu yaKkomishini yaZyeelelo Zyabantu muZimbabwe.
244. Ngambo ziya kuKomishini antoomwe aaLembwa aaKkomishini yaZyeelelo Zyabantu muZimbabwe.

CHIBAKA 4

KKOMISHINI YAKWEELANISIGWA KWAMYEEENYA YABANAKAZI ABAALUMI MUZIMBABWE

245. Kupangwa abwiime bwa Kkomishini yaKweelanisigwa kwaMyeenya yaBanakazi aBaalumi MuZimbabwe.
246. Milimu yaKkomishini yaKweelanisigwa kwaMyeenya yaBanakazi aBaalumi MuZimbabwe.
247. Ngambo/Malipoti aaLembwa aaKkomishini yaKweelanisigwa kwaMyeenya yaBanakazi aBaalumi MuZimbabwe.

CHIBAKA 5

KKOMISHINI YAZIMWAYA MILUMBE MUZIMBABWE

248. Kupangwa abubumbwe bwaKkomishini yaZimwaya Milumbe muZimbabwe.
249. Milimu yaKkomishini yaZimwaya Milumbe muZimbabwe.
250. Ngambo zilembwa aaKkomishini yaZimwaya Milumbe muZimbabwe.

CHIBAKA 6

KKOMISHINI YALUUMUNO ALULEKELELO MUNYIKA

251. Kupangwa abubumbwe bwaKkomishini yaLuumuno aLulekelelano Munyika.
252. Milimu yaKkomishini yaLuumuno aLulekelelano Munyika.
253. Ngambo zilembwa aaKkomishini yaLuumuno aLulekelelano Munyika.

CHAANDAANO 13

TUBUNGA TWAKULWANA BUBOLI ANTOOMWE AMILANDU

CHIBAKA 1

KKOMISHINI YANKAKA-BUBOLI MUZIMBABWE

254. Kupangwa abwiime bwa Kkomishini yaNkaka Buboli muZimbabwe.
255. Milimu yaKkomishini yaNkaka Buboli muZimbabwe.
256. Kuchita zyaambidwe muChaandaano 12 kumulimu waKkomishini yaNkaka Buboli muZimbabwe.
257. Ngambo zilembwa aKkomishini yaNkaka Buboli muZimbabwe

CHIBAKA 2

NKAMU YABASIKUSOELA MILANDU MUNKUTA

Chibela

258. Kupangwa amilimu yaNkamu yaBasikusosela Milandu Munkuta.
259. Nabbatule waBasikusosela Milandu Munkuta abamwi bobelesi.
260. Kulyiimikilila akulisanta kwaNabbatule waBasikusosela Milandu.
261. Mbubeelede kulijata bobelesi baNkamu yaBasikusosela Milandu Munkuta.
262. Nabbatule waBasikusosela Milandu Munkuta weelete kupa lipoti kuPalyamenti munyaka amunyaka.
263. Amwi manguzu akusosela milandu

CHAANDAANO 14

FULUMENDE WA**CHILIKITI AWABBOOMA**

Ntalisyo

CHIBAKA 1

N_TALISYO

264. Kuselusigwa kwanguzu zyakulela nyika kuzwa kuli fulumende mupati kusika kuli fulumende waansi, nguzu zipedwe antoomwe amilimu yeelede kuchitwa.
265. Ndemeko zyeedele kujanika muli fulumende wachilikiti, dolopo abbooma.
266. Kulijata kwaBabelesi Baluundu wachilikiti mumadolopo mapati amumabbooma.

CHIBAKA 2

ZILIKITI AMAKKANSILI AAZILIKITI AMADOLopo-MAPATI

267. Zilikiti amabbooma aamuZimbabwe.
268. Makkansili aamuZilikiti.
269. Makkansili aMadolopo Mapati.
270. Milimu yamaKkansili muzilikiti zyamadolopo mapati.
271. Makkomiti aamakkansili amuzilikiti.
272. Basichuuno bamakkansili amuzilikiti.
273. Zimwi zinga zilaambwa aatala amakkansili amuzilikiti amumadolopo mapti.

CHIBAKA 3

FULUMENDE WA**DOLopo NAAKUTI WABBOOMA**

274. Fulumende/kkansili yadolopo.
275. Kkansili yaBbooma lyaMumyuunzi.
276. Milimu yamakkansili amumaBbooma aaMumyuunzi.
277. Kusalwa kuba kkansela.
278. Bulamfu bwachiindi nchibanga balakkala muzyuuno makkansela.
279. Meendelezyo aKkansili yabbooma.

CHAANDAANO 15

BAZULUZI BABULONGO

280. Buzuluzi bwabulongo.
281. Ndemeko zyeedele kulangisisigwa abazuluzi babulongo.
282. Milimu yabazuluzi babulongo.
283. Kunjizigwa akugwisigwa kwabazuluzi babulongo muzyuuno.
284. Mifolo alumwi lugwasyo lupegwa bazuluzi babulongo.
285. Kkansili Yabaami Yanyika Yoonse aNkamu Yabaami Yamuchilikiti.
286. Milimu yaKkansili Yabaami Yanyika Yoonse aNkamu Yabaami Yamuchilikiti.
287. Kkomiti yazyabuntususu akulijata kwaBaami.

CHAANDAANO 16

NYIKA YAKULIMA

Chebeela

288. Bupanduluzi bwaChaandaano 16.
289. Ndemeko zitobelezegwa mumabeleseyo aanyika yakulima.
290. Kwiinkilila nembo kwazyeelo zyafulumedne kunyika yakulima.
291. Kwiinkilila nembo kwazyeelo zyabantu bakkede aanyika yakulima.
292. Kukwabililwa kwanzila njibakegwaa aayo bantu bakkede aanyika yakulima.
293. Kupambula kwafulumedne nyika yakulima.
294. Kupambulwa kwanyika yakulima abeni nyika naakuti bakkede mpawo.
295. Kubbadalwa kwabantu bakanyangwa nyika yakulima afulumende muchiindi chakiinda.
296. Kupangwa antoomwe abwiime bwa Kkomishini yaNyika yakulima muZimbabwe.
297. Milimu yaKkomishini yaNyika yakulima muZimbabwe.

CHAANDAANO 17

ZYAMALI

CHIBAKA 1

MABELESESYO AA MALI

298. Ndemeko zilaatala amabeleseyo aamali yabulumbu.
299. Kubayila kwaPalyamenti kumabelesesyo akujanwa kwamali afulumende.
300. Aagolela mweelo waFulumende wakucheneka mali kubwezwa kwachikwelete chabulumbu akusyomezya nyika.
301. Kupegwa mali kwabafulumende bazilikiti abamabbooma.

CHIBAKA 2

NKOMO MPATI YA FULUMENDE

302. Nkomo Mpati Yafulumende.
303. Kugwisigwa kwamali kuzwa muNkomo Mpati yafulumende.
304. Kuliya kulangene aaNkomo Mpati yaFulumende.

CHIBAKA 3

KUZUMIZIGWA KWAMABELESESYO AAMALI IIIZWA MU NKOMO MPATI YA FULUMENDE

305. Kwaabanisa mali iiizwa muNkomo Mpati yaFulumende.
306. Kuzumizigwa kubelesya mali kiitana kwaabanisigwa.
307. Kubelesegwa kwamali kutapedwe mvumo.

CHIBAKA 4

KUKWABILILWA KWA MALI ANTOOMWE AMBONO ZYA BULUMB

308. Milimu yabantu bakwabilila mali ambono zyabulumbu.

CHIBAKA 5

MUPATI UULANGA MABELESESYO AA MBONO A M ALI ZYA LUUNDU

309. Mupati uulanga mabeleseyo aambono amali zyaluundu antoomwe amilimu yakwe.
310. Kunjizigwa mulimu kwaMupati uulanga mabeleseyo aambono amali zyaluundu.
311. Kulyiimikilila akulisanta kwaMupati uulanga mabeleseyo aambono amali zyaluundu.
312. Mufolo waMupati uulanga mabeleseyo aambono amali zyaluundu.
313. Kugwisigwa mulimu kwaMupati uulanga mabeleseyo aambono amali zyaluundu.
314. Babelesi mbabeleka aabo Mupati uulanga mabeleseyo aambono amali zyaluundu.

CHIBAKA 6

ZYABIYOBIYO

Chibela

315. Mawulilo aazintu antoomwe azimwi zizuminano zyafulumende.
316. Kwendelezegwa kwatubunga twakabumbwa kwiinda mumulawu.
317. Bbenki pati lyaNyika yaZimbabwe.

CHAANDAANO 18

ZYABIYOBIYO AZIMWI NJILIKIZYO

CHIBAKA 1

ZYABIYOBIYO ZILANGENE AMAKKOMISHINI

318. Mabeleseyo aaChibaka 1.
319. MaKkomishini tube tubunga tulyiimvwilidi atulikke.
320. Bajanika mumakkomishini amabelekelo aabo.
321. Milimu ameendelezezyo aaKkomishini.
322. Kupegwa mali kwaKkomishini.
323. MaKkomishini ayelede kupa lipoti kuPalyamenti lumwi amunyaka.

CHIBAKA 2

ZYABIYOBIYO

324. Kubelekwa zizikitide kwamilimu yaambidwe muKkata lyaMulawu.
325. Kupegwa kwamali kwatubunga twakalengwa akwiinda muKkata lyaMulawu antoomwe atumwi Tubunga.
326. Mulawu wachintu wamanyika aandeene.
327. Zizuminano zyamanyika aandeene.
328. Kubambilulwa kwaKkata lyaMulawu.
329. Kutaanguna kubelesegwa kwaKkata lyaMulawu azitobelwa mukuzubuka

CHIBAKA 3

BUPANDULUZI

330. Mbeleseyo yaChibaka 3.
331. Ndemeko zyabiyobiyo zyabupanduluzi bwaKkata lyaMulawu.
332. Mpandululo.
333. Aawo mpukwadomwa zyaandaano, zibeela, azimwi.
334. Mabala aali mubuche awamba bwiingi kabiyo aali mubwiingi awamba mubuche.
335. Malembe aazili mukati antoomwe amitwe yamakani.
336. Kudomwa kwachiindi.
337. Kudomwa kwababelesi bamumawofesi.
338. Kudomwa kwaPalyamenti.
339. Kuyanduula akujana busongo.
340. Kugalwa kwabantu kuti banjile muzyuuno zyamilimu.
341. Kusiya mulimu.
342. Kuchita milimu, azimwi.
343. Aawo mutnu mpategwa tachibelekeli luundu.
344. Bwiingi bweenzya muswaangano azimanga zijanika mutubungabunga twakalengwa aKkata lyaMulawu.
345. Kuteendelana kwazyaambwa aamabala muKkata lyaMulawu.

MPAMPIKWA NTAANZI: Ndembela yaChisi, Lwiimbo lwaChisi, Pande lyaChisi antoomwe aChidindo chaChisi.

MPAMPIKWAYABILI: Kutyolwa kwazyelelelo muchiindi champyopyongano. MPAMPIKWA YATATU: Zikonke aNzumino.

MPAMPIKWA YANE: Nzibeelede Kubaazyo kuti Bantu Balembesye Kuvoota.

MPAMPIKWA YAMUSANU: Zitobelezegwa mukuchita maBills azimwi zyaambo muPalyamenti.

MPAMPIKWA YAMUSANU AKAMWI: Katalika kubeleka kwaKkata lyamulawu eeli aKutambikizyania Nguzu kwaF ulumende.

NTALISYO

Swebo tubantu bamuZimbabwe,

Katukamantanisigwa, mukusiyana kwesu , achiyandisyo chakwaangunuka, bululami akweelana kabiyo akukaka nkutwakaka budyamizi, nsaluulakkanda antoomwe azyonse nzila zyabudyamizi,

Katulumbayizya akukankayizya basichaamba babaalumi abanakazi bakapedekezya buumi bwabo muchiindi chankondo zyakulilela zyonse,

Katulemeka bensiku bakabelekela nyika yesu changuzu kuti isumpuke kusika mpiibede sunu,

Katubona bubotu bwakusimatizya bulelo bwajandabanji, bulelo bubalangala kabuzikitide kabiyo bulemeka mulawu,

Katulipeda kabiyo kukusumpula akukwabilila zyeelelo angwangunuko zyabantu zyaampandamunsaka,

Katuliyeezya buvule bwabuvubi bwazilengwaleza zyesu, Katusekelela kupona kwatunsiyansiya twesu azimwi zyabasikale

Katulipeda kuzunda boonse buyumuyumu azimwi zijalila lusumpuko lwesu, Katukomezya kwaangunuka, kweelana, luumuno, bululami, kulekelelana,

kusumpuka akuyandisya nyika yesu katuyanduula kusumpuka kwanyika yesu mulukamantano,

Katuliyeezya bupati kampatila bwaSikabumba Leza, mumaanza aakwe lyajuunza lyesu mulibede,

Katulipeda kwiinda muli zeezyo zyaambidwe muKkata lyamulawu eeli kuti tuyake nyika yesu ikamantene, yabululami iyakidwe aajulu kwandemeko zyabulelo bwajandabanji,

Kabiyo, katuyanduula lugwasyo luzwa kuli Sikabumba Leza, tulaano twabumba Kkata lyamulawu eeli katulipeda lwesu kuli ndilyo Kkata lyamulawu wanyika yesu iiyandwa.

CHAANDAANO 1

BWAALO BWAMILAWU

1 IRipabbuliki

Nyika yaZimbabwe nimbulumbumbe yachisi, chilaabweendelezi bwajandabanji kabiyo yakalilela.

2 Bupati-kampatila bwaKkata lyaMulawu

(1) Kkata lyaMulawu eeli ngumulawu mupati-kampatila nkaako toonse tulawu- lawu, inchito zyabantu antoomwe aziyanza ziteendelani azeezyo zilembedwe muKkata lyaMulawu eeli, zilaanze kwamulawu nkabela tazikwe manguzu.

(2) Zyaambidwe muKkata lyaMulawu eeli zyeelede kuchitwa tweede twazichita toonse tubantu atubunga kujatikizya fulumende antoomwe azibela zyakwe zisiyenesiyene zibikkikizya basilutwe, bapanga milawu a Babetesu atumwi tutabitabi twafulumende kuzibela zyoonse zyanyika kweelede zyazuzikizya mulawu ooyu mbuuli mbuwamba.

3 Bwaalo Bwandemeko

(1) Nyika yaZimbabwe yakabumbwa kwiinda mukulemeka ndemeko zitobela —

- (a) bupati-kampatila bwaKkata lyaMulawu eeli;
- (b) kulemekwa akutobelezegwa kwamilawu yaNyika;
- (c) zyeelelo zyabantu zyaampandamunsaka antoomwe angwangunuko zyabo;
- (d) kusiyana kwatunsiyansiya twabantu baNyika yaZimbabwe antoomwe abuvule bwanzila nzyakombwa aazyo Leza amakkalilo abantu;
- (e) kulemekwa bulemu abuntususu bwawumwi awumwi muntu;
- (f) kulemekwa kweelana kwabantu boonse;
- (g) kweelanisya myeenya yabaalumi abanakazi mubukkale bwabuumi.
- (h) njendelezyo yanyika atubunga mbotu, kabiyo
- (i) akulemekwa kwankondo yakulilela.

(2) Ndemeko zyachisi anjendelezyo yamasena izikitide, ikamantanisya tubunga ambunga zyafulumende kumasena woonse antoomwe azibela zisiyene-siyene kubikkikizya

(a) lulelo lwanyika lwajandabanji lusungwaazya kubumbwa kwatubunga twiingi twakweendelezya nyika.

(b) mabambe ansaluuzyo zyabazulwidi ayeeme a —

- (i) antoomwe akweelana kwa nsaluulo/kwamavooti aabantu boonse;
- (ii) kweendelezya zyamavooti muchiindi cheelede munzila iwangunukide kabiyo kiibalangala; a
- (iii) kwiimikililwa kuzwide kwabantu bavoota.

(c) kutambikizyana zyuuno zyabuzulwidi kuzwa nizyachitwa nsaluuzyo zyanjizya bazulwidi muzyuuno;

(d) kulemekwa zyeelelo zyatubunga toonse twanjendelezyo yanyika;

(e) kulemekwa kusiyana kwamanguzu aapedwe zibeela zyafulumende zisiyene-siyene;

(f) kulemekwa bulumbu bwaZimbabwe oobo bupa nguzu zyakweendelezya nyika eeyi;

(g) kubeleka milimu munzila ilaantanganana, yabululami, ibalangala antoomwe akuswiilizya makanze aabantu mbibazulwida mumibeleko isiyene-siyene.

(h) kusungwaazya kukamantana kwanyika, luumuno akuzikitila kwanyika kwiinda mukusumpula milaka isiyenesiyene, tunsiyansiya antoomwe abukkale busiyenesiyene bujanika munyika;

- (i) kulemekwa kwazyelelo zya —
 - (i) tubunga tuisyenesiyene twabantu bamisyobo-misyobo, tunsiyansiya tuisyenesiyene, milaka isiyenesiyene antoomwe anzila zyakukomba Leza zisiyenesiyene;
 - (ii) bantu balemene munzila zisiyenesiyene;
 - (iii) banakazi, bantu bakachembaala, bakubusi abana;
 - (iv) bakalwana nkondo yakulilela;
- (j) kwaabana bweelene kwazilengwa-leza zyamuchisi kubikkikizya nyika yakulima;
- (k) kulemeka zyelelo zipati; kabiyo
- (l) kupa nguzu kumitabi yafulumende ili muzilikiti amumabbooma.

4 Ndembela Yachisi, Lwiimbo Lwachisi, Chidindo Chachisi antoomwe aPande Lyachisi

Chisi chaZimbabwe chijisi Ndembela, Lwiimbo lwaChisi, Pande lyaChisi antoomwe aChidindo chaChisi zyoonse eezi zili pandulwidwe muMpampikwa Ntaanzi.

5 Zibeela zyafulumende kuzwa kujulu kuloosika aansi

Zibeela zisiyenesiyene zyafulumende waZimbabwe kuzwa kujulu kuloosika aansi zyiimvwi boobu —

- (a) fulumende waChisi choonse mbuchizulwa;
- (b) fulumende wachilikiti amaKkansili amadolopo mapati;
- (c) fulumende wamaKkansili maniini awaMabbooma —
 - (i) fulumende weendelezya dolopo (kkansili yamudolopo) kabona zyabukkale bwabantu mudolopo eelyo; kabiyo
 - (ii) fulumende weendelezya bbooma kabona bukkale bwabantu bamumyuunzi.

6 Milaka

(1) Milaka iitobela; Chewa, Chibarwe, English, Kalanga, Koisan, Nambya, Ndau, Ndebele, Shangani, Shona, Sign Language, Sotho, Tonga, Tswana, Venda aXhosa, njiimilaka izibikene zili mumulawu waZimbabwe.

(2) Mulawu wakapangwa aPalyamenti ukonzya kusianisa milaka eeyi munzila zyobile; imwi ibe milaka itanoobelesegwe mumalembe ali mumulawu kakuli imwi milaka kiili milaka biyo izibikene kilemekwa zili mumulawu.

(3) Fulumende antoomwe amitabi yakwe yoonse atubunga twakwe toonse kuzibeela zyazilikiti akumabbooma woонse weelete —

- (a) kubona kuti yoonse milaka iizibikene zili mumulawu ibelesegwa akujatwa bweelene;
- (b) kubona kuti bantu bamibusena bumwi abumwi babelesya mulaka ngubayanda mukwaambuzyania antoomwe amilumbe iiza kuli mbabo.

(4) Fulumende weelete kusungwaazya akusumpula kubelesegwa kwamilaka yoonse ibelesegwa munyika yaZimbabwe, kubikkikizya Mulaka Ubelesya Zizo, mpawo weelete kubona kuti milaka yoonse ilookusumpulwa.

7 Kusungwaazya luundu kuti luzibe zili muKkata lyaMulawu

Fulumende weelede kusungwaazya luundu kuti luzibe zili muKkata lyaMulawu, kapati kwiinda—

(a) mukutolekela Kkata lyaMulawu eeli mumilaka isiyenesiyene yoonse izibikene zili mumulawu kabiyo malembe aayo amwaywa mabantu kuti bajane luzibo aatala amulawu ooyu momasena woonse;

(b) kubona kuti zili muKkata lyaMulawu eeli zilokuyiisiga muzikolo, kabiyo kazilo kubikkwa muzyiyo zyabasilumamba, bakapokola tuswiilizya bavwiya antoomwe ababelesi baluundu bajanika muzibeela zyoonse zyafulumende; kabiyo;

[Fuka lyabambululwa aMulawu 2 wa2021]

(c) kusungwaazya bantu boonse, tubunga toonse kuti tumwaye milumbe munyika yoonse aatala azili muKkata lyaMulawu eeli.

CHAANDAANO 2

MPALAMO ZYA CHISI

8 Mpalamo zizulwida fulumende antoomwe atoonse tubunga-bunga amitabi yafulumende

(1) Mpalamo ziyalidwe muChaandaano eechi zizulwida fulumende, tubunga twafulumende antoomwe atutabitabi twakwe toonse tujanika muzibeela zyanyika zyoonse, mukubumba akwendelezya milawu igwasizya, kusumpula akusungwaazya kuyakwa kwachisi chiimvwi mubululami, chaangunukide kabiyo kachilaalulelo lwajandabanji, bantu mubaangunukide kababotelwa akupona buumi buzwide bujisi nzibayanda.

(2) Mukuyanda kumwisisisy Mikuli yafulumende yakugwasizya luundu yaambilidwe muKkata lyaMulawu eeli ayimwi milawu, kweelede twalangisisya mpalamo ziyalidwe muChaandaano eechi.

9 Buzuluzi buzikitide

(1) Fulumende weelede kubumba antoomwe akwendelezya milawu isungwaazya bunkutwe, bubalangale mumabelekelo amilimu yaluundu, kusumpula bwime abuntususu bwamuntu antoomwe akusungwaazya kusyomeka kumabeleseyo aamali mumitabi yafulumende, mutubunga twafulumende tujanika muzibeela zyoonse zyanyika kapa—

(a) bantu banjizigwa mumilimu yafulumende kweelede kabajisi luzibo aatala amilimu njibapegwapee chinjizyenjizye.

(b) ntaamo kweelede zyatolwa kuti kukwabililwe, kubbongononwe kabiyo kugwisigwe yoonse misyobo yabuboli antoomwe akubelesya bubi nguzu kwabazuluzi bajisi zyuuno zyakwendelezya nyika abaabo babelekela fulumende.

(2) Fulumende weelede kubona kuti tubunga twakwe, mitabi yakwe atutabitabi twakwe muzibeela zyoonse zyanyika, kapati maKKomishini atumwi tubunga twakaanzwa kwiinda muKkata lyaMulawu eeli, tweelede twapegwapee zibesyo nkukuti tukonzye kubeleka milimu yato munzila iiluleme, ibalangala kilaabusichaamba.

10 Lukamantano Iwachisi, Luumuno akunzinzama

Fulumende antoomwe amuntu woonse, kubikkikizya tubunga twanzidwe kwiinda mumulawu, yoonse mitabi yafulumende muzibela zyoonse zyanyika, zyelede kusungwaazy a lukamantano, luumuno akulyiiba kwachisi.

11 Kusumpula zyelelo zyaampandamunsaka antoomwe angwanguku

Fulumende weelede kutola ntaamo zyoonse zyakukwabilila zyelelo zyaampandamunsaka antoomwe angwanguku zyabantu mbuuli mbuziyalidwe muChaandaano 4, kabiyo asungwaazy kuzuzikizigwa kwazyelelo eezi mbuuli mbukweelede.

12 Bulidilano bwazisi

(1) Bulidilano bwanyika yaZimbabwe azimwi nyika kweelede kabuzulwidwa andemeko zitobela —

- (a) kusumpula akukwabililwa kwazintu antoomwe amizeeo igwasya nyika yaZimbabwe;
- (b) kulemekwa kwamilawu iswaanizya akujatikizya manyika aandeene;
- (c) kukkala muluumuno azimwi zisi;
- (d) kuzyotololana akumana luzyokola akati kamanyika/kazisi munzila yaluumuno.

(2) Fulumende weelede kusungwaazy kusumpulwa kwabuntususu atunsiyansiya antoomwe akumvwanana kwanyika zyamuAfrica. Uleelede kabiyo kubekela aamwi azimwi nyika antoomwe atumwi tubunga-bunga twamuchilawu twiimvwilidi zyaluumuno abukkale bubotu muchilawu, muchisi chaAfrica choonse mbuchizulwa akubona zyakusumpuka kwabantu mbubazulwa.

13 Lusumpuko lwachisi

(1) Fulumende antoomwe amitabi yakwe atubunga twakwe muzibela zyoonse zyachisi weelede wasungwaazy lusumpuko lweelene koonse, kapati weelede kubweza ntaamo kuchita zitobela —

- (a) kusungwaazy bantu kuti balipangile mizeeo yalusumpuko lwabo beni antoomwe akubelesya zibelesyo azilengwa-leza zili muluwa lwabo;
- (b) kusungwaazy kusumpuka kwazyalulimi, zyamakwebo, zyamandastili, zyabusyaabusongo(tekinoloji), azyasayensi;
- (c) kusungwaazy kuzwidilila kwamandastili amakwebo kakuli ninzila yakbusilizya bana bachisi chaZimbabwe; kabiyo
- (d) kweeta lusumpuko lweelene mumasena aandeene muchisi, kapati kusumpulwa kwamumyuunzi amumadolopo munzila yeelene.

(2) Ntaamo amabambe alusumpuko zyaambidwe muchibela echi kubota zyeendelezegwa antoomwe abantu bamuluwa nkukuti bagwasizye mukweeta lusumpuko lwabo beni.

(3) Ntaamo zyakweeta lusumpuko zyaambidwe muchibela echi kweelede kazisumpula cheelelo chabantu, kapati bamakayintu, kuti bapegwe myeenya yeelene abaalumi muli zyalusumpuko.

(4) Fulumende weelede wabona kuti bantu bamuluundu balookujana mpindu kuzwa muzilengwa-Leza zijanika mibusena bwabo.

14 Kusumpulwa kwabantu antoomwe akupangwa kwamilim

(1) Fulumende, mitabi yakwe atutabitabi twakwe toonse muzibeela zyanyika zyoonse weelede watola ntaamo zyakusumpula bantu, kwiinda munzila zikonzeka mubusena oobo, munzila ibalangala, ilaantanganana, yabululami kabiyo igwasizya akuchebuka baabo bakadyaamikizidwe mumazuba aayinda munyika yaZimbabwe.

(2) Choonse chiindi, Fulumende, mitabi yakwe atutabitabi twakwe toonse muzibeela zyanyika zyoonse weelede wabona kuti zyoonse zikonzya kuchitwa zyachitwa kuti bana Zimbabwe bajane milimu yakubeleka, kapati bamakayintu abakubusi.

15 Kubawo kwachakulya

Fulumende weelede —

- (a) kusungwaazya bantu kuti balime akubamba chakulya chiingi;
- (b) kupanga zimumbwa zyanyika zyakubambilila chakulya chiingi chikonzya kusanina luundu lwanyika; kabiyo
- (c) kusungwaazya akusumpula malimino aachakulya chilaamunse kwiinda mukuyiisa bantu azimwi nzila zyeede.

16 Tunsiyansiya

(1) Fulumende, mitabi yakwe atutabitabi twakwe toonse muzibeela zyanyika zyoonse weelede wasumpula akulondola/kubamba tunsiyansiya tuyaka buntususu, bukkale bubotu bwabantu akusumpula kweelene kwabantu boonse muchisi.

(2) Fulumende, mitabi yakwe atutabitabi twakwe toonse muzibeela zyachisi zyoonse antoomwe abana Zimbabwe boonse kweelede basoleeka kubamba akukwabilila nzyakatupa Leza.

(3) Fulumende, mitabi yakwe atutabitabi twakwe toonse muzibeela zyanyika zyoonse weelede twatola ntaamo zyakubona kuti buzuluzi bwabulongo muluundu bwalemekwa.

17 Kupana myeenya yeelene yabaalumi abanakazi

(1) Fulumende weelede kusumpula kweelana kwabaalumi abanakazi mumyeenya yazyabukkale munyika yaZimbabwe kapati —

- (a) fulumende weelede wasumpula bamakayintu kuti banjile akubeleka muzibeela zyanyika zyoonse bweelene abaalumi;
- (b) fulumende weelede kutola ntaamo zyoonse, kubbikkikizya kupanga milawu, yeelede kubona kuti —
 - (i) banakazi abaalumi balajanika muli fulumende, mumitabi yakwe atutabitabi twakwe toonse muzibeela zyanyika zyoonse; kabiyo
 - (ii) banakazi mbiingi kusika muchisela chabantu bajanika mutubunga twamaKkomishini antoomwe atumwi tubunga twafulumende twaanzipidwe kwiinda muKkata lyaMulawu eeli naakuti Mulawu wapangwa aPalyamenti
- (c) Fulumende, mitabi yakwe atutabitabi twakwe toonse muzibeela zyanyika zyoonse weelede watola ntaamo mbotu zyakuzyotolola musiyano wakujana myeenya kwabaalumi abanakazi zyakali kupangwa aatunsiyansiya antoomwe amilawu yansiku yabudyaamizi.

(2) Fulumende weelede watola ntaamo mbotu zyakuzyotolola musiyano wakujana myeenya kwabaalumi abanakazi zyakali kupangwa aatunsiyansiya antoomwe amilawu yansiku yabudyaamizi.

18 Kwiimikililwa kweelene kwazilawu munyika

(1) Fulumende weelede kusungwaazya kwimikililwa kweelene kwazilawu zyachisi zyaZimbabwe zyoonse mutubunga twakwe toonse atutabitabi twakwe toonse tujanika muzibeela zyachisi zyoonse kuzwa kujulu kuyoosika aansi.

(2) Fulumende, mitabi yakwe atutabitabi twakwe toonse muzibeela zyanyika zyoonse weelede zyatola ntaamo zyakubona kuti boonse bantu bakkala muluwa bajana zibelesyo zyakweendelezya lusumpuko muluundu lwabo.

19 Bana

(1) Fulumende weelede kupanga milawu atulawu-lawu kubona kuti kunkani zyabana, eezyo ziyandikana kuti bana bapone buumi buntuloko zyalemekwa akuchitwa.

(2) Fulumende weelede kupanga milawu atulawu-lawu, ikonzya kuzuzikizigwa kakulangwalangwa zibelesyo ziliwo, kuti bana—

- (a) bakomena kababambwa kabetu abazyali mumpuli naakuti kubambwa kabetu nibagwisigwa mumpuli zyabo;
 - (b) bajana chiyusilo achakulya chilomene azigwasizya bukkale bwamwana mbuuli zyalwiiyo, kusilikwa azimwi zilangene azyabukkale;
 - (c) bakwabililwa kuzwa kukupenzegwa, kujatwa bubi naakuti kuli bumwi bubi bukonzya kupambanisa bukkale bwamwana); kabiyo
 - (d) bakonzya kujana lwiyo antoomwe akwiiya mulimu wamaboko /ikkoosi.
- (3) Fulumende weelede kupanga milawu akutola zimwi ntaamo —
- (a) kukwabilila bana kuzwa kukubelesegwa mbuuli bazike mumilimu; kabiyo
 - (b) kubona kuti bana tabazumizigwi pe kubeleka naakuti kuchita milimu —
 - (i) iteedelani pe aminyaka yabana; naakuti
 - (ii) ibikka bana mubuyumuyumu, kabatachijani zintu zili mbuuli lwiyo, kukkalinkana muboongo amumuuya, antoomwe akukomena kwabo kwamubili.

20 Bakubusi

(1) Fulumende, mitabi yakwe atutabitabi twakwe toonse muzibeela zyanyika zyoonse weelede watola ntaamo, kubikkizya mabambe akusumpula bakadyaamikizidwe nsiku, zyeede kubona kuti bakubusi, bana balaaminyaka ilaakati kakkumi (10) kuyoosika kuminyaka iili makumi otatwe alaamusatu yaminyaka (35)—

- (a) bajana lwiyo antoomwe amweenya wakuyisigwa mulimu;
- (b) bajana myeenya yakuswaanana, kwiimkililwa antoomwe akubamo muzibeela zyabuumi zyoonse mbuuli zyakweendelezegwa kwanyika, zyabukkale azyabuvubi;
- (c) bapegwa myeenya yakubeleka milimu ayimwi myeenya iinga ilabasumpula muli zyabuvubi;
- (d) bajana myeenya yakulisangalizya akujana myeenya yakusika kumasena aakulisangalizya; kabiyo
- (e) bakwabililwa kuzwa kutunsiyansiya tukonzya kubanyonyoona, kubelesegwa buzike, azimwi nchito zikonzya kubanyongania buumi bwabo.

(2) Mulawu wapangwa aPalyamenti ukonzya kudoma akwaamba mabambe aanyika anga alagwasizya kusumpula bakubusi.

(3) Ntaamo amabambe zyaambwa muchibeelela (1) a (2) zyeede kugwasizya bakubusi boonse kakutalangwi tubunga bakubusi nkubajanika twakweendelezegwa kwanyika.

21 Bantu bakachembaala

(1) Fulumende, mitabi yakwe atutabitabi twakwe toonse muzibeela zyanyika zyoonse weelede watola ntaamo, kubikkikizya kupanga milawu, zyakubona kuti bantu bakachembaala balemekwa, bakwabililwa antoomwe akugwasigwa kuti bajatane abamwi mubuumi bwaluundu mubakkala.

(2) Fulumende, mitabi yakwe atutabitabi twakwe toonse muzibeela zyanyika zyoonse kweelede, kakulangwalangwa zibelesyo ziliwo—

- (a) kusungwaazya bakachembaala kuti bajatane abamwi mubuumi bwaluundu mubajanika;
- (b) kubajania zinga zilabagwasya mbuuli chakulya akubambwa kaboutu kwabantu bakachembaala;
- (c) kuchita mabambe agwasizya machembele abapa mweenya wakulyoolola kwinda mukugwasizya mpubakonzya kumanguzu amuluzibo ndubalaalo antoomwe anzibayanda kuchita lwabo; kabiyo
- (d) kusungwaazya tubungabunga tugwasizya kusumpula buumi abukkale bwabantu bakachembaala.

22 Bantu balemene

(1) Fulumende, mitabi yakwe atutabitabi twakwe toonse muzibeela zyanyika zyoonse kweelede walemeka zyelelo zyabantu balemene mubili naakuti muboongo, kapati cheelelo chabo chakujatwaaabulemu alulemeko.

(2) Fulumende, mitabi yakwe atutabitabi twakwe toonse muzibeela zyanyika zyoonse weelede, kakulangwalangwa zibelesyo ziliwo, wagwasizya bantu balemene mubili naakuti muboongo kuti bajane lugwaso lubapa myeenya yakubelesya zipo nzibalaazyo akuchesya budyaamizi mbubaswaanana aabo mubuumi bwabo.

(3) Kapati, fulumende, mitabi yakwe atutabitabi twakwe toonse muzibeela zyanyika zyoonse kweelede—

- (a) wapanga mabambe agwasizya bantu balemene mubili aboongo, kapati mabambe akuti balibeke kakweendelana abulema mbabajisi antoomwe anzibalimvwa kabayanda kuchita lwabo beni;
- (b) kulangisisya zintu ziyandwa abantu balemene munzila zyaandeene kuti zibe nzizyo zigwasizya mukuchita mabambe agwasya balemene;
- (c) kusungwaazya misyobo yakwaambuuzyania iisiyene-siyene njibakonzya kubelesya kakweendelana abulema mbabajisi).
- (d) kusungwaazya tubungabunga tugwasizya kusumpula buumi abukkale bwabantu balemene.

(4) Fulumende weelede kutola ntaamo kubona kuti mayake azimwi zyakulisangalizya kwaluundu zyayakwa munzila njibakonzya kubelesya balemene abalabo kabataswaanani abuyumuyumu pe.

23 Bakalwana nkondo yakulilela

(1) Fulumende, mitabi yakwe atutabitabi twakwe toonse muzibela zyanyika zyoonse weelede kupa lulemeko kubantu bakalwana nkondo yakulilela, kakwaambwa kuti—

- (a) aabo bakalwana munkondo yakulilela;
- (b) aabo bakagwasizya basikulwana nkondo yakulilela; kabiyo
- (c) aabo bakaangidwe mumajele kabaangilwa zyanyika muchiindi kakulwanwa nkondo yakulilela.

(2) Fulumende weelede kutola ntaamo, kubikkikizya kupanga milawu, igwasizya bukkale akusumpulwa kwabantu bakalwana nkondo yakulilela muli zyabuvubi.

24 Zyabubelesi akubelekelana

(1) Fulumende, mitabi yakwe atutabitabi twakwe toonse muzibeela zyanyika zyoonse weelede wapanga milawu azimwi ntaamo, kakulangisigwa zibelesyo ziliwo, kuyanda kugwasizya woonse muntu kuti abeleke mibusena bwaangunukide kabelekela mpuli yakwe munzila yabulemu.

(2) Fulumende, mitabi yakwe atutabitabi twakwe toonse muzibeela zyanyika zyoonse weelede wabona kuti—

- (a) kuli milimu yakubeleka;
- (b) wagwisya zintu zikonzya kukataazya babelesi kuti batabelevi kabetu mumilimu yabo;
- (c) wagwasizya bantu kwiinda muyyiyo zyamaboko kubikkikizya bantu balemene;
- (d) kweendelezya ntaamo zyakugwasizya mpuli kuchitila kuti bamakayintu bakonzye kujana chiindi chakubeleka kabetu kabaangunikide.

25 Kukwabililwa kwampuli

Fulumende, mitabi yakwe atutabitabi twakwe toonse muzibeela zyanyika zyoonse weelede wakwabilila akusungwaazya chiyanza champuli, kapati weelede kubona, kakulangisisigwa zibelesyo ziliwo, kuti kwatolwa ntaamo zyaku—

- (a) bikka mabambe akugwasizya bamamama, mataata abamwi bajanika mumpuli bakonzya kubamba bana;
- (b) kukasya kopenzyania kwabakwetene kwiinda mukulwana, kutukilana akwiimana zibelesyo azimwi nzibeelede kugwasyania mulukwatano.

26 Lukwatano

Fulumende weelede kutola ntaamo kubona kuti—

- (a) taakwe lukwatano luchitwa basikukwatana kabatayandi kukwatana pe lwabo;
- (b) bana tababelesegwi pe mukukwatizya naakuti kubbada zikwelete akubbada ngozi;
- (c) kuli kweelana kwazyeelo mulukwatano aakati kabasikukwatana muchiindi nibakwetene amuchiindi nibalekana;
- (d) kuti bakwetene balekana, kwiinda mukufwa kwawumwi naakuti balekana luzutu, mabambe kweelede achitwa akukwabilila bana naakuti aabo bakakwetene.

27 Lwiiyo

(1) Fulumende weelede kutola zyoonse ntaamo zikonzeka zyakusumpula—

- (a) bana kuti baangilwe kujana lwiiyo kabababbadi pe, lwiiyo lwakumatanganino; kabiyi
- (b) lwiiyo lwajulu antoomwe azyamaboko

(2) Fulumende weelede kutola ntaamo kubona kuti bana bachisimbi bapegwa myeenya ikozyania abalombe mukujana lwiiyo muzibeela zyoonse zyalwiiyo.

28 Chiyusilo

Fulumende, mitabi yakwe atutabitabi twakwe toonse muzibeela zyanyika zyoonse weelete kutola ntaamo zyakupanga milawu azimwi nzila, kakulangwalangwa zibelesyo ziliwo, kubona kuti woонse muntu wajana chiyusilo chilomene.

29 Zyabulondosi

(1) Fulumende weelete kutola ntaamo zyoonse kubona kuti bantu balookujana kusilikwa muzibbadela amumakkilinka munyika yoonse yaZimbabwe.

(2) Fulumende weelete kutola ntaamo kubona kuti taakwe muntu ukakilwa kusilikwa kuti waswaanana abuyumuyumu buyanda kusilikwa chakufwambaana nikuba kulichili achili chibbadela naakuti kkilinika.

(3) Fulumedne weelete kutola zyoonse ntaamo, kakulangwalangwa zibelesyo ziliwo, kukuiisya luundu aatala akukwabilwa kwakutabukila kwamalwazi.

30 Zyalugwasyo abukkale bwabantu

Fulumende weelete kutola ntaamo, kakulangwalangwa zibelesyo ziliwo, kubona kuti aabo bayanda lugwasyo nibachembaala naakuti batachibeleti balujana lugwasyo oolo.

31 Lugwasyo Iwakwiimikililwa munkuta asimulawu

Fulumende weelete kutola ntaamo, kakulangwalangwa zibelesyo ziliwo, zyakugwasizya bantu kwiinda mukupa basimulawu banga baliiminina bafwaba munkuta zyamulawu.

32 Zyamisobaano akulisangalizya

Fulumende weelete kutola ntaamo zyoonse zikonzeka kuti asungwaazye zyamaSpoti akulisangalizya kwabantu, kubikkikizya kupangwa kwamasena akuchitila maspoti akulisangalizya kwabantu boonse bayanda.

33 Kubambwa kwaluzibo Iwansiku

Fulumende weelete kutola ntaamo zyakubamba kabotu, kukwabilila akusungwaazya Luzibo IwaNsiku kubikkikizya luzibo lwatala aminsamu yakusilika yansiku antoomwe aminsamu yamulusaka ibelesegwa aabantu basiyenesiyene.

34 Kweetwa kwamilawu yamanyika aandeene mumilawu yanyika yaZimbabwe

Fulumende weelete kubona kuti yoonse milawu ijatikizya manyika aandeene yakasayinwa aMuzulwidi waNyika kayimvwilidi Zimbabwe yabikkikizigwa mumilawu yaZimbabwe.

CHAANDAANO 3

BWENICHII

35 Bwenichisi

(1) Bantu bajana bwenichisi kwiinda munzila eezi: kuzyalilwa munyika yaZimbabwe, kuzyalwa abazyali bajisi bwenichisi bwaZimbabwe (mubuzukululu), kujana bunanyika kwiinda mukulembesya kubupegwa.

(2) Boonse bantu bajisi bwenichisi beeled e kujatwa bweelene akujana lugwasyo loonse lwelede, kabiyo balaamukuli wakuchita yoonse milimu yakusumpula nyika yabo.

(3) Boonse bajisi bwenichisi beeled e kujana zyeelo alugwasyo, ajulu kwazimwi zinga zilaambwa amilawu imwi—

- (a) kujana lukwabililo kuzwa kuli fulumende waZimbabwe fumbwa nkubabe;
- (b) kujana mapepa asiyenesiyene akweenzya kumanyika aandeene (mapasipoti awamwi);
- (c) kujana mapepa akuzyalwa antoomwe awamwi mapepa akuzibikana kwamuntu munyika aajanwa kuli fulumende.

(4) Bajisi bwenichisi balaamukuli wakuchita milimu eeyi, ajulu kwayimwi njibanga balapegwa ayimwi milawu —

- (a) kusyomeka akulipeda kunyika yaZimbabwe;
- (b) kuswiilila Kkata lyamulawu eeli, kuleme ka nzilyaamba antoomwe akuleme ka tubunga twakabumbwa kwiinda mumulawu ooyu;
- (c) kuleme ka ndembela yanyikai antoomwe alwiimbo lwanyika; kabiyo
- (d) kukwabilila kulilela kwanyika yaZimbabwe munzila nzibakonzya zyoonse.

36 Bwenichisi mukuzyalwa

(1) Bantu bajana bwenichisi kwiinda mukuzyalilwa munyika yaZimbabwe, antoomwe akuti chiindi nibakazyalwa —

- (a) umwi wabazyali (baama naakuti ndeende) wakajisi bwenichisi; naakuti;
- (b) umwi wabamanyinakulu amasyanyinakulu wakajisi bwenichisi bwakuzyalilwa munyika yaZimbabwe naakuti bakabujana kwiinda mubuzukululu.

(2) Bantu bakazyalilwa aanze kwanyika yaZimbabwe bajana bwenichisi kwiinda mukuzyalwa kuti kakuli muchiindi chakuzyalwa kwabo umwi wabazyali wakajisi bwenichisi; kabiyo —

- (a) wakkede munyika yaZimbabwe;
- (b) wakali kubekela aanze kwanyika yaZimbabwe kubekela fulumende waZimbabwe naakuti kubekela mbungano ijanika mumanyika aandeene.

(3) Mwana wajanika muZimbabwe, ulaaminyaka ilaansi kwakkumi amusanu utazibikene bwenichisi bwakwe, ngawabwezwu kuba bwenichisi kwiinda mukuzyalwa.

37 Bwenichisi kwiinda mubuzukululu

Kwiinda muli zeezyo zilemedwe muchibeela 36(2), bantu bakazyalilwa aanze kwanyika yaZimbabwe bajana bwenichisi kwiinda mubuzukululu kuti kakuli muchiindi chakuzyalwa kwabo —

- (a) umwi wabazyali babo naakuti bayinakulu asayinakulu wakajisi bwenichisi bwaZimbabwe kwiinda mukuzyalwa naakuti bazyali bakalaabunanyika bwaZimbabwe; naakuti
- (b) umwi wabazyali babo wakajisi bwenichisi bwaZimbabwe kwiinda mukulembesa, kabiyo kuzyalwa ooko kakulembesedwe muZimbabwe mumulawu wakulembesa zyakuzyalwa.

38 Bwenichisi kwiinda mukulembesya

(1) Fumbwa mutu uteensi munaZimbabwe pesi kakwetene amunaZimbabwe kwaminyaka iyinda musanu, kabiyo mutu ooyo kazuzikizya zyoonse ziyandikana amulawu ulelede kupegwa bunanyika bwaZimbabwe, kuti walembela kuli fulumende kakumbila kupegwa bwenichisi bwaZimbabwe.

(2) Fumba mutu uteensi munaZimbabwe pesi ukkede munyika yaZimbabwe zili mumulawu kwaminyaka iyinda kkumi, kabiyo mutu ooyo kazuzikizya zyoonse ziyandikana amulawu ulelede kupegwa bwenichisi, kuti walembela kuli fulumende kakumbila kupegwa bwenichisi.

(3) Mwana uteensi munaZimbabwe, pesi watolwa kuti alelwe amunaZimbabwe ulacheelo chakupegwa bwenichisi bwaZimbabwe kuti walembela kuli fulumende kakumbila kupegwa bwenichisi bwaZimbabwe.

39 Kunyangwa bwenichisi

(1) Bwenichisi kwiinda mukulembesya bukonzya kunyangwa kuti —

- (a) mutu wakabupedwe wakabupegwa kwiinda munzila italuleme; naakuti
- (b) muchiindi chankondo yakalwanwa anyika yaZimbabwe, mutu ooyo wakawuzya nyika yaZimbabwe, munzila zisiyenesiyene, kuli basinkondoma bakali kulwana anyika yaZimbabwe.

(2) Bwenichisi bwakajanwa kwiinda mukuzyalwa bukonzya kunyangwa kuti —

- (a) mutu wakabupegwa kwiinda munzila italuleme; naakuti,
- (b) kumuntu uwambidwe muchibela 36(3), bunanyika bwakwe bwazibikana naakuti bazyali bakwe bazibikana kuti bakajisi bwenichisi bwayimbi nyika.

(3) Bwenichisi tabukonzyi kunyangwa kuti kakuli sikunyangwa taakwe bumbi bwenichisi mbwanga ulasyaala aabo nanyangwa bwenichisi.

40 Kutabunda kwabwenichisi kwiinda mulukwatano naakuti kulekana

Muntu takonzyi kusweekelwa bwenichisi nkaambo kakunjila mulukwatano naakuti kufwa kwalukwatano.

41 Bwenichisi aMbunga ilanga bantu bazwa kumanyika aambi kabayanda kuzookkala muchisi

Mulawu upangwa aPalyamenti uyelede kupandulula zyakubumbwa kwa Mbunga zilanga beni chisi kuli aamwi manyika zyazya bwenichisi ijisi sichuuno antoomwe abamwi bantu babili basalwa aMuzulwidi waNyika, bbodi eeyi kilaamulimu wa :—

- (a) kupa akunyanga bwenichisi bujanwa kwiinda mukulembesya;
- (b) kuzumizya bantu, batajisi bwenichisi, kuti bakkale akubeleka munyika yaZimbabwe antoomwe akubapa malayilile ngibeelede kutobeleyza mumakkalilo aabo beenzu munyika yaZimbabwe; kabiyo
- (c) kuchita imwi milimu njibatanooli bapegwa aMulawu ubumbwa aPalyamenti.

42 Manguzu aPalyamenti aatala azyabwenichisi

Mulawu ubumbwa aPalyamenti ukonzya kupandulula zyiingi, pesi kawuyendelana azili muChaandaano eechi, aatala —

- (a) azyeelede kutobeleyzegwa kuti mutu ajane bwenichisi bwaZimbabwe kwiinda mukulembesya;

- (b) akuboozya bwenichisi bwaZimbabwe amuntu wakabupedwe kwiinda mukulembesya;
- (c) azyeelede kutobelezegwa mukunyanga muntu bwenichisi bwaZimbabwe mbwakali wapegwa kwiinda mukulembesya;
- (d) kupegwa bwenichisi bwaZimbabwe mbwakali wanyangwa muntu;
- (e) akukasigwa kwakuba abwenichisi bwamanyika obile kubantu balaabwenichisi bwakajanwa kwiinda mubuzukululu amukulembesya; kabiyo
- (f) akubona kuti zyaambidwe muChaandaano eechi zilookubeleka.

43 Kweendelela nembo abwenichisi antoomwe akuboozegwa kwabwenichisi bwakali bwanyangwa

- (1) Woonse muntu wakajisi bwenichisi bwaZimbabwe kuzwa buunsi nuwakadindwa mulawu ooyu, ulaya nembo kali munaZimbabwe.
- (2) Woonse muntu wakazyalilwa munyika ya Zimbabwe kuutanadindwa mulawu ooyu wakaba munaZimbabwe kwiinda mukuzyalwa kuti kakuli—
 - (a) umwi wabazyali naakuti bobile bazyali bakajisi bwenichisi bwanyika ili muMbunga ya*Southern African Development Community* yakabumbwa kwiinda muchizuminano chakasayinwa ku Windhoek munyika yaNamibia mubuunsi bwa 17 Itwi, 1992; naakuti
 - (b) wakakkede kali munyika yaZimbabwe kale buunsi nuwakadindwa mulawu ooyu.

CHAANDAANO 4

MOOMPLOLO WAZYEELELO

CHIBAKA 1

MABELESEZYO ABUPANDULUZI BWACHAANDAANO 4

44 Mukuli wakulemeka zyeelelo zyabantu zyaampandamunsaka angwanguku

Fulumende amuntu woonse, kubikkilizya tubunga tuli mumulawu, antoomwe amitabi yafulumende iijanika muzibela zyoonse zyanyika kweelede kulemeka, kukwabilila, kusungwaazya akuzuzikizya zyeelelo angwanguku zyaambidwe muchaandaano eechi.

45 Mwisisisyo yaChaandaano 4

(1) Chaandaano eechi chaanga fulumende, bazuluzi bafulumende, basikubumba milawu zyanyika, babetesи antoomwe azibeela zyafulumende zijanika muzibaka zisiyenesiyene zyanyika, kuti boonse bantu aaba balemeke zyeelelo zyaampandamunsaka.

(2) Chaandaano eechi chisungwaazya antoomwe akubangila muntu woonse mubuntu bwakwe antoomwe atubunga tuli mumulawu kuti kulemekwe akuzuzikizigwa zyeelelo eezi munzila njizyeede kulemekwa kakulangwa kuti nziizili zyeelelo angwanguku umwi awumwi nzyeelede kuzuzikizya amilimu njeelede kuchita mukuzuzikizya zyeelelo eezi.

(3) Tubunga toonse tuli mumulawu antoomwe abantu beeledge kujana zyeelelo angwanguku zyaambidwe muchaandaano eechi munzila njizyeede kuzuzikizigwa akuchitwa kubantu boonse antoomwe atubunga tuli mumulawu.

46 Imbelesezyo abupanduluzi bwaChaandaano 4

- (1) Kuti nikupandululwa Chaandaano eechi, nkuta, imbeta abamwi babetesи beeledе—
 - (a) kweezya kuzuzikizya akulemeka zyeelelo angwangunuko zyaambidwe muChaandaano eechi;
 - (b) kusungwaazya bwaalo bwabukkale bubumba bbambabbwe lyaluundu lweendelezegwa munzila yajandabanji, iilemeka lulelo lubalangala, bululami, bulemu bwamuntu, kweelanisigwa kwabantu akwaangunuka kwabo, kapati bwaalo bwazyandemeko azilemekwa mbuuli mbukupandulwidwe muChibela 3 chaKkata lyaMulawu.
 - (c) kulemeka milawu yakazuminanwa aamanyika woonse alaansi aano kiili milawu eeyo yakatambulwa afulumende waZimbabwe;
 - (d) kulemeka zibeela zyoonse zyaKkata lyaMulawu wanyika (national constitution) kapati bwaalo bwamulawu antoomwe ampalamo zijanika muChaandaano 2 chaKkata lyaMulawu wanyika.
 - (e) kulemeka milawu yaamwi manyika iiyendelana kabiyo kiinjililana amilawu yesu;

eezi zyoonse zichitwa aajulu kwakulangisisya zintu zinji zyeelede kuchitwa mukubelesya akumvwsisisya Kkata lyaMulawu wanyika.

(2) Kuti nikubelesegwa umwi mulawu, anikupangwa milawu yalunji, milawu yabukkale bwabantu, inkuta zyoonse, tubunga tubeteka, abamwi babetesи beeledе kusungwaazya kabiyo balulamikwe aamuuya ampalamo zyaChaandaano eechi.

47 Chaandaano 4 tachikasyi pe kuzuzikizigwa akubawo kwazimwi zyeelelo

Chaandaano eechi tachikasyi kuzuzikizigwa akulemekwa kwazimwi zyeelelo pe angwangunuko zyeelede kuzuzikizigwa akulemekwa kwiinda muliimwi milawu iiliwo, fumbwa milawu eeyo kayiyendelana aziyandwa aKkata lyaMulawu wanyika.

CHIBAKA 2

ZYEELELO ZYABANTU ZYAAMPANDAMUNSAKA ANGWANGUNUKO

48 Cheeelo chakupona

- (1) Muntu woonse ulacheeelo chakupona.
- (2) Mulawu ulaako kuzumizya kupa chisubulo chalufu kumuntu wajanika kalaamulandu wakujeya muntunyina achaali, kabiyo —
 - (a) mulawu weeledе kuzumizya nkuta kuti ipe chisubulo chakujeegwa kwamuntu naakuti pe kakusiyana aabwiime bwamulandu ulookubetekwa;
 - (b) chisubulo chalufu chichitwa luzutu kuti kakuli nkuta yamumulawu yapa chisubo eecho;
 - (c) inkuta tayikonzyi kupa chisubulo chalufu pe kubantu batobela —
 - (i) kumuntu woonse wasunda mulandu kajisi minyaka ilaansi kwamakumi obile awumwi.
 - (ii) kumuntu woonse ujisi minyaka iiyinda makumi musanu amakumi obili;
 - (d) chisubulo chalufu tacheeledo kupegwa kumuntu wachanakazi; kabiyo
 - (e) muntu wapegwa chisubulo chalufu ulacheeelo chakukumbila lulekelelo kuzwa kuMuzulwidi waNyika.

(3) Mulawu wapangwa aPalyamenti weelede kukwabilila bana batana tumbukwa nkaambo abalabo balijisi cheelelo chakupona Mulawu uzoobikkwa upandulula aawo mpukweelede kuti mwanakazi agwisye bula/ida zili mumulawu.

49 Cheelelo changwangunuko yakwe mwini

- (1) Woonse muntu ulacheelelo chakwaangunuka kwakwe. Eezi zibikkilizya —
 - (a) cheelelo chakutabikkwa mubwaange naakuti muchitookesi kutabetekedwe pe ankuta yamulawu.
 - (b) cheelelo chakutanyangwa ngwangunuko yako kakutakwe nchuwasunda.
- (2) Taakwe muntu uunga ulasungwa nkaambo kakutyola chizuminano naakuti cheene pe.

50 Zyelelo zyabaange abali muchitookesi

- (1) Woonse muntu wasungwa —
 - (a) weelede kwaambilwa mulandu ngwaasunda/ngwaawangilwa;
 - (b) weelede kuzumizigwa, achakufwambaana —
 - (i) kuzibisyia banakwe/mulumaakwe, naakuti nzubo zyakwe, simulawo/ Loya unga ulamwiiminina naakuti nguni ngwaayanda kuzibisyia aatala akusungwa kwakwe. Kufonena bantu aaba kweelede kwabbadalilwa afulumende/kakubelesegwa mfoni yafulumende.
 - (ii) kalibbadalila lwakwe, ulacheelelo chakubonana aSimulawu/Loya ngwayanda uunga ulamwiiminina munkuta naakuti kubona dokotela ngwayanda;
 - (c) weelede kujatwaaabulemu bweelede;
 - (d) weelede kugwisigwa muchitookesi kakutakwe zimwi nzyeelede kuchita naakuti kakuli zimwi zisyoonto nzyeelede kuchitwa, kachilinda kubetekwa kwamulandu wakwe. Ukonza biyo kubambwa mubwaange/ muchitookesi kuti kwaboneka zimwi ziyoowelwa kuti zilachitika kuti wagwisigwa abetekwe kalaanje; kabiyo
 - (e) weelede kuzumizigwa kutongawuka aatala akwaangwa kwakwe kuti kakuli takaangwa zili mumulawu. Weelede wagwisigwa kuzwa muchitookesi kuti kwaboneka kuti wakaangwa zilaanje kwamulawu.
- (2) Woonse muntu wasungwa/wajalilwa muchitookesi —
 - (a) kuchitila kuti abambilwe kweetwa kunkuta yalubenta; naakuti
 - (b) nkaambo kamulandu ngwaategwa wakasunda;
weelede kutolwa kunkuta yalubeta achakufwambaana mukati kachiindi chitiindi mawola aali makumi aane alaamusau atutatu (48) kuzwa chiindi nchaasungwa aacho naakuti kuzwa aawo naajalilwa muchitookesi. Eezi tazikwe ndaba pe kuti muntu waangwa kumamanino aamviki kiinjila muMugibelo, Nsondo naakuti mubuzuba bwakulyookeza kwabantu.
- (3) Muntu watetwa kunkuta yalubeta mukati kachiindi chamawola aasika makumi aane alaamusau atutatu (48) weelede wagwisigwa muchitookesi adomane kuti kubambwa kwakwe muchitookesi kwazumizigwa aankuta.
- (4) Woonse muntu wasungwa naakuti wajalilwa nkaambo kakuyeyelwa kuti wasunda mulandu ulacheelelo—
 - (a) chakuumuna naasungwa;
 - (b) chakwaambilwa achakufwambaana;
 - (i) cheelelo chakwe chakuumuna; kabiyo

- (ii) zinga zilachitika kuli nguwe kuti wawumuna akuti taawumuna naasungwa;
 - (c) chakutaangilwa kuzumina mulandu; kabiyo
 - (d) natolwa kunkuta kwalutanzi, weeletee kuzibisigwa mulandu ngwaakasanda naakuti kwaambilwa chinga chilapa kuti abweedezezegwe mubwaange naakuti agwisigwe mubwaange.
- (5) Woonse mutu uuli mubwaangemuchitookesi, kakubikkilizigwa ooyo wakapegwa kale chisubulo, ulacheelo —
- (a) chakuzibisigwa cheecho chapa kuti abambwe mubwaange;
 - (b) kabelesya mali yakwe, kubonana mukavwindi asimulawu wakwe uunga ulamwiiminina munkuta yalubeta, kabiyo weeletee kwaambilwa achakufwambaana cheelelo chakwe eechi;
 - (c) kwambuuzyania akuswayigwa abantu batobela aaba —
 - (i) mwanakazi wakwe/mulumi wakwe;
 - (ii) luzubo lwakwe;
 - (iii) mukambawusi ngwaalisalila lwakwe;
 - (iv) simulawu ngwaalisalila lwakwe
 - (v) dokotela ngwaalisalila lwakwe; kabiyo
 - (vi) abamwi bantu mbayanda kuti bamuswaya, pesi kazisiyana aakuti balatambulika na kubapati babona zyakubambwa kwabaange kuchitila kuti kubambwa kwabaange kweendelezegwe kabotu;
 - (d) kubambwa mubusena bukkalika, busalala kabiyo butondeezya bulemu bwamuntu, kupegwa mweenya wakulyoolola akuchita zeezyo zisimya mibili, kupegwa, kazibbadalilwa afulumende, malo aakulala azulide, zimbuzi, busanambi bweelede antoomwe akusilikwa malwazi; kabiyo.
 - (e) kutongawuka, kwiinda munkuta, aatala akubambwa kwakwe mubwaange kuti kawene kuti kubambwa kwakwe mubwaange kulaanje kwamulawu, mpawo akugwisigwa mubwaange chakufwambaana kuti kwategwa agwisigwe.
- (6) Woonse mutu wabambwa mubwaange katabetekedwe pe mane kwiinda chiindi cheelede (48) weeletee kugwisigwa kuzwa mubwaangwe. Kugwisigwa ooku kulakonza kuchitwa kakutakwe zyaambwa pe zyeede kuchenjelelwaa naakuti kakuli zimwi zyaambwa zyeede kutobelezegwa amwaange kuchitila kuti naagwisigwa—
- (a) azoosike kulubeta lwankuta;
 - (b) atazookolonganyi bukamboni bweelede kubelesegwa kunkuta buunsi bwalubeta; kabiyo
 - (c) teeletee kusunda uumbi pe mulandu muchiindi kachilinda kubetekwa mulandu ngwalaawo kale.
- (7) Kuti kwaba aantanganana kuti mwaange ubambidwe muchitookesi zilaanze kwamulawu naakuti takuzibikani kuti mwaange ubambidwe kuchitookesi chili, nikuba nabani mutu ulakonza kwiinka kuNkuta Yaajulu akakumbile pepa lyamvumo—
- (a) yakuti mwaange agwisigwe mubwaange bwakwe naakuti ayetwe kunkuta azoobetekwe kuchitila kuti bwaangwe bwakwe bupandululwe kabotu bubonwe kuti buli mumulawu na, naakuti mwaange adombolwe nkwasidwe nkwatabanteki; naakuti
 - (b) yakwaamba kuti bwaange bwamuntu bulaanje kwamulawu nkaako mwaange ngagwisigwe muchitookesi achakufwambaana;

Kabiyo Inkuta Yaajulu ikonzya kupa mvumo eeyo kazyendelana aakuti bwiime bwakwaangwa kwamwaange bweendede biyeni.

(8) Bwaangwe bwamuntu buteendelani azeezi zyaambwa muchibela eechi bunooli bulaanze kwamulawu.

(9) Woonse muntu wakaangwa zitali mumulawu naakuti wakabikkwa mubwaange zitali mumulawu ulacheelo chakuliigwa/kubbadalwa amuntu ooyo wakamwaangide zitali mumulawu. Pesi mulawu ukonzya kukwabilila bantu batobela kuti bataanzigwi—

(a) silubeta wakazichita katobeleyza mulimu wakwe mbuuli mbukuyandikana;

(b)woonse mubelesi walundu utanooli wazichita katobeleyza ziyandwa aamulimu wakwe katachitide bubeya pe.

51 Cheeelo chakujatwa aabulemu

Muntu wonse uzedyewe kajisi bulemu mubuumi bwakwe boonse kabiyo cheeelo chakulemeka bulemu bwamuntu cheelede kukwabililwa akuzuzikizigwa.

52 Cheeelo chakujana lukwabililo lwakwe muntu

Muntu wonse ulacheelo chakuchita mbabona kazimweelede aatala amubili wakwe antoomwe amayeyelo aakwe. Eezi zibikkilizya zitabela—

(c) cheeelo chakutanjila mumpyompyongano antoomwe amulumamba;

(d) cheeelo chakuchita mbayanda muntu aatala azyakuzyala bana bakwe;

(e) cheeelo chakutabelesegwa muyyiyo zyakufunuuka akuyanduula bwiime bwazintu zipya, naakuti kugwisigwa kwazipanzi zyamubili muntu katazumide kuti zigwisigwe.

53 Kwaangunuka kuzwa mukusonsegwa, kusubulwa akujatwa bunkala munzila iigwisya bulemu bwamuntu

Taakwe muntu uunga ulasonsegwa pe aamubili naakuti muboongo bwakwe. Taakwe muntu weelete kupegwa chisubulo chimugwisya bulemu bwakwe pe.

54 Kwaangunuka kuzwa kubuzike akujatwa bunkala

Taakwe muntu weelete kujatwa buzike naakuti kujatwa bunkala.

55 Ngwangunuko kuzwa kukwaangilwa kubeleka mulimu kutayandi

Taakwe muntu weelete kwaangilwa kuchita mulimu katayandi pe/ngwaatalisalila pe mwini.

56 Kweelana kwabantu antoomwe akutasaluulana

(1) Woonse muntu ulelene kunembo lyamulawu kabiyo wonse muntu weelete kukwabililwa amulawu.

(2) Boonse baalumi abanakazi bajisi myeenya iikozyania mubuumi kuzintu zyoonse zichitikana mubuumi; muli zyakweendelezegwa kwanyika, zyabuvubi, zyabukkale bwabantu azyatunsiyansiya.

(3) Woonse muntu ulacheelo chakutasaluulwa pe abamwi kwiinda muzintu zisiyenesiyene mbuuli bunanyika bwakwe, mubala wachikumba chakwe, mulaka wakwe, musyobo wakwe, nkombyo yakwe, kabunga kazyanyika nkanjide, tunsiyansiya twakwe, nkwarzwa kubusena, bwanakazi/bwaalumi bwakwe, bulema bwakwe, minyaka yakwe, kuba aada kwakwe, mayeeyelo aakwe, nzila njaakazyalwa aayo, azimwi zintu zinga zilapa kuti muntu asaluulwe.

(4) Muntu nga ulati wasaluulwa mbuuli kwaambidwe mukabeela (3) aajulu kuti kakuli

—
(a) wajatwa muliimwi nzila naakuti wakasigwa chimwi chintu bamwi bantu nchibazumininwa, naakuti;

(b) bamwi bantu bapegwa chimwi chintu naakuti bumwi bubotu mbwaatapegwa pe we.

(5) Lusaluulo lwaambidwe aajulu mukabeela (3) lunooli taluli mumulawu pe kuti teelwachitwa kwiinda munzila zibalangala mubukkale bwajandabanji bweendelezegwa munzila iibalangala, yabululami, yabulemu iiyelanisa bantu boonse akulemeka ngwaangunuko zyabantu.

(6) Fulumende weelete kupanga milawu iiwamba kuti bantu kweelede bajatwe bweelene mubuumi. Weelede kuchita mabambe akukwabilila akusungwaazya bantu badyaamizidwe kwiinda mukusaluulwa; kabiyo—

(a) eezi zyelede kuchitwa kuti kakuyanda kweelanisigwa bamwi bantu bakadyaamizidwe nsiku;

(b) eezi kuti zyachitwa takunooli kwategwa nkusaluula pe nkaambo nkuyanda kugwasya bantu bakadyaamizigwa kwiinda mukabeela (3).

57 Cheelelo chakuba aansiswa

Woonse muntu ulacheelelo chakuba aakavwindi/nsiswa, eezi zibikkilizya zitobela—

(a) kutanjilwa kwalubuwa lwako, muunzi wako, ng'anda yako amuntu utakwe mvumo;

(b) kutasechwa kwamubili wako, ng'anda yako, alubono lwako kakutakwe mvumo pe;

(c) kutabezela lubono lwako pe;

(d) kutanjililwa muzyaambo zyako nzuwambuula aaluwayile, aanjobolamakanu mumagwalo aako, awumwi muntu katakwe mvumo; naakuti

(e) kubbulula bwiime bwamalwazi aamuntu we mwini katayandi kuti zibbululwe kabantu.

58 Waangunuka kwakuswaanana, kulyidilana akubungana kwabantu

(1) Woonse muntu ulacheelelo chakubungana, kulyidilana akuswaanana abamwi bantu mbayanda. Kabiyo muntu ulacheelelo chakusala kutayanda kuswaanana, kulyidilana antoomwe akubungana abamwi bantu mbatayandi mwini.

(2) Muntu takweelede kuti waangilwa kunjila mukabunga nkatayandi naakuti kunjila mumiswaangano njatayandi.

59 Kwaangunuka kwamuntu kuti atongawuke antoomwe akulemba aapepa eezyo zyamuchima

Woonse muntu ulacheelelo chakutongawuka akung'ung'una aawo mpajatwa bubi akutondeezya kutabotelwa kwakwe kwiinda mukuzilemba aapepa eezyo nzyatayandi mpawo pepa walipa baabo bakonzya kuzizyotolola. Pesi kutongawuka akung'ung'una ooku kweelede kwachitwa muluumuno.

60 Kwaangunuka muli zyakulibeteka akulilya moyo

(1) Woonse muntu ulaangunukide kuti alilye moyo antoomwe akulibeteka mwini, eezi zijatikizya—

- (a) kwaangunuka kwamuntu kusala nzila yakukomba njayanda, kuba amayeyelo amaboneno aakwe; kabiyo
 - (b) kukomba zintu nzyayanda/Leza ngwayanda aantanganana naakuti munsiswa alikke naakuti aamwi abenziina.
- (2) Taakwe muntu uunga ulaangilwa kuchita chikonke chiteendelani anzila yakukomba Leza wakwe.
- (3) Bazyali antoomwe abaabo balelede bana bateensi babo balacheelo chakugwasizya mwana nzyelede kukomba akuchita mubuumi. Pesi eezi tazyelede kutyola cheeelo chamwana kuti ajane lwiiyo, lukwabililo, zyakusilikwa abukkale bubotu.
- (4) Basinkombyo balakonzya kuyaka mayake oomo mubatanochitile nkombyo zyabo. Mayake aabo akonzya kujana lugwasyo lwamali kuzwa kuli fulumende.

61 Ngwangunuko yakulyaambwida zilaamoyo a ngwangunuko mukubelesegwa kwazibelesyo zyakumwaya milumbe

- (1) Woonse muntu ulacheelo chakwaangunuka kuti ambuuzyanie abamwi nzyayanda, eezi zibikkiliza zeezi —
 - (a) kwaangunuka kwamuntu kuti ayanduule, atambule antoomwe akumwaya mizeezo yakwe ayimwi milumbe;
 - (b) kwaangunuka kupanga zikozyanisy, kuchita mfukununo, antoomwe akubumba zintu; kabiyo
 - (c) kujana kwaangunuka mulizyalwiiyo.
- (2) Woonse muntu ulaangwangunuko yakubelesya zimwaya milumbe, ngwangunuko eeyi ibikkiliza kukwabililwa kwacheelo chakutabbongonona bantu bapa basimusunzatwaambo makani.
- (3) Maanda aasikapepele aamwaya milumbe alakonzya kupangwa kakutakwe chikachizya, pesi ayelede kutobeleya milawu yakujana mapepa aapa mvumo yakutalika kubeleka antoomwe—
 - (a) akukwabilila mabeleseyo azyamuluwo ansimbi zigwasizya kweendelezya mayiwe aazyakumwaya milumbe/twaambo;
 - (b) akubeleka kabataseyamide kuli fulumende pe naakuti kabataseyamide kutubunga twazyanyika pe naakuti kuli bazyamakwebo.
- (4) Basikumwaya twaambo bablekela fulumende tabeelede pe —
 - (a) kutola mabazu muli zyatubunga twazyakweendelezegwa kwanyika.
 - (b) beeledge kuchita mulimu wabo mbuuli mbubawubona kakweelede nikuba kuti mayeyelo aabo anooli kakazyania amizeezo yafulumende, tazikwe ndaba; kabiyo.
 - (c) basungwaazye bamwi kuti bamwaye milumbe, maboneno amayeyelo aabo asiyene antoomwe amaboneno abaabo bayeeya zisiyene azyabamwi.
- (5) Ngwangunuko zyakwambuuzyania antoomwe akumwaya milumbe atwaambo takweelede pe kuti —
 - (a) zyabanzila zyakusungwaazya lupyopyongano;
 - (b) kumwaya majwi aalusulano;
 - (c) kubisya chiimo abuntu bwamuntu antoomwe abulemu bwakwe; naakuti
 - (d) kuvwanyanga cheeelo chamuntu chakuba ansiswa.

62 Kujana luzibo antoomwe amilumbe

(1) Woonse munaZimbabwe naakuti wakapegwa mvumo yakuchita kakkalila muZimbabwe, ulacheelo chakujana luzibo antoomwe amilumbe zibambilidwe afulumende kapati kuti luzibo oolo luyandilwa kugwasizya luundu kuti lubelesye luzibo oolo mukumvwisisiya mabelekelo afulumende.

(2) Woonse muntu, kubikkilizya basimumwaya twaambo bamuZimbabwe, ulacheelo chakujana luzibo loonse lubambilidwe anikuba muntu uuli, kubikkilizya mitabi yafulumende fumbwa luzibo oolo kaluyanda kubelesegwa kuzuzikizya naakuti kukwabilila cheeelo chabantu.

(3) Woonse muntu ulacheelo chakululamikilwa malembe/luzibo lwakwe naakuti kuziminwa malembe aataluleme alaatala anguwe naakuti luzibo lwakubeja lujiswi afulumende naakuti lujiswi anikaba kali kabunga kalyiimikilide naakuti mutabi wafulumende muzibeela zyoonse zyanyika, malembe aayo ayeedele alulamikwa.

(4) Milawu yeeede kupangwa yakusimatizya cheeelo eechi. Milawu eeyi ilakonzya kukasya lumwi luzibo kuti lutapegwi bantu boonse pe nkaambo kakuti ninsiswa yafulumende yakukwabilila nyika mbiizulwa naakuti ninsiswa yazyamilimu. Kukasya ooku kweelede kwachitwa munzila iibalangala munyika yeendelezegwa munzila yajandabanji muli bublangale, bululami bulemu bwamuntu, kweelanisigwa kwabantu alwaangunuko.

63 Mulaka antoomwe atunsiyansiya

Muntuwoonse ulacheelo —

- (a) chakubelesya mulaka ngwayanda;
- (b) chakutobeleyza tunsiyansiya ntwayanda;

pesi mukutobeleyza cheeelo eechi muntu tayelede kutyola zyeeelo zyabamwi pe bantu mbuuli mbuuyaambidwe muChaandaano eechi.

64 Ngwangunuko yakulisalila milimu iyiilwa, zyamabbindawuko naa imwi biyo milimu

Woonse muntu weelede kulisalila antoomwe akuchita mulimu ngwayanda mwini antoomwe akuchita zyakuuzizyania. Pesi mabelekelo aamulimu ooyo akuuzizyania kweelede kakutobeleyza milawu iiliwo.

65 Zyeeelo zyababelesi ababelekelwa

(1) Woonse muntu ulacheelo chakujatwa kabotu kakutobeleyzegwa milawu yakubelekelana aakati kabasikubelekelwa ababelesi antoomwe akubbadalwa mali iiyeede mulimu ngwalookubeleka mubelesi.

(2) Woonse muntu, aanze kwabaabo babeleka milimu yakukwabilila nyika (basilumamba, tuswiilizyabavwiya amapulisa), ulacheelo chakupanga kabunga antoomwe akunjila mukabunga kakapangwa kale kalaatala akwiiminwa kwababelekelwa naakuti babelesi aamilimu yabo.

(3) Woonse muntu, aanze kwabaabo babeleka milimu yakukwabilila nyika (basilumamba, tuswiilizyabavwiya amapulisa), ulacheelo chakutongawuka aatala amabelekelo aakwe kuti taajatwa kabotu aamulimu. Eezi zijatikizya cheeelo chakutakata mulimu akutakata kwiindila mukukkalila mubelekelwa kabababeleki pe bantu. Pesi mulawu ulakonzya kukasya bamwi babelesi bachita iimwi milimu yakuvuna buumi bwabantu kuti tabatakati milimu yabo.

(4) Woonse mubelesi weelede kubeleka mulimu akujatwa aamulimu munzila iiyandikana amulawu.

(5) Aanze kwabaabo babeleka milimu yakukwabilila nyika, woosne mubelesi asikubelekelwa, kabunga kayimina babelesiakabungakayiminababelekelwa, ulacheelo—

- (a) chakujatana abamwi mukukombelezya kutansikilwa mali yamufolo.
 - (b) kweendelezya; antoomwe
 - (c) akupanga naakuti kunjila mutubunga twiimina babelesi ababelekelwa.
- (6) Banakazi abaalumi bajisi zyeelo zikozyania kabiyo beelete bafola mali iiyelene nibabeleka milimu ikozyania.
- (7) Banakazi beelete kupega mazuba akuya kukulyookezya nichasika chiindi chakuyanda kutumbuka kuli baabo banooli balaada. Bulamfu bwachiindi eechi nchibeelete kupega busika kumyeezi iitatu.

66 Ngwangunuko yakweendeenda akukkala munyika

- (1) Woonse munaZimbabwe ula —
 - (a) cheelelo chakunjila munyika yaZimbabwe;
 - (b) cheelelo chakutagwisigwa pe kuzwa muZimbabwe; kabiyo
 - (c) cheelelo chakujana Pasipoti antoomwe awamwi mapepa akweenzya.
- (2) Woonse munaZimbabwe awoonse ooyo wakanjila munyika yaZimbabwe zili mumulawu ulacheelelo —
 - (a) chakweendeenda kaangunukide fumbwa nkwayanda kuya munyika yaZimbabwe;
 - (b) chakukkala fumbwa nkwaayanda munyika; antoomwe
 - (c) akubbuda munyika nichiba chili chiindi nchaayanda.

67 Zyeelo zyameendeleyo aanyika

- (1) Woonse munaZimbabwe ulacheelelo —
 - (a) chakunjila munsaluuzyo zyakusala bazulwidi zichitwa munzila iibalangala kazichitwa chiindi cheelede kakuchitwa munzila iitobelezya mulawu wanyika;
 - (b) chakusala zeezyo nzyayanda aatala ameendeleyo eenyika.
 - (2) Kwiinda muKkata lyaMulawu, bantu bamuZimbabwe balacheelelo —
 - (a) chakupanga akunjila mutubunga twakweendeleya nyika amutubunga tuliwo ntubayanda;
 - (b) chakukombelezya bantu muluumuno kuti bavootele kamwi kabunga;
 - (c) chakunjila mumabambe azyakweendeleya nyika aasiyenesiyene muluumuno.
 - (d) chakuswaanana aabantu antoomwe akunjila mutubunga kulaawulikke naakuti kamuli kabunga muzichitiko zyaluumuno zyakweendeleyegwa kwanyika kamuyanda kutongawuka naakuti kusungwaazya mabelekelo afulumende naakuti kamwi kabunga kazyanyika nikuba chinzi nchimuyanda kuchita.
- (3) Kwiinda muKkata lyaMulawu wanyika eeli, woonse munaZimbabwe uujisi minyaka iisika akwiinda kkumi lilamusau atutatu (18) ulacheelelo —
 - (a) chakuvoota munsaluuzyo zyoone amalefelendamu woonse aayitilizigwa kwiinda mumilawu yanyika iisiyenesiyene kabiyo kavoota munisia;kabiyo
 - (b) chakuyanda kovootele kuti ajane chuuno chabuzulwidi nchayanda.Kuti wasalwa ulacheelelo chakweendeleya chibaka nchaasalilwa abantu.

(4) Munzila yakusungwaazya kuvula kwatubunga twakweendelezya nyika, kweede kwapangwa mulawu uuzumizya fulumende kuti ape mali kutubunga twazyakweendelezya nyika kusungwaazya kuti tuvule.

68 Cheelelo chakweendelezegwa kwazyabululami

(1) Woonse muntu ulacheelelo chakweendelezegwa kwazyabululami munzila ili mumulawu amububalangale.

(2) Woonse muntu ulacheelelo chakwaambilwa kufwambaana kwiinda mumalembe aatala akutyalwa antoomwe akunyonganisigwa kwameendelezezyo aazyabululami.

(3) Mulawu wabumbwa aPalyamenti weede kusimatizya zyeelo eezi kabiyo uelede—

- (a) kuchita ndangamusule yameendelezezyo azyabululami mumabelekelo aankuta, eezi zyeede kuchitwa ababesi balisantide;
- (b) kupa mulandu amukuli kuli fulumende kuti azuzikizye zyeelo zyaambidwe mutubeela (1) a(2); kabiyo,
- (c) kusungwaazigwe kweendelezegwa kwazyabululami munzila ilaamunse.

69 Cheelelo chakubetekwa chooma

(1) Woonse muntu watamizigwa mulandu ulacheelelo chakubetekwa chooma munzila iilaantanganana kabiyo kiibalangala muchiindi chifwiifwi munkunta yamulawu yabwini.

(2) Mukulangwalangwa kwazyeelo zyabukkale abulyidilane bwabantu, woonse muntu ulacheelelo chakujana kubetekwa chakufwambaana kunembo lyankuta ilisantide iitakwe bbazu ndiyitola naakuti kubetekwa akabunga kamwi kali mumulawu.

(3) Woonse muntu ulacheelelo chakwiinka kunkuta zyalubeta kabiyo alisalile lwakwe simulawu/loya utamwiiminine munkuta yamulawu.

(4) Woonse muntu ulacheelelo, kalibbadalila, kusala simulawu/loya unga ulamwiimina munkuta naakuti kamwi kabunga kabeteka.

70 Zyeelo zyabantu batamizigwa milandu

(1) Woonse muntu watamizigwa mulandu ulazyeelelo zinji zimwi nzeezi —

(a) kujatwa mbuuli muntu uutakwe mulandu domane nkuta yamujana kalaamulandu muntu kwiinda mulubeta;

(b) kuzibisigwa achakufwambaana mulandu nguwasungilwa muntu, kabiyo kupegwa mweenya wakulisakwida kumulandu nguwasungulwa.

(c) kupegwa chiindi chiingi chakuti muntu alibambile zyaambo zyakuloolisakwida munkuta yalubeta;

(d) cheelelo chakuyanduula simulawu uunga ulamwiimikilila munkuta yamulawu kabiyo kamubbada lwakwe simulandu;

(e) cheelelo chakuti fulumende ayandwiide sikutamizigwa mulandu, simulawu uunga ulamwiimikilila munkuta yalubeta kabbadalwa afulumende;

(f) kuzibisigwa achakufwambaana zyeelo nzyalaazyo muntu mbuuli mbuuyaambidwe muminchali (d) a (e) aajulu.

(g) mulandu wakwe weede kubetekwa kaliwo lwakwe sikutamizigwa.

(h) kukaka antoomwe akuzumina bukamboni bweetwa munkuta yalubeta.

(i) kuumuna naakuti kutaangilwa pe kwaambuula zyaambo akutapa bukamboni bunga bulakusungilila kumulandu ngulaawo munkuta;

- (j) cheelelo chakubetekwa mumulaka ngumvwa kabotu nusikutamizigwa mulandu;
 - (k) cheelelo chakutabetekwa mulandu wakatali mulandu kutaanguna nichakachitwa
 - (l) cheelelo chakutabetekwa mulandu wakali wasunsikwa kale naakuti nguakali wajanika kutakwaawo.
 - (m) cheelelo chakutabetekwa mulandu nguakali walekelelwa kale nsiku naakuti wakuuzwa kale naakuti wakapegwa chisubulo kale aatala anguwo;
 - (n) kupegwa chisubulo chilaansi kulicheecho chaambidwe amulawu kuti kakuli bwiime abulemu bwamulandu bwakasandulwa kuzwa mpuwakasundwa mulandu kuzoosika nuwapegwa chisubulo.
- (2) Aawo mpukweede kuti muntu apegwe luzibo —
- (a) luzibo oolo lweede kupegwa muntu mumulaka ngwamvwa; kabiyo
 - (b) kuti muntu ooyo katakonzyi kulemba akubala, luzibo ndwapegwa lulaamalembe lweede kupandululwa kabotu munzila njamvwisisisyu muntu uuyanda luzibo oolo.
- (3) Mukubetekwa kwamuntu, bukamboni bwakajanwa munzila iityola zyeelo zyaambwa muChaandaano eechi tabweede kubelesegwa pe munkuta yalubeta nkaambo kuti bwabelesegwa bukamboni oobo lubetaloonse lunooli teelwenzegwa mumulawu pe.
- (4) Cheelelo chakupegwa mapepa ajisi malembe alaatala akweendelezegwa kwalubeta lwako muchiindi chifwiifvi nilwamana lubeta. Pesi kweede wabbadala kamali nikancheya kuti uwapegwe mapepa alaamalembe.

(5) Fumbwa muntu wajanwa kalaamulandu ankuta yalubeta ulacheelo, nikuba kuti ngakwalangwalangwa imwi milawu, kuti,—

- (a) mulandu wakwe ulangwelangwe ankuta yaajulu;
- (b) mulandu wakwe utansikwe kunkuta yaajulu kuti taakkutikana achisubulo nchapegwa ankuta yaansi.

71 Zyeelo zyaatala alubono

(1) Muchibela eechi —

“*lulyo lwa pencheni*” chaamba lulyo lwapegwa muntu kaluli lwapencheni, mali yakulumba muntu nuwamana mulimu naakuti mali zibbadalwa kuzuzikizya kulumba mubelesi wakali kubeleka mulumu, kiili mali eeyo ibbadalwa —

- (a) kumuntu naba uuli kiizwa muNkomo Mpati yafulumende;
- (b) kulumbwa kwamubelesi asikubelekelwa nkaambo kakubeleka nkwaakachita;
- (c) nkaambo kakuti muntu wachisilwa naakuti kulichisila aamulimu;
- (d) nkaambo kakuti muntu wasika aakusiya mulimu nkaambo kakuchembala, malwazi naakuti chimwi chapa kuti asiye mulimu; eezi zibikkilizya kuliigwa kwamali akupewga mali nzyatanooli muntu wakali kubbadala kudencheni yakwe azimwi mali zipegwa mubelesi naasiya mulimu;

“*lubono*” chaamba fumbwa chintu muntu nchalaacho nchati nchichakwe/lubono muntu ndwajisi anzila njaluyanda lubono oolo.

(2) Kwiinda muli zeezyo zyaambidwe muchibela (72), woonse muntu ulacheelo chakuula lubono ndwayanda, kubamba lubono, kuuza lubono, kupa bamwi bantu lubono

lwakwe akujatisya bamwi bantu lubono lwakwe. Zyoonse eezi zikonzya kuchitwa muntu kalaalikke naakuti kabali kabunga.

(3) Kwiinda muli zeezyo zili muchibeela eechi achibeela (72), taakwe muntu weelede kunyangwa lubono lwakwe pe adomane kwiinda munzila zitobela—

- (a) kunyangwa lubono lwakwe kwachitwa kakutobelwa mulawu;
- (b) kunyangwa lubono lwakwe kweelede kuchitwe nkaambo kachimwi chazintu zitobela —
 - (i) nkaambo kakuyanda kukwabilila luundu/bantu, kubamba luumuno lwaluundu, kubamba busanambi bwaluundu antoomwe akutobeleyza mabambe aalusumpuko abwiime bwadolopo.
 - (ii) nikuyanda kuti kuchitwe mabambe aalusumpuko naakuti kubelesya lubono oolo munzila iigwasizya luundu;
- (c) mulawu uwamba kuti aabo bayanda kutola lubono bachite zitobela —
 - (i) kwaambilizya akupa chizibisylo chakuyanda kubweza lubono kakuchili chiindi kabantu balaachakuchita aatala alubono luyanda kutolwa, kuchitila kuti boonse bantu balaachakuchita alubono lutolwa bazibe;
 - (ii) kweelede basikutola lubono babbadale mali yakuliya kutola lubono oolo kabatana lutola naakuti nikwiinda chiindi chifwiifwi kabali balubweza lubono oolo; kabiyo
 - (iii) kuti kutolwa kwalubono oolo kulookukakwa abeni lubono, kweelede bayanda kutola lubono oolo balembela kunkuta yamulawu kabayanda kujana mvumo izwa kunkuta kabatana kulubweza/kulutola pe lubono oolo, naakuti kuti kabali balutola kale kweelede kakutaniinda mazuba makumi otatwe (30) kabali balubweza lubono oolo balembela kunkuta yamulawu kutondeezya kuti bakabweza lubono;
- (d) mulawu upa mvumo kumuntu watoelwa lubono kuti alembele kunkuta yamulawu kayanda kuti lubono lwakwe luboozegwe kuti kakuli nkuta yakakasya kubvezegwa kwalubono lwakwe; kabiyo
- (e) mulawu upa mvumo kumuntu uuyanda kubbadalwa kuti alembele kunkuta yamulawu kayanda kuti zintu zitobela zilangwelangwe—
 - (i) kutondeezya kuluyanda lubono antoomwe abwiime bwaluyando ndwalaalo kulubono oolo;
 - (ii) kutolwa kwalubono oolo kwachitwa mumulawu na; a
 - (iii) bwiingi bwaliyivo ndubeelede kubbadalwa;

Kabiyo kulembela kunkuta kuyanda mvumo yakubbadalwa kufwambaana luliyio lwalubono lulookutolegwaa.

(4) Aawo muntu mpalaacheelo chakubbadalwa lugwasyo Iwapencheni, mulawu ukasya kuti cheelelo eechi tachizuzikizigwi, nkaambo kakabeela (3) kalaajulu, unooli mulawu usungwaazya kutolwa kwalubono achanguzu.

72 Cheelelo chakujana nyika yakulima akuvuba mbono

- (1) Muchibeela eechi —

“nyika yakulima” chaamba nyika yakulima naakuti iiyelede kubelesegwa kulima mbuuli zisyu, minsamu, kuvuba baswi, kuvuba banyama (lubono), kubikkilizya —

- (a) kuvuba banyama bamunzi, banyama bamusokwe, inkuku, antoomwe anzuki; naakuti
- (b) kuchezya banyama bamunzi naakuti banyama bamusokwe;

Pesi nyika yakulima iwambwa tiibikkilizy nyika yamuluzeva mukkala luundu pe naakuti nyika iizyungulukide dolopo/kkansili, naakuti ijjanika mukati katawundi mbuuli mbukwaambidwe mumulawu uubona zyakuyakwa kwamadolopo antoomwe akuchita mabambe aakusumpulwa kwamadolopo akubelesegwa kwanyika;

“nyika” chaamba choonse chijanika /chimena aanyika naakuti chijanika aanyika;

“*chipanzi chanyika yakulima*” chaamba chipanzi chanyika yakulima chilembesedwe aachilikke mumalembe aajanika *kuDeeds Registry*.

(2) Aawo nyika yakulima naakuti kwaterdeezegwa chiyandisyo chakujana nyika yakulima/bulongo kuchitila kuti kugwasigwe baluundu kubikkilizya —

- (a) kwaabanisa bantu nyika yakulima naakuti nyika yakuchita imwi milimu yazyakulima;
- (b) kubambilulwa kwamabeleseyo aanyika/bulongo, kukwabililwa kwaminsamu amasaka, kukwabililwa kwazituzyungulukide naakuti kubebesegwa kwabanyama bamusokwe antoomwe azimwi zyakalengwa aaSikabumba musokwe nzibanga balabelesya bantu; naakuti,
- (c) kulonzegwa kwabantu banyangwa nyika yabo yakulima nkaambo kakuti nyika yabo yayanda kubebesegwa zimbi zintu mbuuli mbukwaambidwe mufuka (a) naakuti (b);

nyika eeyo ikonzya kutolwa changuzu afulumende kabelesya nzila yakubikka chizibisyoo mumapepatwaambo chakutondeezya kuyanda kutola nyika eeyo. Kuti kwachitwa boobo, yika eeyo inooli yaba yafuluemende kuzwa buzuba chizibisyoo nichabikkwa/ nichatondeezegwa mumapepatwaambo.

(3) Aawo nyika yakulima niyabwezwa changuzu kuchitila kuti ibeelesegwe zyaambwa mukabeela (2) kaambwa aajulu —

- (a) kwiinda muchibeela 295(1) a (2), taakwe luliyo lubbadalwa pe mukubweza nyika eeyo pesi sikutolelwa nyika ulakonzya kupegwa luliyo lwakulumba lusumpuko ndwatanooli wakachita aanyika eeyo kayitana tolwa;
- (b) taakwe muntu uunga ulalembela kunkuta yamulawu kayanda kujana zyaluliyi lwakutolwa kwanyika yakwe anooli kayanda kujana luliyo lwalusumpuko ndwaakachita aanyika eeyo kwiinda mukuyaka mayake azimwi. Kabiyo taakwe nkuta iinga ilaswiilizya kulila kwamuntu uuyanda kubbadalwa kubwezegwa kwanyika yakwe kiili yabwezwa aafulumende kakutobelwa nzila yapandululwa eeyi; kabiyo
- (c) kubwezwa kwanyika eeyi takunga kulategwa nkusuulula muntu wabwezelwa pe mbuuli zyaambidwe aatala akubinda kusuulwa kwabantu muchibeela 56

(4) Yoonse nyika yakulima yaka —

- (a) lembwa mu Mpampikwa Yamusanu Tubili (7) muKkata lyamulawu lyachiindi; naakuti
- (b) tondekwa kale kwiinda muchibeela 16B(2)(a)(ii) naakuti (iii) chaKkata lyamulawu wansiku, mulawu mupya ooyu kuutana talika kubeleka;

inooli ninyika yafulumende kabiyo taakwe luliyo lunga lulabbadalwa pe kuti yabwezwa aafulumende dobiyo kubbadala lusumpuko lwakachitwa aanyika eeyo kuitana bwezwa.

(5) Achakufwambaana, mbiitabwezwe biyo nyika kwiindila munzila yapanduluwa aajulu mukabeela (2), mubelesi, uubona zyakulembesegwa kwanyika akupega mapepa atondeezya mweni bulongo, weelde kwiilembesa bupya nyika eeyo katondeezya kuti eeyo nyika yaba nyika yafulumende tiichili nyika yamuntu watolelwa pe.

(6) Mulawu wapangwa aPalyamenti ukonzya kuchita kuti kube mulandu kumuntu utanooli wayanda kutola naakuti kubellesya, katapedwe mvumo, nyika yakabwezegwa afulumende kwiinda munzila yapandululwa muchibeela eechi;

(7) Kuti kakuchitwa mabambe aakubwezwa kwanyika changuzu afulumende kakuyanda kukkazikwa bupya bantu kwiindila mumabambe afulumende aakukkazika bupya bantu,zintu zitobela nzintu zipati loko zyelede kulangisisigwa—

- (a) muchiindi chafulumende wamakuwa wabudyaamizi, bantu bamuZimbabwe bakatolelwa nyika zyabo zyakulima azimwi zilengwa zyaLeza kabatabbadedwe pe luliyo;
- (b) nkaambo kakutolelwa nyika zyabo zyakulima, bantu bakabweza zilwanio kabayanda kulwana amakuwa kuchitila kuti batole nyika yabo yakali yabwezwa aafulumende wamakuwa antoomwe akuyanda kulyaanganuna kuzwa mubudyamizi bwakali bweetwa aafulumende wamakuwa. Nkondo eeyi yakazoyeta kulilela kwanyika yaZimbabwe mumunyaka wa1980;
- (c) nkako banaZimbabwe beeledge bazumizigwa kuti batole nyika yabo njibakali banyangwa; kabiyo—
 - (i) fulumende wanyika yamakuwa aakkede muZimbabwe (Britain) ulaamukuli wakuliya/kubbada baabo bamakuwa bakatolelwa changuzu nyika yakulima afulumende wanyika yaZimbabwe kuchitila kuti nyika yakatolwa ikkalwe bupya abantu batakwe nyika yakukkala akulima, kwiinda munkomo yamali ilisantide yakaanzilwa zintu zili boobu; kabiyo
 - (ii) kuti fulumende wamakuwa wakachilwa kubabbadala luliyo aabo bamakuwa bakatolelwa nyika yakulima, fulumende waZimbabwe takonzi kubabbadala pe luliyo lwabo aabo mbaakabwezela nyika yakulima kayanda kukkazika bupya bantu batakwe aakukkala.

(8) Chibela eechi chisungwaazya fulumende wamakuwa kuti abbadale makuwa aayo aakatolelwa nyika yakulima kakuyanda kukkazikwa bupya bantu bakatalikwe nyika yakulima.

73 Zyeelelo zyazituzyungulukide

(1) Woonse muntu ulacheelelo —

- (a) chakukkala mibusena butakwe malwazi akonzya kupambanisa bulondozi amubili wakwe;
- (b) chakukwabilila zituzyungulukide kuchitila kuti mazyalane aalino awajuunza agwasikane kuzintu zituzyungulukide kwiinda mukubikka mulawu azimwi nchito—
 - (i) zipa kuti takubi kusofwaazikwa kwamaanzi, muuya antoomwe anyika munzila ipa kuti tazibeleseki;
 - (ii) zisungwaazya kukwabilila akuyobolola zituzyungulukide;
 - (iii) zisimatizya bwiime bwazituzyungulukide antoomwe amabelesezyo mabotu aazintu zyakaanzwa aSikabumba kuchitila kuti bantu basumpuke mubukkale bwabo.

(2) Fulumende weelede kuchita mabambe, kuti kakuli zibelesyo, aanga alapa kuti zyeelelo eezi zitattyolwi mbuuli mbuyaambidwe muchibeela eechi.

74 Ngwangunuko yakutayandogwisigwa mpubede achanguzu

Taakwe muntu uunga ulalonzegwa aamuunzi wakwe naakuti amwayilwe muunzi wakwe kakutakwe mvumo iizwa kunkuta yamulawu itanooli yalangalanga bulingolingo boonse buyandikana kulangisisigwa kabatana kulonzegwa bantu.

75 Cheelelo chakujana lwiyo

(1) Woonse munaZimbabwe abaabo bakapegwa mvumo yakuchita kakkalila muZimbabwe bajisi cheelelo —

(a) chakujana lwiyo lwakumatalikilo kalubbadalilwa afulumende. Eezi zibikkikizya lwiyo lwabantu bakakomena.

(b) chakwiiya kuya kunembo kwiinda mukugwasigwa afulumende kakubelesegwa milawu azimwi zinga zilachitwa. Fulumende weelede kuchita kuti kube kuuba kujana lwiyo munyika.

(2) Woonse muntu ulacheelo chakupanga zikolo zilisantide pesi zikolo eezi tazyelede kusaluula bantu pe kwiinda munzila zisiyenesiyene zyaambidwe muKkata lyAMulawu wanyika.

(3) Mulawu ulakonzya kwaamba nzila zyelede kutobelezegwa kuti zikolo zilisantide zilembesegwe kumutabi wafulumende mbu uli mbukwaambidwe mukabeela (2) chilaajulu antoomwe akupandulula nzila njizinga zilajalwa aayo zikolo eezyo kuti teezyatobeleyza mulawu wabikkwa wakuti zilembesye.

(4) Fulumende weelede kuchita mabambe, kuti kakuli zibelesyo, aanga alapa kuti zyelelo eezi zitattyolwi mbuuli mbuyaambidwe mukabeela (1).

76 Cheelelo chakujana kusilikwa muzibbadela

(1) Woonse munaZimbabwe antoomwe abaabo bakapegwa mvumo yakuchita kakkalila muZimbabwe, ujisi cheelelo chakujana mpanga ulasilikwa malwazi akulangwalangwa zyabwiime bwamibili yabo. Eezi zibikkikizya cheelelo chakugwasigwa muli zyakutumbukwa kwabana.

(2) Woonse muntu uupona kachiswa bulwazi butola chiindi kupona ulaacheelo chakujana lugwasyo lwakusilikwa zyabulwazi bwakwe.

(3) Taakwe muntu uunga ulakasigwa kusilikwa muchiindi naanjila muntenda nikuba kuli chili chibbadela.

(4) Fulumende weelede kuchita zyoonse nzyakonzya kuti zyelelo eezi zizuzikizigwe kuti kaziliwo zibelesyo.

77 Cheelelo chakujana chakulya antoomwe ameenda

Woonse muntu ulacheelo —

(a) chakujana maanzi aatakwe tombe; antoomwe

(b) akujana chakulya chizulide; Fulumende weelede kupanga milawu azimwi zintu zinga zilapa kuti cheelelo eechi chizuzikizigwe kuti kaziliwo zibelesyo.

78 Zyelelo zyatala alukwatano

(1) Woonse muntu ulaaminyaka ilaajulu kwakkumi amusanu aminyaka yotatwe (18 years) ulacheelo chakukwata/kukwatwa mpawo atalike kuyaka muunzi wakwe.

(2) Taakwe muntu uunga ulaangilwa kukwatana aamuntu ngwatayandi pe lwakwe.

(3) Baalumi/Banakazi tabakonzyi kukwatana aabalikke.

CHIBAKA 3

BUPANDULUZI BUZWIDE BWAZIMWI ZYEELELO

79 Mabeleseyo aachibeela 3

(1) Chibeela eechi muKkata lyaMulawu chipa bupanduluzi bwiindilide aatala azimwi zyeelelo antoomwe angwanguku kuchitila kuti bantu bazimvwisisye kabotu akuzitobelezya.

(2) Mpingu eeyi tayeelede kuboneka aanga ikasya kuzuzikizigwa kwazyeelo angwanguku zyaampandamunsaka zijanika muMpingu 2 ilaajulu.

80 Zyeelelo zyabanakazi

(1) Woonse mwanakazi ujisi bulemu bwachiimo chamuntu buzwide mbuuli mbwalaabo mwaalumi. Banakazi bajisi zyeelelo zyeelene azyabaalumi kabiyo zyeelelo eezyo zijatikizya cheelelo chakupegwa myeenya iiyelene ayabaalumi mubuumi, muzibela zyakweendelezegwa kwanyika, mubuvubi bwanyika amubukkale bwabantu.

(2) Banakazi abalabo bajisi zyeelelo, mbuuli baalumi, zyakulela antoomwe akukkala aabana. Ipalyamenti ilakonzya kupanga mulawu uupandulula bulingolingo bweeledo kuchitwa kuti cheelelo eechi chizuzikizigwe kabotu.

(3) Yoonse milawu atunsiyansiya twabukkale bwabasikale tudyamizya akutyola zyeelelo zyabanakazi zili muKkata lyaMulawu eeli, zyeelede kusweegwa nkaambo zinooli zikazyania aamulawu mupati wanyika.

81 Zyeelelo zyabana

(1) Woonse mwana (mulombe naakuti musimbi ulaaminyaka ilaansi kwakkumi lilaamusatu atutatu (18) ulacheelelo —

(a) chakujatwa bweelene abamwi bantu kunembo lyamulawu wanyika, antoomwe cheelelo chakuswiilizigwa;

(b) chakupegwa zina amutupo naazyalwa;

(c) kuli baabo bana —

(i) bakazyalilwa muZimbabwe; naakuti

(ii) bakazyalilwa aanze kwanyika yaZimbabwe pesi kalabunanyika bwaZimbabwe kwiinda mubuzukululu nelukata;

balacheelelo chakujana pepa lyakuzyalwa achakufwambaana;

(d) cheelelo chakujana lukwabililo akuvubwa abazyali naakuti abamwi bantu;

(e) cheelelo chakukwabililwa kuzwa kukuchitwa muzike mbuuli kubelesya bana muli zyabusangu, kubelesegwa ziyumu, kusonsegwa, kutakatwa, azimwi nzila zyakujata bana bubi;

(f) cheelelo chakujana lwiyo akusilikwa, kulya chakulya cheelede antoomwe akujana chiyusilo;

(g) cheelelo chakutaangilwa kunjila mutubunga twabasilumamba akulwana nkondo kabachili bana;

(h) cheelelo chakutanjizigwa mutubunga twazyameendelezyo aazyanyika;

(i) cheelelo chakutabikkwa muchitookesi/mujele adomane kwabulika nzila zimbi zinga zilatobelwa—

- (i) kuti wabikkwa muchitookesi/mujele, kweelede kaali mabambe aachiindi chifwiifwi biyo,
 - (ii) kabiyo kabikkidwe aalikke muchitookesi katasweenene abantu bapati bali muchitookesi antoomwe akujatwa kweelede.
 - (iii) kubambwa akujatwa munzila amibusena bweedelene aaminyaka yakwe.
- (2) Muzintu zyonse zilaachakuchita amwana, eeyo nzyayanda mwana nzizyo zitobelwa.
- (3) Bana beelete kujana lukwabililo choonse chiindi ankuta zyamulawu kapati Nkuta Yaajulu.

82 Zyelelo zyabantu bakachembaala

- Woonse mutu ulaaminyaka iisika kumakumi musanu awabili (70)
ulacheelo chakujana —
- (a) lugwasyo nilucheya luzwa kuli fulumende antoomwe aluzwa kumpuli yakwe;
 - (b) lugwasyo lwazyakusilikwa luzwa kuli fulumende; kabiyo
 - (c) lugwasyo lwamali luzwa kuli fulumende lugwasizya mubukkale bwabo; kakale

kabiyo Fulumende weelede kuchita zyonse nzyakonza kuti zyelelo eezi zizuzikizigwe kuti kaziliwo zibelesyo.

83 Zyelelo zyabantu balemene

Fulumende weelede kuchita nzyanga ulachita, kuti zibelesyo kaziliwo, kugwasya bantu balemene kuti bajane nzibayanda akubelesya luzibo ndubalaalo antoomwe azipego zyabo mubuumi bwabo. Nzyeelede kuchita fulumende zjatikizya —

- (a) kubagwasizya kuti bakonzye kulibelekela milimu iibapa mpindu;
- (b) kubagwasizya kuti bakkale aampuli zyabo antoomwe akuti babe aachakuchita muzintu zyiingi zichitikana mubukkale bwampuli zyabo azyakulikondeleya kwabo;
- (c) kubakwabilila kuzwa kukusonsegwa akujatwa buzike abamwi bantu;
- (d) kubagwasya kuti bajane kusilikwa kumalwazi aamubili antoomwe akubachita kuti bakkalinkane mumiyeyo yabo;
- (e) kubagwasizya mayake azikolo akayakwa kagwasizya balemene nkukuti bajane lwiyo; kabiyo
- (f) kubagwasizya kuti bajane lugwasyo lwakuyiisigwa afulumende aawo mpukweelede.

84 Zyelelo zyabantu bakalwana nkondo yakulilela

- (1) Bantu bakalwana nkondo yalwaangunuko —
- (a) mbaabo bakalwana munkondo yakulilela kwaangununa Zimbabwe kuzwa kumakuwa,
 - (b) bakagwasizya basikulwana nkondo yakulilela munzila zisiyenesiyene; kabiyo
 - (c) bakaangidwe kwachiindi chilamfu kabaangilwa zyanyika muchiindi niyakali kulwanwa nkondo yakulilela;

bantu aaba beeblede kuzibikana kuti bakalwana nkondo yakulilela antoomwe akupewga bulemu bweelede. Nkaako beeblede kuchitilwa zintu zili mbuuli kupega mali yakubelesya yabantu bakaleka kubaleka akujana kusilikwa nibachiswa.

(2) Ipalyamenti yeelede kupanga mulawu upandulula kuti banoozijana biyeni zyoonse eezi zyaambidwe mukabeela (1).

CHIBAKA 4

KUZUZIKIZIGWA KWAZYEELELO ZYABANTU ZYAAMPANDAMUNSAKA ANGWANGUNUKO

85 Kuzuzikizigwa kwazyeelo zyabantu zyaampandamunsaka angwangunuko

(1) Kufumbwa nabani wabantu aaba —

- (a) uulyiimikilide kachita zigwasya nguwe alikke;
- (b) uuyimikilila umwi muntu uutakonzyi kulyiimikilila;
- (c) muntu wakabunga naakuti uyimikilila ziyandisyo zyakabunga naakuti musyobo wabantu;
- (d) muntu uuyimikilila ziyandwa aluundu;
- (e) kabunga kiimikilila ziyandwa aabantu bako;

ulacheelolo chakwiinka kunkuta, akuyomang'ala kuti cheelolo naa ngwangunuko yaampandamunsaka iiili mu Chaandaano eechino yakatolywa, naakuti ilakonzya ku nyonyonganisigwa alimwi nkuta ilakonzya kupa nzila nzyakugwasizya zili mbuuli zyeelo naakuti batyolelwya zyeelo babbadalwe.

(2) Kutyola kwamuntu mulawu takumukachizy pe kuyoomang'ala kunkuta kuti ajane lugwasyo mbuuli zyaambidwe mukabeela (1) aajulu.

(3) Tulawu-lawu twankuta zyoonse tweede kupa bweendelezi butobelegwa muchiindi bantu nibayanduula lugwasyo mbuuli makanze ali mukabeela (1), tulawu ootu tweede kubona kuti—

- (a) cheelolo chakumang'ala kunkuta mbuuli zyaambidwe mukabeela (1) cheelede kweendelezegwa kabotu;
- (b) kweendelezegwa kwalubeta lwankuta antoomwe akutalika kwalubeta, kweelede zyafwiinsigwa muchiindi chifwiifwi loko/chiniini;
- (c) inkuta, nikuba kuti yeelede kutobeleyza tulawu-lawu twakubeteka kabotu, tiiyelede kuchelezegwa aatulawu ootu twabweendelezi oobu; alimwi
- (d) muntu ulaaluzibo, kuti wazumizigwa ankuta, ulakonzya kunjila munkuta kagwasizya.

(4) Kubalika kwatulawu-lawu twaambidwe mukabeela (3) takukonzyi kukachizya cheelolo chakutalika bweendelezi bwaambidwe mukabeela (1) akuchita kuti mulandu ubetekwe munkuta.

CHIBAKA 5

MPUZYEELEDE KULEKWA KUZUZIKIZIGWA ZYEELELO ZYAAMPANDAMUNSAKA

86 Mpuzigolela zyeelo zyaampandamunsaka angwangunuko

(1) Zyeelelo zyabantu zyaampandamunsaka angwangunuko zijanika muChaandaano eechi zyelede kuzuzikizigwa akutobelegwa kabotu pesi kakulemekwa zyeelo angwangunuko zyabamwi bantu.

(2) Zyeelo angwanguku zyaampandamunsaka zijanika muChaandaano eechi zilakonza kudyamizigwa biyo kwiinda mumulawu umwi wabelesegwa fumbwa mulawu ooyo kuboneka kuuyede kudyamizya zyeelo zyaampandamunsaka alimwi achecho chipa kuti zyeelo angwanguku zidyaamizigwe kweelede kachili chintu chiboneka cheendelana abweendelezi bwachisi chajandabanji chitobeleyza bubalangale, bululami, kulemeka bulemu bwamuntu, kweelanisya bantu, kwaanganuka kwabantu, azimwi kubikkilizya—

- (a) bube bwacheelo naakuti ngwanguku yadaamizigwa;
- (b) mpalamo yakudyamizya cheelo echo, akubona kuti kulelede na kudyamizya cheelo echo nkaambo kakuyanda kukwabilila nyika, kukwabilila luundu, bukkale bwabantu muluumuno, kukwabilila zyabulondozi/busanambi bwabantu, mabambe akweendelezegwa kwamadolopo antoomwe aziyandwa abanabunji;
- (c) bube abuyumu bwakudyamizigwa kwacheelo;
- (d) chiyandisylo chakubona kutegwa kunoneezegwa kwazyeelo angwanguku zyabambi bantu;
- (e) bulidilane buliwo aakati kakudyamizigwa kwazyeelo ampalamo yakudyamizya zyeelo;
- (f) naakuti taakwe na zimwi nzila zitadyamizyi loko zyeelo zyabantu zinga zilabelesegwa pesi impalamo yakudyamizya zyeelo kiichizuzikiziga anzila eezyo.

(3) Taakwe mulawu uukonza kudyamizya zyeelo zitobela mbuuli mbuyaambidwe muChaandaano eechi, alimwi taakwe mutu weelede kuzityola pe—

- (a) cheelo chakupona, domane mbuuli mbukwaambidwe muchibeela (48) muChaandaano eechi;
- (b) cheelo chakulemeka bulemu bwamuntu;
- (c) cheelo chakutasonsegwa naakuti kutajatwa bunkala, zitakwe bulemu naakuti zisubulo zisampula mutu;
- (d) cheelo chakutajatwa buzike naakuti kujatwa bunkala;
- (e) cheelo chakubetekwa munzila iiluleme kiibalangala;
- (f) cheelo chakuya kunkuta kukujana mvumo iizumizya mwaange kuti agwisigwe muchitokesi, naakuti atolwe kunkuta kukabonwe kuti kujalilwa kwakwe kuli mumulawu na, naakuti kujana mvumo yakuziba kuti mutu ujalilidwe usisidwe kuli nkwtaboneki, mbuuli mbukwaambidwe muchibeela 50(7)(a).

87 Zyeelo mbuzilekwa kulemekwa muchiimo chalupyopyongano

(1) Aajulu kwanzila zizumizigwa kudyamizya zyeelo zyaampandamunsaka mbuuli mbukwaambidwe muchibeela (86), zyeelo angwanguku eezi zikonza kudyamizigwa kabiyo kwiinda mumulawu wakalembwa antaamo zyeede kuchitwa muchiindi achiimo chalupyopyongano, pesi kudyamizigwa ooku kweelede kuchitwa munzila yakazumizigwa kwiinda muchibeela eechi antoomwe amuMpampikwa Yabili ijanika muKkata lyamulawu eeli.

(2) Mulawu uulembedwe waambwa mukabeela (1) kalaajulu antoomwe azimwi zili mumulawu zinga zilachitwa, zyeede kubikkwa mupepatwaambo lyaluundu lyafulumende litegwa niGazette.

(3) Kufumbwa kudyamizigwa kwacheelo kwaambidwe amulawu ulembedwe mukabeela (1) muchaandaano eechi, takweelede pe kwiindilizya eezyo zyeede kuchitwa kuti kakulangwa bwiime bwalupyopyongano buliwo.

(4) Taakwe mulawu uuuzumizya koompololwa kwachiimo chalupyopyongano, kabiyo taakwe zimwi zili mumulawu zyeede kuchitwa nkaambo kakoompololwa kwachiimo chalupyopyongano zinga zila—

- (a) kwabilila, naakuti kuzumizya fulumende naakuti chibela chafulumende nikuba kuchibaka chili chanyika , naakuti naba uuli muntu, kuti achite zintu zitali mumulawu; naakuti
- (b) dyaamizya nichiba chili chazyeeleo zyaambidwe muchibela 86(3) , naakuti kuzumizya kudyamizigwa akutyolwa kwazyeelo eezi.

CHAANDAANO 5

BASILUTWE BAFULUMENDE

CHIBAKA 1

MANGUZU AA BASILUTWE BAFULUMENDE

88 Manguzi aaBuzuluzi

(1) Manguzu a Basilutwe bafulumende azwa kubulumbu bwaZimbabwe kabiyo ayelede kubelesegwa kwiinda muKkata lyaMulawu eeli.

(2) Manguzu a basilutwe bafulumende munyika yaZimbabwe apedwe Muzulwidi waNyika uwabelesya, kwiinda muNkamu yaBasilutwe baMitabi yaFulumende (Kkabbineti), katobeleyza Kkata lyaMulawu eeli.

CHIBAKA 2

MUZULWIDI WANFYIKA ABAMUTOBELA

89 Muzulwidi Wanyika

Muzulwidi waNyika ngusilutwe waNyika aFulumende kabiyo nguDuundumuntule waBasilumamba bakwabilila nyika.

90 Milimu yaMuzulwidi waNyika

(1) Muzulwidi waNyika weelede kusumpula, kukwabilila, kutobeleyza akulemeka Kkata lyaMulawu eeli mbuuli mulawu mupati-kampatila wachisi chaZimbabwe nkaako kweelede wabona kuti Kkata lyaMulawi eeli antoomwe amilawu imwi yanyika zyalemekwa akutobelezegwa mbuuli mbukweelede.

(2) Muzulwidi waNyika weelede—

- (a) kusungwaazya lukamantano aluumuno muchisi kuchitila kuti boonse banaZimbabwe bakkale kabotu muluumuno;
- (b) kuziba akulemeka bulemu andemeko zyankondo yalwaangunuko;
- (c) kukwabilila zyeelo zyaampandamunsaka angwangunuko antoomwe akulemekwa kwamulawu munyika; kabiyo
- (d) kulemeka busiyane bwamisyobo yabantu ijanika muZimbabwe.

91 Nzyayelede kubaazyo kuti muntu asalwe kuba Muzulwidi waNyika akuba mutobeli waMuzulwidi waNyika

(1) Muntu uyelelwa kusalwa kuba Muzulwidi waNyika naakuti kubikwa mbuuli Utobelwa Muzulwidi waNyika kuti kakuli —

[Kabeela kakabambululwa achibeela 3(a) waMbambululo yaMulawu 2 wa2021]

- (a) ujisi bwenichisi bwaZimbabwe kwiinda mukuzyalwa naakuti mubuzukululu;
- (b) ujisi minyaka isika naakuti kwiinda makumi aane;
- (c) ukkala munyika yaZimbabwe;
- (d) ulembesezye kuvoota.

(2) Muntu takonzyi kwiiimikila kuti asalwe kuba Muzulwidi waNyika naakuti kubikwa kuba Mutobeli waMuzulwidi waNyika kuti kakuli wakali waba Muzulwidi waNyika kale tubili aansi kwaKkata lyaMulawu eeli, kazitobelana naakuti muzidyunkuzidyunku zyanyaaka. Aansi kwaKkata lyaMulawu eeli kuti muntu wakali waba Muzulwidi waNyika kwaminyaka itatu kaziyanembo chaamba kuti unooli wakaba Muzulwidi waNyika kwamweenya uzwide.

[kabeela kakabambululwa achibeela 3(b) chaMulawu 2 wa2021]

92 Kusalwa kwaMuzulwidi waNyika

[Mutwe wakagwisigwa achibeela 4(a) yaMulawu 2 wa2021]

(1) Kusalwa kwaMuzulwidi waNyika waNyika kweelede kwachitwa mukati kachiindi chaambidwe muchibeeela 158.

[Kabeela kakabambululwa achibeela 4(b) chaMulawu 2 wa2021]

- (2) ...
- (3) ...

[Tubeela (2) a(3) tubambululwa achibeela 4 (c) chaMulawu 2 wa2021]

(4) Ziyandikana kuti muntu alembesye kuyovoota mukusala Muzulwidi waNyika zili pandulwidwe muMpampikwa Yane.

[Kabeela kabambululwa achibeela 4 (d) chaMulawu 2 wa2021]

(5) Kusalwa kwaMuzulwidi waNyika kweelede kuchitilwa aamwi ansaluuzyo zyabamwi bazulwidi bali mbuuli bayiminina bantu kung'anda yaPalyamenti (*MP*), bayimkilila bantu kuChilikiti abayimkilila bantu kuBbooma.

[Kabeela kabambululwa achibeela 4 (e) chaMulawu 2 wa2021]

93 Kutondeezya kutakkutikana kunsaluuzyo zyakusala Muzulwidi waNyika

(1) Kwiinda muchibeeela eechi, woonse muntu watakkutikana anzila njaasalwa aayo Muzulwidi waNyika ukonzya kukazya zyazwa munsaluuzyo zyakusala bantu aaba kwiinda mukutola kutongawuka kwakwe kuNkuta yazyakata lyaMulawu mukati kamazuba musanu awabili kakuli koompololwa zina lyamuntu wakazunda bamwi munsaluuzyo zyakachitwa.

[Kabeela kabambululwa achibeela 5 (a) chaMulawu 2 wa2021]

- (2) ...

[Kabeela kabambululwa achibeela 5(b) chaMulawu 2 wa2021]

(3) Nkuta yazyakata lyaMulawu yeelede kuswiilizya ntongawuko yeetwa kuli njiyo, atala akusalwa kwaMuzwilidi waNyika, antoomwe akumana/kugomena kaambo aaka mukati kamazuba kkumi amazuba aane (14) kuzwa buunsi mbukeetwa kaambo kakutongawuka kuNkuta. Eezyo zyazwa mulubeta lwaNkuta yazyakata lyaMulawu tazikazigwi pe.

(4) Mukulangisisya butongawusi bweetwa kuli njiyo Nkuta yazyakata lyaMulawu mbuuli kwaambwa mukabeela (1), inkuta eeyi ikonzya —

- (a) koompolola wakazunda boonse munsaluuzyo yakachitwa;
- (b) kuzimaazya nsaluuzyo zyakachitidwe kuchitila kuti zichitwe bupya, aawo mpukwategwa ngazichit we mupya kweelede zyachitwa mukati

kamazuba atayindi makumi musanu akkumi limwi (60) kuzwa buunsi nkuta niyazimaazyo nsaluuzyo zyakachitidwe.

- (c) kwaamba nzyikonzya kwaamba mbuuli maboneno aayo ayendelana azyakachitika.

(5) ...

[Kabeela kabambululwa achibeela 5(c) chaMulawu 2 wa2021]

94 Katalika mulimu kwaMuzulwidi waNyika

(1) Muntu wasalwa kuba Muzulwidi waNyika utalika mulimu musule akutola chikonke kunembo lyaDunduumuntuule wabaJaji naakuti umwi Mubetesi uuliwo ulachuuno chaajulu kulibamwi mbuuli mbukwaambidwe kuMpampikwa yaTatu kakuli chikonke Muzulwidi waNyika nchayeled e kuchita—

- (a) buzuba bwamusano abuzuba bwane musule akuti wasalwa; naakuti
(b) naa kwaba kutakkutikana kwakusalwa kwakwe, aakati kwamahola makkumi one alamusano aatatu musule akuti Nkuta yaKkata lyaMulawu yoongolola kuti nguwe wazunda.

[Kabeela kasowegwa achibeela 6 (a) chaMulawu 2 wa2021]

(2) Ooyo walaachuuno chaMuzulwidi waNyika ulaya nembo kakkede achuuno kusikila buunsi ooyo mupya Muzulwidi waNyika natalika mulimu kwiindila mukabeela (1).

(2a) Kufwambaana naatalika mulimu, kweelede asale bantu batindi babili kuba batobeli bakwe alimwi bali bantu bali aaziyandikana kuti baslawe mbuuli Muzulwidi waNyika kakutobelwa chabaka 91(1) alimwi batachite chikonke chakuba Batobeli baMuzulwidi waNyika kunembo lyaDunduumutule waJaji naakuti umwi uuliwo ulachuuno chaajulu kulibamwi mbuuli mbukubambidwe kuMpampikwa yaTatu.

[Kabeela kabambululwa achibeela 6 (b) chaMulawu 2 wa2021]

(3) Mutobeli wa Muzulwidi waNyika wabweza chuuno chaMuzulwidi waNyika kuti wakaliwo wafwa, wasiya mulimu naakuti wagwisigwa, ukonzya katalika mulimu kuti kakuli wachita chikonke chachuuno chaMuzulwidi waNyika kunembo lyaDuundumuntule waBabeseti naakuti umwi mubetesi umutobela mbuuli mbukwaambidwe muMpampikwa Yatatu. Chikonke eechi ueyeled e kuchichita kufwambaana mukati kama-awa ali makumi aane alamusano awatatu (48) kakuli chuuno chaMuzulwiid waNyika chasyala kachitachikwe muntu.

95 Bulamfu bwachiindi chakubeleka kwa Muzulwidi waNyika antoomwe aBamutobela

(1) Bulamfu bwachiindi chakubeleka kwaMuzulwidi waNyika butalika buunsi nachita chikonke mbuuli mbukwaambwa muchibeela 94(1)(a) naakuti 94(3).

[Kabeela kabambululwa achibeela 7 (a) chaMulawu 2 wa2021]

(2) Bulamfu bwachiindi chakubeleka kwaMuzulwidi waNyika —

[Kabeela kabambululwa achibeela 7 (b) (i) chaMulawu 2 wa2021]

(a) buunsi naasiya chuuno naakuti naagwisigwa achuuno; naakuti

(b) nikwachitwa nsaluuzyo kakuli wasalwa lubo naakuti uumbi muntu wasalwa kuba Muzulwidi waNyika. Aanze kwazaambidwe muKkata lyaMulawu eeli bulamfu bwakukkala achuuno cha Muzulwidi waNyika kweelede kwaba minyaka musanu, eezi kweelede zyeendelana abulamfu bukkalwa abayiminini bamuPalyamenti.

[Fuka libambululwa achibeela 7(b) (ii) chaMulawu 2 wa2021]

(3) Chiindi chakuba achuuno chaMutobeli waMuzulwidi waNyika chitalika mubuzuba aawo mpabikwa aMululwidi waNyika alimwi musule akuchita chikonke kakutobelwa Chibeela 94(2a).

(4) Mutobeli waMuzulwidi waNyika usiya mulimu wakwe musule akusiya mulimu naakuti musule akugwisigwa achuuno aMuzulwidi waNyika.

[Tubeeela (3) a(4) tubikwa aChibeeela 7 (c) chaMulawu 2 wa2021]

96 Kusiya mulimu kwa Muzulwidi waNyika naakuti Uumutobela

(1) Muzulwidi waNyika ukonzya kusiya chuuno chakwe kwiinda mukulemba lugwalo kuli Sichuuno waNg'anda Yaansi Yamilawu (National Assembly- Speaker). Sichuuno waNational Assembly uyelede kumwaya mulumbe ooyo, kuluundu lwaZimbabwe, wakusiya mulimu kwaMuzulwi waNyika achakufwambaana mukati kazuba limwi /mukati kama- awa makumi abili atune (24) kali wajana lugwalo lwakusiya mulimu kwaMuzulwidi waNyika.

(2) Mutobeli wa Muzulwidi waNyika ukonzya kusiya mulimu kwiinda mukulemba lugwalo kuMupati waNyika uyelede kwaambila bulumbu bwaZimbabwe aatala akusiya mulimu kwawutobela Muzulwidi waNyika mukati kama –awa asika kumakumi abile atune (24).

97 Kugwisigwa kwa Muzulwidi waNyika

[Mutwe wamakani ulabambilulwa achibeeela 8 (a) chaMulawu 2 wa2021]

(1) Ing'anda Yaansi Yamilawu aNg'anda Yaajulu Yamilawu (Senate) kazili zyakkala aamwi zyavoota zikonzya kuzuminana kuti Muzulwidi waNyika ugwisigwe muchuuno chakwe kuti kakuli kwazuminana bwiingi bwabantu busika chisela chaboonee bajanika mumaanda amulawu wobilwe aaya. Muzulwidi waNyika ukonzya kugwisigwa kuti kakuli—

[kabela kabambilulwa achibeeela 8(b)(i) chaMulawu 2 wa2021]

- (a) wachita mulandu mupati loko;
 - (b) wakachilwa kutobeleyza, kusumpula akukwabilila Kkata lyaMulawu eeli;
 - (c) watyola Kkata lyaMulawu eeli achaali; naakuti
 - (d) wakachilwa kuchita mulimu wakwe nkaambo kakuchembaala, kulemana naakuti kusondoka;
- weelede kulangisisigwa kwiinda muchibeela eechi
- (e) katacheelede kuba achuuno chakuba Muzulwidi waNyika kakutobelwa chibeeela 91(1)(c), naakuti kali mweni chisi (kunze kwakuba bumwenichisi nkabuli bwakupegwa) kwachimwi chisi muchiindi kali muchuuno.

[Kabeela kabikwa achibeeela 8 chaMulawu 2 wa2021]

(2) Kakuli bazuminana kwiinda mukabeela (1), iKkomiti yaNzila Zyameendelezyo aPalyamenti iyelede kugala kakkomiti kaswaanizya bantu bazwa muNg'anda Yaansi Yamilawu amuNg'anda Yaajulu Yamilawu basika kumusanu abane kabasweenene mbuuli mbutwiimvwi tubunga twakweendelezegwa kwanyika tuli muPalyamenti. Kkomiti eeyi iyelede kulangisisya kugwisigwa achuuno kwaMuzulwidi waNyika.

[Kabeela kabambilulwa achibeeela 8 (c) chaMulawu 2 wa2021]

(3) Kuti —

- (a) kakuli ikkomiti yakasalwa kuti ilangisisye kugwisigwa kwaMuzulwidi waNyika, mbuuli zyambidwe mukabeela (2) kalaajulu, yaamba kuti ngagwisigwe achuuno chaMuzulwidi waNyika

[Fuka libambilulwa achibeeela 8 (d)(i) chaMulawu 2 wa2021]

- (b) kakuli iseneti anational assembly, nizyaswaanana zyazuminana kugwisya Muzulwidi waNyika achuun; muzulwidi waNyika ulasiya mulimu

[Fuka libambilulwa achibeeela 8 (d)(ii) chaMulawu 2 wa2021]

Aboobo Muzulwidi waNyika anga wazwa achuuno

[Fuka libambilulwa achibeeela 8 (d) (iii) chaMulawu 2 wa2021]

98 Kukwabililwa kwa Muzulwidi waNyika kuli zyakwaangwa

(1) Kuti kachili achuuno, Muzulwidi waNyika tayeled e kwaangwa akutolwa kunkuta pe nkaambo kabulewusi mbwachita naakuti nzyaaleka kuchita lwakwe.

(2) Ukonza kwaangwa akutolwa kunkuta naasiya chuuno chakuba Muzulwidi waNyika kaangilwa nzyakachita anzyakaleka kuchita katanaba Muzulwidi waNyika naakuti naakali Muzulwidi waNyika.

(3) Zikwelete zyaMupati waNyika zyakazwa muchiindi katanaba Muzulwidi waNyika naakuti nakaba Muzulwidi waNyika ngazyachunzika kubbazu nachili achuuno.

(4) Mukubetekwa kwakwe naazwa achuuno wakali Muzulwidi waNyika kabetekelwa nikuba kabakali kaambo nkakachita ankakaleka kuchita kachili amulimu wakwe, ukonza kulisakwida kaamba kuti wakazichita naakuti wakaleka kuzichita kachitila kukwabilila bukkale bwanyika.

99 Milimu yaBatobela Muzulwidi waNyika

Batobela Muzulwidi waNyika bagwasizya Muzulwidi waNyika kuchita milimu yakwe kabiyo balachita ayimwi milimu njibatumwa aMuzulwidi waNyika kazibikkiliza kweendelezya nikuba uuli Mutabi wafulumende naakuti Mulawu waPalyamenti ngubanooli bategwa bawuyendelezye.

100 Ujisilidi Muzulwidi waNyika

(1) Choонse chiindi kuti Muzulwidi waNyika katamo munyika naakuti katakonzyi kuchita milimu yakwe kwiinda mukuchiswa naakuti nkaambo kachimwi chintu, milimu yakwe yeelede kuchitwa —

- (a) aMutobeli mutaanzi waMuzulwidi waNyika;
- (b) aawo Mutobeli mutaanzi wa Muzulwidi waNyika mpatakonzyi kuchita milimu eeyo, Mutobeli wabili weelede kwiichita; naakuti
- (c) kuti kakuli takukwe Mutobeli waMuzulwidi waNyika uukonzya kuchita milimu yaMuzulwidi waNyika, umwi wabaSilutwe baMitabi yaFulumende—
 - (i) wagalwa aMuzulwidi waNyika kuti achite mulimu waMuzulwidi waNyika; naakuti
 - (ii) wasalwa aNkamu yabaSilutwe baMitabi yafulumende (kkabbineti), kuti kakuli taakwe mweendelezi wamutabi wafulumende wakasalwa aMuzulwidi waNyika kwiinda mufuka (i) lilaajulu.

(2) Aanze kwakuti zilokweendelana aachizuminano chakachitwa abanji baNkamu yabaSilutwe baMitabi yafulumende (kkabbineti) , muntu ujisilidi chuuno cha Muzulwidi waNyika kwiinda mukabeela (i) tayeled e kubelesya manguzu aMuzulwidi waNyika—

- (a) kutuma Basilumamba kunkondo kuti bakalwane;
- (b) kusayina chizuminano chanyika yaZimbabwe chijatikizya manyika manji;
- (c) kusala naakuti kugwisya achuuno Mutobeli wa Muzulwidi waNyika, Silutwe waMutabi waFulumende naakuti Uutobela Silutwe waMutabi waFulumende; naakuti
- (d) kupa milimu naakuti kusandula milimu yaMutobeli wa Muzulwidi waNyika naakuti Silutwe waMutabi waFulumende naakuti uMutobela kubikkikizya kweendelezegwa kwaMulawu waPalyamenti naakuti

chipanzi chamutabi wafulumende naakuti kunyeya akuzimaazyaa milimu njakali kuchita umwi wabaaba bantu baambwa aafulu.

101 Kutolwa kwachuuno chaMuzulwidi waNyika aBamutobela kuti wafwa, wasiya mulimu naakuti katachikonzyi kubeleka

(1) Kakutobelwa chibela (2) a(3), naa muntu waslwa kuba Muzulwidi waNyika kuli iili nsaluuzyo kuti wafwa, wasiya mulimu nnaakuti wagwisigwa achiuno —

- (a) Mutobeli waMuzulwidi waNyika naakuti Bbatobeli naa kakuli batobeli babili, Muitobeli waMuzulwidi wakaba wakuchinka kujata chuuno chaMuzulwidi waNyika kakutobelwa Chibela 100, ulajata chuuno chaMuzulwidi waNyika mane kukabikwe Muzulwidi waNyika mupya kakutobelwa kabela (2); alimwi
- (b) Chuuno chaMuzulwidi waNyika chitakwe muntu cheelede kubwezwa amuntu waslwa akabunga kazyabuleli bwanyika lyiimvwilidwi aMuzulwidi waNyika chiindi nchamuzundano walusaluulo.

(2) Kabunga kazyabuleli bwanyika kalacheelo chakusala muntu kakutobelegwa kabela (1)(b) keeled kazibya Sichuuno waNg'anda yaMulawu Yaansi aatala azina lyawoyo ngukasala kakutanayinda mazuba makkumi muisanu amakkumi one musule akuzwa achiuno kwaMuzulwidi waNyika waliwo achiuno. Kuzwa wwawo waslwa ulatalika mulimu mbuuli Muzulwidi waNyika musule akuchita chikonke chaMuzulwidi waNyika kakutobelwa Chibela 94 kachili chikonke waslaw nchayeleda kuchita kakutanayinda mahola makkumi one alamusau aatatu musule akuti Sichuuno waNg'anda yaMulawu Yaansi kali wapegwa zina lyakwe.

(3) Naa ooyo waslwa kuba Muzulwidi waNyika kuti wafwa, wasiya mulimu naakuti wagwisigwa achiuno alimwi nkatalikwe kabunga kazyabuleli bwanyika naakasalwa, Mutobeli wakwe naakuti kabali babili, Mutobeli waMuzulwidi waNyika wakaba wakuchinka kujata chuuno chaMuzulwidi waNyika kakutobelwa Chibela 100 ubweza chuuno chakuba Muzulwidi waNyika.

[Kabeela kasowegwa achibela 9 chaMulawu 2 wa2021]

102 Mufolo wa Muzulwidi waNyika aBamutobela

(1) Muzulwidi waNyika aBamutobela beeleda kujana mifolo, lumwi lugwasyo lwamali lupegwa babelesi, mpencheni azimwi zyaambidwe muMulawu waPalyamenti.

(2) Mufolo amali zyakubelesya zya Muzulwidi waNyika abamutobela zyeede kuzwa kuNkomo Mpati yaFulumende.

(3) Muntu wakali Muzulwidi waNyika naakuti Uutobela Muzulwidi waNyika weelede kujana—

- (c) Mpencheni iyelene amufolo ufolwa a Muzulwidi waNyika naakuti Uutobela Muzulwidi waNyika uchili achiuno; kabiyo
- (d) lumwi lugwasyo lwamali lupegwa babelesi amulimu azimwi zijanwa mbuuli mbukwaambidwe muMulawu waPalyamenti.

103 Muzulwidi waNyika aBamutobela abamwi bakali bajata zyuuno eezi tabeelede kubeleka uumbi pe mulimu nibasiya zyuuno zyabo

Muzulwidi waNyika aBamutobela abamwi bakali bajata zyuuno eezi tabeelede kubeleka uumbi pe mulimu wafulumende nibasiya zyuuno zyabo naakuti kuchita uumbi mulimu kuti kabachipegwaa mpencheni izwa kuli fulumende yakuba wakali Muzulwidi waNyika naakuti uutobela Muzulwidi waNyika.

BASILUTWE BAMITABI YAFULUMENDE, BABATOBELA ANKAMU YABASILUTWE BAMITABI YAFULUMENDE

104 Kugalwa kwaBasilutwe baMitabi yaFulumende aBabatobela

(1) Muzulwidi waNyika nguwe ugala akupa milimu yaBasilutwe baMitabi yafulumende, kubikkilizya kweendelezegwa kwamilawu isiyene-siyene yakapangwa aPalyamenti. Pesi Muzulwidi waNyika ukonzya kulyeendelezezya lwakwe imwi milawu njayanda kweendelezya lwakwe.

(2) Muzulwidi waNyika ukonzya kugala Batobeli baBasilutwe baMitabi yaFulumende batanoogwasizye kweendelezya mitabi yafulumende.

(3) Basilutwe baMitabi yaFulumende abaBatobela bagalwa kuzwa kubantu bakasalwa kuti bayiminine masena muNg'anda Yamilawu (Palyamenti) kabali maSenata antomwe abaabo bajanika muNational Assembly. Pesi Muzulwidi waNyika ukonzya kubweza bantu, basika kumusanu ababili, balaanje kwaPalyamenti kuti babe Basilutwe bamitabi yafulumende batanooli basalilwa luzibo ndubajisi.

[Kabeela kalabambulwa achibeeala 10 chaMulawu 2 wa2021]

(4) Mukugala Basilutwe baMitabi yaFulumende abaBatobela, Muzulwidi waNyika kweelede wabona kuti bantu bazwa kumasena asiyenesiyene munyika bagalwa antoomwe akubona kuti banakazi abaalumi bagalwa bweelene.

(5) Basilutwe baMitabi yaFulumende abaBatobela batakasalwa kuba bayiminini babantu mung'anda yakupangwa kwamilawu (Palyamenti) bakonzya kukkala akuyooma mung'anda yakupangwa kwamilawu pesi tabakonzyi kuvoota muNg'anda Yaajulu Yamilawu (Senate) amuNg'anda Yaansi Yamilawu.

(6) Kabatana kutilika mulimu bakagalwa kuba Basilutwe baMitabi yaFulumende abaBatobela kweelede bachita chikonke kunembo lya Muzulwidi waNyika, chikonke chaBasilutwe baMitabi yaFulumende mbuuli mbuchilembedwe muMpampikwa Yatatu.

105 Nkamu Yabasilutwe Bamitabi Yafulumende

(1) Kuli Nkamu ya Basilutwe baMitabi yaFulumende ijatikizya; Muzulwidi waNyika, kali nguSilutwe waNkamu eeyi, Batobela Muzulwidi waNyika antoomwe aBasilutwe baMitabi yaFulumende boonse bakagalwa.

(2) Sichuuno wamiswaangano yaNkamu yaBasilutwe baMitabi yaFulumende Muzulwidi waNyika pesi kuti katawo umwi waBatobela baMuzulwidi waNyika ukonzya kuba sichuuno wankamu eeyi kuti kabatawo umwi waBasilutwe baMitabi yaFulumende ukonzya kuba sichuuno mbuuli mbukwaambidwe muchibeeala 100(1)(c).

106 Mbubelede kubeleka akulijata Batobela Muzulwidi waNyika, Basilutwe baMitabi yaFulumende abaBatobela

(1) Boonse Batobela Muzulwidi waNyika, Basilutwe baMitabi yaFulumende abaBatobela beeledge kuchita milimu yabo antoomwe akulijata munzila iyendelana aKkata lyaMulawu eeli.

(2) Muchiindi nibachili muzyuuno zyabo Batobela Muzulwidi waNyika, Basilutwe baMitabi yaFulumende abaBatobela tabakonzyi,—

(a) kubeleka uumbi mulimu wafulumende naakuti kubeleka uumbi mulimu ubapa mufolo;

(b) kulijata munzila isiyene aziyandwa amilimu yabo naakuti kuliyanika kuzintu zinga zilabalwanisa ziyandwa aamilimu yabo azeezyo nzibayanda beni mubuumi, naakuti

(c) kubelesya zyuuno zyabo naakuti luzibo ndubalaalo lweendelene azyamilimu yabo kuti balinotye lwabo naakuti bajane zimwi zintu munzila itali kabotu kababelesya zyuuno zyabo.

(3) Mulawu upangwa aPalyamenti weelete kupandulula kaboutu mbubelede kulijata Batobela Muzulwidi waNyika, Basilutwe baMitabi yaFulumende abaBatobela.

107 Kufolomwa kwa Batobela Muzulwidi waNyika, Basilutwe baMitabi yaFulumende abaBatobela

(1) Kwiinda muKkata lyaMulawu eeli, boonse Batobela Muzulwidi waNyika, Basilutwe baMitabi yaFulumende abaBatobela bafolomwa aMuzulwidi waNyika ooyo ubona mabelekelo aabo,

(2) Boonse Batobela Muzulwidi waNyika, Basilutwe baMitabi yaFulumende abaBatobela beelete kunjila mung'anda yakupangwa kwamilawu muPalyamenti antoomwe amumakkomiti aPalyamenti nkukuti kabagwasizya kusandula mibuzyo iyendelana amitabi njibazulwida.

108 Bulamfu bwachiindi chakubeleka mulimu waBasilutwe baMitabi yaFulumende abaBatobela

(1) Chuuno chaBasilutwe bwaMutabi waFulumende naakuti Uumutobela chikonzya kusyala kachitakwe muntu kuti —

- (a) Muzulwidi waNyika wagwisya ooyo wali Silutwe waMutabi waFulumende;
- (b) kuti wajisi chuuno chaBasilutwe bwaMutabi waFulumende wasiya mulimu akuyanda kwakwe kwiinda mukulemba chizibisyo kuMuzulwidi waNyika chaamba kusiya mulimu kwakwe;
- (c) kwanjila Muzulwidi waNyika mupya.

(2) Kwiinda mukabeela (4), Silutwe waMutabi waFulumende naakuti Uumutobela wakali mwiiminini mung'anda yamulawu naakagalwa kuba Silutwe waMutabi waFulumende naakuti Uumutobela, usiya chuuno chakwe kuti waleka kuba mwiiminini wabantu mung'anda yakupanga milawu (Palyamenti).

(3) Kwiinda mukabeela (4) Silutwe waMutabi waFulumende naakuti Uumutobela wakatali mwiiminini mung'anda yamulawu naakadomwa kuba Silutwe waMutabi waFulumende naakuti Uumutobela, usiya chuuno chakwe kuti waba mwiiminini wabantu mung'anda yakupanga milawu (Palyamenti).

(4) Kwiinda muKkata lyaMulawu eeli, kuti Palyamenti yazimaazigwa/ yamwayika, Basilutwe baMitabi yaFulumende abaBatobela beelete kweendelela nembo kabachita milimu yabo kusikila Muzulwidi waNyika mupya wataanguna mulimu nikwiinda nsaluuzyo.

109 Vooti yakutondeezya kubula lusyomo muli Fulumende

(1) Ing'anda Yaajulu Yamilawu aNg'anda Yaansi Yamilawu kazisweenene zikonzya kupanga chizuminano chazuminanwa abantu basika kuntompa-chaala yabantu boonse bajanika mumaanda obile, bakonzya kutondeezya kubula lusyomo muli fulumende.

(2) Mutwe wanjoomo yakuyanda kutondeezya kubula lusyomo muli fulumende ikonzya kutalikwa kwaambuuwlwa kuti—

- (a) kwapegwaa chizibisyo kuli Sichuuno waNg'anda Yaansi Yamilawu chakuyanda kuzoonjizya njoomo eeyo mumazuba musanu awabili aaza; kabiyo
 - (b) kakuli chizibisyo chanjoomo chakasayinwa abantu bayinda chisela chabaabo bajanika muNg'anda Yaansi Yamilawu.
- (3) Njoomo yakuyanda kutondeezya kubula lusyomo muli fulumende —

- (a) iyelede kuyoomwa kazisweenene Ng'anda Yaajulu Yamilawu aNg'anda Yaansi Yamilawu mukati kamazuba makumi abili aazuba limwi (21) kali wakatambula chizibisylo Sichuno; kabiyo
 - (b) iyelede kuvoottwa akugomenwa/kumaninsigwa mukati kamiswaangano itayindi musanu ayibili pe kuzwa mpubakatalika kuswaanana kuyooma kaambo aaka, kuti teebachita boobo njoomo eeyi ilayangala.
- (4) Kuti Palyamenti yazwa achizuminano chakubula lusyomo muli fulumende, Muzulwidi waNyika weelede, mukati kamazuba kkumi awane kuzwa mpuchakapangwa chizuminano chaPalyamenti —
- (a) wabagwisya azyuuno zyabo boonse Basilutwe baMitabi yaFulumende abaBatobela, kuti kakuli teebakali basiya kale abalikke milimu kuzwa buunsi chizuminano chaPalyamenti nichakachitwa; naakuti
 - (b) kutatuula Palyamenti mpawo akwiitilizya nsaluuzyo zimbi mukati kamazuba asika kumakumi ali musanu amakumi aane (90).
- (5) Kuti Muzulwidi waNyika taachita zyaambidwe mukabeela (4) mukati kamazuba ali kkumi aamazuba aane (14) kakuli chizuminano chaPalyamenti chachitwa chakutondeezya kubula lusyomo muli fulumende, Palyamenti inooli yayangala kale zili mumulawu.

CHIBAKA 4

MILIMU YABASILUTWE BAFULUMENDE

110 Milimu yaMuzulwidi waNyika aNkamu yaBasilutwe baMitabi yaFulumende

- (1) Muzulwidi waNyika ujisi manguzu ngapegwa aKkata lyaMulawu eeli antoomwe amulawu waPalyamenti naakuti imwi milawu kuti ayendelezye milimu yachuuno chaMuzulwidi waNyika.
- (2) Kwiinda muKkata lyaMulawu eeli, Muzulwidi waNyika ulaamukuli wakuchita milimu eeyi—
- (a) kuzumina akusayina milawu;
 - (b) kutola malembe amulawu kuNkuta yaKkata lyaMulawu kuti amvwe maboneno aankuta eeyi atala amalembe amulawu aayo;
 - (c) kwiita bayiminini bamuNg'anda Yaajulu yaMilawu abamuNg'anda Yaansi yaMilawu naakuti Palyamenti kuti baswaanane muchiindi nchibatayebolede kuswaanana kuchitila kuti bachite mulimu ngubatanooli batumwa mung'anda yakupanga milawu;
 - (d) kugala bantu kuti banjile muzyuuno zyaambidwe aKkata lyaMulawu aawo mpukuyandikana kuti Muzulwidi waNyika achite mbubo;
 - (e) kwiitala nsaluuzyo kwiinda muKkata lyaMulawu eeli;
 - (f) kwiitala malefulandamu kuti achitwe aawo mpaayeolede kuchitwa kwiinda mumulawu;
 - (g) kutuma Basilumamba kunkondo/kumulimu;
 - (h) kupa bantu zipo zyabulemu nkaambo kamilimu mipati njibakachitila nyika;
 - (i) kugala bayiminini banyika kulaamwi manyika, abamwi bazyuuno zyeendelene akwiimkilila nyika kuli zimwi nyika; kabiyo
 - (j) kutambula baabo bayimvwilidi nyika zimbi munyika yesu;

(3) Kwiinda muKkata lyaMulawu eeli, Nkamu yaBasilutwe baMitabi yaFulumende bajisi mukuli wa —

- (a) kweendelezya milimu yaMitabi yaFulumende;
- (b) kweendelezya milimu yafulumende muPalyamenti;
- (c) kubambila, kutalika akweendelezya milawu yanyika;
- (d) kupanga akweendelezya mapolisi anyika; kabiyo
- (e) kupa Muzulwidi waNyika busongo amizeeo atala azintu zinji.

(4) Kwiinda muKkata lyaMulawu eeli, Muzulwidi waNyika ukonzya kuchita zizuminano amanyika /bafulumende bamanyika aambi antoomwe atubunga tujatikizya manyika manji.

(5) Nzyawamba kuti zichitwe Muzulwidi waNyika kweelede zyabikkwa mumalembe nkukuti zitambulike.

(6) Mukuchita milimu yakwe Muzulwidi waNyika kweelede kapegwa mizeeo aNkamu yaBasilutwe baMitabi yaFulumende, aanze kwakuti ulokuchita milimu iyendelana azyaambidwe mukabeela (2) ajulu.

111 Nkondo aluumuno

(1) Muzulwidi waNyika ulaamanguzu akutalika nkondo akwiimikizya nkondo kabiyo weelede kwaambila Ng'anda Yaajulu Yamilawu aNg'anda Yaansi Yamilawu mukati kamazuba musanu awabili (7) kuti wabelesya manguzu aakwe kutalika nkondo akwiimikizya nkondo.

(2) INg'anda Yamilawu Yaajulu aNg'anda Yamilawu Yaansi kuti zyaswaanana zyachita chizuminano chabantu basika kuntompa-chaala yabantu bajanika mumaanda obile (Palyamenti), bakonzya kuzuminana kwiimikizya nkondo yali yatalikwa a Muzulwidi waNyika.

(3) Aawo Palyamenti mpuyachita chizuminano chakwiimikizya nkondo, Muzulwidi waNyika uyelede kutola ntaamo zyakwiimikizya nkondo yali yatalika pesi kalokubona kabiyo kuti banaZimbabwe boonse antomwe alubono lwanyika zili kwabilidwe.

112 Nguzu zyakulekelela

(1) Muzulwidi waNyika, kwiinda mukuzuwa aNkamu yabaSilutwe baMitabi yaFulumende, ukonzya kubelesya nguzu zyakulekelela, eezi kazyamma —

- (a) kulekelela naba uuli muntu wajanwa kajisi mulandu nikuba wawuli mulawu;
- (b) kulekelela kuti muntu tapegwi chisubulo chamulandu ngwali wajatwa kalaawo;
- (c) kusandula chisubulo chali chilemu chibe chuuba nchali wapegwa muntu wasunda; naakuti
- (d) kusowa yoonse naakuti chipanzi chachisubulo chali chapegwa muntu wajanwa kalaamulandu; ukonzya kwaamba mbukweelede kweenzegwa kulekelelwa kwachitwa muntu ooyo.

(2) Kuti muntu wamu Zimbabwe wajanwa kalaamundu ankuta yakunyika iimbi nkwasundila mulandu kwiinda mumilawu yanyika eeyo, Muzulwidi waNyika yaZimbabwe ukonzya kwaamba kuti mulandu wakasundwa kunyika ooko teemulandu pe mumulawu wamuZimbabwe.

(3) Kulekelela kwachitwa aMuzulwidi waNyika naakuti kuubulwa akugwisigwa kwachisubulo kweelede kudindwa akumwaywa mupepa lyaluundu litegwa *Gazette*.

113 Chiimo chalupyopyongano lwaluundu

(1) Muzulwidi waNyika ukonzya koompolola chiimo chalupyopyongano lwaluundu munyika naakuti muli chimwi chibela chanyika yaZimbabwe.

(2) Koompololwa kwachiimo chalupyopyongano lwaluundu kulayangala kuti kakuli taakwe chachitwa mukati kamazuba kkumi amazuba aane kuzwa buunsi bwamoompololo, kudindwa akumwaywa chiimo chalupyopyongano. Pesi kuti katanayinda mazuba kkumi amazuba aane koompololwa kwachiimo chalupyopyongano kwasimatizigwa aPalyamenti kazisweenene Ng'anda Yaajulu Yamilawu aNg'anda Yaansi Yamilawu kwiinda mubwiingi bwabantu basika kuntompa-chaala bwabayiminini bamasena bajanika mumaanda aPalyamenti.

(3) Kuti Palyamenti yazimaazigwa mukati kamazuba aayo ali kkumi amazuba aane kachili choompololwa chiimo chalupyopyongano, moompololo ooyo ulayangala nikwiinda mazuba asika makumi abili alazuba limwi (21) kubikkikizya zuba lyakudindwa akumwaywa kwamoompololo, aanze kwakuti mukati kamazuba ngawaayo moompololo wasimatizigwa lubo abunji bwabayiminini bamuPalyamenti kazisweenene Ng'anda Yaajulu Yamilawu aNg'anda Yaansi Yamilawu.

(4) Moompololo wachiimo chalupyopyongano wachitwa kwiinda mutubeela (2) naakuti (3) unolaanguzu kusika kwiinda chiindi chamyeesi itatu kuzwa buunsi moompololo nuwadindwa akumwaywa, aanze kwakuti wakakwa moompololo ooyo.

(5) Kuti kakuli moompololo wachiimo chalupyopyongano tewazumininwa aPalyamenti naakuti nkaambo kabumwi bupanduluzi tewazumininwa aPalyamenti mukati kamazuba awambidwe muchibela eechi, Muzulwizi waNyika weelete kuti mukati kamazuba musanu awabili wazimaazya moompololo ngwakali wachita.

(6) Kuti kakuli Palyamenti yazuminana, kazili zyaswaanana ng'anda zyakupangwa kwamilawu yaansi ayakujulu, kuti moompololo wachiimo chalupyopyongano—

(a) weelete uyinkilile kunembo kwachiindi chitayindi myeezi yotatwe, Muzulwidi waNyika kweelede achakufwambaana walampya bulamfu bwachiindi chamoopololo kwiinda mukudinda mu*Gazette*;

(b) weelete uzimaasigwe naakuti ubeleke mibusena buniini, Muzulwidi waNyika kweelede achakufwambaana wazimaazya moompololo ooyo naakuti wachita moompololo ulangene abusena buniini peepe nyika yoonse.

(7) Inkuta yazyakata lyaMulawu kuti yeetelwa kaambo awumwi muntu kalangene amoopololo, ikonzya kupa maboneno aayo aatala —

(a) abwiime bwamoompololo wakachitwa wachiimo chalupyopyongano mumulawu;

(b) kuyungizigwa kwachiindi chamoopololo wachiimo chalupyopyongano.

(8) Nikuba iili nkuta ikonzya kulangalanga bwiime bwamulawu wakapangwa naakuti zyakachitwa nuwakachitwa moopololo wachiimo chalupyopyongano.

CHIBAKA 5

NABBATULE WA~~BASIKUSO~~ SELA MILANDU MU~~NKUTA~~

114 Nabbatule waBasikusosela Milandu muNkuta

(1) Kuli Nabbatule waBasikusosela Milandu Munkuta ugalwa aMuzulwidi waNyika

(2) Muntu wagalwa kuba Nabbatule waBasikusosela Milandu muNkuta utaanguna mulimu naamana kuchita chikonke chijanika muMpampikwa Yatatu kunembo lyaMuzulwidi

waNyika naakuti umwi muntu wapegwa mvumo aMuzulwidi waNyika kuti amuchitisye chikonke.

(3) Muntu uyelela kugalwa kuba Nabbatule waBasikusosela Milandu muNkuta kuti kakuli ulaazyo ziyandikana kuti agalwe kuba Jaji wakuNkuta Yaajulu.

(4) Milimu yaNabbatule waBasikusosela Milandu muNkuta njeyi—

- (a) kuba mupati-kampatila mukupa mizeeo aatala azyamilawu kuli fulumende;
- (b) kwiimikilila fulumende munkuta;
- (c) kulemba milawu kayimvwilidi fulumende;
- (d) kusumpula, kukwabilila akulemeka mulawu antoomwe akukwabilila zeezyo zigwasya luundu muli zyamilawu; kabiyo
- (e) kuchita niiba iili milimu njanga ulapegwa kwiinda mumulawu upangwa aPalyamenti.

Nabbatule waBasikusosela Milandu muNkuta ukonzya kuchita milimu yoonse eeyi lwakwe naakuti kwiinda mubabelesi balaansi lyakwe

(5) Nabbatule waBasikusosela Milandu muNkuta ukonzya —

- (a) kukkanla mumiswaangano yaBasilutwe baMitabi yaFulumende (kkabbineti), pesi tajisi nguzu zyakuvoata;
- (b) kukkanla akwaambuula muNg'anda Yaajulu Yamilawu (Senete) amuNg'anda Yaansi Yamilawu , pesi tajisi nguzu zyakuvoata pe; kabiyo
- (c) kulidilana ankuta mumilandu itanjizyi fulumende pe.

115 Kugwisigwa kwaNabbatule waBasikusosela Milandu Munkuta

Muzulwidi waNyika ukonzya kugwisya Nabbatule waBasikusosela Milandu Munkuta fumbwa chili chiindi nchaayanda.

CHAANDAANO 6

BASIKUPANGA MILAWU

CHIBAKA 1

NGUZU ZYAKUPANGA MILAWU

116 Basikupanga Milawu

Basikupanga milawu muZimbabwe babikkilizya Palyamenti antoomwe aMuzulwidi waNyika bachita milimu yabo kwiinda muChaandaano eechi.

117 Bube abwiime bwanguzu zyakupanga milawu

(1) Nguzu zyakupanga milawu muZimbabwe zizwa kubulumbu bwanyika kabiyo zyeendelezegwa abasikupanga milawu kwiinda mumalayilile ajanika muKkata lyaMulawu eeli.

(2) Nguzu zyakupanga milawu zipegwa basikupanga milawu kwiinda mumanguzu—

- (a) akubambilula Kkata Laymulawu eeli kwiinda muchibela 328;
- (b) akupanga milawu yakweeta luumuno akweendelezegwa kabotu kwanyika yaZimbabwe, kabiyo

(c) akupa nguzu zyakupanga milawu kuli zimwi mbunga naakuti tubunga kwiinda muchibeeela 134.

CHIBAKA 2

PALYAMENTI

118 Palyamenti

Palyamenti ijisi maanda obile:- Ng'anda Yaajulu Yamilawu aNg'anda Yaansi Yamilawu.

119 Mulimu waPalyamenti

(1) Palyamenti iyelede kukwabilila Kkata lyaMulawu eeli antoomwe akusumpula bulelo bwajandabanji muZimbabwe.

(2) Palyamenti ijisi manguzu akubona kuti zyaambidwe muKkata lyaMulawu eeli zyasumpulwa kabiyo tubunga ambunga zyafulumende kuzibeeela zyoonse zyanyika, kuzwida kujulu kuyoosika aansi, zyatobeleyza Kkata lyaMulawu aziyandwa aachisi mbuchizulwa.

(3) Kwiinda mukabeela (2), Palyamenti ijisi manguzu akubona mabelekelo ambunga antomwe atubunga twafulumende toonse kuzibeeela zyoonse zyanyika.

CHIBAKA 3

NG'ANDA YAAJULU YAMILAWU

120 Bubumbwe bwa Ng'anda Yaajulu Yamilawu

(1) Ng'anda Yaajulu yaMilawu ijisi bantu basika kumakumi musanu alaamakumi otatwe (80), kakuli —

(a) bali musanu awumwi ,6, basalwa kuzwa muZilikiti zyamuZimbabwe zyoonse kwiinda muchiimbo chakwiimkililana kakuya abwiingi bwabantu mbuuli mbukwaambidwe mukabeela (2);

(b) bali kkumi amusanu awumwi ,16, mbaSimwaami kakuli bobile basalwa aKkansili YaBaami yachimwi achimwi chilikiti aanze kwazilikiti zyamumadolopo mapati.

(c) Muzulwidi waKkansili yaBaami Yanyika Yoonse antoomwe aWumutobela;

(d) bibili ,2, bayimvwilidi bantu balemene mbuuli mbuzyaambidwe muMulawu waNsaluuzyo.

(2) kusalwa kwamaSeneta kweelede kuchitwa kwiinda muMulawu waNsaluuzyo (Electoral Law) zyakuti kweelede kwabonwa kuti kusalwa kwabo kuchitidwe munzila ibikkilizya tubunga twazyanyika antoomwe akwiimkililwa kwabantu.

(a) zyeendelana amavooti akajanwa mukusalwa kwabayiminini batubunga twazyanyika muli chimwi achimwi chilikiti munsaluuzyo zyakuyanduula bazulwidi bayiminina bantu muNg'anda Yaansi Yamilawu; kabiyi

(b) zyakuti boonse banakazi abaalumi bayanda kwiiminina kusalwa kuba bazulwidi balembea bweelene pesi zina taanzi mukulembwa kalili lyamwanakazi.

121 Ziyandikana kuti muntu asalwe antoomwe azinga zilapa kuti akakilwe kwiimikila bantu muNg'anda Yaajulu yaMilawu

(1) Muntu ukonzya kwiimikila kuti asalwe kuba Seneta mbuuli zyaambwa muchibeela 120(1)(a) naakuti (d) kuti kakul —

- (a) ulembesezye kuvoota;
- (b) ujisi minyaka isika naakuti kwiinda makumi aane;

aanze kwakuti wakasigwa kwiiminina bantu kwiinda mukabeela (4) naakuti (5).

(2) Muntu ukonzya kwiimikila kuti asalwe kuba Seneta Mwaami mbuuli zyaambwa muchibeela 120(1)(b) kuti kakuli:-

- (a) ujisi chuuno chabwaami muluundu;
 - (b) ulembesezye kuvoota;
- aanze kwakuti wakasigwa kwiiminina bantu kwiinda mukabeela (4) naakuti (5).

(3) Muntu ukonzya kwiimikila kuti asalwe kuba Seneta mbuuli zyaambwa muchibeela 120(1)(b) kuti kakuli muntu uulemene mbuuli mbukupandulwidwe muMulawu waNsaluuzyo, aanze kwakuti ulakasigwa kwiinda mukabeela (4) naakuti (5).

(4) Muntu ukasigwa kwiimikila kuti asalwe kuba Seneta kuti kakuli —

- (a) ulakasigwa kwiinda muMpampikwa Yane kuti alembesye kuvoota;
- (b) mukati kaminyaka musanu kakutana kuchitwa nsaluuzyo, wakasiya chuuno chabuSeneta naakuti chakwiimikilila bantu muNg'anda Yaansi Yamilawu kwiinda muchibeela 129(1)(i) nkaambo kakuti wakajanika kalaamulandu ankuta..

(5) Muntu ukasigwa kwiimikila kuti anjile munsaluuzyo zyakusala mwiiiminini wakazwa/wakafwa wakali Seneta kuti kakuli uyimvwilidi bumwi kale busena muPalyamenti.

122 Muzulwidi waNg'anda Yaajulu yaMilawu

(1) Buunsi butaanzi nibaswaanana, mung'anda yamilawu, bantu bakasalwa kuba maSeneta kweelede, kabatana chita chimwi chintu, basala umwi wabo kuti abe Muzulwidi waSeneti utabe sichuuno nibachita njoomo zyabo mung'anda yamilawu eeyi.

(2) Chonse chiindi chuuno chaMuzulwidi waSeneti nichasyala kachitakwe muntu kweelede kwasalwa uumbi muntu sikukkala achuuno eechi.

(3) Muntu ukonzya kusalwa kuba Muzulwidi waSeneti kuti kakuli wakali waba Seneta kale naakuti ulazyo zipa kuti asalwe kuba Seneta.

(4) Nsaluuzyo zyakusala Muzulwidi waSeneti zyeelede kweendelezegwa aMulembi Mupati waPalyamenti kagwasigwa aKkomishini yaNsaluuzyo muZimbabwe. Nsaluuzyo yansiswa kweelede yabelesegwa nikusalwa Muzulwidi waSeneti kabiyo butebuzi bwansaluuzyo bwazibisigwa mpawaawo.

(5) Katana talisya mulimu wakwe Muzulwidi waSeneti kweelede wachita chikonke chamulimu wakwe kunembo lyaduundumuntule waBabetesi naakuti umwi mubetesi umutobela uliwo mbuuli mbukwaambidwe muMpampikwa Yatatu.

(6) Muntu wasalwa kuba Muzulwidi waSeneti ngampawo wasiya chuuno chakwe chabuSeneta nkaako kweelede kwachitwa nsaluuzyo mubusena mbwakali kwiimikilila kuti kusalwe umbi Seneta utayiminine busena oobo.

(7) Muzulwidi waSeneti ukonzya kusiya chuuno chakwe kuti wayanda, kwiinda mukuzibisyia maSeneta lwakwe. Pesi kuti Ng'anda Yaajulu Yamilawu njazulwida kitalokubeleka chiindi nayanda kusiya chuuno chakwe, ukonzya kupa Mulembi Mupati waPalyamenti chizibisyo chakwe chilembedwe aatala akuyanda kusiya chuuno chakwe.

- (8) Muzulwidi waSeneti weelede kusiya chuuno chakwe kuti—
- (a) buunsi Ng'anda Yaajulu Yamilawu njazulwida niyasmaanana kwakutaanguna kuzwa nikwachitwa nsaluuzyo zyakusala bazulwidi basiyenesiyene bapya naakuti maSeneta mapya;
 - (b) naatambula chimbi chuuno chamulimu wafulumende naakuti kuti naanjila uumbi mulimu uteensi wafulumende;
 - (c) naaba Mwiiminini wabantu mu Ng'anda Yaansi Yamilawu naakuti kuba Sichuuno wa Ng'anda Yaansi Yamilawu;
 - (d) naaba Mutobeli waMuzulwidi waNyika, Silutwe waMutabi waFulumende naakuti Uutobela Silutwe waMutabi waFulumende;
 - (e) nikwaba zinga zilamwaangila kuti asiye chuuno chakwe kuti kakuli wakali Seneta; naakuti
 - (f) kuti kakuli kwaba chizuminano akati kamaSeneta chakumugwisya achuuno chakwe, chizuminano eechi chachitwa amaSeneta asika kuntompa-chaala yamaSeneta wonse ajanika mung'anda eeyi.

123 Mutobeli waMuzulwidi waNg'anda Yaajulu yaMilawu

(1) Mbubatamanne biyo kusala Muzulwidi waSeneti, maSeneta ayelede kusala umwi wabo kuti abe Mutobeli waMuzulwidi waSeneti.

(2) Choонсе chiindi kuti wazwa walaachuuno chaMutobeli waMuzulwidi waSeneti kweelede basala uumbi Seneta kuti abweze chuuno eechi.

(3) Nsaluuzyo zyakusala Mutobeli waMuzulwidi waSeneti zyeede kweendelezegwa aMulembi Mupati waPalyamenti kagwasigwa aKkomishini yaNsaluuzyo muZimbabwe. Nsaluuzyo yansiswa kweelede yabelesegwa nikusalwa Muzulwidi waSeneti kabiyo butebuzi bwansaluuzyo bwazibisigwa mpawaawo.

(4) Katana talisya mulimu wakwe Mutobeli waMuzulwidi waSeneti kweelede wachita chikonke chamulimu wakwe kunembo lyDuundumuntule waBabeseti naakuti umwi mubetesu umutobela uliwo mbuuli mbukwaambidwe muMpampikwa Yatatu.

(5) Mutobeli waMuzulwidi waSeneti ukonzya kusiya chuuno chakwe kuti wayanda kwiinda mukuzibisa Seneti lwakwe mwini. Pesi kuti Ng'anda Yaajulu Yamilawu njazulwida kitalokubeleka chiindi nayanda kusiya chuuno chakwe, ukonzya kupa Muzulwidi waSeneti chizibisyo chilembedwe. Pesi kuti katawo Muzulwidi waSeneti ukonzya kupa Mulembi Mupati waPalyamenti.

- (6) Mutobeli waMuzulwidi waSeneti weelede kusiya chuuno chakwe kuti—
- (a) nikwamana kuba Seneta kwakwe;
 - (b) naaba Sichuuno wamu Ng'anda Yaansi Yamilawu;
 - (c) naaba Mutobeli waMuzulwidi waNyika, Silutwe waMutabi waFulumende naakuti Uutobela Silutwe waMutabi waFulumende;
 - (d) kuti kakuli kwaba chizuminano akati kamaSeneta chakumugwisya achuuno chakwe, chizuminano eechi chachitwa amaSeneta asika kuntompa-chaala yamaSeneta wonse ajanika mung'anda eeyi.

CHIBAKA 4

NG'ANDA YAANSI YAMILAWU

124 Bubumbwe bwaNg'anda Yaansi Yamilawu

(1) Ng'anda Yaansi Yamilawu iyimvwi boobu —

- (a) bantu basika myaanda yobile ilaakkumi lyabantu mbaabo banga basalwa kwiinda munsaluuzyo kuzwa kumasena ngibayiminina mung'anda eeyi asika kumyaanda yobile ilaakkumi akagaanunwa munyika yaZimbabwe yoonse; kabiyo
 - (b) muchiindi chansaluuzyo zyone zitazoochitwe kazitobelana kuzwa buunsi
Kkata lyaMulawu eeli nilyatalika kubeleka, kweelede kakusalwa banakazi basika kumakkumi musanu alimwi (60). Musanu awumwi ,6, kabazwa muli chimwi achimwi chazilikiti zyaZimbabwe basalwa kwiinda mutubunga tweendelezya zyanyika kwiinda muchiimbo chakwiimikilana mubuvule kaziya amavooti ajanwa kamwi akamwi katubunga tweendelezya zyanyika muzilikiti.
- [Fuka libambululwa achibeela 11 (a) chaMulawu 2 wa2021]
- (c) bamwi biiminini babachikula balikkumi, zyaamba abntu balaminyaka yakuzyalwa iitalika kumakkumi obile awumwi kuyojinka kumakkumi atatu alamusanu, chilikiti chimwi achimwi chaZimbabwe chilamwiiminini womwe uusalwe munsi ampampikwa yakabunga kazyabuleli bwachisi munsi aanzila yakwiiminina yakweelenanisa kuzwa kumyeelwe yabantu bakavotela kabunga kazyabuleli bwanyika muchilikiti eecho—
 - (i) iyeme munsi anzila yakwiiminina yakweelanisa kwatubunga twabuleli bwachisi amyeelwe yamavoti atanoli ajanwa kunsaluuzyo yabiiminini bachilikiti; alimwi
 - (ii) bazundana bachaalumi abachikayintu babikidwe kabiinzizyania:
Naa kakuli kuti tubunga twabuleli bwachisi tulasisimpizya kuti —
 - (a) biiminini bachikayintu balikkumi aakati kwamakkumi musanu akkumi lyomwe bali aansi amyaaka makkumi otatwe alamusanu;
 - (b) bachikayintu balabulema biimininwe ampampikwa zizwa kutubunga twazyabuleli bwachisi twabo
 - (c) bachikayintu bachikula balabulema biimininwe kumpampikwa yatibunga twabo twazyabuleli bwachisi kakutobelwa Mulawu waPalyamenti.

[Fuka lyabikwa achibeela 11(b) chaMulawu 2 wa2021]

(2) Nsaluuzyo zyabayiminini babantu bakkala mu Ng'anda Yaansi Yamilawu kweelede zyachitwa kakutobelezegwa Mulawu waNsaluuzyo.

(3) Nzyayelete kuba aazyo muntu kuti alembesyе kuvoota kabiyo akuvootelа ngwayanda munsaluuzyo yabayiminini babantu mu Ng'anda Yaansi Yamilawu, zilaambidwe muMpampikwa Yane.

125 Ziyandikana kuti muntu asalwe antoomwe azinga zilapa kuti akakilwe kuba mwiiminini wabantu mu Ng'anda Yaansi Yamilawu

(1) Muntu ulatambulwa kuti ayimine kusalwa kuba mwiiminini wabantu mu Ng'anda Yaansi Yamilawu kuti kakuli —

- (a) ulembesezye kuvoota;
- (b) ujisi minyaka isika naakuti iyinda makumi obile awumwi (21);aanze kwakuti wakasigwa kwiiminina bantu kwiinda muli zyaambidwe mukabeela (2) naakuti (3).

(2) Muntu ulakasigwa kuti asalwe kuba mwiiminini wabantu mu Ng'anda Yaansi Yamilawu kuti kakuli —

- (a) wakasigwa kwiinda muMpampikwa Yane kuti alembesyе kuvoota;
- (b) mukati kaminyaka musanu kakutana kuchitwa nsaluuzyo, wakasiya chuuno chabuSeneta/naakuti chakwiimikilila bantu muNg'anda Yaansi

Yamilawu kwiinda muchibeeala 129(1)(i) nkaambo kakuti wakajanika kalaamulandu ankuta.

(3) Muntu ukasigwa kwiimikila kuti anjile munsaluuzyo zyakusala mwiiminini wakazwa/wakafwa wakali *MP* kuti kakuli uyimvwilidi bumwi kale busena kali MP muPalyamenti.

126 Sichuuno waNg'anda Yaansi Yamilawu

(1) Buunsi butaanzi nibaswaanana bantu bakasalwa kuba bayiminini bamu Ng'anda Yaansi Yamilawu kweelede, kabatana chita chimwi chintu, basala Sichuuno utanoobe sichuuno nibachita njoomo zyabo mung'anda yamilawu eeyi.

(2) Choонse chiindi naasiya chuuno chabu Sichuuno kweelede, achakufwambaana, kwasalwa uumbi sikukkala achiuno eechi.

(3) Muntu ukonzya kusalwa kuba Sichuuno wa Ng'anda Yaansi Yamilawu kuti kakuli wakali waba *MP* kale nsiku naakuti ulaazyo zipa kuti asalwe kuba *MP*.

(4) Nsaluuzyo zyakusala Sichuuno zyelede kweendelezegwa aMulembi Mupati waPalyamenti kagwasigwa aKkomishini yaNsaluuzyo muZimbabwe. Nsaluuzyo yansiswa kweelede yatobelezegwa nikusalwa Sichuuno kabiyo butebuzi bwansaluuzyo bwazibisigwa mpawaawo.

(5) Katana talisa mulimu wakwe Sichuuno kweelede wachita chikonke kunembo lyu Duundumuntule waBabesi naakuti umwi mubetesi umutobela uliwo mbuuli mbukwaambidwe muMpampikwa Yatatu.

(6) Muntu wasalwa kuba Sichuuno ngampawo wasiya chuuno chakwe chabu *MP* nkaako kweelede kwachitwa nsaluuzyo mibusena mbwakali kwiimikilila kuti kusalwe uumbi *MP*/ mwiiminini wabusena oobo kakutobelezegwa Mulawu waNsaluuzyo.

(7) Sichuuno ukonzya kusiya chuuno chakwe kuti wayanda kwiinda mukuzibisya maMP lwakwe. Pesi kuti Ng'anda Yaansi Yamilawu njazulwida kitalokubeleka chiindi nayanda kusiya chuuno chakwe, ukonzya kulemba chizibisyo chakusya mulimu wakwe wapa Mulembi Mupati waPalyamenti,

(8) Sichuuno weelede kusiya chuuno chakwe kuti —

- (a) buunsi Ng'anda Yaansi Yamilawu njazulwida niyaswaanana kwakutaanguna kuzwa nikwachitwa nsaluuzyo zyakusala maMP aambil;
- (b) naatambula chimbi chuuno chamulimu wafulumende naakuti kuti waanjila uumbi mulimu utensi wafulumende;
- (c) naaba Mwiiminini wabantu mu Ng'anda Yaansi Yamilawu naakuti kuba Muzulwidi waSeneti/waNg'anda Yaajulu Yamilawu;
- (d) naaba Mutobeli waMuzulwidi waNyika, Silutwe waMutabi waFulumende naakuti Uutobela Silutwe waMutabi waFulumende;
- (e) nikwaba zinga zilapa kuti asiye chuuno chakwe; kuti kakuli wakali mwiiminini wabusena muPalyamenti; naakuti
- (f) kuti kakuli kwaba chizuminano akati kamaMP chakumugwisya achiuno chakwe, chizuminano eechi chachitwa amaMP asika kuntompa-chaala yamaMP woone ajanika mung'anda eeyi.

127 Mutobeli wa Sichuuno waNg'anda Yaansi Yamilawu

(1) Mbubatamane biyo kusala Sichuuno maMP ayelede kusala umwi *MP* kuti abe Mutobeli waSichuuno mu Ng'anda Yaansi Yamilawu.

(2) Choонse chiindi kuti wasiya chuuno Uutobela Sichuuno, kweelede basala uumbi muntu kuti abweze chuuno eechi.

(3) Nsaluuzyo zyakusala Mutobel i wa Sichuuno zyeede kweendelezegwa aMulembi Mupati waPalyamenti kagwasigwa aKkomishini yaNsaluuzyo muZimbabwe. Nsaluuzyo yansiswa kweede yabelesegwa nikusalwa Mutobel i waSichuuno kabiyo butebuzi bwansaluuzyo bwazibisigwa mpawaawo.

(4) Katana talisya mulimu wakwe Mutobel i wa Sichuuno kweede wachita chikonke kunembo lya Duundumuntule waBabete naakuti umwi mubetesi umutobela uliwo mbuuli mbukwaambidwe muMpampikwa Yatatu.

(5) Mutobel i wa Sichuuno ukonzya kusiya chuuno chakwe kuti wayanda kwiinda mukuzibisya maMP lwakwe. Pesi kuti Ng'anda Yaansi Yamilawu njazulwida kitalokubeleka chiindi nayanda kusiya chuuno chakwe, ukonzya kulemba chizibisyo chakusiya mulimu wakwe wapa Sichuuno. Pesi kuti katawo Sichuuno ukonzya kupa chizibisyo eecho kuMulembi Mupati waPalyamenti.

(6) Mutobel i waSichuuno weede kusiya chuuno chakwe kuti—

- (a) nikwamana kuba MP kwakwe;
- (b) naaba Muzulwidi waSeneti/Ng'anda Yamilawu Yaajulu;
- (c) naaba Mutobel i waMuzulwidi waNyika, Silutwe waMutabi waFulume naakuti Uutobela Silutwe waMutabi waFulume;
- (d) kuti kakuli kwaba chizuminano akati kamaMP chakumugwisya achuuno chakwe, chizuminano eechi chachitwa amaMP asika kuntompa-chaala yamaMP woone ajanika mung'anda eeyi.

CHIBAKA 5

BULAMFU BWACHIINDI NCHIBEELEDE KUBA MUWOFESI BAYIMININA MASENA ANSALUUZYO
MUPALYAMENTI

128 Chikonke chaMwiiminini Wabusena bwaNsaluuzyo muPalyamenti

(1) Katana talika mulimu wakwe Mwiiminini wabusena bwansaluuzyo muPalyamenti uyeede kukonka chikonke chabiiminini bamuPalyamenti chijanika muMpampikwa Yatatu.

(2) Chikonke eechi chaambidwe mukabeela (1) cheede kukonka kunembo lyaMulembi Mupati waPalyamenti.

129 Bulamfu bwachiindi nchibeelede kuba muwofesi bayiminina masena ansaluuzyo mupalyamenti

(1) Chuuno chasikwiiminina busena bwansaluuzyo muPalyamenti nga chayanda uumbi muntu kuti kakuli —

- (a) Palyamenti yamwaywa/yayangala;
- (b) kuti wali mwiiminini busena bwansaluuzyo muPalyamenti wasiya mulimu akuyanda kwakwe kwiinda mukulemba lugwalo kuMuzulwidi waSeneti naakuti Sichuuno waNg'anda Yaansi Yamilawu;
- (c) wali mwiiminini waba Muzulwidi waNyika naakuti waba Mutobel i waMuzulwidi waNyika;
- (d) wali mwiiminini waba Muzulwidi waSeneti naakuti waba Sichuuno naakuti wanjila muliimbi Ng'anda Yamilawu wasiya njakasalilwa kubamo;
- (e) mwiiminini wagwisigwa mumalembe abantu bakonzya kuvoota;
- (f) mwiiminini walova kumulimu, katakwe mvumo yazwa kuli Sichuuno naakuti kuMuzulwidi waSeneti, kwamazuba atobelana asika kumakumi obile azuba limwi (21) beenzinyina kabayinka kumulimu. Bayiminini bamung'anda yamulawu mwabede bakonzya kuvoota, abwiingi

bwabazuminana busika kuchisela chabo, kabazuminana kuti chuuno chasikulova ngachipegwe uumbi;

- (g) kuti mwiiminini wamuPalyamenti watambula mulimu muli fulumende naakuti wachimwi chipanzi chafulumende, kukkansili yachilikiti naakuti yalimwi dolopo naakuti bbooma;
 - (h) kuti mwiiminini wamuPalyamenti wakajisi chuuno mulifulumende naakuti muli chimwi chipanzi chafulumende, mukkansili yachilikiti naakuti yalimwi dolopo/bbooma chiindi naakasalwa kuba mwiiminini mpawo wakachilwa kusya chuuno chakwe mukati kamazuba asika makumi otatwe kuzwa buensi naasalwa kuba mwiiminini wamu Palyamenti;
 - (i) kuti mwiiminini wamuPalyamenti wajanika kalaamulandu ankuta—
 - (i) yamu Zimbabwe, mulandu umugwisa bulemu, kulemekwa, kusyomwa kwakwe abantu, walupyopyongano akulwana; naakuti,
 - (ii) yaanje kwanyika yaZimbabwe, wanchito iinga kuti yalangwalangwa amumilawu yaZimbabwe ipa mulandu ugwisya bulemu bwamuntu, kusyomwa kwakwe abantu, lupyopyongano akulwana, mpawo kali wakapegwa chisubulo chakukkala mujele kwamyezei musanu awumwi naakuti kwiinda, katapedwe mweenya wakubbadala/kuliya mali naakuti katapedwe chimwi chisubulo chiteensi chakujalila mujele, aanze kwakuti mwiiminini wakumbila kuti mulandu wakwe ulangwelangwe lubo ankuta mpawo nuwa langwalangwa lubo kwajanika kuti chisubulo nchakapedwe chakali chipati loko mpawo wapegwa chisubulo chamyezei ilaansi kwamusau awumwi naakuti kupegwa chisubulo chitamunjizyi mujele.
 - (j) kuti mwiiminini wategwa tachikonzyi kutola zikwelete nkaambo kabuvule bwazikwelete nzyalaazyo mubuumi bwakwe kwiinda mumulawu wamuZimbabwe kabiyo katakwe nchachitwa kuti agwasigwe;
 - (k) kuti mwiiminini wazwa mukabunga kazyanyika nkakayiminide naakasalwa kuba mwiiminini kabiyo kabunga nkakayiminide kalembela kuli Sichuuno naakuti Muzulwidi waSeneti kwaamba kuti mwiiminini wakazwa mukabunga kabo kazyanyika;
 - (l) kuti mwiiminini taakali mukabunga kazyanyika naakasalwa pesi wazoonjila muli kamwi kabunga kazyanyika kali wasalwa kuba mwiiminini;
 - (m) kuti mwiiminini wajanika kuti wasondoka zyakuti tachiyeeyi kabotu eezi kazili zyaba abukamboni kwiinda mumilawu yamuZimbabwe; naakuti
 - (n) kuti mwiiminini wajanika kajisi mulandu uyendelana amulawu wansaluuzyo kabiyo woopololwa aNkuta Yaajulu kuti wagwisigwa mumalembe abantu bavoota naakuti moompololo umukasya kuvoota kunsaluuzyo niziba zili.
- (2) Mwiiminini uwambwa mukabeela (1)(i) ooyo wakumbila kuti kujanika kalaamulandu kwakwe kulangwelangwe lubo ankuta yaajulu, ukonzya kujana bukkala achiuno chakwe chabwiiminini nachilinda kuti kulangwalangwa kwamulandu wakwe kuchitwe ankuta yaajulu kusikila nkuta yapa maboneno aayo. Muchiindi eechi nachilinda kumvwa maboneno ankuta yaajulu, mwiiminini ukonzya kuchita milimu yakwe yoonse yalubbe antoomwe akutambula mali aanze kwakuti nkuta yati ngakalindile maboneno ankuta yaajulu kali mujele.
- (3) Mwiiminini wasalwa kuba Sichuuno cha Kkansili yaChilikiti ulasiya chuuno chakwe chamwiiminini nchaajisi katanaba Sichuuno waKkansili yachilikiti.

CHIBAKA 6

NGUZU ZYAKUPANGA MILAWU AZIMWI NGUZU

130 Manguzu antoomwe amilimu yaNg'anda Yaajulu Yamilawu a Ng'anda Yaansi yamilawu

(1) Aanze kwazeezyo zyaambidwe muMpampikwa Yamusanu, mukubelesya manguzu aazyo aakupanga milawu ng'anda zyaPalyamenti zyobile (yaajulu ayaansi) zilaamanguzu akutalika, kubambilala, kulangalanga antoomwe akukaka fumbwa nuuba uuli mulawu.

(2) Aajulu kwamilimu yabo yaambidwe muKkata lyaMulawu eeli, Ng'anda Yaajulu aNg'anda Yaansi zikonzya kuchita imwi milimu njizyapegwa ayimbi milawu.

131 Milawu iPangwa aPalyamenti antoomwe anzila zitobelezegwa mukwiipanga

(1) Manguzu aPalyamenti akupanga milawu abeleka kwiinda mukupanga Milawu ipangwa aPalyamenti.

(2) Mulawu waPalyamenti malembe amulawu aka —

- (a) langwalangwa akutambulwa amaanda obile aPalyamenti; kabiyo
- (b) zuminwa mpawo asayinwa aMuzulwidi waNyika; kakutobelezegwa zilembedwe muKkata lyaMulawu eeli.

(3) Mabala awamba kubumba mulawu waPalyamenti ngaya ‘Wakabumbwa aPalyamenti antoomwe aMuzulwidi waNyika yaZimbabwe’ naakuti amwi mabala awamba zikozyania azeezi.

(4) Nzila zitobelwa aNg'anda Yaansi aYaajulu mukupanga milawu ili pandulwidwe muMpampikwa Yamusanu.

(5) Kuti malembe amulawu atambulwa akuzuminwa amaanda amilawu obile kakutobelezegwa zilembedwe muMpampikwa Yamusanu, Muzulwidi waSeneti antoomwe aSichuuno waNg'anda Yamilawu Yaansi, kweelede umwi wabo achakufwambaana —

- (a) watumizya malembe amulawu, akatambulwa akuzuminwa amaanda amilawu obile, kuMuzulwidi waNyika kuti akazuminwe akusayinwa antoomwe asetifiketi lyeelede kweenda aamwi amalembe amulawu (Bill); kabiyo
- (b) amwaye mulumbe mumapepa kwaambila luundu buunsi naakatumizya malembe amulawu kuMuzulwidi waNyika.

(6) Kuti malembe amulawu atolwa ku Muzulwidi waNyika kuti akazuminwe akusayinwa kweelede kuti, mukati kamazuba makumi obile azuba limwi, wachita chimwi chazeezi zitobela —

- (a) waazumina akwasayina malembe aayo mpawo awadinde akwamwaya mu*Gazette* achakufwambaana; naakuti
- (b) kuti waabona kuti malembe ngaapegwa taayendelani pe aKkata lyaMulawu naakuti ulaachimwi nchabona chitali kabotu aatala amalembe amulawu ngapegwa ukonzya kwabweedezya kuPalyamenti, kwiinda kuMulembi Mupati waPalyamenti, antoomwe alugwalo lupandulula zizwide zyapa kuti aleke kuwazumina akuwasayina Muzulwidi waNyika malembe amulawu.

(7) Kuti malembe amulawu akakwa aMuzulwidi waNyika mpawo abweedevezegwa kuPalyamenti kwiinda mbuuli mbukaamba kabeela(6)(b), Sichuuno waNg'anda Yaansi Yamilawu uyelede kwiita maMP kuti aze kumulimu kuti —

(a) alangelange malembe amulawu akaboola kuzwa kuMuzulwidi waNyika akulangisisya zyakapa kuti aboozegwe; naakuti

(b) kuzuminana kuti malembe amulawu aaya ali kabotu mbuuli mbaabede taayandi kubambululwa pe. Chizuminano eechi kweelede chachitwa amaMP asika kuntompa-chaala yamaMP akkala muNg'anda Yaansi Yamilawu;

nikuba kuti nziizili nzibachita maMP, Sichuno waNg'anda Yaansi Yamilawu ulatumizya lubo malembe amulawu kuMuzulwidi waNyika achakufwaambana kuchitila kuti akazuminwe akusayinwa malembe. Alubo Sichuno ulamwaya mumapepa kuzibisyia luundu buunsi mbwatumizya malembe kuMuzulwidi waNyika.

(8) Kuti malembe amulawu(bill) abwedezezwa kuMuzulwidi waNyika kwiinda mbuuli mbukwaambidwe mukabeela (7) kaali akabambilulwa kubikkikizya nzyakaambide Muzulwidi waNyika, Muzulwidi waNyika uyelede kwaazumina akwasayina malembe aaya mukati kamazuba makumi obile azuba limwi mpawo awadinde akwamwaya mupepa lyaluundu (Gazeti) achakufwambaana. Pesi kuti Muzulwidi waNyika katana kkitikana abwiime bwamalembe amulawu aboozegwa kuli nguwe, uyelede kuti mukati kachiindi chikozyania, wachita chimwi chazeezi zyaambidwe aansi—

(a) waazumina akwasayina malembe amulawu nikuba katakkutikene angawo; naakuti

(b) kutola malembe amulawu aayo kuNkuta yazyakata lyaMulawu kuti akalangwe bweendelene bwawo malembe aaya aKkata lyaMulawu.

(9) Kuti kakuli malembe amulawu akatolwa kuNkuta yaKkata lyaMulawu, kwiinda mukabeela (8), mpawo Nkuta yazyakata lyaMulawu yaamba kuti malembe amulawu aleendelana aKkata lyaMulawu, Muzulwidi waNyika uyelede kutola malembe amulawu awazumine antoomwe akwasayina achakufwambaana mpawo akwadinda akwamwaya mu*Gazette*.

(10) Kuti malembe amulawu atumizigwa kuMuzulwidi waNyika kuti akazuminwe akusayinwa pesi katakwe setifiketi iyandikana kutumizigwa aamwi amalembe amulawu mbuuli mbulyaamba Kkata lyaMulawu eeli, Muzulwidi waNyika tayelede kuwazumina pe nikuba kwasayina malembe amulawu aayo kusikila setifiketi yeetwa. Pesi Muzulwidi waNyika weelete walembela Palyamenti, kwiinda kuMulembi Mupati waPalyemnti, kuti setifiketi teeyakatumizigwa aamwi pe amalembe amulawu nkaako iyanda kutumizigwa achakufwambaana.

132 Katalika kubeleka kwaMilawu ipangwa aPalyamenti

Mulawu wapangwa aPalyamenti utaanguna kubeleka kumatalikilo kwazuba nuwazibisigwa kuti wabeleka kwiinda mu*Gazette* naakuti kumatalikilo kwazuba lyaambidwe mumulawu mupya naakuti buunsi bwakaambwa mulaamwi malembe.

133 Kunjizigwa kwamilawu ipangwa a Palyamenti

(1) Kuti Mulawu upangwa aPalyamenti wazuminwa akusayinwa aMuzulwidi waNyika, Mulembi Mupati waPalyamenti weelete kutumizya mulawu mupya ulaanzilingo yaMuzulwidi waNyika antoomwe aChidindo chaChisi ku-ofesi yaRejistra waNkuta Yaajulu, kuchitila kuti mulawu mupya ukabikkwe mu-ofesi eeyi. Nkaako malembe amulawu mupya ooyu mbubukamboni kategwa kwaanzwa mulawu mupya kusikila mulawu ooyu wabambululwa aPalyamenti kabiyo kwiinda mukabeela (2)

(2) Mulawu upangwa aPalyamenti ukonza kuba mulawu wabwini naakuti chipanzi chawo, ukonza kudindwa kakuli wabambululwa kabiyo ukonza—

(a) kuti chiindi nuwadindwa wabambululwa kuuli ulakozyania awooyo mutaanzi;

(b) malembe akabambululwa ayelede kupegwa wofesi yaRejistira waNkuta Yaajulu ukabambwe; kabiyo

(c) mulawu wabikkwa muwofesi yaRejestira waNkuta Yaajulu nguwo upa bukamboni bwakuti kwakaba mulawu mupya.

(3) Kutaanguna kubeleka kwaMulawu upangwa aPalyamenti naakuti wakabambululwa takulindi kuti mane ukabikkwe mu-ofesi yaRejesitira waNkuta Yaajulu pe.

134 Imwi milawu igwasilizya

Palyamenti ikonzya kuti, kwiinda muMulawu upangwa aPalyamenti, yapa manguzu aayo akupanga tulawu-lawu mbuuli mbukwaambidwe mumulawu utanooli wabikkwa, pesi —

(a) mukuli waPalyamenti wakupanga milawu tuyelede kupegwa kambi pe kabunga/mbunga;

(b) tulawu-lawu tatweede kudyamizya zyeelelo angwangunuko zijanika muZyeelelo Zyampandamunsaka;

(c) tulawu-lawu tweeede kweendelana aMulawu waPalyamenti ngutwakabumbwa kuti tugwasizye munsi lyawo;

(d) Mulawu waPalyamenti uyelede kupandulula kabotu kujinka manguzu antoomwe azimwi zyeelede kujatwajatwa akalawulawu kapangwa kakweendelana andemeko zyeelede kutobelezegwa mukupanga kalawulawu.

(e) tulawu-lawu tatkonzzi kuba aanguzu zyamulawu domane twadindwa mu*Gazette*; kabiyo.

(f) tulawu-lawu tweeede kweetwa muNg'anda Yaansi Yamilawu mbuuli malayilile aliwo kakutobelwa Nzila Zyameendelezyo aPalyamenti. Tweede kulangwalangwa aKkomiti Yazyamilawu ijanika muNg'anda Yaansi Yamilawu.

CHIBAKA 7

MEENDELEZYO AAMILIMU MUPALYAMENTI

135 Silutwe waPalyamenti

(1) Sichuuno waNg'anda Yaansi Yamilawu nguSilutwe waPalyamenti pesi uyelede kubeleka katobeleya Nzila Zyameendelezyo aPalyamenti.

(2) Kakutobelezegwa Nzila Zyameendelezyo aPalyamenti, Muzulwidi waNg'anda Yaajulu Yamilawu nguwe uutobela kuba Silutwe waPlayamenti kuti Sichuuno waNg'anda Yaansi Yamilawu katawo naakuti kakuli chimwi chachitika.

136 Bantu bazulwida njoomo muPalyamenti

(1) Muntu uzulwida njoomo fumbwa chiindi achiindi nikuyoomwa makani muNg'anda Yaajulu Yamilawu kweelede —

(a) kali Muzulwidi waSeneti, kuti katawo , kweelede umutobela wazulwida; naakuti

(b) kuti katawo Muzulwidi waSeneti naakuti Umutobela, umwi Seneta wasalwa kuti achite mulimu ooyo ulakonzya kuzulwida njoomo fumbwa ooyo wasalwa katali Silutwe waMutabi waFulumende naakuti Uutobela Silutwe waMutabi waFulumende.

(2) Muntu uzulwida njoomo fumbwa chiindi achiindi nikuyoomwa makani muNg'anda Yaansi Yamilawu kweelede —

- (a) kali Sichuuno waNg'anda Yaansi Yamilawu, kuti katawo, kweelede umutobela wazulwida; naakuti
- (b) kuti katawo Sichuuno naakuti Umutobela, umwi wabiiminini baNg'anda Yaansi Yamilawu (*MP*) wasalwa kuti achite mulimu ooyo ulakonzya kuzulwida mbandiko fumbwa ooyo wasalwa katali Silutwe waMutabi waFulumende naakuti Utobela Silutwe waMutabi waFulumende.
- (3) Sichuuno, naakuti katawo Sichuuno, Muzulwidi waSeneti, umwi wabo weeledes kuzulwida mbandiko ijatarisya maanda obile amilawu (Yaansi aYaajulu).

137 Buvule bwabantu beeledes kutalika njoomo muPalyamenti

Maanda obile amilawu ayelede kuzwa aNzila Zyameendelezyo aPalyamenti zipandulula buvule bwabantu beeledes kubawo mumaanda amilawu kuti njoomo zitalike antoomwe akweendelela nembo amulimu wamumaanda amilawu.

138 Kuvootaacheelalo chakumvwigwa muPalyamenti

- (1) Aanze kwawaawo Kkata lyaMulawu mpulyaamba busiyene —
 - (a) zyoonse zyaambo naakuti mibuzyo iyanda kuvootelwa mumaanda amilawu obile zimaninsigwa kwiinda mukutobela zeezyo zyazuminanwa aabantu banji baliwo chiindi chakuvoota;
 - (b) mutu uzulwida njoomo mumaanda amilawu obile takonzyi kuvoota nikwasika chiindi chakuvootelwa makani ayanda kugomenwa/kumaninsigwa;
 - (c) kuti mavooti atala amakani alikuyoomwa mumaanda amilawu obile ayelana kumabazu obile, chaamba kuti kaambo kali kuvootelwa kayangala nkaambo taakwe bbazu lyazunda limwi pe.
- (2) Batobela Muzulwidi waNyika bakonzya kukkala akwaambuula munjoomo zyamuPalyamenti pesi tabakwe nguzu zyakuvoota pe mumaanda amilawu obile.
- (3) BaSilutwe baMitabi yaFulumende abaBatobela bakonzya kukkala akwaambuula munjoomo zyamuPalyamenti pesi tabakwe nguzu zyakuvoota pe muNg'anda Yamulawu mubateensi bayiminini.
- (4) Bayiminini bali muKkomiti Yazyakulangalanga Milawu muPalyamenti antoomwe awambi makkomiti ajanika muPalyamenti balacheelalo chakukkala akwaambuula munjoomo zya muPalyamenti nikuba muliili ng'anda yamulawu, pesi tabakwe nguzu zyakuvoota pe muNg'anda Yamulawu mubateensi bayiminini.
- (5) Aawo mwiiminini wamuPalyamenti, utajisi chuuno chaSilutwe waMutabi waFulumende naakuti Utobela Silutwe waMutabo waFulumende, wakonzya kunjizya Malembe azyaMulawu muliimwi yamaanda amilawu, ooyo wanjizya malembe azyaMulawu ulacheelalo chakukkala akwaambuula munjoomo zyaatala aMalembe azyaMilawu alokubandikwa mung'anda yamulawu, pesi takwe nguzu zyakuvoota pe muNg'anda Yamulawu mwateensi mwiiminini.

139 Nzila Zyameendelezyo aPalyamenti

- (1) Meendelezyo aanjoomo amilimu yamuPalyamenti mung'anda zyobile zyamilawu azulwidwa amiteto itegwa Nzila Ziyalidwe Mumalembe aPalyamenti. Miteto eeyi ibumbwa abayiminini bayimwi ayimwi ng'anda yamilawu naakuti kazisweenene ng'anda eezi kuswaanana kwazyo kakuli kwasungwaazigwa aKkomiti ibona zya Nzila Zyameendelezyo aPalyamenti.

- (2) Nzila Zyameendelezyo aPalyamenti zikonzya kuzulwida bupanduluzi bwamachitilo atobela —

- (a) kupangwa kwamilawu yanyika;

- (b) kupangwa amabelekelo amaKkomiti antoomwe akuwapa nguzu zyawo;
 - (c) mbaabelesegwa manguzu ngibalaawo maMP antoomwe akukwabililwa kwamaMP nibachita njoomo zyabo mumaanda amilawu;
 - (d) mbubelede kubuzigwa mibuzyo baSilutwe baMitabi yaFulumende ababatobelka kababuzigwa abayiminini bamumaanda amilawu;
 - (e) mbubelede kulijata maMP/bayiminini kuti kabali muPalyamenti;
 - (f) kubelesegwa kwamanguzu aluundu kuti batongawuke kuPalyamenti kuti kakuli zitalookubajata kabotu; kabiyo
 - (g) meendelezyo aamilimu yamuPalyamenti muliimwi ayimwi ng'anda yamulawu naakuti akati kamaanda amilawu.
- (3) Kweendelezegwa kwamilimu yamuPalyamenti amumaKkomiti aPalyamenti, mbuuli mbukwaambidwe muNzila Zyameendelezyo aPalyamenti, kweelede kusungwaazya bubalangale mumachitilo amilimu yaPalyamenti kabiyo kakubikkikizya boonse bayiminini bajanika muPalyamenti bamutubunga twazyanyika tusiyenesiyene toonse tuli muPalyamenti. Mabelekelo aPalyamenti aaya ayelede kusungwaazya luundu kuti lujane mweenya wakubikka mizeezo yalo mumilimu yaPalyamenti. Zyoonse eezi zyeedele kuchitwa munzila iyelanisya boonse bantu munzila yabululami.
- (4) Woonse maKkomiti abumbwa kwiinda muNzila Zyameendelezyo aPalyamenti ayelede kutondeeza bwiime, bube abubumbwe bwaPalyamenti mutubunga twazyanyika tujanika muPalyamenti antoomwe abwiingi bwabanakazi abaalumi bajanika muPalyamenti naakuti mung'anda yamilawu muzibeleka Nzila Zyameendelezyo aPalyamenti.

140 Milumbe izwa kuMuzulwidi waNyika kiiya kuPalyamenti

- (1) Muzulwidi waNyika ukonzya kwaambuula aPalyamenti nikuba iili ng'anda yamilawu naakuti kazisweenene ng'anda zyamilawu zyobile (Yaansi aYajulu).
- (2) Muzulwidi waNyika ukonzya kutumizya milumbe nikuba kuliili ng'anda yamilawu, nkaako milumbe eeyo yatumizigwa yeelede kabalwa aMutobeli waMuzulwidi waNyika naakuti Silutwe waMutabi waFulumende naakuti umwi muntu uzulwida njoomo mung'anda yamilawu yatambula milumbe eeyo.
- (3) Muzulwidi waNyika ukonzya kukkanala munjoomo zyaPalyamenti kuchitila kuti asandule mibuzyo yabuzigwa mbuuli mbukuyalidwe mu Nzila Zyameendelezyo aPalyamenti.
- (4) Muzulwidi waNyika kweelede wapa ngambo amilumbe kumaanda amilawu kasweenene bumwi naakuti twiingi amunyaka aatala abwiime bwachisi, nkaako Sichuuno aMuzulwidi waSeneti beelete kuchita mabambe akuti bayiminini bajanika mumaanda amilawu obile kuti bazimvwwe ngambo amilumbe eezyo zyazwa kuMuzulwidi waNyika.

141 Kubelekelaamwi kwaPalyamenti abulumbu bwaZimbabwe

Palyamenti iyelede —

- (a) kuchita kuti kuube kuti bulumbu bukonzye kunjizya mizeezo yabo mukupangwa kwamilawu yanyika antoomwe amumabelekelo amakkomiti aPalyamenti;
- (b) kubona kuti bantu boonse bayanda kupa mizeezo atala milawu ilokupangwa muPalyamenti bapegwa mweenya wakupa mizeezo yabo aanze kwakuchiti kakuli buyumuyumu bupa kuti bantu tababikki mizeezo yabo mukupangwa kwamilawu muPalyamenti; kabiyo
- (c) kuchita milimu yayo munzila ilaantangana ibalangala, kiichita miswaangano yayo amiswaangano yamakkomiti amuPlayamenti mibusyu bwabantu, nikuba kuti ntaamo kweelede zyatolwa kuti—

- (i) kubelekeke cube luumuno muPalyamenti;
- (ii) kubona kuti luundu abasimusunza twaambo banjizigwa muPalyamenti achiindi cheelede;
- (iii) kukasya bulumbu antoomwe abasikuzunza twaambo kunjila mumiswaangano yamakkomiti aPalyamenti; kabiyo
- (iv) kusecha bantu banjila muPalyamenti naakuti kukasya bantu kuti tabanjili muPalyamenti bateelede naakuti kugwisa bantu muPalyamenti;

pesi ntaamo eezi zyeede kuchitwa mububalangale kazitondeezya kuti ninyika ilaabulelo bwajandabanji busimpide mubululami, kulemekwa kwabantu abulemu bwamuntu, kweelanisigwa kwabantu antoomwe akulemekwa kwangwangunuko zyabantu

142 Butambulwe abukakwe bwanjoomo zyaPalyamenti

(1) Kutabawo kwawumwi naakuti kwaandwa kwawumwi mwiiminini mumaanda amilawu takwiimikizyi njoomo pe naakuti kwiimikizya milimu yaPalyamenti mumaanda amilawu obile.

(2) Kuti kwaba umwi muntu, mumaanda amilawu obile, wateelede kubamo munjoomo amukuvootela twaambo muPalyamenti, tazyambi kuti njoomo eeyo antoomwe azyazuminanwa zyeede kuyangala pe, zyazuminanwa zinoochitambulika.

CHIBAKA 8

BULAMFU BWAKUKKALA, KUMWAYIKA AKUBELEKA KWAPALYAMENTI

143 Bulamfu bwakukkala akumwaywa kwaPalyamenti

(1) Bayiminini bamuPalyamenti bavootelwa kuti babeleke kwachiindi chisika kuminyaka musanu kuzwa buunsi Muzulwidi waNyika naatalika mulimu kakutobelegwa zilembedwe muchibela 94(1)(a) chamulawu ooyu. Palyamenti nga yamwayigwa akati-kabo kwabuzuba nikucha kakuli nsaluuzyo/mavooti akusala bazulwidi bamuzibaka zisiyenesiyene mbuuli kusala umbi Muzulwidi waNyika, bambi bayiminini bamuPalyamenti abambi maKkansela mbuuli mbukwaambidwe muchibela 144 chamulawu ooyu.

(2) Muzulwidi waNyika uyeede kuti, kwiinda mumooppolo, wamwaya Palyamenti kuti lwavo maanda amilawu obile akkala imwi ayimwi mpawo azuminana kuti Palyamenti imwayigwe. Mavooti aya ayeede kusika kuntompa-chaala yabwiingi bwabayiminini bajanika mulimwi ayimwi ng'anda yamulawu.

(3) Muzulwidi waNyika ukonzya kumwaya Palyamenti, kwiinda mumooppolo, kuti Ng'anda Yaansi Yamilawu yakaka kuzumina mulawu uwambidwe muchibela 305 chamulawu ooyu.

(4) Kumwaywa kwaPalaymenti kwiinda muli zilembedwe mukabeela (3) zikonzya kuti, kwiinda mukulembela kwawumwi mwiiminini wamuPalyamenti, kwabikkwa aabbazu kakuyanda kuti kulangwelangwe kabotu aNkuta yazyakata lyaMulawu.

(5) Malembe akuti muzeezo wakumwaywa kwaPalaymenti ulangwelangwe ayeede kutolwa ku Nkuta yazyakata lyaMulawu mukati kamazuba musanu aabili (7) kuzwa buunsi moompololo nuwachitwa wakumwaya Palyamenti, kabiyo —

- (a) iNkuta yazyakata lyaMulawu kweelede iyoome antoomwe akumaninsya kaambo keetwa kuli njiyo mukati kamazuba asika kukkumi amazuba aane (14) kuzwa buunsi kaambo nikeetwa kunkuta; kabiyo
- (b) nikuchilindwa mazembe azwa muNkuta yazyakata lyaMulawu, moompololo wakumwaywa kwaPalyamenti nga wajana bwiimikizigwa.

144 Nsaluuzyo zyakusala bazulwidi basiyenesiyene nikwamwaywa Palyamenti

(1) Aawo Palyamenti mpuyatazuminana akumwaywa kwayo mbuuli mbukulembedwe muchibeeala 143(2) chamulawu ooyu, Muzulwidi waNyika uyelede kuti, kwiinda mumoompololo, waamba mazuba akuzoochitwa kwansaluuzyo zyakusala bazulwidi basiyenesiyene mukati kachiindi chaambidwe muchibeeala 158 chamulawu ooyu.

(2) Aawo—

- (a) Palyamenti mpuyazuminana kuti imwaywe mbuuli mbukwaambidwe muchibeeala 143(2) chamulawu ooyu;
- (b) Muzulwidi waNyika naamwaya Palyamenti kwiinda muchibeeala 143(3) chamulawu ooyu;
- (c) Muzulwidi waNyika wamwaya Palyamenti kwiinda mukutondeezya kubula lusyomo kakutobelezegwa chibeeala 109(4); naakuti
- (d) Palyamenti yakkala kiimwayidwe nkaambo kakutondeezya kubula lusyomo kwiinda muchibeeala 109(5)a.

Muzulwidi waNyika weelete, kwiinda mumoompololo, waamba mazuba akuchitwa kwansaluuzyo yakusala bazulwidi basiyenesiyene zyeelede kuchitwa mukati kamazuba asika mumakumi musanu amakumi aane (90) kuzwa buunsi Palyamenti niyamwaywa

(3) Mazuba akuchita nsaluuzyo zyakusala bazulwidi basiyenesiyene kakutobelezegwa kabeela (1) naakuti (2) ayelede kwaambwa aMuzulwidi waNyika kabapana mizeezo aKkomishini yaNsaluuzyo muZimbabwe.

145 Kuswaanana kutaanzi kwaPalyamenti nizyamana nsaluuzyo zyakusala bazulwidi basiyenesiyene

(1) Kuswaanana kwaPalyamenti nikwamana kuchitwa nsaluuzyo zyakusala bazulwidi basiyenesiyene kweelede kuchitwa mubuzuba bwaambwa aMuzulwidi waNyika pesi buzuba oobo bweelede kuba mukati kamazuba makumi otatwe kuzwa buunsi natalika kubeleka Muzulwidi waNyika wakasalwa kakutobelezegwa zyaambidwe muchibeeala 94 chamulawu ooyu.

(2) Kusikila kwasalwa Sichuuno waNg'anda Yaansi Yamilawu naakuti kusalwa kwaMuzulwidi waSeneti muNg'anda Yaajulu Yamilawu, Mulembi Mupati waPalyamenti nguwe uyendelezya kuswaanana kwamaanda aaya.

146 Chiindi chakuswaanana achakulyookezya

Imwi ayimwi ng'anda yaPalyamenti ilalibikkila zyiindi abulamfu bwakuswaanana kwabo mung'anda yamulawu antoomwe amazuba akulyookezya, pesi —

- (a) Muzulwidi waNyika ukonzya kwiita Palyamenti kuti iswaanane ibeleke mulimu nguyayitilwa fumbwa chiindi nikwayandikana;
- (b) takweelede pe kuti kwiinda mazuba asika kumwaanda omwe amazuba makumi musanu awatatu (180) kilyookezezye Palyamenti.

147 Kuyangala kwamaBills, mitwe yanjoomo azimwi mbandiko zyakali kuchitwa kiitana mwayika Palyamenti

Aakumwayika kwaPalyamenti zyoonse njoomo , ngambo, amabills zyakali kubandikwa nga zyayangala.

148 Lukwabililo anzibeelede kuchitilwa bayiminini bamuPalyamenti

(1) Muzulwidi waSeneti, Sichuuno waNg'anda Yaansi Yamilawu antoomwe abayiminini bamuPalyamenti bajisi ngwanganuko yakwaambuula nzibayanda kuti kabali muPalyamenti, amumakkomiti aPalyamenti. Nikuba kuti bayelete kutobeleyza tulawulawu twameendelezyo aPalyamenti, pesi tabeelede pe kwaangwa, kubikkwa mujele naakuti kutolwa kunkuta kuti bakaliye nkaambo kazyaambo nzibaamba kabali muPalyamenti naakuti mumakkomiti aPalyamenti.

(2) Mulawu upangwa aPalyamenti ukonzya—

- (a) kupa zimwi nzibeelede kuchitilwa, lukwabililo awamwi manguzu aPalyamenti antoomwe abayiminini bamuPalyamenti;
- (b) kupandulula kabotu nchito zibonwa kazili zyakuubya akunyansya Palyamenti nikuba kazili zyachitwa abayiminini bamuPalyamenti naakuti bamwi bantu luzutu;
- (c) kupa cheelelo chakusandulwa, kwiinda muli Sichuuno naakuti Muzulwidi waSeneti, kuli baabo batanooli bamvwa machise nkaambo kazeezyo zyaambwa atala ambabo muchiindi chambandiko zyaPalyamenti.

pesi ooyo mulawu waPalyamenti tukonzyi kupa manguzu akuti Palyamenti naakuti bayiminini bamuPalyamenti bape chisubulo cheelene achakutolana kunkuta yamulawu pesi wasunda uyelede kubbadalisigwa biyo nkaambo kakutyola zyeelelo zyabantu bamuPalyamenti naakuti kuubya akunyansya Palyamenti

149 Cheelelo chakutongawukila Palyamenti kwiinda mumalembe

(1) Woonse munaZimbabwe amuntu ulaavumo yakuchita kakkalila muZimbabwe ulaacheelo chakutongawukila Palyamenti kwiinda mumalembe aatala anikaba kali kaambo kamukataazya kuzintu nzyikonzya kuzyotolola Palyamenti, mbuuli kupanga mulawu, kuzyotolola mulawu akukaka mulawu.

(2) Nzila njizyeelede kusika aazyo kuPalyamenti ntongawuko zilembedwe zizwa kubantu kweelede zyapandululwa kabotu kwiinda mu Nzila Zyameendelezyo aPalyamenti.

150 Mpuyiswaananila Palyamenti

Palyamenti ikonzya kuswaanana kubusena buteensi bwamazuba woonse pe, pesi kakulangisigwa ziyandwa abulumbu, lukwabililo akusikika kwabusena oobo.

151 Kkomiti yaNzila Zyameendelezyo aPalyamenti

(1) Palyamenti iyelede kudoma Kkomiti izibikene kuti niKkomiti yaNzila Zyameendelezyo aPalyamenti kuchitila kuti —

- (a) kibona kweendelezegwa kwamilimu yaPalyamenti;
- (b) kupanga Nzila Zyameendelezyo aPalyamenti;
- (c) kulangalanga zyoonse zyaatala abwiime bwaPalyamenti; kabiyo
- (d) kuchita nuuba uuli mulimu nguyapegwa Kkomiti eeyi aKkata lyaMulawu naakuti a Nzila Zyameendelezyo aPalyamenti naakuti uuli mulawu.

(2) Kkomiti ya Nzila Zyameendelezyo aPalyamenti iyelede kubumbwa abantu batobela; Sichuuno waNg'anda Yaansi Yamilawu, Muzulwidi waSeneti antoomwe abayiminini bamuPalyamenti batobela —

- (a) Uutobela Sichuuno waNg'anda Yaansi Yamilawu;
- (b) Uutobela Muzulwidi waSeneti;

- (c) Silutwe waMutabi waFulume nde ubona Mali antoomwe abamwi baSilutwe baMitabi yaFulume nde babili bagalwa aMuzulwidi waNyika;
- (d) Muzulwidi waZyaambo zyaFulume nde muliimwi ayimwi ng'anda yamilawu;
- (e) Muzulwidi watubunga twazyanyika tuli muPalyamenti pesi tutali muli fulume nde muliimwi ayimwi ng'anda yamilawu;
- (f) Bazulwidi batubunga twabuleli bwanyika muNg'anda yaMulawu batubunga twazyanyika tuli muPalyamenti;
- (g) Muzulwidi waKkansili yaBaami Yanyika Yoonse;
- (h) babili bayiminini bamuPalyamenti bateensi baSilutwe baMitabi yaFulume naakuti babatobela, umwi kali wakuNg'anda Yaajulu Yamilawu wakagalwa aMuzulwidi waSeneti, uumbi kali wakuNg'anda Yaansi Yamilawu wagalwa aSichuuno wang'anda eeyi;
- (i) bayiminini bamuPalyamenti bali musanu abatatu bateensi baSilutwe baMitabi yaFulume naakuti babatobela, bane basalwa aSeneti kwali kuti bambi bane basalwa aNg'anda Yaansi Yamilawu.

(3) Bantu beeleded kugalwa naakuti basalwa kunjila muKkomiti yaNzila Zyameendeleyo aPalyamenti achakufwambaana kuzwa niyatalka kuswaanana Palyamenti. Beeleded kusalwa nkukuti balangisisye bwiime abubumbwe bwaPalyamenti muli zyakweendelezegwa kwanyika antoomwe abwiingi bwabanakazi abaalumi kuti zyobile ng'anda zyamilawu zyaswanana.

(4) Kkomiti ya Nzila Zyameendeleyo aPalyamenti isalwa kubeleka kwabuumi bwaPalyamenti eeyo boonse.

(5) Kkomiti ya Nzila zyaMeendeleyo aPalyamenti izulwidwa aSichuuno waNg'anda Yaansi Yamilawu, pesi kuti katawo Muzulwidi waSeneti nguyizulwida.

(6) Meendeleyo amilimu yaKkomiti ya Nzila Zyameendeleyo aPalyamenti ayelede kupandululwa muNzila Zyameendeleyo aPalyamenti.

(7) Kuti kwaba mweenya muKkomiti yaNzila zyaMeendeleyo aPalyamenti kakuyanda kubikkwa umbi/ bambi bantu kweelede muntu/bantu aabo bagalwa/basalwa achakufwambaana kusinka mweenya wabawo.

152 Kkomiti yakulangwalangwa kwaMilawu muPalyamenti

(1) Achakufwambaana kuzwa nibakkala kwalutaanzi muPalyamenti, iKkomiti yaNzila Zyameendeleyo aPalyamenti jyelede kusala kkomiti itegwa Kkomiti yakulangwalangwa kwaMilawu muPalyamenti, ilaabantu batali aansi kwabatatu bateensi baSilutwe baMitabi yaFulume nde naakuti babatobela.

(2) Banji babantu basalwa kunjila muKkomiti yakulangwalangwa kwaMilawu muPalyamenti kweelede kabali bantu bazi zyamilawu muZimbabwe aanze kwakuti kwajanika kuti muPalyamenti bakayiya zyamulawu mbache.

(3) Kkomiti yakulangwalangwa kwaMilawu muPalyamenti jyelede kulangisisya—

- (a) woonse malembe amilawu, aanze kwamalembe ali aatala aKkata lyaMilawu, kaatanasika achibaka chakuvootelwa malembe amulawu aaya mumaanda obile amilawu;
- (b) fumbwa malembe amilawuabambululwa kuzwa naakalangisisigwa lutaanzi akkomiti eeyi kaatana vootelwa lubo pe mumaanda obile aPalyamenti;
- (c) toonse tulawulawu tunga twadindwa mupepa lya*Gazette*;

- (d)woonse malembe amilawu ayetwa kukkomiti aMutobeli waMuzulwidi waNyika naakuti Silutwe waMutabi waFulumende; kabiyo
- (e)tulawulawu tweetwa kukkomiti anikuba uuli ulaamanguzu akupanga tulawulawu ootu.

Kkomiti eeyelede kwaambila, Palyamenti, Mutobeli waMuzulwidi waNyika, Silutwe waMutabi waFulumende naakuti naba uuli wakiipede malambe amulawu kuti ilangisisye, nziyajana mukulangalanga kwayo bwiime bwamalembe amulawu wayetwa kuli njiyo. Ikkomiti nga ilangalanga bwiime bwamalembe mapya amulawu kuti aleendelene na aKkata lyaMulawu wanyika

(4) Niyamana kulangalanga bube bwamalembe amulawu naakuti bwamalembe atanazuminanwa ngiyapegwa Kkomiti yeelede kwaambila, Palyamenti, Mutobeli waMuzulwidi waNyika, Silutwe waMutabi waFulumende naakuti naba uuli wakiipede malambe amulawu kuti ilangisisye, nziyajana mukulangalanga kwayo bwiime bwamalembe amulawu wayetwa kuli njiyo. Ikkomiti nga ilangalanga bwiime bwamalembe mapya amulawu kubona kuti taakwe na zikazyania aKkata lyaMulawu wanyika mumalembe mapya ayanda kuba mulawu.

(5) Mulawu wapangwa aPalyamenti naakuti Nzila zyaMeendelezyo aPalyamenti zikonzya kupa Kkomiti yakulangwalangwa kwamulawu imwi milimu yakuchita.

153 Mufolo waMuzulwidi wang'anda yaajulu yamulawu, Sichuuno waNg'anda Yaansi Yamilawu aBayiminini bamuPalyamenti

- (1) Mifolo ya Sichuuno waNg'anda Yaansi Yamilawu aMuzulwidi waSeneti —
 - (a) yeelede kupandululwa muMulawu upangwa aPalyamenti kabiyo izwa Munkomo Mpati yaFulumende;
 - (b) tiyelede kuselusiga pe kuti kabachili muzyuuno zyabo; kabiyo
 - (c) yeelede kubbadalwa nikuba Palyamenti yamwayika kusikila bazwa azyuuno zyabo.

(2) Mifolo ibbadalwa kubayiminini bamuPalyamenti yeelede kupandululwa muMulawu upangwa aPalyamenti.

154 Mulembi Mupati waPalyamenti abamwi babelesi

(1) IKkomiti ya Nzila Zyameendelezyo aPalyamenti, kiili yazuminana aNg'anda Yaansi Yamilawu, yeelede kunjizya mulimu muntu achuuno chaMulembi Mupati waPalyamenti utanooyendelezye maanda aPalyamenti kabiyo muntu ooyo kali munsi lyaSichuuno waNg'anda Yaansi Yamilawu.

(2) Mulembi Mupati waPalyamenti unjizigwa mulimu kwachiindi chisika minyaka musanu awumwi pesi ukonzya kubweedezegwa achuuno kwaminyaka ikozyenie.

- (3) Mulembi Mupati waPalyamenti uyelede kusiya chuuno chakwe—
 - (a) kwiinda muchikumbizyo chazwa kuKkomiti yaNzila Zyameendelezyo aPalyamenti, bayiminini bamuNg'anda Yaansi Yamilawu biinda chisela chabaabo bajanika mung'anda mbiizulwa bazuminana kuti nchobeni Mulembi Mupati waPalyamenti agwisigwe achuuno;
 - (b) Mulembi Mupati uyandikana kuti azwe achuuno chakwe aawo kuti kali wakali umwi wabayiminini bamuPalyamenti; naakuti
 - (c) naamaninsya minyaka isika kkumi atubili (12) kali achuuno chaMulembi Mupati waPalyamenti.

(4) IKkomiti ya Nzila Zyameendelezyo aPalyamenti yeelede yasala uumbi Mulembi Mupati waPalyamenti kuzwa mubabelesi mbuuli mbiikubona kakwelela.

- (5) Mulembi Mupati waPalyamenti abamwi babelesi bamuPalyamenti —

(a)banjizigwa milimu aKkomiti ya Nzila Zyameendeleyo aPalyamenti eeyo kabiyo ibapa malayilile ambubeelede kubeeleka anzibeelede kujana mukubeleka kwabo; kabiyo

(b)babelekela luundu pesi teeBabelesi baLuundu pe.

[Fuka libambululwa aMualwu 2 wa2021]

CHAANDAANO 7

N SALUUZYO

CHIBAKA 1

NZILA ZYAKWEENDELEYA N SALUUZYO

155 Ndemeko zyanzila zyansaluuzyo

(1) Nsaluuzyo, zyeede kuchitwa chiindi achiindi, antoomwe amalefulandamu zyaambidwe muKkata lyaMulawu eeli zyeede kuchitwa —

- (a) kabaangunukide bantu munzila ilaantanganana;
- (b) kuchitwa munzila yansiswa;
- (c) boonse bapati bakonzya kuvoota beelee bavoota bweelene; kabiyo
- (d) kakutakwe lupyopyongano abumwi bubi buchitwa chiindi chansaluuzyo.

(2) Fulumende weelede kuchita zyoonse ntaamo kubikkilizya kupanga mulawu, kubona kuti ndemeko zyaambwa mukabeela (1), kapati, weelede —

- (a) kubona kuti boonse bantu basika achiimo chakuvoota banaZimbabwe bakonzya kuvoota mbuuli mbukwaambidwe muMpampikwa Yane, balembesyu kuvoota;
- (b) kubona kuti woonse munaZimbabwe ukonzya kuvoota munsaluuzyo naakuti mulefelendamu wajana mweenya wakuvoota, kabiyo agwasizye kuchita kuti kuvoota kwabantu balemene kwabawubila;
- (c) kubona kuti toonse tubunga twazyanyika antoomwe abayiminini bayanda kusalwa bakonzya kuchita zyoonse nzibayanda kuchita zilaatala akulisambala kabayanduula mavooti antoomwe akuvootelwa;
- (d) kubona kuti toonse tubunga twazyanyika antoomwe abayiminini bayanda kusalwa bakonzya kusikila zimwaya milumbe nkukuti bakonzye kulisambala kabotu kubantu; kabiyo
- (e) kubona kuti kukazyania akutamvwanana kwameendeleyo ansaluuzyo zyazyotololwa muchiindi chifwiifwi.

156 Meendeleyo aansaluuzyo antoomwe amalefelendamu

Kunsaluuzyo amalefelendamu woonse, iKkomishini yaNsaluuzyo yeede kubona kuti —

- (a) fumbwa nzila yabelesegwa mukuchita nsaluuzyo iluleme, tikataazyi pe, ilibalangele kabiyo ibikka aantanganana bweendelezegwe bwansaluuzyo;
- (b) butebuzi bwazwa munsaluuzyo naakuti mulefelendamu bwazibisigwa bantu achakufwambaana niyamana biyo nsaluuzyo; kabiyo
- (c) nzila zyakweendeleya milimu zyeede zyabawo—
 - (i) kuchitila kugwisya akukaka zyalupyopyongano lunga lwabawo chiindi chansaluuzyo abumwi bubeya bweendelene akuchitwa kwansaluuzyo;

(ii) kubona kuti zibelesyo zibelesegwa mukuchita nsaluuzyo zibambidwe kabotu.

157 Mulawu waNsaluuzyo

(1) Mulawu upangwa aPalyamenti weelede kupandulula kabotu meendelezyo ansaluuzyo antoomwe amalefelendamu zyaambidwe muKkata lyMulawu eeli, kapati zintu zitobela —

- (a) kweengwa kwamigaanu yamakkonsitwensi antoomwe amawaadi mbuuli mbukwaambidwe muchibeela 161;
- (b) kulembwa kwabantu bakonzya kuvoota, antoomwe azeezyo ziyandikana kuti muntu elembesye kuvoota mumalembe abasikuvoota;
- (c) bayiminina kusalwa munsaluuzyo abamwi bantu balaachakuhcita mukweendelezegwa kwansaluuzyo amalefelendamu;
- (d) kuba amabambe akwiimininwa kwabantu kwiinda mukubona bwiingi bwabo kubantu basalwa kwiiminina masena muNg'anda Yaajulu Yamulawu mbuuli mbukwaambidwe muchibeela 120(1)(a) azyuuno zibambilidwe banakazi muNg'anda Yaansi Yamilawu mbuuli mbukwaambidwe muchibeela 124(1) (b), nzila zyeedele kutobelezegwa mukusalwa kwabantu banjila muzimanga zyabawo. Zimanga eezyo zyeedele kuzuzikizigwaaabantu—
 - (i) bazwa kutubunga twazyanyika twakajisi zyuuno zyasyala kazitakwe bayiminini; kabiyo
 - (ii) bakozyenie awakaliwo kale, kuti wakali mwaalumi ngakunjile mwaalumi kuti wakali mwanakazi ngakunjile mwanakazi;
- (e) kusalwa kwabayiminini babantu balemene mbuuli mbukwaambidwe muchibeela 120(1)(d);
- (f) kuchitwa kwansaluuzyo zyamaKkansili amuzilikiti, mumadolopo antoomwe amumabbooma;
- (g) kweendelezegwa kwantongawuko yaatala abutebuzi bwansaluuzyo.

(2) Chiindo chakwiimininwa kwabantu kwiinda mukubona bwiingi bwabo mbuuli mbukwaambidwe mukabeela (1)(d) kweelede kwabona kuti kuli kwiimikililwa kwabanakazi mumase Seneta mbuuli mbukwaambidwe muchibeela 120(1)(a).

(3) Mulawu aNsaluuzyo weelede kupa malayilile aatala ambukweelede kusalwa bantu bayanda kwiiminina bantu munsaluuzyo. Eezi zyeedele kuchitwa mukati kamazuba asika kukkumi amazuba aane (14) kuzwa buunsi nikoompololwa zuba lyansaluuzyo. Nsaluuzyo zyeedele kuchitwa mukati kamazuba asika makumi otatwe (30) kuzwa buzuba nibatambulwa bantu bayanda kwiiminina bantu munsaluuzyo.

(4) Taakwe kubambululwa kwaMulawu waNsaluuzyo, naakuti nuba uuli mulawu ulachakuchita ansaluuzyo kweelede kuchitwa pe domane Kkomishini yaNsaluuzyo yapa mizeeo yayo mumbandiko eeyo kabiyo mizeeo njiyapa yatambulwa;

(5) Kuti nsaluuzyo zyoompololwa kuti zizoobawo lili, taakwe masandu aachitwa pe kumulawu waNsaluuzyo naakuti kuluuli mulawu ulaachakuchita azyansaluuzyo ayelede kuchitwa nkaambo akonzya kusandula mpalamo zyansaluuzyo eezyo.

CHIBAKA 2

CHINDI CHAKUCHITWA KWANSALUUZYO

158 Chiindi Chakuchitwa kwansaluuzyo

(1) Nsaluuzyo zyakusala bazulwidi basiyenesiyene zyeedele kuchitwa zyakuti takweelede kwiinda mazuba ayinda —

- (a) makumi otatwe kakutanasika buzuba nibazwa azyuuno aabo bakasalidwe munsaluuzyo zyakiinda minyaka musanu yayinda mbuuli mbukwaambidwe muchibeela 143;
 - (b) aawo Palyamenti mpuyazuminana kuti imwayike kwiinda muchibeela 143(2), mazuba aasika kumakumi musanu alaamakumi aane kakuli kwazuminanwa kumwayika kwaPalyamenti; naakuti
 - (c) aawo Palyamenti mbuyamwayika kwiinda muchibeela 109(4) naakuti (5) kakutobela kutondeezya kubula lusyomo kwabantu muli fulumende, mazuba aasika kumakumi musanu alaamakumi aane kakuli kwazuminanwa kumwaywa kwaPlayamenti.
- (2) Nsaluuzyo zyakusalala makkansela kweelede zyachitilwa aamwi azyakusalala Muzulwidi waNyika abayiminini bamuPalyamenti.

(3) Nsaluuzyo zyakuzuzikizya chuuno chakasiigwa awumwi mwiiminini muPalyamenti naakuti mumabbooma zyeedele kuchitwa mukati kamazuba makumi musanu amakumi aane (90) kuzwa buunsi nichasyala kachitachikwe mutu chuuno, aanze kwakuti chuuno chasiigwa kakuli kwasyala myeezi musanu ayine (9) kakuya kunsaluuzyo zyakusalwa kwabantu banji yakumana kwaminyaka musanu. Mpukwaba boobo nsaluuzyo zyakuzuzikizya chuuno zilalekwa kulindwe nsaluuzyo zyakusalwa kwabazulwidi basiyenesiyene

159 Kuzuzikizigwa kwazyuuno kwiinda munsaluuzyo

Aawo mpukweelede kuchitwa nsaluuzyo zyakuzuzikizya zyuuno, fumbwa kuli chili chuuno chasyala kachitachikwe muzulwidi kachili chuuno eecho cheelede kuzuzikizigwa kwiinda mbuuli zyaambidwe muKkata lyamulawu eeli, aabo balangene akubambilisa nsaluuzyo zyakuzuzikizya zyuuno beelederbachita mabambe ayelede achakufwambaana aanze kwansaluuzyo zyazyuuno zyaambidwe muchibeela 158.

CHIBAKA 3

KWEENGWA KWAMIGAANO YAZYAN SALUUZYO

160 Buvule bwamakkonsitichwensi amawaadi

(1) Kuchitila kuti kusalwe bantu batakayiminine bamwi muPalyamenti, iKkomishini yaNsaluuzyo yeelede kweenga migano ipanga makkonsitichwensi asika kumyaanda yobile akkumi limwi (210) munyika yaZimbabwe yoonse.

(2) Kuchitila kuti kusalwe bantu batakayiminine bamwi kuKkansili yaMudolopo amuBbooma, iKkomishini yaNsaluuzyo yeelede kweenga migano ipanga mawaadi ayendelana abuvule bwabantu bayanda kwiimikilila bamwi mudolopo naakuti mubbooma.

161 Kweengwa kwamigaano yazyansaluuzyo

(1) Choense chiindi nikwiinda minyaka kkumi, bumwi buzuba bwaagalwa aKkomishini yaNsaluuzyo bweelede kuba afwiifwi anikuzuwa butebuzi bwakubalwa buvule bwabantu munyika, iKkomishini yaNsaluuzyo yeelede kweenga migano yazyansaluuzyo itondeezya migano mipya yama kkonsitichwensi amawaadi.

(2) Kutieengwa kwamigaano kwachitwa kakuli kwasyala myeezi itasiki musanu awumwi kakuli kwasika mazuba ansaluuzyo zyakusalala bazulwidi basiyenesiyene (general elections), migano eeyo mipya tikonzyi kubelisegwa pe kunsaluzzyo zitanooli ziyanda kuchitwa, pesi kulabeleka migano yansiku/ yakaliwo kale kunsaluuzyo ziyanda kuchitwa.

(3) Migano yansaluuzyo (ma kkonsitichwensi) yeelede kuti muchiindi chakwiiyenga kwaabanwa kwabantu bakavoota mumakkonsitichwensi woonse kulelene nyika yoonse yaZimbabwe.

(4) Migaano yansaluuzyo yamawaadi yeelede kuti muchiindi chakwiiyenga kwaabanisigwa kwabantu bakavoota mumawaadi woonse kweelana mubbooma lyoonse.

(5) Mukweenga migaano yazyansaluuzyo—

(a) migaano yamawaadi, iKkomishini yaNsaluuzyo, yeelede kuti yabona kuti taakwe waadi pe yapegwa migaano iyibikka mumabooma aabili naakuti kwiinda;

(b) migaano yama kkonsitichwensi, iKkomishini yaNsaluuzyo, yeelede kuti yabona kuti taakwe waadi pe yapegwa migaano iyibikka mumabooma aabili naakuti kwiinda;

(6) Mukweenga migaano yansaluuzyo, iKkomishini yaNsaluuzyo, mibusena abusena kweelede ilangisisye zintu zitobela —

(a) zilengwa-leza zili mbuuli milonga, zilundu, mimpata azimwi;

(b) nzila zyakwaambuuzyania mibusena oobo;

(c) buyalwe bwambubakkede basikuvoota mibusena oobo;

(d) fumbwa zintu ziyandwa abantu basikuvoota mibusena oobo;

(e) aawo mpukweengwa migaano mipya, kweelede kwalangwa yansiku kuti yakayimvwi biyeni; kabiyo

(f) bantu bakkala mibusena oobo;

mpawo balangisisye akubona kuti zintu eezi bazilangisisya mukweenga migaano yabo. IKkomishini yaNsaluuzyo ikonzya kusianisa bwiingi bwabantu bajanika muwaadi naakuti mu kkonsitichwensi pesi yeelede yabona kuti woonse mawaadi ama kkonsitichwensi alakonzyania. Kuti kaasiyene, asiyene munzila itayindi makumi aabili kuzwa mumwaanda (20%) bwiingi naakuti buche bwabantu.

(7) Niyamana kweenga migaano yamawaadi ama kkonsitichwensi, iKkomishini yaNsaluuzyo iyelede kupa Muzulwidi waNyika Ngambo/lipoti ijisi—

(a) mazina amawaadi amakkonsitichwensi woonse antoomwe abupanduluzi bwamigaano bwachimwi achimwi;

(b) mepu naakuti mamepu atondeezya mawaadi amakkonsitichwensi; kabiyo

(c) fumbwa luzibo iKkomishini nzyibona kazyelede kuti azibe Muzulwidi waNyika;

Muzulwidi waNyika uyelede kutola ngambo eeyo kuPalyamenti mukati kamazuba asika musanu aabili kuzwa buunsi nayitambula.

(8) Mukati kamazuba asika kukkumi amazuba aane kuzwa lipoti yamigaano niyakeetwa muPalyamenti —

(a) Muzulwidi waNyika ukonzya kwiibweedezya lipoti kuKkomishini yaNsaluuzyo kuti ikalangelange zimwi nzyitanooli yalyiiba kuzilangisisya;

(b) fumbwa ng'anda yamulawu akati kazyo zyobilwe ikonzya kubweedezya lipoti kuKkomishini yaNsaluuzyo kuti ikalangisisye zimwi nzyitalangisisye mulipoti eeyo. Kuti kwaboobo, Muzulwidi waNyika uyelede kubweedezya lipoti kuKkomishini yaNsaluuzyo.

(9) Aawo lipoti yakweengwa kwamigaano mpuyabweedezeegwa kuKkomishini, kwiinda mukabeela (8), iKkomishini yaNsaluuzyo yeelede kubona kuti yatola mizeezo njiyapegwa kuti iyilangelange lubo pesi nziyazuminana Kkomishini eeyo nzizyo tazisanduki.

(10) Achakufwambaana kuzwa akutobeleyza zyaambidwe mutubeela (7) a (9), iKkomishini yaNsaluuzyo yeelede kweeta lipoti lyakumaninsizya kuMuzulwidi waNyika.

(11) Mukati kamazuba asika mukkumi aane kali watambula lipoti yaKkomishini yaNsaluuzyo, Muzulwidi waNyika uyelede kudinda mupepa lyaluundu (Gazeti) koompolola mazina amigaano yamawaadi ama kkonsitichwensi mapya.

(12) Aawo mpukuli musiyano akati kabupanduluzi bwamugaano wawaadi naakuti kkonsitichwensi amepu/amamepu akabambwa aKkomishini, zili mubupanduluzi nzizitobelwa.

CHAANDAANO 8

BUBETESI BOONSE ANTOOMWE ANKUTA

CHIBAKA 1

BWIIME BWAZYANKUTA

162 Manguzu aBubetesи

Bubetesи boonse bujana nguzu kuzwa kuluundu lwaZimbabwe kabiyo nguzu eezi zibikkidwe munkuta zisiyenesiyene zibikkilizya —

- (a) Nkuta yazyakata lyaMulawu
- (b) Nkuta Yaajulujulu
- (c) Nkuta Yaajulu
- (d) Nkuta Yambelekelano
- (e) Nkuta Yanjendelezyo
- (f) Nkuta yaMejastiliti
- (g) and Nkuta Zyabaami aBasibbuku
- (h) zimwi nkuta zipangwa aMulawu upangwa aPalyamenti.

163 Bubetesи Boonse

(1) Bubetesи boonse bwamuZimbabwe bujisi bantu batobela —

- (a) Duundumuntule waBubetesи, Mutobeli waDuundumuntule waBubetesи, abamwi Majaji aNkuta yazyakata lyaMulawu;
- (b) Majaji aNkuta Yaajulujulu;
- (c) Muzulwidi waBubetesи baNkuta Yaajulu abamwi Majaji aNkuta Yaajulu;
- (d) Muzulwidi waBubetesи baNkuta Yambelekelano abamwi Majaji aNkuta Yambelekelano;
- (e) Muzulwidi waBubetesи baNkuta Yanjendelezyo abamwi Majaji aNkuta Yanjendelezyo; kabiyo
- (f) bantu babeteka milandu muNkuta zyamaMejastiliti, amunkuta zyabaami abasibbuku azimwi nkuta zitanooli zyabumbwa kwiinda Mulawu upangwa aPalyamenti.

(2) Duundumuntule waBubetesи nguwe silutwe wabubetesи boonse kabiyo nguuzulwida Nkuta yazyakata lyaMulawu aNkuta Yaajulujulu.

- (3) Muzulwidi waNkuta Yaajulu ngusilutwe wankuta eeyo.
- (4) Muzulwidi waNkuta Yambelekelano ngusilutwe wankuta eeyo.
- (5) Muzulwidi waNkuta Yanjendelezyo ngusilutwe wankuta eeyo.

[Aboobo mbambululo yachitwa ku163(1)(d) a (e) a 163 (4) a (5) mukwiinda mukusowa "Muzulwidi waBubetes" a Muzulwidi Mupati": Sikubambulula Mulawu]

164 Kulyiimikilila akulisanta kwaBubetes Boonse

(1) Nkuta zyoonse zililyiimikilile akulisanta mukuchita milimu yazyo nkaako zyelede kulemeka akutobeleya Kkata lyaMulawu luzutu antoomwe amilawu yoonse yamunyika. Zyelede kubona kuti batyola milawu bapegwa zisubulo zyeendelene aakutyolwa kwamilawu kakutakwe muntu uyoowegwa naakuti ufwidwa luse.

(2) Bulyiimikilile, kulisanta akubeleka nchobeni kwankuta nkuko kusimatizya kulemekwa kwamulawu akusimya bulelo bwajandabanji munyika nkaako—

- (a) taakwe fulumende naakuti mutabi wafulumende muzibela zyoonse zisiyenesiyene munyika, kuzwa kujulu kuyoosika aansi, naakuti umwi biyo muntu, uyelede kunjilila mumabelekelo ankuta;
- (b) Fulumende, kwiinda mukupanga milawu akutola zimwi ntaamo, uyelede kuti wagwasizya akukwabilila nkuta zyoonse kuchitila kuti kulisanta akulyiimikilila kwazyo, bulemu bwazyo, kusikika kwazyo akubeleka nchobeni kwazyo kuchitike, nkukuti nkuta zikonzye kuzuzikizya ndemeko zyaambidwe muchibela 165 chaKkata lyaMulawu eeli.

(3) Zyaambo zyaambwa ankuta antoomwe azisubulo zyapegwa ankuta zyelede kulemekwa akuchitwa amuntu woonse munyika kubikkilizya fulumende, atubungabunga toonse tujanika munyika.

(4) Taakwe chaambidwe pe muchibela eechi chinga chilabonwa aanga chikasya Mulawu upangwa aPalyamenti kuti upe nguzu antomwe amilimu iimbi yakuchita kububetesi aajulu kwayeeyo yakubeteka milandu, fumbwa kuti milimu iimbi njibwapegwa bubetesi tayichiti kuti buleke kulyiimikilila akulisanta mukuchita mulimu wakubeteka milandu.

165 Ndemeko zizulwida babetesi

(1) Mukuchita mulimu wabo babetesi, basikubeteka beelete kuzulwidwa aandemeko zitobela —

- (a) bululami bweelede kuchitilwa kumuntu woonse nikuba abe muntu ulibiyeni muchisi;
- (b) bululami tabweelede kunonokelwa pe nkaako babetesi beelete kuchita milimu yabo zyanhobeni akufwambaana kweelede;
- (c) milimu yankuta mipati loko mukukwabilila zyelelo angwangunuko zyabantu antoomwe akubona kuti milawu yanyika yoonse yalemekwa akutobelezegwa.

(2) Babetesi, kalaalikke naakuti kabali banji, beelete kulemeka zyuuno zyabo zyabubetesi antoomwe kusyomwa nkubasyomwa aluundu. Beelete kubona kuti balilyiimikilile akulisanta munzila njibachita milimu yabo nkukuti luundu lwiinkilile nembo kalusyoma akulemeka babetesi boonse.

(3) Kuti kabaamba nzibayeeya aatala atwaambo tweetwa kunkuta, babetesi bayelede kwaamba nzibayeeya kabaangunukide kakutakwe banjilila mumabelekelo aabo naakuti kabatakwe ubasungilizya kuti bachite mulimu wabo muliimi nzila njibatayandi.

(4) Basikubeteka tabeelede pe—

- (a) kunjila muli zyakweendelezegwa kwanyika (politikisi);
- (b) kuba achuuno naakuti kuba umwi watubunga twakweendelezegwa kwanyika;
- (c) kugwasizya mukulanguula mali yakupa tubunga twazyanyika naakuti kupa mali kukabunga kakweendelezegwa kwanyika; naakuti
- (d) kwiinka kumiswaangano yatubunga twazyanyika.

(5) Bubetesи tabweelede pe kukumbila zipo kuzwa nikuba kulini zinga zilachita kuti kulyimikilila akulisanta kwabo kunyonyongane.

(6) Bubetesи bweelede kutunzya nembo mulimu wabo wakubeteka milandu kabiyo tabweelede kuchita zimwi pe zinga zilanyonyongania kulyimikilila akulisanta kwabo.

(7) Bubetesи bweelede kutola ntaamo zyakujana antoomwe akuyungizya luzibo lwamilimu yabo, kapati bweelede kubona kuti bulookujana luzibo aatala azilookuchitika kumilawu yanyika naakuti milawu yakunze kwanyika,

166 Nkuta yazyakata lyaMulawu

(1) Nkuta yazyakata lyaMulawu njiinkuta yakumamanino kuzyaambo zilaachakuchita azyakata lyaMulawu kabiyo ijisi babetesи batobela —

(a) Duundumuntule waBabeteи awutobela Duundumuntule waBabeteи; kabiyo

(b) amajaji aali musanu aNkuta yazyakata lyaMulawu;

(2) Kuti kwayandikana kuti cube Jaji wabujana bugwasizya kuNkuta yazyakata lyaMulawu kwachiindi chisyoonto, Duundumuntule waBabeteи ukonzya kugala uumwi Jaji naakuti Jaji wakasiya mulimu kuti agwasizye muNkuta yazyakata lyaMulawu kwachiindi chiyandikana.

(3) Milandu naakuti twaambo tweetwa kuNkuta yazyakata lyaMulawu —

(a) tulaatala akutyolwa kwazyeelo angwangunuko zyaampandamunsaka zyaambidwe muChaandaano 4 naakuti zyaambo zilaatala akusalwa kwaMuzulwidi waNyika naakuti uMutobela, zyelede kubetekwa kaaliwo wonse majaji aNkuta yaZyaKkata lyaMulawu.

(b) Tumwi twaambo naakuti imwi milandu iteensi yeeyo yaambwa mufukalilaajulu, tweede kubetekwa amajaji asika batatu naakuti biingi kwiinda batatu baNkuta yazyakata lyaMulawu. Pesi Mulawu upangwa aPalyamenti naakuti imwi miteto yaNkuta ikonzya kuzumizya kuti tumwi twaambo/milandu ibetekwe aJaji womwe naakuti banji baNkuta yazyakata lyaMulawu.

(4) MaJaji aachibeleka naakuti maJaji akasiya mulimu banga bagalwa kuti bagwasizye kuNkuta yazyakata lyaMulawu, mbuuli zyaambwa mukabeela (2) bakonzya kwiinkilila nembo kabagwasizya muNkuta yazyakata lyaMulawu naanka chasika chiindi chabo chakuti bayimikile nkukuti bakonzye kumaninsizya imwi milimu njibakatalika naakuti yakatalikwa kabatana galwa kuti bagwasizye.

167 Nziibeleka Nkuta yazyakata lyaMulawu

(1) Nkuta yazyakata lyaMulawu —

(a) njiinkuta yakumamanino kumilandu yoonse ilaachakuchita azyakata lyaMulawu, nkaako nziyaamba atala atwaambo tweetwa kulinjiyo nkuta eeyi tazikazigwi pe kabiyo boonse bantu beelee kuzitobeleyza akuzichita zyaambwa ankuta eeyi;

(b) ilangana atwaambo twazyaKkata lyaMulawu luzutu antoomwe atumwi twaambo tulaachakuchita azyakata lyaMulawu, kapati eezyo zyaambidwe muchibeela 131(8)(b) afuka 9(2) lyaMpampikwa Yasanu ijanika kumamanino kwaKkata lyaMulawu eeli; kabiyo

(c) nziyaamba ataala azyaambo zyaKkata lyaMulawu naakuti zimwi zyaambo zyeendelana aKkata lyaMulawu tazikazigwi pe iinga —.

(2) Kwiinda muKkata lyaMulawu eeli, niNkuta yaZyaKkata lyaMulawu luzutu —

- (a) ilaamba atala akweendelana naakuti kuteendelana kwamulawu mupya aKkata lyaMulawu eeli, pesi nkuta eeyi ikonzya kupa muzeezo wayo luzutu kuti kaambo aka keetwa kuli njiyo kwiinda munzila zyaambidwe muKkata lyaMulawu eeli;
- (b) ilabeteka kaambo keendelene akukazyania kulaatala akusalwa kwaMuzulwidi waNyika munsaluuzyo zyachitwa;
- (c) ilabeteka kaambo keendelene akukazyania kulaatala akusalwa kwaMutobeli waMuzulwidi waNyika munsaluuzyo; naakuti
- (d) ilaamba kuti Palyamenti naakuti Muzulwidi waNyika wakachilwa kuchita milimu yakwe mbuuli mbukwaambidwe muKkata lyaMulawu.

(3) Mulawu upangwa aPalyamenti ukonzya kwaamba zimwi nzyiyelede kuchita Nkuta yazyakata lyaMulawu, nkaambo kaboobo mulawu ooyo ukonzya kupa manguzu akuti Nkuta yazyakata lyaMulawu ipange miteto itobelezegwa munkuta.

(4) Milawu yaNkuta yazyakata lyaMulawu yeelede kuzumizya muntu, kuti kakuli kuchita boobo kuzuzikizya kuti muntu ajane bululami.

(5) Milawu yaNkuta yazyakata lyaMulawu yeelede kuzumizya muntu, kuti kakuli kuchita boobo kuzuzikizya kuti muntu ajane bululami—

- (a) kuti muntu ayete kuNkuta yazyakata lyaMulawu kaambo kalaazyakuchita azyakata lyaMulawu;
- (b) kukumbila kuti mulandu wakwe ukabekwe aNkuta yazyakata lyaMulawu kuzwa kuliimwi nkuta nkuwali kubetekwa;
- (c) kuboneka mbuuli mweenzinyina waNkuta yazyakata lyaMulawu.

168 Nkuta Yaajulujulu

- (1) Nkuta Yaajulujulu ninkuta mpati ijisi babetesi batobel—a
 - (a) Duundumuntule waBabeseti awutobela Duundumuntule waBabeseti;
 - (b) majaji abili naakuti ayinda bibili baNkuta Yaajulujulu
 - (c) fumbwa majaji bagalwa kwiinda mukabeela (2)
- (2) Kuti kwayandikana kuti kube Jaji wakujana bugwasizya Nkuta Yaajulujulu kwachiindi chisyoonto, Duundumuntule waBabeseti ukonzya kugala umwi Jaji uchibeleka naakuti Jaji wakasiya mulimu kuti agwasizye mu Nkuta Yaajulujulu kwachiindi chiyandikana.
- (3) MaJaji bachibeleka naakuti maJaji bakasiya mulimu banga bagalwa kuti bagwasizye kuNkuta Yaajulujulu, mbuuli zyaambwa mukabeela (2) bakonzya kwiinkilila nembo kabagwasizya mu Nkuta Yaajulujulu naanka chasika chiindi chabo chakuti bayimkile nkukuti bakonzye kumaninsizya imwi milimu njibakatalika naakuti yakatalikwa kabatana galwa kuti bagwasizye.

169 Nzyiibeleva Nkuta Yaajulujulu

- (1) Nkuta Yaajulujulu njiinkuta yakumamanino kuliimwi milandu yoonse atumwi twaambo tutalangene azyakata lyaMulawu.
- (2) Pesi kwiinda mukabeela (1), Mulawu upangwa aPalyamenti ukonzya kupa Nkuta Yaajulujulu iimbi milimu yakuchita antoomwe awambi manguzu.
- (3) Mulawu upangwa aPalyamenti ukonzya kupa iimbi milimu Nkuta Yaajulujulu kubikkilizya manguzu akuchita miteto itobelezegwa muNkuta Yaajulujulu.
- (4) Miteto yamunkuta ikonzya kupa nguzu kuli Mulembi Mupati waNkuta Yaajulujulu antoomwe ankuta lwayo kuti niilangalanga milandu yakubbadalisania kwabantu—

- (a) ipe mizeeza yamaboneno aayo kumilandu itendebete pesi kumilandu naakuti twaambo tulaachakuchita akubambwa kwabana nibakakana bazyali;
- (b) ipe maboneno aayo atala atwaambo tumwi biyo pesi peepe kumilandu ilaachakuchita akwaangunuka kwamuntu;

Pesi miteto eeyo iyelede kupa nguzu, muntu wajatwajatwa bubi azyaambwa a Mulembi Mupati waNkuta Yaajulujuju, zyakukumbila kuti Jaji waNkuta Yaajulujuju alangelange kaambo kakwe. Ooyu Jaji wakumbilwa ukonzya kusimatizya zyakaambwa aMulembi Mupati waNkuta Yaajulujuju naakuti kuzisandula zyakambidwe, naakuti kuzikaka zyoonse zyakaambidwe mpawo ape maboneno aakwe aasiyene mbuuli mbazibona zyaambo.

170 Nkuta Yaajulu

Nkuta Yaajulu ninkuta mpati ijisi babetesи batobela —

- (a) Duundumuntule waBabtesi, Mutobeli waDuundumuntule waBabtesi antoomwe aMuzulwidi waBabtesi baNkuta Yaajulu; kabiyo
- (b) abamwi majaji baNkuta Yaajulu batanoogalwe muchiindi achiindi mbuuli mbukwelede.

171 Nzyiibeleva Nkuta Yaajulu

(1) Nkuta Yaajulu —

- (a) njiyo ilangalanga yoonse milandu yamipati yeetwa kunkuta kuzwa munyika yoonse yaZimbabwe;
- (b) ilaamukuli wakulangalanga mabelekelo ankuta zyabaMejasitiliti azimwi nkuta zilaansi antoomwe akulangalanga zisubulo zyakapegwа kumilandu yakabetekwa ankuta zyabaMejasitiliti.
- (c) ikonzya kulanga zyaambo zilaachakuchita azyaKkata lyaMulawu aanze kwazeezyo zyelede kulangwalangwa aNkuta yazyaaKkata lyaMulawu;
- (d) ikonzya kuchita zimwi mbuuli mbukutanooli kwaambwa aMulawu upangwa aPalyamenti.

(2) Mulawu upangwa aPalyamenti ukonzya kupa iiambi milimu Nkuta Yaajulu kubikkilizya manguzu akuchita miteto itobelezegwa muNkuta Yaajulu.

(3) Mulawu upangwa aPalyamenti ukonzya kupa manguzu kuNkuta Yaajulu kuti ipandulwe muzipanzi-panzi zilangisisya zintu zisiyenesiyene pesi chimwi achimwi chipanzi cheelede kukonzya kuchita mulimu ukonzya kuchitwa aNkuta Yaajulu yoonse kijisini nikuba muli kali akali kaambo/mulandu weetwa kunembo lyabo.

(4) Milawu yamunkuta ikonzya kupa nguzu kuli Mulembi Mupati waNkuta Yaajulu kuti niilangalanga milandu yakubbadalisyania kwabantu—

- (a) ipe mizeeza yamaboneno aayo kumilandu itendebete pesi kumilandu naakuti twaambo tulaachakuchita akubambwa kwabana nibalakana bazyali
- (b) ipe maboneno aayo atala atwaambo tumwi biyo pesi peepe kumilandu ilaachakuchita akwaangunuka kwamuntu;

Pesi miteto eeyo iyelede kupa nguzu, muntu wajatwajatwa bubi azyaambwa aMulembi Mupati waNkuta Yaajulu, zyakukumbila kuti Jaji waNkuta Yaajulu alangelange kaambo kakwe. Ooyu Jaji wakumbilwa ukonzya kusimatizya zyakaambwa aMulembi Mupati waNkuta Yaajulu naakuti kuzisandula zyakaambidwe, naakuti kuzikaka zyoonse zyakaambidwe mpawo ape maboneno aakwe aasiyene mbuuli mbazibona zyaambo.

172 Nkuta Yambelekelano

- (1) Nkuta Yambelekelano ijisi babetesи batobela —
(a) Mubetesи mupati; kabiyo
(b) abamwi mabtesи ba Nkuta Yambelekelano batanoogalwe muchiindi achiindi.

[Kabela kakabambululwa achibela 3 kaMulawu 10 wa2017]

(2) Nkuta Yambelekelano ijatajata zyaambo amilandu yazyakubelekelana kwabantu (babesi ababelekelwa) mbuuli mbukunga kuli pandulwidwe muMulawu upangwa aPalyamenti.

(3) Mulawu upangwa aPalyamenti ukonzya kupa nguzu kuNkuta Yambelekelano kuti ilangelange zimwi zyaambo antoomwe akupanga milawu yamuNkuta Yambelekelano.

173 Nkuta Yanjendelezyo

- (1) Nkuta Yanjendelezyo ninkuta yamalembe ijisi babetesи batobela —
(a) Mubetesи mupati; kabiyo
(b) abamwi babetesи baNkuta Yanjendelezyo batanoogalwe muchiindi achiindi.

[Kabela kakabambululwa achibela 3 chaMulawu 10 wa2017]

(2) Nkuta Yanjendelezyo ijatajata zyaambo zyakweendelezegwa kwazintu mbuuli mbukunga kuli pandulwidwe muMulawu upangwa aPalyamenti.

(3) Mulawu upangwa aPalyamenti ukonzya kupa nguzu kuNkuta Yanjendelezyo kuti ilangelange zimwi zyaambo antoomwe akupanga miteto yamuNkuta Yanjendelezyo.

174 Zimwi nkuta atubunga tubeteka

- (1) Mulawu upangwa aPalyamenti ukonzya kwaamba aatala akupangwa, bubumbwe bwazyo, antoomwe atwaambo/milandu tubetekwa ankuta zya —
(a) maMejastiliti, kuti balangelange misyobo yamilandu yoonse;
(b) nkuta zyabaami abasimabbuku zilangalanga miteto yazyatunsiyanisya ayachintu;
(c) zimwi nkuta zilaansi kwaNkuta Yaajulu; kabiyo
(d) atubunga tubumbwa kuti tulangelange mpyompyongano zyeetwa kuli ntuto.

(2) Naa kakulangidwe chibela eechi alimwi achibela 171(1)(b), kulazibisigwa kuze kutabi kudoneeka kuti Nkuta yaKubeteka atumwi tubunga tubeteka aNkuta waNjendelezyo ninkuta zili munsi aNkuta Yaajulu.”

(3) Kakutobelezegwa chibela 188(4) chaKkata lyaMulawu, mifolo, luliyi alumwiluliyo Iwamali zyaBabesи baNkuta yaMbelekelano aBabesи aNkuta yaBweendelezi bwaManguzu balazyuno naakuti biimvwilidi uujisi chuunomubuzuba oobo Mulawu ooyu nuatalika kubeleka tiyooselusigwa.

[Kabela (2) a(3) kakabikwa achibela 5 chaMulawu 10 wa2017]

175 Nguzu zyankuta kuzyaambo zilachakuchita azyaKkata lyaMulawu

(1) Aawo nkuta mpuyapa muzeezo wayo kuti mulawu tuuyendelani pe aKkata lyaMulawu, naakuti aatala anchito zyaMuzulwidi waNyika naakuti nchito zyaPalyamenti, muzeezo ooyo tukonzyi kubelesegwa kusikila wazuminwa aNkuta yazyakata lyaMulawu.

(2) Nkuta yapa muzeezo aatala akuteendelana kwamulawu aKkata lyaMulawu mbuuli kwaambidwe mukabeela (1) aajulu, ikonzya kujana buumuzya machise luzutu naakuti

kwiimikizya meendelezyo azyaambo kusikila Nkuta yazyakata lyaMulawu yapa maboneno aayo aatala azyaambo naakuti nchito eezyo.

(3) Fumbwa mutu ukonzya kukumbila kuti zyaambo zyakwe zitolwe kuNkuta yazyakata lyaMulawu, naakuti kwiinka kuNkuta yazyakata lyaMulawu kuti muzeezo wakapegwa ankuta yaansi , mbuuli mbukwaambidwe mukabeela (1) aatala azyaambo zilachakuchita azyakata lyaMulawu, ukasimatizigwe, ukasandulwe naakuti kukakwa.

(4) Kuti zyaambo zilaachakuchita azyakata lyaMulawu zyeetwa mukubetekwa kwamulandu umwi, mubetesu wankuta eeyo weelede kutola zyaambo eezyo kuNkuta yazyakata lyaMulawu, aanze kwakuti unooli wabona kuti chikumbizyo nchamayabwe.

(5) Mulawu upangwa aPalyamenti naakuti miteto yankuta yeelede kubikka antanganana kuti muzeezo wapegwa ankuta yaansi aatala akweendelana naakuti kuteendelana kwamulawu/nchito aKkata lyaMulawu, zyeede kutolwa kuNkuta yazyakata lyaMulawu.

(6) Kuti kiilangisisya zyaambo zilaachakuchita aatala azyakata lyaMulawu, inkuta yaansi ikonzya—

- (a) kupa muzeezo wakuti mulawu/nchito tazyeendelani pe aKkata lyaMulawu;
- (b) Kupa muzeezo wabwini, kubikkizya kuzyotolola zintu zyakali zyabija kale nkaambo kazyambo zyeetwa munkuta zyaambo nizichitolwa kuNkuta yazyakata lyaMulawu kuti zikazyotololwe.

176 Nguzu zijiwi aNkuta yazyakata lyaMulawu, Nkuta Yaajulujuju aNkuta Yaajulu

Nkuta yazyakata lyaMulawu, Nkuta Yaajulujuju aNkuta Yaajulu zijiwi nguzu zyakukwabilila akweendelezya milimu yazyo akusumpula mulawu wanyika amulawu wachintu, kakulangisisigwa mbukweelede kusumpula zyabululami antoomwe azili muKkata lyaMulawu.

CHIBAKA 2

KUGALWA KWABABETESI ACHIINDI NCHIBEELEDE KUKKALA MUZYUNO ZYABO

177 Nzibeelede kubaazyo bantu kuti basalwe/bagalwe kuba majaji aNkuta yaKkata lyaMulawu

(1) Muntu ukonzya kugalwa kuba Jaji waNkuta yazyakata lyaMulawu kuti kakuli munazimbabwe, ujisi minyaka isika naakuti iyinda makumi aane kabiyo ujisi luzibo lunji aatala amulawu wazyaKkata lyaMulawu, kabiyo kajisi chimwi chazeezi zitobela—

- (a) wakali waba Jaji kale wankuta ilangalanga milandu azyaambo zyiingi ku civil acriminal cases munyika ibelesya mulawu waRoman Dutch naakuti mulawu waChikuwa, kabiyo nyika eeyo kiibelesya mulaka wachikuwa mukweendelezya nkuta amilimu yafulumende; naakuti
- (b) kwaminyaka isika naakuti iyinda kkumi atubili, kayijisini naakuti kayitajisini minyaka eeyi, wakali kubeleka zyabusimulawu—
 - (i) muZimbabwe; naakuti
 - (ii) munyika ibelesya mulawu waRoman Dutch naakuti mulawu waChikuwa , Chikuwa kakuli ngumulaka ubelesegwa munkuta amukweendelezya milimu wafulumende kabiyo achiindi eecho ukonzya kuchita mulimu wasimulawu.

(2) Kuti ugalwe kuba Jaji waNkuta yazyakata lyaMulawu, muntu kweelede kakonzya kuchita mulimu wabuJaji.

178 Nzibeelede kubaazyo bantu kuti basalwe/bagalwe kuba maJaji aNkuta Yaajulujulu

(1) Muntu ukonzya kugalwa kuba Jaji waNkuta Yaajulujulu kuti kakuli munaZimbabwe, ujisi minyaka isika naakuti iyinda makumi aane, kabiyo kajisi zeezi zitobela

-
- (a) wakali waba Jaji kale wankuta ilangalanga milandu azyaambo zyiingi ku civil acriminal cases munyika ibelesya mulawu waRoman Dutch law naakuti mulawu waChikuwa, kabiyo nyika eeyo kiibelesya mulaka wachikuwa mukweendelezya nkuta amilimu yafulumende; naakuti
 - (b) kwaminyaka isika naakuti iyinda kkumi, kayijisini naakuti kayitajisini minyaka eeyi, wakali kubeleka zyabusimulawu—
 - (i) muZimbabwe; naakuti
 - (ii) munyika ibelesya mulawu waRoman Dutch naakuti mulawu waChikuwa,
 - (iii) Chikuwa kakuli ngumulaka ubelesegwa munkuta amukweendelezya mulimu wafulumende; kabiyo achiindi eecho ukonzya kuchita mulimu wasimulawu.

(2) Kuti ugalwe kuba Jaji waNkuta Yaajulujulu, muntu kweelede kakonzya kuchita mulimu wabubetesi/wabuJaji.

179 Nzibeelede kubaazyo bantu kuti babe maJaji aNkuta Yaajulu, Nkuta Yambelekelano aNkuta Yanjendelezyo

(1) Muntu ukonzya kugalwa kuba Jaji waNkuta Yaajulu, Nkuta Yambelekelano aNkuta Yanjendelezyo kuti kakuli, ujisi minyaka isika naakuti iyinda makumi aane, kabiyo kajisi zeezi zitobela —

- (a) wakali waba Jaji kale wankuta ilangalanga milandu azyaambo zyiingi kumilandu mipati munyika ibelesya mulawu waRoman Dutch naakuti mulawu waChikuwa, kabiyo nyika eeyo kiibelesya mulaka wachikuwa mukweendelezya nkuta amilimu yafulumende; naakuti
- (b) kwaminyaka isika naakuti iyinda musanu atubili, kayijisini naakuti kayitajisini minyaka eeyi, wakali kubeleka zyabusimulawu—
 - (i) muZimbabwe;
 - (ii) munyika ibelesya mulawu waRoman Dutch, Chikuwa kakuli ngumulaka ubelesegwa munkuta amukweendelezya mulimu wafulumende; naakuti
 - (iii) kuti kali munaZimbabwe, munyika kubelesegwa muawu waChikuwa kabiyo Chikuwa kakuli ngumulaka ubelesegwa munkuta amukweendelezya mulimu wafulumende kabiyo achiindi eecho ukonzya kuchita mulimu wasimulawu.

(2) Kuti ugalwe kuba Jaji waNkuta Yaajulu, Nkuta Yambelekelano aNkuta Yanjendelezyo, muntu kweelede kakonzya kuchita mulimu wabuJaji.

180 Kugalwa kwaBabtesi

(1) Dunduumuntule waBabtesi, Mutobeli waDunduumuntule waMubetesи alimwi aMuzulwidi wamaJaji baNkuta Yaajulu abamwi boonse majaji bagalwa aMuzulwidi waNyika nkakutobelezewa chibaka eechi.

(2) Dundumuuntule waBabtesi, Mutobeli waDundumuuntule waMubetesи waNkuta Yaajulu bagalwa aMuzulwidi waNyika musule akubonisyania aKkomishini yaMbelekelano yaMulawu.

(3) Naa kugalwa kwaDundumuuntule waBabtesi, Mutobeli waDunduumuntule waBabaetsi antoomwe aMuzulwidi waBabtesi baNkuta Yaajulu kuti kabateendelani amabambe kufumbwa atanoli abikwa aKkomishini yaMbelekelano waMulawu mbuuli mbukwaambidwe kuchibaka (2), Muzulwidi waNyika uzochita kuti Ng'anda yaMulawu yaSeneti izibisigwe aatala azeezi chakufwambana;

Naa, kuchitila kuti kutabi kudoneeka, kulazibisigwa kuti ntaamo yaMuzulwidi waNyika tikoyosandulwa

(4) Kakutobelwa kabela 4(a), kufumbwa chiindi mpukuyandikana kuti kukapegwe Bubtesi uutali Dundumuuntule waBabtesi, Mutobeli waDunduumuntule waMubetes antoomwe aMuzulwidi waMajaji kuNkuta Yaajulu, Kkomishini yaMbelekelano yaMulawu yeelede—

- (a) yiitilile chuuno eecho; alimwi
- (b) itambe Muzulwidi waNyika antoomwe aLuundu kuti basale mazina; alimwi
- (c) ichite mbuzisisyo kunembo lyaLuundu abaabo bayanda mulimu ooyo; alimwi
- (d) ibunganie mulongo wabantu botatwe basalwa mbuuli bantu beeledo ooyo mulimu; alimwi
- (e) ipe Muzulwidi waNyika mulongo ooyo; kakutobelezegwa kabela (5), Muzulwidi waNyika kweelede wapa uumwi wasalwa eecho chuuno.

[Chibela chakasowegwa achibela 12 (a) chaMulawu 2 wa2021]

(4a) Kakutakwe azyakuchita azyaambwa kukabela (4) Muzulwidi waNyika, katobela kubonisigwa kwaKkomishini yaMbelekelano ulakonzya, kufumbwa chiindi mpukuyandikana, kuti abike Mubetes uuliwo kale waNkuta Mpati, Nkuta Yaajulu, Nkuta Yambelekelano naakuti Nkuta yaNjendeleyo kuti abe mubetes wankuta iitobela yaajulu

[Chibela chabikwa achibela 12 (b) chaMulawu 2 wa2021]

(5) Naa Muzulwidi waNyika wazwa amuzeego wakuti kunyina naba womwe kumulongo ngwaapegwa weelede mulimu mbuuli mbukwaambidwe kukabela (4)(e), weelede wachita kuti Kkomishini yaMbeleko yaMulawu imupe uumbi mulongo wabantu botatwe beeledwe ooyo mulimuMuzulwidi waNyika kuzwa waawo weelede kusala umwi wabaabo kuti ayendelezye eecho chuuno.

(6) Muzulwidi waNyika weelede wachitisa kuti kugwisigwa ngambo wakuzibya aatala akupegwa mulimu kwendelana acheechi chibaka muGazette.

(7) Zyuuno zyaDundumuule wabaJaji waNkuta yaMbelekelano aMubetes Mupati waNkuta yaNjendeleyo yaManguzu kweelede kweendelezegwa awumwi Jaji naakuti waajulu naakuti Jaji uchijisi chuuno, nkaziya akuti nchichili chiimo chiliwo, kunkuta yeelede, alimwi bapegwa mulimu aDundumuuntule waBabtesi musule akubonisyania aKkomishini yaMbelekelano yaMulawu.

[Chibela chakasowegwa achibela 6 chaMulawu 10 wa2017]

181 Kugalwa kwaBabtesi bajisilidi zyuuno

(1) Kuti chuuno chaDuundumuuntule waBabtesi chasyala kachitakwe mutu naakuti ultiwo katachikonzyi kuchita milimu yachuuno eechi, Uumutobela ukonzya kunjila ajatile chuuno eechi. Pesi kuti zyuuno zyobilwe duundumuuntule amutobeli wakwe kabatawo naakuti kabatachikonzyi kuchita milimu yabo, umwi Jaji ulachiindi chilamfu kabeleka muNkuta yazyaKkata lyaMulawu, ukonzya kujatila kubaDuundumuuntule waBabtesi.

(2) Kuti wofesi ya—

- (a) muzulwidi waBabtesi baNkuta Yaajulu;

(b) mubetesi mupati waNkuta Yambelekelano: naakuti

(c) mubetesi mupati waaNkuta Yanjendelezyo:

yasyala kiitachikwe mutu naakuti uuliwo katachikonzyi kuchita milimu yakwe, umwi Jaji, ulachiindi chilamfu kabeleka, munkuta eeyo ukonzya kujana bujatila kuba Dundumuntuule waBabtesi bankuta eeyo.

[Kabela kabambululwa achibela 7 kaMulawu 10 wa2021]

(3) Kuti kwayandikana lugwasyo Iwawumbi Jaji kwachiindi chifwiifwi, aajulu kwabaabo baliwo muNkuta Yaajulu, Nkuta Yambelekelano, aNkuta Yanjendelezyo, Muzulwidi waNyika ukonzya kugala umwi wamaJaji akasiya mulimu. Mukugala kwakwe Muzulwidi waNyika upegwa mizeezo aKkomishini yaBabtesi. Ooyo Jaji wagalwa kuti ajane bujatilila ukonzya kubeleka kwachiindi chisika kumyeezi

kkumi ayibili, nikuba kuti ukonzya kupegwa iimbi myeezi kkumi ayibili niyamana yakutaanguna.

(4) Bantu bagalwa kuti bajane bujatilila, kwiinda mukabeela (3), bakonzya kwiinkillila nembo kabagwasizya kubamaJaji naanka chasika chiindi chabo chakuti bayimikile kubeleka, nkukuti bakonzye kumaninsizya imwi milimu njibakatalika naakuti yakatalikwa kabatana galwa kuti bagwasizye.

182 Kugalwa kwabaMejasitiliti abamwi babeleka mububetes

Mulawu upangwa aPalyamenti kweelede waamba mbukweelede kugalwa baMejasitiliti antoomwe abamwi babelesi babubetesи bateensi maJaji, pesi —

(a) Mejasitiliti ueyelede kugalwa aKkomishini yaBabtesi;

(b) babelesi babubetesи bateensi baMejasitiliti amaJaji kweelede bagalwa kwiinda mukuzumina kwaKkomishini yaBabtesi

(c) kugalwa kwababelesi ooku kweelede kuchitwa munzila ibalangala ilaantanganana kakutakwe kuyoosegwa akuchitilana luse.

183 Babelesi babubetesи tabeelede kugalwa kubelekela nkuta zyiinda iimwi

Aanze kwazeezyo zyaambidwe muKkata lyaMulawu eeli, mutu tayeledе kugalwa kuba mubelesi wabubetesи wankuta zyiinda iimwi pe.

184 Kugalwa kwababelesi babubetesи kweelede kutondeezya bwiime bwachisi

Kugalwa kwababelesi babubetesи kweelede kutondeezya bwiime abube bwachisi kabiyo kakutondeezya buvule abuche bwabaalumi abanakazi muZimbabwe.

185 Chikonke chamulimu

(1) Katana talika mulimu Duundumuntule waBabtesи naakuti Uutobela Duundumuntule waBabtesи, kweelede wakonkezya kunembo lyaMuzulwidi waNyika naakuti kunembo lyawumwi mutu wazumizigwa aMuzulwidi waNyika. Bwiime bwachikonke nchibeelede kukonka mpuchili muMpampikwa Yatatu kumamanino kwaKkata lyaMulawu eeli.

(2) Katana talika mulimu Jaji, uteensi Duundumuntule waBabtesи naakuti Uutobela Duundumuntule waBabtesи, kweelede wakonkezya kunembo lya Duundumuntule waBabtesи naakuti kunembo lyawumwi Jaji ulachiindi chilamfu kabeleka. Bwiime bwachikonke nchibeelede kukonka mpuchili muMpampikwa Yatatu kumamanino kwaKkata lyaMulawu eeli.

(3) Mulawu upangwa aPalyamenti ubelesegwa mukunjizya milimu maMejstiliti abamwi bableesi babubetesi, bateensi maJaji, uyelede kupandulula bwiime bwachikonke nchibeelede kukonkezya bableesi babubetesi aaba.

186 Chiindi nchibeelede kukkala muzyuuno maJaji

(1) Dundumuntuule wabaJaji aMutobeli wakwe baba achuuno kuzwa buzuba nibatalika milimu wabo kuze bakabe amyaaka makkumi musanu aabili, aawo mpubeede kusiya milimu kunze kwakuti nkabatanasisya myaaka eeyo, basale kuti bayungizye myaaka musanu aajulu:

Naa kakuli kuti wasala kuchita oobo ulatola ngambo yakuti uponede kabotu muboongo amubili alimwi ngambo eeyo itambulwe aMuzulwidi waNyika musule aakuti wabonisyania aKkomishini yaMibeleko yaMulawu kuti ayinkilile nembo akubeleka

(2) BaJaji baNkuta yaKkata lyaMulawu bagawla kwalweendo lomwe lwachiindi myaaka kkumi ilamusu ikonzya kuyumgiziga, pele —

- (a) Kweelede basiye mulimu myaaka eeyo kiitanasika naa basisya myaaka yakuzyalwa makkumi musanu amakkumi obile kunze kwakuti, nibasisya myaaka eeyo, basale kwiinkilila nembo kwamyaaka musanu kabali aachuuno:

Naa kakuli kuti uusala kuchita oobo ulabweza ngambo yakuti uponede kabotu muboongo amubili alimwi ngambo yakwe ikatambulwe aMuzulwidi waNyika musule akubonisyania aKkomishini yaMbelekelano yaMulawu kuti ayinkilile nembo kabeleka achuuno.

- (b) musule akumana kwachiindi chabo chitalidwe, bakonzya kupegwa milimu mbuuli maJaji aNkuta Yaajulu naakuti Nkuta Mpati naa basala kuchita oobo.

(3) MaJaji baNkuta Yaajulu baba azyuuno kuzwa buzuba nibatalika kubeleka achuuno eecho kuze bakabe amyaaka makkumi musanu aamakkumi obile, aawo mpubeede kusiya milimu kunze kwakuti nkabatanasisya myaaka eeyo basala kwiinkilila nembo akubeleka kwamyaaka musanu:

Naa nkakuli kuti Jaji ulatola ngambo yakwe kuMuzulwidi waNyika wakuti upona kabotu muboongo amubili mpawo ngambo ikatambulwe aMuzulwidi waNyika musule akubonisyania aKkomishini yaMibeleko yaMulawu kuti ayinkilile nembo.

(4) Kakutakwe kuti ninzi zilembedwe kukabela (7) kachibela 328, mpandamayake akabela (1), (2) a(3) zyachibela eechi zilabeleka kweendelezya chuuno chaDundumuntuule wamaJaji, Mutobeli waDundumuntuule, majaji aNkuta yaKkata lyaMulawu amajaji baNkuta Yaajulu.

(5) MaJaji baNkuta Mpati antoomwe abamwi majaji baba achuuno kuzwa buzuba mbubatalika mulimu kuze bakabe amyaaka makkumi musanu amakkumi obile, aawo mpubeede kusiya mulimu.

(6) Muntu ulakonzya kubikwa chuuno chakubajaji waNkuta Yaajulu naakuti kufumbwa nkuta kwachiindi chitalidwe pele naa muntu ubikidwe kuti achite oobo nkajisilidi uumwi, uliima kuba jaji wankali waba amyaaka makkumi musanu amakkumi obile amasanu (naa kali jaji waNkuta Yaajulu naa kufumbwa nkuta) nikuba kakuli kuti chiindi chakwe chitalidwe chakubeleka kachitanamana.

(7) Nikuba kuti Jaji wasiya mulimu naan kali wasisyaya myaaka yakuzyalwa makkumi musanu amakkumi obile naakuti, kakulangidwe Jaji waNkuta yaKkata lyaMulawu kuti wasisyaya kumanina chiindi chakwe chitalidwe chakubeleka, ulakkala achuuno chabuJaji kuchitila kuti amaninsizye kubeteka milandu iiendumaboko aakwe nakachili Jaji.

(8) Jaji ulakonzya kusiya chuuno chakwe kufumbwa chiindi musule akulemba chizibisyo chiya kuMuzulwidi waNyika chitolwa aKkomishini yaMibeleko yaMulawu.

(9) Chuuno chaJaji takweelede chiimikila chiindi chakugalwa kwakwe.

[Kabela kasowelwa mbali abusena bwako kubikwa chibela 13 chaMulawu 2 wa2021]

187 Kugwisigwa kwamaJaji amulimu

(1) Jaji ukonzya kugwisigwa aamulimu luzutu kuti —

- (a) tachikonzyi kuchita milimu yakwe nkaambo kakuchembaala naakuti kusondoka/kupenga;
- (b) watondeezya kutaziba mulimu wakwe munzila iiyindilide; naakuti
- (c) wasunda mulandu mupati loko;

nkaako Jaji takonzyi kugwisigwa amulimu, aanze kwakuti kwatobelezegwa zilembedwe muchibela eechi.

(2) Kuti Muzulwidi waNyika wayeeya kugwisya Duundumuntule waBabeseti kuzwa amulimu, uyelede kugala kabunga kanga kalalangisisya kabotu kaambo aako.

(3) Kuti Kkomishini yaBabeseti yapa Muzulwidi waNyika muzeego wakuti kugwisigwe Jaji amulimu, kubikkiliza Duundumuntule waBabeseti, Muzulwidi waNyika uyelede kugala kabunga kanga kalalangisisya kabotu kaambo aako.

(4) Kabunga kagalwa kuti kalangelange zyakugwisigwa kwaJaji, kakutobelezegwa zyaambidwe muchibela eechi, keelede kuba aabantu batatu naakuti bayinda batatu kabagalwa aMuzulwidi waNyika, kakuli —

(a) umwi wabo mukabunga kagalwa kali muntu —

- (i) wakabeleka kuba Jaji muNkuta Yaajulujuju naakuti muNkuta Yaajulu muZimbabwe; naakuti
- (ii) nguJaji naakuti wakali Jaji wankuta ilanga yoonse misyobo yamilandu (civil acriminal cases) munyika ibelesya mulawu wa*Roman Dutch Law* naakuti mulawu waChikuwa kabiyo Chikuwa kachili ngumulaka ubelesegwa mukweendelezya milimu yafulumende munyika eeyo.

(b) Umwi naakuti bamwi babo beeleder kusalwa kuzwa kuli baabo basimulawu bakabeleka kwaminyaka musanu ayibili naakuti kwiinda, kabali bakasangwa aKabunga Kabasimilawu kaambilidwe muMulawu upangwa aPalyamenti.

(5) Kabunga Kabasimilawu kaambilidwe mukabeela (4)(b) keelede kuzwa amundanda wamazina uwambidwe mukabeela nkakaako kuti mundanda wamazina ooyo wayandwa aMuzulwidi waNyika.

(6) Muzulwidi waNyika kweelede wagala umwi wabantu aaba kuti abe sichuuno wakabunga kagalwa.

(7) Kabunga kagalwa kwiinda mukabeela (2) naakuti (3) keelede kulangisisya kuti agwisigwe na Jaji amulimu. Nibalangalanga kweelede balemba lipoti/ngambo bayipa Muzulwidi waNyika mpawo baamba maboneno aatala akuti agwisigwe naakuti tagwisigwi Jaji amulimu wakwe.

(8) Muzulwidi waNyika uyelede kuchita mbuuli zyaambwa akabunga kakali kulangisisya kaambo kakugwisigwa kwaJaji kwiinda mbukwaambilidwe mukabeela (7).

(9) Kabunga kagalidwe kwiinda mukabeela aaka, kajisi zyeelelo anguzu mbuuli makkomishina kakutobelezegwa Mulawu waKkomishini yaMfukununo [*Chaandaano 10:07*].

(10) Kuti kaambo kaJaji kakatolwa kukabunga (tribunal) mbuuli mbukwaambilidwe muchibela eechi, Jaji ooyo kweelede wajana busosoloka kuzwa amulimu wakwe kusikila Muzulwidi waNyika wamuboozya lubo naakuti wamugwisya achuuno kazyeedelana azeezyo zyaambwa akabunga kakagalidwe kuti kalangelange mabelekelo aJaji.

(11) Mulawu upangwa aPalyamenti ukonzya kupa nguzu Kkomishini yaBubetes naakuti kabunga kagalwa kwiinda muchibeeala eechi kuti kakumbile fumbwa naba uli Jaji kuti ayete malembe atondeezya bwiime bwabulondozi bwakwe kuzwa kuKabunga kaBasilisi yabumbwa nkaambo kakuyanda kuti kuchitwe mulimu ooyo, nkukuti kubonwe kuti nhobeni Jaji uyimvwi biyeni mubulondozi bwakwe mumubili amuboongo.

188 Bwiime bwamulimu wabubetes achiindi nchibeelede kukkala muzyuuno zyabo

(1) Majaji beelete kujana mifolo alumwi lugwasyo lwaamulimu lusiyenesiyene zitanooibikkwe chiindi achiindi, zyoonse eezi zilangwalangwa aKkomishini yaBubetes kazizuminwa aMuzulwidi waNyika uyelede kutanguna kupooma aSilutwe waMutabi waFulumeende Wazyabululami akujana mizeezo kuli Silutwe waMutabi waFulumeende waZyamali.

(2) Mulawu upangwa aPalyamenti weelete kupandulula mifolo anzibeelede kujana bamwi babelesi babubetes bateensi maJaji. Mulawu ooyo uyelede kubona kuti kusumpulwa kwababelesi mumilimu yabo, kulonzegwa kuzwa kuli bumwi busena kuya kuli bumbi akwaandwa kwababelesi mulimu antoomwe antaamo zyeelede kutolwa mukubeteka babelesi basunda, zyeelede kuchitwa—

- (a) kwiinda mukuzuminana aKkomishini yaBubetes; kabiyo
- (b) munzila ibalangala, itakwe lusuallulo, kuyoowa akufwidilana luse.

(3) Mifolo alumwi lugwasyo lwaamulimu lusiyenesiyene zyeelede kupegwa babelesi babubetes zyeelede kuzwa kuNkomo Mpati yaFulumeende.

(4) Mifolo alugwasyo lwaamulimu lusiyesiyyene lupegwa babelesi babubetes talweelede kuchesegwa pe kuti kabachili muzyuuno zyabo.

CHIBAKA 3

KKOMISHINI YABUBETESI

189 Kubumbwa abwiime bwaKkomishini yaBubetes

- (1) Kuli Kkomishini yaBubetes ilabantu batobela —
 - (a) Duundumuntule waBabete;
 - (b) Mutobeli waDuundumuntule waBabete;
 - (c) Muzulwidi waBabete baNkuta Yaajulu;

(d) womwe Jaji wagalwa amaJaji akuNkuta yazyakata lyaMulawu, kuNkuta Yaajulujulu, kuNkuta Yaajulu, kuNkuta Yambelekelano akuNkuta Yanjendelezyo;

(e) Simulawu/Loya Mupati waFulumeende;

(f) Mupati wabaMejastiliti;

(g) Sichuuno waKkomishini yaBabete Baluundu;

[Fuka libambululwa aMulawu 2 wa2021]

(h) botatwe basimulawu bakabeleka kwachiindi chaminyaka musanu ayibili naakuti kwiinda basangwa akabunga kayiminina basimulawu mbuuli mbukwaambidwe aMulawu upangwa aPalyamenti kuti kweelede kuba kabunga kali boobo;

(i) womwe muyiisi wazymulawu (Siangwilima kuli zyamulawu) wagalwa akabunga kayiminina bayiisi bazyamulawu mumayunivesiti

amuZimbabwe, naakuti kakatawo kabunga kali boobo, Muzulwidi waNyika ukonzya kugala muyiisi wazyamulawu;

- (j) womwe muntu ulaluzibo lwazyakulangalanga mabeleseyo amali utanooli wakabeleka kwachiindi chaminyaka musanu ayibili naakuti kwiinda utanooli wasangwa akabunga kabayiminina, mbuuli mbukwaambidwe muMulawu upangwa aPalyamenti kuti kube kabunga kali boobo; kabiyo
- (k) womwe ujisi minyaka yakubeleka ili musanu ayibili naakuti kwiinda, muli zyakubamba bantu ugalwa aMuzulwidi waNyika.

(2) Duundumuntule waBabetesi naakuti Uumutobela kuti katawo, mbabo beeled e kuba Sichuuno bamiswaangano yaKkomishini yaBabetesi, pesi kuti kabatawo bobile chiindi chimwi, aabo baliwo bakonzya kusala umwi wabo kuti abe sichuuno wamuswaangano.

(3) Bantu bali muKkomishini yaBabetesi baambwa mumafuka (d),(h),(i),(j) a (k) mukabeela (1) aajulu bagalwa kuti bakkale mukkomishini kwamweenya womwe luzutu ulaaminyaka musanu awumwi.

190 Milimu yaKkomishini yaBabetesi

(1) IKkomishini yaBabetesi ikonzya kupa mizeeo kuli fulumende aatala azyababetesi naakuti kweendelezegwa kwabululami munyika kabiyo fulumende weeled e kuswiilizya mizeeo izwa ku Kkomishini yaBabetesi.

(2) IKkomishini yaBabetesi yeelede kusumpula akugwasizya kuti kube kulyiimikila akulisanta kwababetesi antoomwe akubona kuti bubetes i bulokubeleka changuzu, kabotu munzila ibalangala mukweendelezya bululami muZimbabwe kabiyo ijisi nguzu zyoonse kuti ichite zyoonse eezi.

(3) IKkomishini yaBabetesi, kwiinda mukuzuminana aSilutwe waBululami, ikonzya kumbu miteto izulwida kuchitwa kwafumbwa nchinzi mukweendelezegwa kwabululami.

(4) Mulawu upangwa aPalyamenti ukonzya kupa Kkomishini yaBabetesi milimu iyendelana akubona zyakunjizigwa milimu, kubetekwa kwababelesi amifolo yababelesi alumwi lugwasyo lwaamulimu ndubajana babelesi kubete ka muNkuta yazyakata lyaMulawu, muNkuta Yaajulujuju, muNkuta Yaajulu, muNkuta Yambelekelano amuNkuta Yanjendelezyo azimwi nkuta.

191 Bubalangale mumabelekelo aKkomishini yaBabetesi

IKkomishini yaBabetesi yeelede kuchita milimu yayo munzila yabululami, itakwe lusaluulo yabubalangale kabiyo ilaantanganana.

CHIBAKA 4

ZYABIYOBIOYO

192 Mulawu uyelede kweendelezegwa

Mulawu uyelede kweendelezegwa akubelesegwa munkuta zyaZimbabwe ngooyo wakali kubete ka chiindi nilyakatalika kubete ka Kkata lyaMulawu antoomwe ayeeyo itanoobambululwe milawu mukuya kwachiindi.

193 Nkuta zyeelede kubeteka milandu yachakuchita aatala abasimilandu

Nkuta zitobela luzutu nzizyo zyeelede kubeteka milandu yatala abasimilandu

- (a) Nkuta yaZyaKkata lyaMulawu, Nkuta Yaajulujuju, Nkuta Yaajulu aNkuta yaMejasitiliti;
- (b) nkuta naakuti kabunga kabeteka aako kabeteka kakabelesya mulawu wazyakubeteka babelesi babisya nzizikonzya kubeteka milandu yamamipati kakuya akweelela kwamilandu kuliwo kuchitila kuti kube kulijata kabotu kwababelesi bali muli zyakukwabililwa kwanyika (mapulisa, basilumamba ababamba baange abamwi).

CHAANDAANO 9

NDEMEKO ZYAKWEENDELEZYA BULUMBU ANTOOMWE ABUZULUZI

194 Ndemeko mpati zizulwida kweendelezegwa kwabulumbu

(1) Kweendelezegwa kwabulumbu muzibeela zyafulumende zyoonse, kubikkilizya mbunga atubunga twafulumende, mitabi yafulumende azimwi zipanzi zyafulumende, kweelede kwazulwidwa aandemeko zyabulelo bwajandabanji mbuuli mbuzyaambidwe muKkata lyaMulawu eeli, kubikkilizya ndemeko zitobela—

- (a) kulijata kwababelesi munzila itondeezya kuziba zyeelede kuchitwa mumulimu wabo kweelede kwasungwaazigwa akuchitwa choonse chiindi;
- (b) kubelasya zibesyo munzila yabunonoozi kweelede kwasungwaazigwa;
- (c) kweendelezegwa kwabulumbu kweelede kwalemeka lusumpuko;
- (d) lugwasyo lupegwa bulumbu kweelede lwachitwa kakutakwe lusaluulo, munzila ibalangala kabiyo itasumpuli bbazu limwi luzutu;
- (e) mapenzi aabantu ayelede kwiingulwa muchiindi chisyoonto loko, kabiyo bulumbu ngabunjilingane mukupangwa kwamizeezo atulawulawu aawo mpukweelede;
- (f) bweendelezi bwabulumbu bweelede kakulangwalangwa chiindi achiindi aPalyamenti antoomwe abantu lwabo;
- (g) ntabi, mbunga atubunga twafulumende muzibeela zyoonse zyanyika kweelede zyabelekela aamwi;
- (h) bubalangale mumachitilo amilimu kweelede kusungwaazigwa kwiinda mukupa bulumbu lugwasyo lwaluzibo lulaamunse kabiyo lubagwasizya muchiindi eecho;
- (i) kugwasya babelesi munzila zisiyenesiyene zibagwasizya kusumpula mabelekelo aluzibo lwabo kweelede kwasungwazigwa kuchitila kuti babelesi babelesye zipo antoomwe aluzibo lwabo zizwide;
- (j) kweendelezegwa kwabulumbu kweelede kwachitwa abantu bazwa mumisyobo bantu zisiyenesiyene bachisi chaZimbabwe;
- (k) kunjizya milimu, kuijisiga makkosi aamilimu akusumpulwa kwabantu muzyiyo zyabo kweelede kwachitwa munzila ilangisisya kuziba akukonzya kwabantu, kakutakwe lusaluulo, bweelene akati kabaalumi abanakazi akubikkilizya bantu balemene.

kabiyo fulumende uyelede kutola ntaamo, kubikkilizya kupanga milawu, mukusungwaazya kutobelezegwa akuzuzikizigwa kwandemeko eezi

(2) Kunjizya milimu mumawofesi ajanika muzibeela zisiyenesiyene zyafulumende, kubikkilizya mbunga atubunga twafulumende, mitabi yafulumende azimwi zipanzi zyafulumende, kweelede kwachitwa munzila ilangisisya kuziba akukonzya kwabantu.

195 Mabbizinesi antoomwe aMakkapani afulumende

(1) Makkapani awamwi mabbizinesi afulumende ayeede kuti aajulu kwakutobeleyza antoomwe akuchita ndemeko zyaambidwe muchibela 194(1), ngaachite milimu yawo munzila iyeta mpindu nkukuti ayendelele nembo kaachiliwo kabiyo akutobeleyza buzuluzi buzikitide mukweendelezya mabbizinesi aawo.

(2) Makkapani awamwi mabbizinesi afulumende awambwa mukabeela (1) ayeede kubikka nzila zitondeezya kubalangala akusungwaazya bantu/mabbizinesi amwi manji kuti ajatikane mukuula zintu zyawo.

196 Mikuli yaBabelesi Baluundu andemeko zyabuzuluzi

(1) Nguzu zipedwe Babelesi Baluundu zijanwa mulusyomo bulumbu ndulupede fulumende nkaako kweelede nguzu eezyo zyabelesegwa kabotu munzila —

- (a) iyendelana ampalamo zyaKkata lyaMulawu eeli;
- (b) itondeezya kulemeka bulumbu achiyandisyo chakugwasizya kutatondeezyi kuti mubelesi wafulumende nguwe ujatwa mbuuli mwaami biya abulumbu mbwayelede kubelekela; kabiyo
- (c) isungwaazya kuti bulumbu bube alusyomo kuBabelesi Baluundu.

(2) Babelesi Baluundu beeleder kulijata, aamulimu akunze kwamulimu, munzila ibapa bulemu alulemko antoomwe akutondeezya kusumpula nzibayanda beni babelesi pesi kusumpula ziyandikana aamulimu. Kabiyo beeleder kusiyana anchito zyuubula chiimo chamawofesi aabo achiimo chafulumende.

(3) Babelesi Baluundu bajisi zyuuno zyabuzuluzi beeleder kutobeleyza ndemeko zyabuzuluzi zitobela —

- (a) kuchita milimu munzila itakwe lusaluulo;
- (b) kusyomeka mukuchita mulimu wabulumbu;
- (c) kutondeezya kulemeka bulumbu akuchita zintu zyeede aziyandwa aabulumbu; kabiyo
- (d) kulijata akutondeezya kulipeda kumulimu nikugwasigwa bulumbu.

197 Chiindi cheelede kukkalwa abasilutwe batutabi tusiyene-siyene twafulumende muzyuuno zyabo

Mulawu upangwa aPalyamenti ukonzya kufwiinsya chiindi cheelede kukkalwa aBabelesi Baluundu muzyuuno zyabo, Babelesi Baluundu bamumitabi yafulumende amumabbizinesi afulumende.

198 Mulawu weelede kubona kuzuzikizigwa Chaandaano 9

Mulawu upangwa aPalyamenti uyeede kupandulula ntaamo zyeede kutowa kuti eezi zyaambidwe muchaandaano eechi zyatobelegwa antoomwe akuchitwa, kubikkilizya ntaamo zya —

- (a) kuchita kuti Babelesi Baluundu kabazibisa bulumbu chiindi achiindi lubono lwabo;
- (b) kubumba zizuminano zyakulijata kwababelesi zyeede kutobelegwa aBabelesi Baluundu;
- (c) kubikka antanganana zyeede kuchita mukutobeleyza buzuluzi buzikitide mukweendelezya mabbizinesi afulumende;
- (d) kuzwa antaamo zyeede kutobelegwa mukubeteka bantu batyola zyaambwa muChaandaano eechi naakuti fumbwa zizuminano zyakulijata kwababelesi zyaambidwe mufuka (b) lilaajulu.

CHAANDAANO 10

BABELESI BALUUNDU

[Mutwe wamakani ubambululwa achibeela 14 chaMulawu 2 wa2021]

199 Babelesi Baluundu

[Mutwe wamakani wachibeela ubambululwa achibeela 14(a) chaMulawu 2 wa2021]

(1) kuliMutabi womwe waBabelesi baLuundu lwakweendelezya Nkunkume zyalubazu lwaFulumende kuchitila kuti lugwasye kweendelezya Zimbabwe alimwi akupa lugwasyo kuluundu.

[kabela kasowegwa achibeela 14(b) chaMulawu 2 wa2021]

(2) Babelesi baluundu mbantu babelekela luundu aanze kwa —

[Kabela kabambilulwa achibeela 14(c) chaMulawu 2 wa2021]

- (a) babelesi banjide mutubunga twakukwabilila nyika naakuti fumbwa kabunga kanga kalabumbwa kakukwabilila nyika;
- (b) maJaji, maMejasitiliti abamwi babelesi bamunkuta zisiyenesiyene;
- (c) bantu bajanika mumakkomishini aabumbwa kwiinda muKkata lyaMulawu eeli;
- (d) babelesi bamuPalyamenti; kabiyo

(e) fumbwa muntu ulaachuuno chaambidwe, muKkata Lyamilawu eeli naakuti aMulawu upangwa aPalyamenti, kuti tayeleded kubalilwa kuBabelesi Baluundu.

[Fuka lyagwisigwa achibeela 14 (c) chaMulawu 2 wa2021]

(3) Mulawu upangwa aPalyamenti uyelede kupandulula bwiime, bubumbwe, kweendelezegwa, kulijata kwababelesi anzibeelede kujana mukubeleka kwabo babelesi baluundu, kakulangwa zilembedwe muchibeeala 203.

[kabela kagwisigwa achibeela 14 (c) chaMulawu 2 wa2021]

200 Kulijata kwaBabelesi Baluundu

(1) Babelesi Baluundu beeleded kulijata munzila zyaambidwe muKkata lyaMulawu eeli ayimwi milawu;

(2) Taakwe Mubelesi Waluundu uyelede kuswiilizya akutobelezya malayilile atali mumulawu pe.

(3) Mukuchita milimu yabo taakwe Babelesi Baluundu beeleded —

- (a) kuchita milimu yakabunga kakweendelezegwa kwanyika;
- (b) kuzuzikizya mpalamo zyakabunga kakweendezya nyika;
- (c) kudyamizya ziyanda kuchitwa akabunga kazyanyika zili mumulawu;
- (d) kutyola akutalemeka zyeeleo angwangunuko zyaampandamunsaka zyanikuba uuli muntu,

(4) Babelesi Baluundu tabeeleded pe kunjila muzyuuno zyatubunga twakweendelezegwa kwanyika.

(5) Mulawu upangwa aPalyamenti weeleded kutola ntaamo zyakubona kuti Babelesi Baluundu taakwe kabunga kakweendelezegwa kwanyika nkibadundiizya pe.

[Kabela kabambilulwa aMulawu 2 wa2021]

201 Silutwe waMutabi waFulumende uubona zyaBabelesi Baluundu

Muzulwidi waNyika weelede kugala Silutwe waMutabi waFulumende ubona zyaBabelesi Baluundu.

[Chibela chibambululwa aMulawu 2 wa2021]

202 Kupangwa abubumbwe bwaKkomishini yaBabelesi Baluundu

(1) Kuli Kkomishini yaBabelesi Baluundu ilaabantu batobela —

(a) Sichuuno antoomwe awutobela Sichuuno; kabiyo

(b) bambi bantu bayinda babili pesi kabatayindi musanu; bagalwa aMuzulwidi waNyika.

(2) Bantu bagalwa kunjila muKkomishini yaBabelesi Baluundu kweelede kabali bantu bajisi luzibo lwamulimu wakweendelezya bulumbu.

[kabela kakabambululwa aMulawu 2 wa2021]

203 Milimu yaKkomishini yaBabelesi Baluundu

(1) Kkomishini yaBabelesi Baluundu ijisi milimu itobela —

(a) kusalwa bantu beeledo alimwi balaluzibo luliluzi lwakuba achuuno chaMibeleko yaLuundu kwakuti mweelo wakkumi kuzwa kumwaanda ube wabantu bapona abulema;

[Kabela kabambululwa aMulawu 2 wa2021]

(b) kwiinda muchibela 65(5), kuchita mabambe aamifolo alugwasyo lwamulimu ndubeelede kujana Babelesi Baluundu;

(c) kuzyotolola akubeteka Babelesi Baluundu babisya mumilimu;

(d) kulangisisya ntongawuko akuyanduula nsandulo zyantongawuko zizwa kuBabelesi Baluundu;

(e) kutola ntaamo zinga zilagwasizya akusungwaazya Babelesi Baluundu mukuchita milimu yabo changuzu;

(f) kubona kuti Babelesi Baluundu balookubeleka kabotu milimu yabo mbuuli mbukweelede kakutakwe lusaluulo;

(g) kupa Muzulwidi waNyika antoomwe aSilutwe waMutabi waBabelesi Baluundu mizeeo abusongo aatala azintu zisiyenesiyene zyaatala aBabelesi Baluundu;

(h) kusumpula akusungwaazya kulemekwa kwa ndemeko akati kaBabelesi baBaluundu mbuuli mbuzyaambidwe muKkata lyaMulawu eeli; kabiyo

(i) kuchita niiba iili milimu mbuuli mbitanooli yapegwa manguzu aakuchita milimu eeyo aKkata lyaMulawu naakuti aMulawu upangwa aPalyamenti.

(2) Kkomishini yaBabelesi Baluundu ikonzya kupanga miteto, kwiinda mukuzuminana aSilutwe waMutabi waFulumende, igwasizya kuzuzikizigwa kwampalamo zyamilimu yabo mbuuli mbukwaambidwe mukabeela (1).

(3) Kkomishini yaBabelesi Baluundu yeelede kuchita milimu yayo kwiinda mumalembe aamayilile aazwa kuli Silutwe waMutabi waFulumende chiindi achiindi.

(4) Mukuzwa amabambe amifolo alumwi lugwasyo lwamulimu lupegwa Babelesi Baluundu, iKkomishini yaBabelesi Baluundu iyelede kuchita milimu yayo kwiinda mukuzuminana aMuzulwidi waNyika kali alakwe wapegwa mizeeo abaSilutwe baMitabi yaFulumende babona zyaMali aBabelesi Baluundu.

[Kabela kabambululwa aMulawu 2 wa2021]

204 Bayiminini baNyika yaZimbabwe kulaamwi maNyika

Muzulwidi waNyika ukonzya kugala bantu kuti bakayiminine nyika yaZimbabwe kulaamwi maNyika, naakuti kuli tumwi tubunga twamanyika andeene kabiyo Muzulwidi waNyika ujisi nguzu zyakubagwisya nichiba chili chiindi bayiminini aabo bagalwa.

204 A Mulembi Mupati waWofesi yaMuzulwidi waNyika aKabunga kaBazulwidi baMitabi yaFulumende

(1) Mulembi Mupati waWofesi yaMuzulwidi waNyika aBasilutwe baMitabi yaFulumende aBatobelis babo bagalwa aMuzulwidi waNyika musule akubonisyania aKKomishini yaBabelesi baLuundu.

(2) Mulembi Mupati waWofesi yaMuzulwidi waNyika aKabunga kabaSilutwe baMitabi yaFulumende mubelesi mupati kulibamwi baBabelesi baLuundu alimwi Balembi Bapati baMitabi basalwa kakutobelwa Chibeela 205 bali munsi lyaNabbatule waWofesi yaMuzulwidi waNyika akabunga kabaSilutwe baMitabi yaFulumende kufumbwa makani aali azyakuchita ambabo.

(3) Bulamfu bwachiindi chakubeleka alimwi azyiimo zyamubeleko zyaMulembi Mupati waWofesi yaMuzulwidi waNyika akabunga kabaSilutwe baMitabi yaFulumende antoomwe abatobelis babo bulaba mbuuli mbabikide Muzulwidi waNyika.

[Chibeela chabikwa achibeela 15 chaMulawu 2 wa2021]

205 Beendelezi baMitabi yaFulumende

(1) Balembi baMitabi yaFulumende bagalwa aMuzulwidi waNyika kajana mizeezo kuzwa kuKkomishini yaBabelesi BaLuundu.

[Kabela kabambululwa aMulawu 2 wa2021]

(2) Bulamfu bwachiindi cheelede kukkalwa muchuuno aMulembi waMutabi waFulumende minyaka isika kumusanu, kabiyo ukonzya kupegwa uumbi mweenya wakukkala muchuuno eecho kwachiindi chaminyaka musanu pesi kakulangisisigwa kuti ubeleka zidodonkene na milimu yakwe.

CHAANDAANO 11

BAKWABILILA NYIKA

CHIBAKA 1

ZYABIYOBIOYO

206 Kukwabililwa Kwanyika

(1) Impalamo zyakukwabililwa kwanyika zyeede kutowondeeza chiyandisyu chabana baZimbabwe chakupona bweelene, mulwaangunuko, muluumuno, mukutayoowa kabiyo mulusumpuko.

(2) Kukwabililwa kwaNyika yaZimbabwe kweelede kwachitwa kwiinda muKkata lyamulawu eeli antoomwe ayimwi milawu.

(3) Kapati, kukwabililwa kwanyika yaZimbabwe kweelede kuchitwa kakulemekwa eezi zintu zitobela—

(a) zyeelo angwangunuko zyaampandamunsaka antoomwe andemeko zyabulelo bwajandanji bwaambidwe muKkata lyamulawu eeli; kabiyo

(b) kulemeka akutobeleyza mulawu.

207 Tubunga tukwabilila nyika

- (1) Tubunga tukwabilila nyika yaZimbabwe ntoo—
- (a) Basilumamba
 - (b) Bakapokola
 - (c) Bufumfuzyi
 - (d) BaMajele aKuzyotololwa Kwabaange; kabiyo
 - (e) fumbwa kabunga kakukwabililwa kwanyika kabumbwa kwiinda muMulawu upangwa aPalyamenti.
- (2) Tubunga tukwabilila nyika tuchita milimu yato katutobeleya Kkata lyaMulawu eeli, zyaambwa aMuzulwidi waNyika kabiyo mabelekelo aato alangisisiga aPalyamenti.
- (3) Bubumbwe abube bwatubunga twakukwabililwa kwanyika kweelede kutondeezya busiyane bwamisyobo yabantu bamuZimbabwe.

208 Kulijata kwababelesi batubunga twakukwabilila nyika

- (1) Babelesi batubunga tukwabilila nyika beeleder kulijata kwinda muli zyaambidwe muKkata lyaMulawu eeli antoomwe ayimwi milawu.
- (2) Taakwe kabunga naakuti mubelesi wakabunga kakukwabililwa kwanyika unga mukuchita mulimu wakwe—
- (a) wachita katobelezya zyakweendelezegwa kwanyika;
 - (b) kuzuzikizya mpalamo zyakabunga kakweendelezegwa kwanyika;
 - (c) kudyamizya ziyanda kuchitwa akabunga kazyanyika zili mumulawu;
 - (d) Kutyola akutalemeka zyelelo angwangunuko zyaampandamunsaka zyanikuba uuli muntu.
- (3) Babelesi batubunga tukwabilila nyika tabeelede pe kunjila muzyuno zyatubunga twakweendelezegwa kwanyika naakuti imwi mbungano biyo.
- (4) Babelesi batubunga tukwabilila nyika tabeelede pe kunjizigwa milimu mutubunga twabanasinakoma aanze kwaziindi nizyayimikila luzeya zintu.

209 Kkansili yaKukwabililwa Kwanyika

- (1) Kuli Kkansili yaKukwabililwa Kwanyika ilaabantu batobela: Muzulwidi waNyika kali nguSichuuno, Mutobelis waMuzulwidi waNyika antoomwe abaSilutwe baMitabi yaFulumende ababelesi batubunga tukwabilila nyika abamwi bantu banga balaambwa muMulawu upangwa aPalyamenti.
- (2) Milimu yaKkansiliyaKukwabililwa Kwanyika njeyi—
- (a) kubumba mabambe ambiinga ilakwabililwa nyika yaZimbabwe;
 - (b) kuzibisya akupa mizeeo kuMuzulwidi waNyika aatala akukwabililwa kwanyika; kabiyo
 - (c) kuchita imwi milimu inga ilaambwa aMulawu upangwa aPalyamenti.
- (3) Makkomanda aatubunga tukwabilila nyika ayelede kupa Kkansili yaKukwabililwa Kwanyika luzibo aatala abwiime bwakukwabililwa kwanyika chiindi achiindi mbuuli mpiyayandila Kkansili yaKukwabililwa Kwanyika.

210 Nzila ilyimikilide yakutambula ntongawuko

Mulawu upangwa aPalyamenti weeleder kupandulula nzila ilomene kabiyo ilyimikilide akulisanta yakutambula akuzilangisisya ntongawuko zizwa kubulumbu

zilaatala akutalijata kabotu kwababelesi batubunga tukwabilila nyika. Nzila eeyi yeelede kuzyotolola kubisya kutanooli kwachitwa.

CHIBAKA 2

BASILUMAMBA

211 Basilumamba

(1) Basilumamba baZimbabwe bajatikizya bali mutubunga tutobela: Balwanina Aansi (Army) antoomwe aBalwanina Mumulengalenga atumwi tubunga twabasilumba tunga tulabumbwa aMulawu upangwa aPalyamenti.

(2) Basilumamba baZimbabwe mbabo luzutu basilumamba bali mumulawu munyika.

(3) Basilumamba beelete kulemeka zyeelelo angwangunuko zyabantu boonse kabiyo tabeelite kunjila muli zyakwendelezegwa kwanyika, pesi bapalame kukwabilila akulemeka nyika mbiizulwa, bayandisise nyika yabo, bachite mulimu wabo munzila iyelede kabiyo kabaswiilila buzuluzi bwenyika buteensi basilumamba mbuuli mbukwaambidwe muKkata lyaMulawu eeli.

(4) Basilumamba beelete kukkanala kabali babelesi bawkizi kulijata kabotu munchito zyabo.

(5) Mulawu upangwa aPalyamenti uyelete kupandulula bwiime, bubumbwe, kweendelezegwa, kulijata kwababelesi anzibeelete kujana mukubeleka kwabo babelesi batubunga twabasilumba, kakulangwa zilembedwe muchibeela 218.

212 Milimu yaBasilumamba

Milimu yaBasilumamba nkukwabilila nyika yaZimbabwe, bulumbu bwayo, lukwabililo lwachisi anzyiyanda nyika amigaano yayo antoomwe akusumpula Kkata lyaMulawu.

213 Kutumwa kwaBasilumamba kumulimu

(1) Kwiinda muKkata lyaMulawu eeli, Muzulwidi waNyika kali nguDuundumuntule waBasilumamba, nguwe luzutu uujisi nguzu —

- (a) zyakutuma Basilumamba kunkondo; naakuti
- (b) ulaanguzu zyakwaamba mbubeede kuyoochita nkubatumwa kunkondo Basilumamba.

(2) Kwiinda mumvumo yaMuzulwidi waNyika, Basilumamba bakonzya kutumwa kumulimu mukati kanyika yaZimbabwe kuti —

- (a) kabakwabilila nyika yaZimbabwe;
- (b) kabagwasizya Bakapokola mukubamba luumuno lwabulumbu;
- (c) kabagwasizya Bakapokola atumwi tubunga twabantu biyo muchiindi zintu nizyiimikila luzeya naakuti nikwaba chachitika chibi.

(3) Kwiinda mumvumo yaMuzulwidi waNyika, Basilumamba bakonzya kutumwa kumulimu aanze kwanyika yaZimbabwe —

- (a) kukubamba luumuno kabalaansi kwaMbungano yaKujatana kwaManyika Woonse naakuti kamwi biyo kabunga kamuluwa kamanyikamanyika pesi nyika yaZimbabwe nkiilyidilana aankako.
- (b) kukukwabilila migaano yayimwi nyika itali Zimbabwe;
- (c) kukuzuzikizya mulimu wamanyikamanyika aandeene;
- (d) kukukwabilila ziyandwa akugwasya nyika yaZimbabwe.

(4) Kwiinda mukuzuminana kwabayiminini bamuPalyamenti basika kubwiingi bwantompachaala mumuswaangano uswaanizya maanda amilawu obile (yaansi ayaajulu), Palyamenti ikonzya kuzuminana kwaamba kuti kutumwa kwaBasilumamba aanze kwanyika nkubakatumwa ngababoozegwe.

(5) Aawo Palyamenti mpuyazuminana kuti Basilumamba bakatumwa aanze kwanyika baboozegwe, Muzulwidi waNyika weelede kubweza ntaamo zyoonse zyakuboozya Basilumamba, pesi kalangisisya kukwabililwa kwabantu bamuZimbabwe azibelesyo zyabo.

214 Beelede kuzibisigwa nikwatumwa kwaBasilumamba

Aawo Basilumamba nibatumwa kumulimu wabo —

- (a) Basilumamba beelede kuba aansi kwaMupati waBasilumamba womwe; naakuti
- (b) Yoonse milimu yabo Basilumamba naakuti yobile naakuti kwiinda mpubabelekela aamwi beelede kuba aansi kwaBapati baBasilumamba basiyene—

Muzulwidi waNyika weelede kuzibisya Palyamenti kufwambaana eezyo zyapa kuti atume Basilumamba kabiyo—

- (i) kwaamba busena nkwaabatuma muZimbabwe;
- (ii) kwaamba busena nkwbatuma aanze kwaZimbabwe.

215 Silutwe waMutabi waFulumende ubona zyaBasilumamba

Muzulwidi waNyika ukonzya kugala Silutwe waMutabi waFulumende ubona zyaBasilumamba.

216 Kuzulwidwa kwaBasilumamba

- (1) Mulawu upangwa aPalyamenti ukonzya kupandulula kuti —

- (a) Basilumamba beelede kuba aansi kwaMupati waBasilumamba womwe; naakuti
- (b) Yoonse milimu yabo Basilumamba naakuti yobile naakuti kwiinda mpubabelekela aamwi beelede kuba aansi kwaBapati baBasilumamba basiyene.

(2) Woonse Mupati waBasilumamba awoonse Mupati wakapanzi kaBasilumamba ugalwa aMuzulwidi waNyika kajana mizeeo kuzwa kuli Silutwe waMutabi waFulumende waBasilumamba.

(3) Bapati baBasilumamba aBapati batupanzi twaBasilumamba bagalwa kuti babe muzyuuno zyabo kwabulamfu bwachiindi chisika kuminyaka musanu kabiyo muntu takonzyi kupegwa myeenza iyinda tubili kali muchuuno chomwe.

(4) Muntu wagalwa kuti abe Mupati waBasilumamba naakuti kapanzi kaBasilumamba ukonzya kugalwa kuba Mupati waBasilumamba, pesi muntu wakali Mupati waBasilumamba naakuti kapanzi kaBasilumamba takonzyi kugalwa kuba Mupati waBasilumamba naakuti Mupati wakapanzi kaBasilumamba naakuti kuba Mupati wakamwi kapanzi kakukwabililwa kwanyika.

(5) Woonse Mupati waBasilumamba awoonse Mupati wakapanzi kaBasilumamba weelede kubeleka mulimu wakwe katobeleyza malayilile ngaapegwa aSilutwe waMutabi waFulumende ubona zyaBasilumamba kali alakwe uchita nzyachita kajana mvumo kuzwa kuMuzulwidi waNyika.

217 Kupangwa abubumbwe bwaKkomishini yaBasilumamba

(1) Kuli Kkomishini yaBasilumamba ilaabantu batobela; Sichuuno weelede kuba kali nguSichuuno waKkomishini yaBabelesi Baluundu, antoomwe abamwi bantu bayinda bibili pesi kabatayindi musanu awumwi bagalwa aMuzulwidi waNyika.

[Kabeela kabambululwa aMulawu 2 wa2021]

(2) Bajanika muKkomishini yaBasilumamba beeledes kusalwa kwiinda muluzibo lwabo lwakweendelezya milimu, zyankondo, alwiyo ndubalaalo naakuti kuba kwabo kupa kuti babe lugwasyo kuKkomishini; kabiyo—

- (a) basika kuchisela chabantu bajanika muKkomishini kabali mbantu batana beleka mulimu waBasilumamba;
- (b) uumwi naakuti kwiinda uumwi kali wakali waba umwi waBapati mumulimu waBasilumamba kwamweenya womwe naakuti yobile isisyu minyaka musanu kaziya nembo.

218 Milimu yaKkomishini yaBasilumamba

(1) Kkomishini yaBasilumamba ijisi milimu itobel —

- (a) kunjizya bantu bazi milimu kuti babweze zyuuno naakuti bapegwe nyembe mumulimu waBasilumamba;
- (b) kubamba mabambe aamabelekelo aabasilumamba kakulangwa mifolo ampindu zyaandeene
- (c) kubona kuti balookupona buumi buli kabotu akweendelezegwa kabotu mumilimu yabo Basilumamba;
- (d) kubona kuti Basilumamba bazuzikizya ziyandwa achibeela 208;
- (e) kusungwaazya luumuno akumvwanana akati kaBasilumamba abulumbu bwaZimbabwe;
- (f) kupa Muzulwidi waNyika antoomwe aSilutwe waMutabi waFulume mizeezo abusongo aatala azintu zisiyenesiyene zyaatala aBasilumamba; kabiyo
- (g) kuchita niiba iili milimu mbuuli mbitanooli yapegwa manguzu akuchita milimu eeyo aKkata lyaMulawu antoomwe aMulawu upangwa aPalyamenti.

(2) Kkomishini yaBasilumamba ikonzya kupanga miteto, kwiinda mukuzuminana aSilutwe waMutabi waFulume ubona Basilumamba, igwasizya kuzuzikizigwa kwampalamo zyamilimu yabo mbuuli mbukwaambidwe mukabeela (1)

(3) Mukuzwa amabambe amifolo alumwi lugwasyo lwaamulimu lupegwa yaBasilumamba, iKkomishini yaBasilumamba yeelede kuchita milimu yayo kwiinda mukuzuminana aMuzulwidi waNyika kali alakwe wapegwa mizeezo abaSilutwe baMitabi yaFulume babona zyaMali aBasilumamba.

CHIBAKA 3

BAKAPOKOLA

219 Bakapokola amilimu yabo

(1) Kuli Bakapokola bajisi milimu iitobela —

- (a) kubbutula, kupokoola akukwabilila kuchitika kwamilandu;

- (b) kubamba luumuno lwabulumbu munyika yaZimbabwe;
 - (c) kukwabilila lubono abuumi bwabulumbu;
 - (d) kubona kuti mulawu ulokutobelezegwa akulemekwa; kabiyo
 - (e) kusumpula Kkata lyaMulawu akubona kuti mulawu ulokutobelezegwa kakutakwe kuyoowa naakuti lusaluulo.
- (2) Bakapokola beeledge kuchita milimu yabo kabaalamwi a —
- (a) tubunga twatuswiilizya bavwiya tubumbwa kwiinda mumulawu;
 - (b) fumbwa mutu wabikkwa amulawu kuti agwasizye mukubbutula, kupokoola akukwabilila kuchitika kwayimwi misyobo yamilandu;
 - (c) tubunga twamuluwa atwamanyika aandeene alwana kusundwa kwamilandu.
- (3) Bakapokola tabeelede kunjila mutubunga twazyakweendelezegwa kwanyika, pesi bapalame kulemeka nyika mbiizulwa, bayandisisye nyika yabo, bachite mulimu wabo munzila yeelede kabiyo kabaswiilila buzuluzi bwenyika butali bakapokola mbuuli mbukwaambidwe muKkata lyaMulawu eeli.
- (4) Mulawu upangwa aPalyamenti weeledge kupandulula bwiime, bubumbwe, kweendelezegwa, kulijata kwababelesi anzibeelede kujana mukubeleka kwabo babelesi baBakapokola, kakulangwa zilembedwe muchibela 223.

220 Silutwe waMutabi waFulumende ubona zyaBakapokola

Muzulwidi waNyika weeledge kugala Silutwe waMutabi waFulumende ubona zyaBakapokola.

221 Nabbatule waBakapokola

- (1) Bakapokola balaansi kwabweendelezi bwaNabbatule waBakapokola ugalwa aMuzulwidi waNyika kagwasigwa aSilutwe waFulumende ubona zyaBakapokola.
- (2) Nabbatule waBakapokola ugalwa kuti abe achuuno kwaminyaka musanu pesi ukonzya kupegwa uumwi biyo uumbi mweenya waminyaka musanu lubo.
- (3) Mutu wakali wabeleka mulimu wabuNabbatule waBakapokola takonzyi kugalwa kuti akabe Nabbatule kuli kambi kabunga kakukwabililwa kwanyika.
- (4) Nabbatule waBakapokola weeledge kubeleka mulimu wakwe katobeleyza malayilile ngaapegwa aSilutwe waMutabi waFulumende ubona zyaBakapokola kali alakwe uchita nzyachita kajana mvumo kuzwa kuMuzulwidi waNyika.

222 Kupangwa abubumbwe bwaKkomishini yaBakapokola

- (1) Kuli Kkomishini yaBakapokola ilaabantu batobela; Sichuno uyeledge kuba kali nguSichuno waKkomishini yaBabelesi Baluundu, antoomwe abamwi bantu bayinda babili pesi katabayindi musanu awumwi bagalwa aMuzulwidi waNyika.

[Kabeela kabambilulwa aMulawu 2 wa2021]

- (2) Bajanika muKkomishini yaBakapokola beeledge kusalwa kwiinda muluzibo lwabo lwakweendelezya milimu, zyankondo, alwiyo ndubalaalo naakuti kuba kwabo kupa kuti babe lugwasyo kuKkomishini; kabiyo—
 - (a) basika kuchisela chabantu bajanika muKkomishini kabali mbantu batana beleka mulimu waBakapokola;
 - (b) uumwi naakuti kwiinda uumwi kali wakali waba umwi waBapati mumulimu waBakapokola kwamweenya womwe naakuti yobile isisya minyaka musanu kaziya nembo.

223 Milimu yaKkomishini yaBakapokola

(1) Kkomishini yaBakapokola ijisi milimu itobela —

- (a) kunjizya bantu bazi milimu kuti babweze zyuuno naakuti nyembe mumulimu waBakapokola;
- (b) kuchita mabambe aamifolo alugwasyo ndubeelede kujana lwaamulimu Bakapokola;
- (c) kubona kuti balookupona buumi buli kabotu akweendelezegwa kabotu mumilimu yabo Bakapokola;
- (d) kubona kuti Bakapokola bazuzikizya ziyandwa achibeeala 208;
- (e) kusungwaazya luumuno akumvwanana akati kaBakapokola abulumbu bwaZimbabwe bateensi Bakapokola;
- (f) kupa Muzulwidi waNyika antoomwe aSilutwe waMutabi waFulumeende mizeezo abusongo aatala azintu zisiyenesiyene zyaatala aBakapokola; kabiyo
- (g) kuchita niiba iili milimu mbuuli mbitanooli yapegwa manguzu akuchita milimu eeyo aKkata IyaMulawu antoomwe aMulawu upangwa aPalyamenti.

(2) Kkomishini yaBakapokola ikonzya kupanga milawu, kwiinda mukuzuminana aSilutwe waMutabi waFulumeende ubona Bakapokola, igwasizya kuzuzikizigwa kwampalamo zyamilimu yabo mbuuli mbukwaambidwe mukabeela (1).

(3) Mukuzwa amabambe amifolo alumwi lugwasyo lwaamulimu lupegwa yaBakapokola, iKkomishini yaBakapokola yeelede kuchita milimu yayo kwiinda mukuzuminana aMuzulwidi waNyika kali alakwe wapegwa mizeezo abaSilutwe baMitabi yaFulumeende babona zyaMali azyaBakapokola.

CHIBAKA 4

BUFUMFUUZI

224 Kupangwa kwakabunga Kabufumfuuzyi

(1) Fumbwa kabunga kaFulumeende kaBufumfuuzyi, katali kabunga kabufumfuuzyi kajanika muli Basilumamba amuli Bakapokola, keelede kubumbwa kwiinda mumulawu naakuti malayilile azwa kuMuzulwidi waNyika naakuti kuNkamu yabaSilutwe baMitabi yaFulumeende (kkabbineti).

(2) Bafumfuuzyi tabeelede pe kunjila mukweendelezegwa kwanyika, pesi bapalame kulemeka nyika mbiizulwa, bay andisisye nyika yabo, bachite milimu yabo munzila yeelede kabiyo kabaswililu buzuluzi bwenyika butali bwa bufumfuuzyi pe mbuuli mbukwaambidwe muKkata IyaMulawu eeli.

225 Silutwe waMutabi waFulumeende ubona zyaBufumfuuzyi

Muzulwidi waNyika weelede kugala Silutwe waMutabi waFulumeende ubona zyaBufumfuuzyi.

226 Kweendelezegwa kwakabunga kaBufumfuuzyi

(1) Kabunga kaBufumfuuzyi keelede kweendelezegwa aNabbatule waBufumfuuzyi (Director-General of Intelligence Services) weelede kugalwa aMuzulwidi waNyika

kwaminyaka musanu, kakonzya kupegwa uumbi lubo mweenya waminyaka ikozyania bwiingi bwayo.

(2) Nabbatule waBufumfuuzyi weelede kubeleka mulimu wakwe katobeleyza malayilile ngaapegwa aSilutwe waMutabi waFulumende ubona zya Bufumfuuzyi kali alakwe uchita nzyachita kajana mvumo kuzwa kuMuzulwidi waNyika.

(3) Muntu wakali wabeleka mulimu wakuba Nabbatule waBufumfuuzyi takonzyi kugalwa kuti akabe Nabbatule kuli kambi kabunga kakukwabililwa kwanyika.

CHIBAKA 5

NTOLONGO/MAJELE AKUZYOTOLOLWA KWABAANGE

227 Milimu yakabunga kaMajele aKuzyotololwa Kwabaange

(1) Kuli kabunga kaMajele aKuzyotololwa Kwabaange kalaamilimu iitobela —

(a) kukwabilila luundu kuzwa kubantu basunda kwiinda mukubajalila mumajele akuzyotolola bantu bajanwa kabaalamilandu munkuta kabeede kujalilwa akuzoogwisigwa lubo kuti babweede muluundu nikwiinda chiindi chaambwa aankuta; kabiyo

(b) kweendelezegwa kwamajele amasena akuzyotolola baange.

(2) Babelesi bakabunga kaNtolongo/Majele aKuzyotololwa Kwabaange tabeeede pe kunjila mukweendelezegwa kwanyika, ngabapalame kulemeka nyika mbiizulwa, bayandisisye nyika yabo, bachite mulimu wabo munzila iyelede kabiyo kabaswiilila buzuluzi bwenyika butali bwatuswilizya bavwiya mbuuli mbukwaambidwe muKkata lyaMulawu eeli.

(3) Mulawu upangwa aPalyamenti uyelede kupandulula bwiime, bubumbwe, kweendelezegwa, kulijata kwababelesi anzibeelede kujana mukubeleka kwabo babelesi bakabunga kaNtolongo/Majele aKuzyotololwa Kwabaange, kakulangwa zilembedwe muchibeeela 231.

228 Silutwe waMutabi waFulumende ubona zyaNtolongo/Majele aKuzyotololwa Kwabaange

Muzulwidi waNyika weelede kugala Silutwe waMutabi waFulumende ubona zyaNtolongo/Majele aKuzyotololwa Kwabaange.

229 Nabbatule waNtolongo/Majele aKuzyotololwa Kwabaange

(1) Babelesi bakabunga ka Ntolongo/Majele aKuzyotololwa Kwabaange balaansi kwabweendelezi bwa Nabbatule wa Ntolongo/Majele aKuzyotololwa Kwabaange ugalwa aMuzulwidi waNyika kagwasigwa aSilutwe waFulumende ubona zya Ntolongo/Majele aKuzyotololwa Kwabaange.

(2) Nabbatule wa Ntolongo/Majele aKuzyotololwa Kwabaange ugalwa kuti abe achiuno kwaminyaka musanu pesi ukonzya kupegwa uumbi mweenya waminyaka musanu lubo.

(3) Muntu wakali wabeleka mulimu wabuNabbatule wa Ntolongo/Majele aKuzyotololwa Kwabaange takonzyi kugalwa kuti akabe Nabbatule kuli kambi kabunga kakukwabililwa kwanyika.

(4) Nabbatule wa Ntolongo/Majele aKuzyotololwa Kwabaange weelede kubeleka mulimu wakwe katobeleyza malayilile ngaapegwa aSilutwe waMutabi waFulumende ubona zya Ntolongo/Majele aKuzyotololwa Kwabaange kali alakwe uchita nzyachita kajana mvumo kuzwa kuMuzulwidi waNyika.

230 Kupangwa abubumbwe bwaKkomishini yaNtolongo/Majele aKuzyotololwa Kwabaange

(1) Kuli Kkomishini ya Ntolongo/Majele aKuzyotololwa Kwabaange ilaabantu batobela; Sichuuno uyelede kuba kali nguSichuuno waKkomishini yaBabelesi Baluundu, antoomwe abamwi bantu bayinda bibili pesi kabatayindi musanu awumwi bagalwa aMuzulwidi waNyika.

[Kabeela kakabambululwa aMulawu 2 wa2021]

(2) Bajanika muKkomishini yaMajele aKuzyotololwa Kwabaange beelede kusalwa kwiinda muluzibo lwabo lwakweenedelezya milimu, zyankondo, alwiyo ndubalaalo naakuti kuba kwabo kupa kuti babe lugwasyo kuKkomishini; kabiyo—

- (a) basika kuchisela chabantu bajanika muKkomishini kabali mbantu batana beleka mukabunga kaMajele aKuzyotololwa Kwabaange;
- (b) uumwi naakuti kwiinda uumwi kali wakali waba umwi waBapati mumulimu waMajele aKuzyotololwa Kwabaange kwamweenya womwe naakuti yobile isisya minyaka musanu kaziya nembo.

231 Milimu yaKkomishini yaMajele aKuzyotololwa Kwabaange

- (1) Kkomishini yaMajele aKuzyotololwa Kwabaange ijisi milimu itobela —
 - (a) kunjizya bantu bazi milimu kuti babweze zyuuno naakuti nyembe mumulimu wamu Majele aKuzyotololwa Kwabaange;
 - (b) kuchita mabambe aamifolo alugwasyo ndubeede kujana lwaamulimu wamuMajele aKuzyotololwa Kwabaange;
 - (c) kubona kuti balookupona buumi buli kabotu akweendelezegwa kabotu mumilimu yabo babelesi bamuMajele aKuzyotololwa Kwabaange;
 - (d) kubona kuti babelesi bamuMajele aKuzyotololwa Kwabaange bazuzikizya ziyandwa achibeeda 208;
 - (e) kusungwaazya luumuno akumvwanana akati kaBakapokola abulumbu bwaZimbabwe;
 - (f) kupa Muzulwidi waNyika antoomwe aSilutwe waMutabi waFulume mizeeo abusongo aatala azintu zisiyenesiyene zyaatala ababelesi bamuMajele aKuzyotololwa Kwabaange; kabiyo
 - (g) kuchita niiba iili milimu mbuuli mbuyitanooli yapegwa manguzu akuchita milimu eeyo aKkata lyamulawu antoomwe aMulawu upangwa aPalyamenti.

(2) Kkomishini yaNtolongo/Majele aKuzyotololwa Kwabaange ikonzya kupanga miteto, kwiinda mukuzuminana aSilutwe waMutabi waFulume ubona zyaNtolongo/Majele aKuzyotololwa Kwabaange, igwasizya kuzuzikizigwa kwampalamo zyamilimu yabo mbuuli mbukwaambidwe mukabeela (1).

(3) Mukuzwa amabambe amifolo alumwi lugwasyo lwaamulimu lupegwa babelesi bamuMajele aKuzyotololwa Kwabaange, iKkomishini yaMajele aKuzyotololwa Kwabaange iyelede kuchita milimu yayo kwiinda mukuzuminana aMuzulwidi waNyika kali alakwe wapegwa mizeeo abaSilutwe baMitabi yaFulume babona zyaMali azyaMajele aKuzyotololwa Kwabaange.

CHAANDAANO 12

MAKKOMISHINI ALYIIMIKILIDE ASUMPULA BULELO BWAJANDABANJI

CHIBAKA 1

BWIIME BWACHIBAKA 1

232 Makhomishini akazwimila

- MaKkomishini alyiimkilide aswaanizya aaya aatobela —
- (a) Kkomishini yaNsaluuzyo muZimbabwe;
 - (b) Kkomishini yaZyeelelo Zyabantu muZimbabwe;
 - (c) Kkomishini yaKweelanisigwa kwaMyeenya yaBanakazi aBaalumi MuZimbabwe;
 - (d) Kkomishini yaZimwaya Milumbe muZimbabwe; kabiyo
 - (e) Kkomishini yaLuumuno aLulekelelano Munyika.

233 Mpalamo zyamaKkomishini Alyiimkilide

- MaKkomishini ajisi mpalamo zijanika kuli woonse alaajulu kwazeezyo ziluleme aayimwi ayimwi kkomishini—
- (a) kusungwaazya akusukutizya zyeelelo zyabantu mubulelo bwajandabanji;
 - (b) kukwabilila kulilela antoomwe aziyandwa abantu;
 - (c) kusungwaazya kutobelezegwa akulemekwa kwaKkata lyaMulawu;
 - (d) kusungwaazya bubalangale mumachitilo atubunga twafulumende;
 - (e) kusimatizya kulemekwa kwabulelo andemeko zyajandabanji muli fulumende amutubunga twafulumende; kabiyo
 - (f) kubona kuti kudyamizigwa kwabantu kwazyotololwa.

234 Babelesi bamaKkomishini alyiimkilide

Makkomishini alyiimkilide ajisi nguzu zyakunjizya bantu milimu antoomwe akubapa mifolo alumwi lugwasyo lupegwa babelesi, zyonse eezi kazichitwa kwiinda mumulawu.

235 Kulyiimkilila akulisanta kwamaKkomishini

- (1) Makkomishini alyiimkilide —
 - (a) alilyiimkilide akulisanta kabiyo mabelekelo aawo taayeled e kunjililwa awumwi muntu;
 - (b) ayelede kubeleka kaatobeleya Kkata lyaMulawu eeli; kabiyo
 - (c) ayelede kuchita milimu yawo katayoowi akutasaluula; nikuba kuti kubeleka kwawo kweelede kulangisisigwa chiindi achiindi aPalyamenti.
- (2) Fulumende antoomwe atoonse tubunga amitabi yakwe zijanika kuzibela zisiyenesiyene zyanyika, kwiinda mumulawu azimwi ntaamo, weelede kugwasizya maKkomishini alyiimkilide akukwabilila kulisanta akulyiimkilila kwawo, kubeleka kaatasaluuli, bulemu bwawo akubeleka zizikitide;
- (3) Taakwe muntu uyelede kunjilila mumabelekelo amaKkomishini alyiimkililide pe.

236 Bantu bajanika mumakkomishini alyiimkilide tabeelede kunjila pe mutubunga twakweendezya nyika

- (1) Mumabelekelo aabo bantu bajanika mumakkomishini tabeelede pe —
 - (a) kunjila zyatubunga twakweendeleya nyika;
 - (b) kuzuzikizya mpalamo zyakabunga kakweendelegwa kwanyika;
 - (c) kudyaamizya ziyanda kuchitwa akabunga kazyanyika zili mumulawu;

(d) kutyola akutalemeka zyelelo angwangunuko zyaampandamunsaka zyanaba uuli muntu.

(2) Bantu bajanika mutubunga twakweendelezya nyika nibagalwa kuti banjile mulimu mumakkomishini alyiimvwilidi beeledge kusiya zyuuno zyabo mutubunga twakweendelezegwa kwanyika achakufwambaana mukati kamazuba makumi otatwe kuzwa buunsi nibapegwa mulimu mukkomishini ilyiimkilide.

(3) Kuti umwi muntu ujanika muKkomishini ilyiimkilide—

(a) wapegwa chuuno mukabunga kakweendelezya nyika; naakuti

(b) wakali umwi wakabunga kakweendelezya nyika chiindi naapegwa mulimu akkomishini ilyiimkilide, mpawo wakachilwa kusiya chuuno chakwe kukabunga kazyanyika mukati kamazuba makumi otatwe;

unooli wagwisigwa mukuba umwi waKkomishini eeyo yamupede mulimu

237 Kunjila akugwisigwa mulimu kwabantu bali muMakkomishini alyiimkilide

(1) Kuchitila kuti kuube kuzwa amazina abantu banga balanjizigwa mumakkomishini alyiimkilide, iKkomiti ya Nzila Zyameendelezyo aPalyamenti yeelede—

(a) kusambala zibaka ziliwo;

(b) yiitila bulumbu kuti bwaambe mazina aabantu mbibabona kuti ngabalakonzya kunjila mumakkomishini;

(c) chita mbuzisisyo antanganana kunembo lyabulumbu kakubuzisisigwa baabo bayanda kunjila mumakkomishini;

(d) lemba mazina abaabo beeleta kugalwa kunjila mumakkomishini; kabiyo

(e) tola mazina aayo kuMuzulwidi waNyika.

(2) Muntu uli mukkomishini ilyiimkilide ukonzya kugwisigwa amulimu kuti kakuli muntu ooyo—

(a) tachikonzyi kuchita mulimu nkaambo kakulemana naakuti kusondoka muboongo;

(b) wakachilwa loko kuchita mulimu wakwe;

(c) wajanika kalaamulandu wakusunda kampatila; naakuti

(d) takonzyi kusalwa kuba umwi wamakkomishini alyiimkilide.

(3) Nzila yakugwisya Jaji njiyo ibelesegwa mukugwisya bantu bali mumakkomishini alyiimkilide.

CHIBAKA 2

238 Kupangwa abubumbwe bwaKkomishini yanSaluuzyo muZimbabwe

(1) Kuli Kkomishini itanootegwa Kkomishini yanSaluuzyo muZimbabwe ilaabantu batobela—

(a) sichuuno ugalwa aMuzulwidi waNyika kagwasyania aKkomishini yanBubetesi aKkomiti yanNzila Zyameendelezyo aPalyamenti; kabiyo

(b) bamwi bantu bali musanu abatatu bagalwa aMuzulwidi waNyika kuzwa kumazina alikkumi awabili naa kwiinda aazwa kuKkomiti yanNzila Zyameendelezyo aPalyamenti.

(2) Sichuuno waKkomishini yaNsaluuzyo muZimbabwe uyelede kuba Jaji naakuti wakali Jaji naakuti muntu ukonzya kunjizigwa mulimu wabuJaji.

(3) Kuti kugalwa kwasichuuno waKkomishini yaNsaluuzyo muZimbabwe kakuteendeli amizeezo yakazwa kuKkomishini yaBubetesi, Muzulwidi waNyika uyelede kwaambila Kkomiti yaNzila Zyameendelezyo aPalyamenti achakufwambaana.

(4) Bantu banjila muKkomishini yaNsaluuzyo muZimbabwe beeleder kuba banaZimbabwe basalwa kwiinda mubulemu mbubajisi aluzibo Iwamulimu ndubalaalo lwakubeleka abulumbu, mumakkapani antoomwe amutubunga tuteensi twafulumende.

(5) Bantu banjizigwa muKkomishini yaNsaluuzyo muZimbabwe bapegwa mweenya wakubeleka mukkomishini kwachiindi chisika minyaka musanu awumwi kabiyo bakonzya kupega uumbi mweenya waminyaka ikozyania. Pesi taakwe muntu unga ulagalwa lubo pe kuti anjile mumakkomishini kuti wakali wabelekela iimwi Kkomishini kale kwaminyaka kkumi ayibili kiitungene mulongo naakuti kitatungene mulongo myaaka.

239 Milimu yaKkomishini yaNsaluuzyo muZimbabwe

IKkomishini yaNsaluuzyo muZimbabwe ilaamilimu itobela —

(a) kubambil, kweendelezya akubona kuti ulookuchitwa kabotu mulimu —

- (i) kunsaluuzyo zyakusala Muzulwidi waNyika abayiminini bamuPalyamenti;
- (ii) kunsaluuzyo zyamumaKkansili aamuzilikiti awamumadolopo mapati antoomwe amaKkansili amabbooma;
- (iii) kunsaluuzyo zyabantu banjila muKkansili yaBaami Yanyika Mbiiuzwa mbuuli mbukwaambidwe muchibela 285; kabiyo
- (iv) kweendelezya malefelendamu;

akubona kuti nsaluuzyo eezi amalefelendamu zyachitwa kabotu , kabaangunukide bantu, kakutakwe lusaluulo, mububalangale kabiyo kakutobelezegwa mulawu;

(b) kweendelezya nsaluuzyo zyakusala Muzulwidi waNg'anda Yaajulu Yamilawu antoomwe akusala Nabbatule waNg'anda Yaansi Yamilawu, kubona kuti zyachitwa kabotu kakutobelezegwa mulawu;

(c) kulembesy bayanda kuvoota;

(d) kubumba malembe abasikuvoota;

(e) kubamba akubambilula malembe abasikuvoota;

(f) kweenga migaano yamakkonsitichwensi, mawaadi ayimwi migaano yazyakuvoota;

(g) kupanga, kudinda akutola kumasena aandeene mapepa akuvootesya , kuzumina misyobo yamabbokesi mubavootela bantu, kuzwa aamasena akuvootesya bantu;

(h) kweendelezya akubona machitilo alwiiyo lwakuvoota;

(i) kutambula akupa mvumo kubantu bayanda kubona mbuzyeendelezegwa nsaluuzyo amalefelendamu;

(j) kupa malayilile kuBabelesi Baluundu naakuti babelesi bakkansili yabbooma/dolopo kuchitila kuti bagwasizye mukweendelezya nsaluuzyo/ malefelendamu munzila iwanguunkide, itakwe lusaluulo kabiyo ibalangala akutandabala; kabiyo

(k) kutambula akulangisisya ntongawuko zizwa kubulumbu zyaatala ambuzyakachitwa nsaluuzyo antoomwe akuchita zyeede kuchitwa kakweendelana antongawuko zyeetwa abantu kuKkomishini.

240 Kusiigwa aanze kwabantu bayanda kunjila muKkomishini yaNsaluuzyo muZimbabwe

Aajulu kwabantu baambidwe muchibeedla 320(3), bantu batobela tabakonzyi kugalwa kuti banjile muKkomishini yaNsaluuzyo muZimbabwe—

- (a) Babelesi Baluundu, aanze kwamaJaji;
- (b) babelesi bamakkansili azilikiti amadolopo mapati antoomwe ababelesi bamumabbooma;
- (c) babelesi batubunga ambunga zisiyenesiyene zizulwidwa afulumende.

241 Kkomishini yaNsaluuzyo muZimbabwe yeelede kupa ngambo (lipoti) yabweendelezi bwansaluuzyo amalefelendamu

Aajulu kwangambo njiyelede kutola kuPalyamenti, mbuuli mbukwaambidwe muchibeedla 323, iKkomishini yaNsaluuzyo muZimbabwe yeelede kuti achakufwambaana yatola lipoti kuPalyamenti, kwiinda kuli Silutwe waMutabi waFulumende, aatala abweendelezi bwansaluuzyo zyoonse amalefelendamu aakachitwa.

CHIBAKA 3

KKOMISHINI YAZYEELELO ZYABANTU MUZIMBABWE

242 Kupangwa abwiime bwa Kkomishini yaZyeelelo Zyabantu muZimbabwe

(1) Kuli Kkomishini itanootegwa niKkomishini yaZyeelelo Zyabantu muZimbabwe ilaabantu batobela —

- (a) sichuuno ugalwa aMuzulwidi waNyika kagwasyania aKkomishini yaBubetesi aKkomiti yaNzila Zyameendelezyo aPalyamenti; kabiyo
- (b) bamwi bantu bali musanu abatatu bagalwa aMuzulwidi waNyika kuzwa kumazina ali kkumi awabili naa kwiinda aazwa kuKkomiti yaNzila Zyameendelezyo aPalyamenti.

(2) Sichuuno wa Kkomishini yaZyeelelo Zyabantu muZimbabwe uyelede kuba muntu wakabeleka muli zyamulawu kwachiindi chisika naakuti kwiinda minyaka musanu ayibili muZimbabwe.

(3) Kuti kugalwa kwasichuuno wa Kkomishini yaZyeelelo Zyabantu muZimbabwe kakuteendeli amizeezo yakazwa kuKkomishini yaBubetesi, Muzulwidi waNyika uyelede kwaambilila Kkomiti yaNzila Zyameendelezyo aPalyamenti achakufwambaana.

(4) Bantu banjila muKkomishini yaZyeelelo Zyabantu muZimbabwe beeleder basalwa kwiinda mubulemu mbubajisi aluzibo lwamulimu ndubalaalo muli zyakusumpula zyeelelo zyabantu.

243 Milimu yaKkomishini yaZyeelelo Zyabantu muZimbabwe

(1) IKkomishini yaZyeelelo Zyabantu muZimbabwe ijisi milimu itobela —

- (a) kusungwaazya kumwaywa kwaluzibo aatala akulemekwa kwazyelelo angwangunuko zyabantu muzibela zyoonse zyachisi;
- (b) kusungwaazya kukwabililwa, kusumpulwa akuzuzikizigwa kwazyelelo angwangunuko zyabantu;
- (c) kulangisisya kulemekwa akuzuzikizigwa kwazyelelo angwangunuko zyabantu;

- (d) kutambula akulangisisya ntongawuko/nyontooko zizwa kubulumbu akutola ntaamo zyakuzyotolola bulewusi kakweendelana abulewusi bwakachitwa mbuuli mbiizibona Kkomishini;
- (e) kukwabililwa kwabulumbu kuzwa kubazuluzi aBabelesi Baluundu bableesyza zyuuno zyabo munzila italuleme mukudyaamizya bulumbu;
- (f) kupokoola aatala anchito zyabantu bamang'alilwa naakuti kabunga/tubunga twamang'alilwa nkaambo kakutyola zyelelo angwangunuko zilembedwe muZyeelelo Zyaampandamunsaka;
- (g) kugwasizya bantu batyoletwa zyelelo zyabo kuti bajane bululami, kubikkilizya kutola basikutyola zyelelo kunkuta aawo zyelelo angwangunuko zyabantu mpuzyatylwa;
- (h) kwaambila Nabbatule waBakapokola kuti apokoole milandu yakutyolwa kwazyelelo angwangunuko mpawo ape butebuzi bwabupokoozi kuKkomishini yaZyeelelo Zyabantu;
- (i) kupa mizeeo kuPalyamenti aatala antaamo anzila zinga zilatobelezegwa kusungwaazya kulemekwa kwazyelelo angwangunuko zyabantu;
- (j) kuchita mfukununo aatala azintu zyeendelene akulemekwa kwazyelelo angwangunuko zyabantu antoomwe abukkale bwabantu; kabiyo
- (k) kuswaya akulangalanga bwiime—
 - (i) bwamajele, masena abambilwa baange, masena kukkanbasikuchija lumamba awamwi masena ayendelana awaaya;
 - (ii) masena kubambwa bantu bakasondoka muboongo;

kuchitala kuti kuzibikane bube abwiime bwamasena aaya mukkala bantu mpawo Kkomishini ipe maboneno aayo atala abwiime bwamasena aaya kuli Silutwe waMutabi waFulumende ubona zyakweendelezegwa kwamulawu ulangene aamasena aayo.

(2) Nabbatule waBakapokola weelete kulemeka akutobeleyza malayilile ngaapegwa aKkomishini yaZyeelelo Zyabantu muZimbabwe mbuuli mbukwaambidwe mukabeela (1)(h).

244 Ngambo/Malipoti aaya kuKomishini antoomwe awalembwa aKkomishini yaZyeelelo Zyabantu muZimbabwe

- (1) IKkomishini yaZyeelelo Zyabantu muZimbabwe ikonzya kuyanda muntu, kabunga, tubunga, twafulumede naakuti tuteensi twafulumende kuti—
 - (a) aambile Kkomishini ntaamo zyakatolwa kukusungwaazya akusumpula kuzuzikizigwa kwazyelelo angwangunuko zyabantu mbuuli mbuziyalidwe muZyeelelo Zyaampandamunsaka;
 - (b) kupa Kkomishini luzibo njiluyanda mukubambilakulemba malipoti/ngambo zitolwa nikuba kuli mbuuli kutubunga twamanyika aandeene twamuluwa naakuti tubunga twamanyika andeene aansi lyoonse tubona zyazyelelo zyabantu.
- (2) Aajulu angambo njiyelede kupa Palyamenti, mbuuli mbukwaambidwe muchibeela 323, iKkomishini yaZyeelelo Zyabantu muZimbabwe yeelede kuti achakufwambaana yatola lipoti kuPalyamenti, kwiinda kuli Silutwe waMutabi waFulumende wayo, aatala azimwi zyakachitikanazyazyelelo angwangunuko zyabantu nzyibona lwayo Kkomishini kuti zyeelede kuzibisigwa Palyamenti.

CHIBAKA 4

KKOMISHINI YAKWEELANISIGWA KWAMYEENYA YABANAKAZI ABAALUMI MUZIMBABWE

245 Kupangwa abwiime bwa Kkomishini yaKweelanisigwa kwaMyeenya yaBanakazi aBaalumi MuZimbabwe

(1) Kuli Kkomishini itanootegwa Kkomishini yaKweelanisigwa kwaMyeenya yaBanakazi aBaalumi muZimbabwe ilaabantu batobela —

- (a) sichuuno ugalwa aMuzulwidi waNyika kagwasyania aKkomiti yaNzila Zyameendelezyo aPalyamenti; kabiyo
- (b) bamwi bali musanu abatatu, kakuli —
 - (i) bali musanu ababili bagalwa aMuzulwidi waNyika kuzwa kumazina abantu aali kkumi awabili ngapegwa aKkomiti yaNzila Zyameendelezyo aPalyamenti; kabiyo
 - (ii) uumwi ugalwa aKkansili Yabaami Yanyika Yoonse, ugalwa aMuzulwidi waNyika.

(2) Bantu banjila muKkomishini yaKweelanisigwa kwaMyeenya yaBanakazi aBaalumi muZimbabwe beeledle basalwa kwiinda mubulemu mbubajisi aluzibo lwamulimu ndubalaalo muli zyabukkale, tunsiyansiya, zyabuvubi, azyakweendelezegwa kwanyika antoomwe azyakusiyana kwamyeenya yabanakazi abaalumi mubuumi. Buvule bwabaalumi abanakazi bweelede kweelana muKkomishini eeyi.

246 Milimu yaKkomishini yaKweelanisigwa kwaMyeenya yaBanakazi aBaalumi MuZimbabwe

IKkomishini yaKweelanisigwa kwaMyeenya yaBanakazi aBaalumi muZimbabwe ijisi milimu itobela —

- (a) kulangisisya zyaambo zyeendelene akweelanisigwa kwamyeenya yabanakazi abaalumi mubuumi mbuuli mbukwaambidwe muKkata lyamulawu;
- (b) kulangisisya kutyolwa kwazyeelo zyabantu kubbazu lyakweelansigwa kwamyeenya yabanakazi abaalumi mubuumi;
- (c) kutambula akulangisisya ntongawuko/nyontooko zizwa kubulumbu akutola ntaamo zyakuzyotolola bulewusi kakweendelana abuleswusi bwakachitwa mbuuli mbiizibona Kkomishini;
- (d) kuchita mfukununo aatala azintu zyeendelene akweelana kwabanakazi abaalumi mumyeenya yabo mubuumi antoomwe akupa mizeeo atala amasandu anga alachitwa amilawu amachitilo abantu zinga zilachesya lusaluulo lwabantu aatala akweelana kwabanakazi abaalumi mubuumi;
- (e) kupa mizeeo kutubunga twafulumende atuteensi twafulumende aatala antaamo zinga zilatolwa kuti kube kweelana kwamyeenya akati kabaalumi abanakazi mubuumi;
- (f) kupa mizeeo atala amabambe agwasizya kweelanisigwa kwamyeenya yabanakazi abaalumi mubuumi;
- (g) kupa mizeeo aatala akubetekwa kwabantu batyola zyeeelo zigwasizya kweelanisigwa kwamyeenya yabanakazi abaalumi mubuumi;
- (h) kugwasizya bantu batyolelwa zyeeelo zyabo zyeendelene akweelanisigwa kwamyeenya yabanakazi abaalumi mubuumi; kabiyo
- (i) kuchita nichiba chili chigwasizya kuti kuzuzikizigwe kweelana kwamyeenya yabanakazi abaalumi mubuumi.

**247 Ngambo/Malipoti alembwa aKkomishini yaKweelanisiga
kwaMyeenya yaBanakazi aBaalumi MuZimbabwe**

Aajulu kwalipoti/ngambo njiyelede kupa Palyamenti, mbuuli mbukwaambidwe muchibeeela 323, Kkomishini yaKweelanisiga kwaMyeenya yaBanakazi aBaalumi muZimbabwe yeelede kuti achakufwambaana yatola lipoti kuPalyamenti, kwiinda kuli Silutwe waMutabi waFulumende wayo, aatala azimwi zyakachitikana mukweelanisiga kwamyeenya yabanakazi abaalumi nzyibona lwayo Kkomishini kuti zyelede kuzibisigwa Palyamenti.

CHIBAKA 5

KKOMISHINI YA ZIMWAYA MILUMBE MU ZIMBABWE

**248 Kupangwa abwiime bwaKkomishini yaZimwaya Milumbe
muZimbabwe**

- (1) Kuli Kkomishini itanootegwa Kkomishini yaZimwaya Milumbe muZimbabwe —
- (a) sichuuno ugalwa aMuzulwidi waNyika kagwasyania aKkomiti yaNzila Zyameendelezyo aPalyamenti; kabiyo
 - (b) bali musanu abatatu bagalwa aMuzulwidi waNyika kuzwa kumazina abantu aali kkumi awabili ngaapegwa aKkomiti yaNzila Zyameendelezyo aPalyamenti.

(2) Bantu banjila muKkomishini yaZimwaya Milumbe muZimbabwe beeledes basalwa kwiinda mubulemu mbubajisi aluzibo lwamulimu ndubalaalo muli zyazyelelo zyabantu, amachitilo mabotu muli zyakumwaywa kwamilumbe.

249 Milimu yaKkomishini yaZimwaya Milumbe muZimbabwe

- (1) IKkomishini yaZimwaya Milumbe muZimbabwe ijisi milimu itobela —
 - (a) kusungwaazya akusumpula kwaangunuka kwazimwaya milumbe munyika;
 - (b) kusungwaazya akubona kuti zilookuchitwa zigwasizya kubeleka kabotu kwazimwaya milumbe;
 - (c) kulangisisya mabelekelo anzila njimwaywa aayo milumbe kakutobelegwa zintu zigwasya bulumbu, kapati kubona kuti takukwe lusalulano akutambula kusiyana kwamizeezo yaluundu lwaZimbabwe;
 - (d) kusungwaazya kupangwa kwazyelede kutobelegwa ababelesi bali mumilimu yakumwaywa kwamilumbe. Aawo mpuzitawo zyelede kuchitwa Kkomishini yeelede kuzipanga akubona kuti zilookulemekwa;
 - (e) kutambula akulangisisya ntongawuko zizwa kubulumbu akutola ntaamo zyakuzyotolola basimutola twaambo bachita bulewusi mukuchita milimu yabo naakuti batyola milawu/zyelede kuchitwa ambabo;
 - (f) kubona kuti bantu bamuZimbabwe bajana luzibo amilumbe minji munzila itakwe lusalulano;
 - (g) kusungwaazya kubelesegwa akusumpulwa kwayoonse milaka izibikene zili mumulawu muZimbabwe;
 - (h) kusungwaazya kubelesegwa kwazyabusongo bwamazuba aano (technology) mukumwaywa kwamilumbe aluzibo;
 - (i) kuzumizya aksusungwaazya mbunga/ng'anda zyandeene zimwaya milumbe; kabiyo

(j) kuchita mfukununo aatala azintu zyeendelene akwaangunuka kwazimwaya milumbe akaangunuka kwanzila zyakwaambuula, kabiyo akusungwaazya kubambilulwa kwamilawu iyanda kubambilulwa kuti kumwaywa kwamilumbe kuchitwe kabotu.

(2) Mulawu upangwa aPalyamenti ukonzya kupa nguzu ku Kkomishini yaZimwaya Milumbe muZimbabwe kuti —

(a) ipokoole akulangalanga —

(i) fumbwa nchito abube bwazintu bukachizya kwaangunuka kwazimwaya milumbe; kabiyo

(ii) machitilo azimwaya milumbe; kabiyo

(b) kutola ntaamo naakuti kupa mizeeo atala azinga zilachitwa mukuyotolola basimutola twaambo abamwi babelesi bajanika muzimwaya milumbe batanooli batyola milawu naakuti kutalemeka zyeede kuchitwa ababeleka muzimwaya milumbe.

(3) Mulawu upangwa aPalyamenti ukonzya kubikka nzila zyeede kutobelezegwa ababeleka muzimwaya milumbe.

250 Ngambo zilembwa aKkomishini yaZimwaya Milumbe muZimbabwe

Aajulu kwalipoti/ngambo njyeede kupa Palyamenti, mbuuli mbukwaambidwe muchibela 323, Kkomishini yaZimwaya Milumbe muZimbabwe yeede kuti achakufwambaana yatola lipoti kuPalyamenti, kwiinda kuli Silutwe waMutabi waFulume wayo, aatala azimwi zyakachitikana zyakumwaya kwamilumbe nzyibona lwayo Kkomishini kuti zyeede kuzibisigwa Palyamenti.

CHIBAKA 6

KKOMISHINI YA LUUMUNO ALULEKELELANO MU NYIKA

251 Kupangwa abubumbwe bwaKkomishini yaLuumuno aLulekelelano Munyika

(1) Kwachiindi chaminyaka ili kkumi kuzwa buunsi nilitalika kubeleka Kkata lyamulawu eeli, kunooli kkomishini itegwa niKkomishini yaLuumuno aLulekelelano Munyika ijisi bantu batobel —

(a) sichuuno ugalwa aMuzulwidi waNyika kagwasyania aKkomishini yaBubetesi antoomwe aKkomiti yaNzila Zyameendeleyo aPalyamenti; kabiyo

(b) bali musanu abatatu bagalwa aMuzulwidi waNyika kuzwa kumazina abantu aali kkumi awabili ngapegwaa aKkomiti yaNzila Zyameendeleyo aPalyamenti.

(2) Sichuuno wa Kkomishini yaLuumuno aLulekelelano Munyika uyeede kuba muntu wakabeleka muli zyamulawu kwachiindi chisika naakuti kwiinda minyaka musanu ayibili muZimbabwe.

(3) Kuti kugalwa kwasichuuno waKkomishini yaLuumuno aLulekelelano Munyika kakuteendelani amizeeo yakazwa kuKkomishini yaBubetesi, Muzulwidi waNyika uyeede kwaambila Kkomiti yaNzila Zyameendeleyo aPalyamenti achakufwambaana.

(4) Bantu banjila mu Kkomishini yaLuumuno aLulekelelano Munyika beeleder basalwa kwiinda mubulemu mbabajisi aluzibo Iwamulimu ndubalaalo akumvvisisisya zyakulekelelana, koomboozania, kumana mpyopyongano, kulekelelana kwabantu nilwamana luzyokola antoomwe anzila zyakubumba luumuno.

252 Milimu yaKkomishini yaLuumuno aLulekelelano Munyika

- IKkomishini yaLuumuno aLulekelelano Munyika ijisi milimu itobela —
- (a) kubona kuti kwaba bululami nilwamana lupyopyongano/luzyokola, koomboozyania/kumuzya aachisa akulekelelana kwabantu;
 - (b) kuchita mabambe asumpula kuumuzya aachisa kwanyika, kumvwanana lukamantano muZimbabwe akubelesya nzila zyaluumuno mukumana mpyopyongano zyabawo;
 - (c) kweeta lulekelelano munyika kwiinda mukusungwaazya bantu kuti baambe nchobeni aatala azyakachitikana nkukuti bagwasigwe mukujana lulekelelano abululami;
 - (d) kupanga nzila atubunga twanyika yoonse tusungwaazya kwaambuuzyania akati katubunga twazyakweendelezya nyika, luundu, mbungano antoomwe atumwi tubunga, nkukuti kuchesegwe kubawo kwampyopyongano muchiindi chiza;
 - (e) kupanga mabambe akubona kuti bantu bakasonsegwa mubuumi, bajatwa buzike akukoloonsegwa bajana lugwasyo lwakubusilisigwa, kusilikwa alugwasyo mubuumi;
 - (f) kutambula akulangisisya ntongawuko/nyontooko zizwa kubulumbu akutola ntaamo zyakuzyotolola butongawusi abulewusi munzila iyelede;
 - (g) kupanga nzila zyakubbutula mpyopyongano chakufwambaana kuchitila kuti luzyokola taluyaluuki mbuuli mulilo mpawo akutola ntaamo zyakuchesyia kubawo kwampyopyongano;
 - (h) kuchita zyoonse zikonzeka kuchitwa kukwabilila mpyopyongano akusungwaazya luumuno;
 - (i) kumana mpyopyongano kwiinda mukwaambuzyania kwabantu muluundu, mumbungano, mutubunga antoomwe amuluumwi awumwi wabantu; kabiyo
 - (j) kupa mizeeo atala amilawu iyelede kubikkwa kuchitila kuti lugwasyo, kubikkilizya zilembwa, lwapegwaa kubantu bakaswaanana ampyopyongano, luzyokola abumwi buyumuyumu.

253 Ngambo/Malipoti alembwa aKkomishini yaLuumuno aLulekelelano Munyika

Aajulu kwalipoti/ngambo njiyelede kupa Palyamenti, mbuuli mbukwaambidwe muchibela 323, Kkomishini yaLuumuno aLulekelelano Munyika yelede kuti achakufwambaana yatola lipoti kuPalyamenti, kwiinda kuli Silutwe waMutabi waFulumende wayo, aatala azimwi zyakachitikana zyaluumuno alulekelelano munyika nzyibona lwayo Kkomishini kuti zyelede kuzibisigwa Palyamenti.

CHAANDAAN0 13

TUBUNGA TWAKULWANA BUBOLI ANTOOMWE AMILANDU

CHIBAKA 1

KKOMISHINI YANAKAKA BUBOLI MUZIMBABWE

254 Kupangwa abwiime bwa Kkomishini yaNkaka Buboli muZimbabwe

- (1) Kuli Kkomishini itanoategwa Kkomishini yaNkaka Buboli muZimbabwe —

(a) sicheuno ugalwa aMuzulwidi waNyika kajana mizeeo kuzwa kuKkomiti yaNzila Zyameendelezyo aPalyamenti; kabiyo

(b) musanu abatatu bagalwa aMuzulwidi waNyika kuzwa kumundanda wamazina usika kukkumi awabili naakuti kwiinda, mazina aayo kaali ayetwa aKkomiti yaNzila Zyameendelezyo aPalyamenti kuMuzulwidi waNyika.

(2) Bantu beelede kujanika muKkomishini yaNkaka Buboli muZimbabwe beelede kusalwa nkaambo kabulemu mbubajisi, luzibo lwabo azyamulimu abuumi mukweendelezya akupokoolwa kwamilandu naakuti kulangika kwabo kabeelela kugalwa; kabiyo—

(a) uumwi naakuti banji babo kweelede kabali bakayiila mulimu wazyabusimulawu kabiyo ukonzya kubeleka zyabusimulawu muZimbabwe, kali wakali kubeleka zyabusimulawu kwaminyaka isika musanu ayibili naakuti kwiinda;

(b) uumwi naakuti banji babo beelede kuti kabali bantu bakayiila mulimu wazyakulangalanga mabeleseyo amali naakuti kufunkulula mabeleseyo amali (public accountant /public auditor), kabiyo wakali kubeleka muZimbabwe zyakulangalanga/kufunkulula mabeleseyo amali kwachiindi chisika naakuti chiinda minyaka musanu ayibili; kabiyo

(c) uumwi naakuti banji babantu kabali bajisi minyaka isika naakuti kwiinda kkumi muli zyakupokoola akuyanduulilisyva bwiime bwamilandu.

255 Milimu yaKkomishini yaNkaka Buboli muZimbabwe

(1) IKkomishini yaNkaka Buboli muZimbabwe ijisi milimu itobela —

(a) kupokoola akulangisisya bwiime bwamilandu yazyabuboli mumitabi atubunga twafulumende antoomwe amumakkampani alyiimikilide;

(b) kulwana buboli, bubbii, kubbigwa kwamali azintu, kutabelesegwa kabotu manguzu kwabazuluzi muzyuno zyabo mumitabi yafulumende amutubunga /makkampani alyiimikilide;

(c) kusungwaazya busichaamba, mabeleseyo mabotu amali, bupalangale mumitabi atubunga twafulumende antoomwe amutubunga tulyiimikilide;

(d) kutambula, kulangisisya ntongawuko/nyontooko zizwa kubulumbu akutola ntaamo zyakuzyotolola ntongawuko mbuuli mbukweelede;

(e) kwaambila Nabbatule waBakapokola kuti apokoole akulangisisya milandu ilaatala abuboli mpawo akwaambila Kkomishini butebuzi butanooli bwazwa mubupokoozi bwachitwa;

(f) kutola zyaambo amilandu kuNkamu yaZyakusosela Milandu kuti milandu itolwe kunkuta;

(g) kujana lugwasyo kuzwa kuli Bakapokola ayimwi mitabi yafulumenedne ipokoola milandu; kabiyo

(h) kupa mizeeo kuli fulumende abamwi bantu aatala akusungwaazya kulijata kuli kabotu kwatubunga amitabi yaFulumende antoomwe amutubunga tulyiimikilide.

(2) Nabbatule waBakapokola weeledes kuswilizya malayilile aazwa ku Kkomishini yaNkaka Buboli muZimbabwe mbuuli mbukwaambidwe mukabeela (1) (e).

(3) Fulumende weeledes kubona kuti, kwiinda mukupanga mulawu azimwi ntaamo, Kkomishini yaNkaka Buboli muZimbabwe ilaamanguzu aakupa kuti mutu asungwe antoomwe akubetekwa ooyo wayeyelwa kuti wakachita zyabuboli, watabelesya kabotu manguzu achiuno chakwe naakuti kutalijata kabotu kwamuntu munzila ichita mulandu mumeso aKkomishini yaNkaka Buboli muZimbabwe.

256 Kuchita zyaambidwe muChaandaano 12 kumulimu waKkomishini yaNkaka Buboli muZimbabwe

Zyaambidwe muzibela 234, 235, 236 a 237 zyeede kuchitwa kuKkomishini yaNkaka Buboli muZimbabwe antoomwe abantu bajanika mukkomishini eeyi mbukunga nikkomishini ilyimikilide ipangwa kwiinda muChaandaano 12.

257 Ngambo zilembwa aKkomishini yaNkaka Buboli muZimbabwe

Aajulu kwalipoti njiyeede kupa Palyamenti, mbuuli mbukwaambidwe muchibela 323, iKkomishini yaNkaka Buboli muZimbabwe yeeede kuti, kwiinda kuli Silutwe waMutabi waFulumende, yatola lipoti kuPalyamenti, aatala akulijata kwababelesi mumitabi atubunga twafulumende amumakkampani alyiimkilide nzyibona kazyeeede kwaambilwa Palyamenti.

CHIBAKA 2

NKAMU YABASIKUSOSELAMILANDUMUNKUTA

258 Kupangwa amilimu yaNkamu yaBasikusosela Milandu Munkuta

Kuli Nkamu yaBasikusosela Milandu Munkuta ilaamulimu wakatalika akweendelezya kusosela milandu munkuta kayiimikilila fulumende mumilandu yacriminal cases antoomwe akuchita imwi milimu iyede nikusoselwa milandu munkuta eeyo itanooli yasundwa.

259 Nabbatule waBasikusosela Milandu Munkuta abamwi babelesi

(1) Kuli Nabbatule waBasikusosela Milandu muNkuta kakuli ngusilutwe waNkamu yaBasikusosela Milandu muNkuta.

(2) Chuuno chabuNabbatule waBasikusosela Milandu Munkuta nchuuno chababelesi baluundu pesi teensi bamwi abaBabelesi Baluundu.

[Kabela 2 kakabambululwa achibeela 16 (b) chaMulawu 2 wa2021]

(3) Nabbatule waBasikusosela Milandu Munkuta ugalwa aMuzulwidi waNyika kapegwa mizeezo aKkomishini yaBubetesu kuti anjile mulimu.

[Kabela 3 kakabambululwa achibeela 16 (c) chaMulawu 2 wa2021]

(4) Nabbatule waBasikusosela Milandu Munkuta uyeede kuba muntu ukonza kupegwa mulimu wabuJaji bwaNkuta Yaajulujulu.

(5) Bulamfu bwakukkala muwofesi bwa Nabbatule waBasikusosela Milandu minyaka musanu awumwi pesi ukonza kupegwa uumbi mweenya wabulamfu bwaminyaka bweelene abwakutaanguna.

(6) Katana talika kubeleka Nabbatule waBasikusosela Milandu Munkuta weeede kukonka chikonke kunembo lyaMuzulwidi waNyika naakuti kunembo kwawumwi muntu wapegwa mvumo aMuzulwidi waNyika, bwiime bwachikonke buli muMpampikwa Yatatu.

(7) Nabbatule waBasikusosela ulagwisigwa achiuno akaambo kazitobela—

(a) kukachilwa kweendelezya mulimu wakwe weendelana achiuno chakwe akaambo kakukuchiswa boongo naakuti mubili; naakuti

(b) kukachilwa kuchita mulimu wakwe kwiindilide; naakuti

(c) kutilichata kabotu kwiindilide.

[Kabela 7 kalabambululwa chibeela 16 (c) chaMulawu 2 wa2021]

(7a) Naa Muzulwidi waNyika wabona kuti kugwisigwa kwaNabbatule waBasikusosela Kunkuta achiuno yeeede kulangisisigwa, Muzulwidi waNyika weeede kugala kabunga kamaJaji kuti balangisisye nkani eeyo.

(7b) Kabunga kamaJaji kagalwa munsi akabela (7a) keelede kabe aabantu batali munsi abatatu bagalwa aMuzulwidi waNyika, kakweelede kuti aakati kabo —

(a) bobile babe kabaliluzi naakuti kabali majaji kuNkuta Yaajulu; alimwi

(b) womwe kali aziyandikana naa kali wakali wabajaji waNkuta Mpati naakuti wakali waba jaji wankuta itakwe mweelo wamanguzu kumakanii aamilandu akutyola mulawu muchisi aawo mulawu uutobelwa kuuli wa*Roman-Dutch* naakuti waChikuwa, alimwi Chikuwa kachibwezegwa mbuuli mulaka mukoloondo wakubelesya mumasena asiyene.

(7c) Muzulwidi waNyika weelete wagala um wi wakabunga kamaJaji kuti abe sichuuno wakabunga.

(7d) Kabunga kamaJaji keelede kulangisisya kaambo kakugwisigwa kwaDundumuntule wabaJaji achuuno, alimwi musule akuchita oobo, keelede kazibisywa Muzulwidi waNyika aatala azeezyo nzikajana alimwi kabambe kuti Dundumuntule wabaJaji agwisigwe na naakuti pe achuuno.

(7e) Kabunga kamaJaji kabikwa munsi achibeela kali azyeelelo amanguzu ayelene awamaKkomishina munsi aMulawu wamaKkomishina aaKudunamina [Chaandano 10:07] naa umwi mulawu uubikwa aabusena bwayooy.

(7f) Naa makani akugwisigwa achuuno kwaNabbatule waBasikusosela kuNkuta lwatolwa kukabunga kamaJaji munsi achaandaano eechi, Nabbatule waBasikusosela kuNkuta ulakonzya kwiiimikizigwa kuchuuno kunze kukabe kuti Muzulwidi waNyika, akubonisyania akabunga kamaJaji, usowe kwiiimikizigwa naa agwisye Nabbatule waBasikusosela achuuno.

(7g) Mulawu uubikwa aPalyamenti kwaaambuulwa awo munsi akabela (10) uuulimunsi yaBoodi yaKabunga kaChisi kaBasikusosela naakuti kabunga kababetkesi kabikwa munsi kwaChibeela eechi kuti kalangisisye kuti Nabbatule waBasikusosela eete ngambo yakwe yakulangwa kwakwe akabunga kazyabolondosi katanoli kapegwa mukuli ooyu, kuti kuge lusinzyo aatala akupona kwakwe kwaboongo amubili

[Kabela 7(a)-7(g) kabikwa achibeela 16(c) chaMulawu 2 wa2021]

(8) Mifolo alumwi lugwasyo lupegwa babelesi amulimu lwendelene a Nabbatule waBasikusosela Milandu Munkuta, zyeedele kupandululwa kabotu aMulawu upangwa aPalyamenti. Pesi mifolo wakwe tuuyelete kuselusigwa pe Nabbatule waBasikusosela Milandu Munkuta kachili achuuno.

(9) Mufolo wa Nabbatule waBasikusosela Milandu Munkuta uzwa kuNkomo Mpati yaFulumende.

(10) Mulawu upangwa aPalyamenti uyelete kwaamba aatala akupangwa kwaBoodi lyeedele kupandulula kunjizigwa milimu kwababelesi bagwasizya Nabbatule waBasikusosela Milandu Munkuta—

(a) nzibeelede kubaazyo kuti banjile milimu;

(b) mifolo yabo ambubelede kulijata amulimu;

(c) akuti nibachita milimu yabo kweelede babelesi aabo kabalyiimikilide akulisanta kabatobeleya mulawu luzutu, kuswiilizya malayilile anzyotololo zizwa kuli Nabbatule waBasikusosela Milandu muNkuta;

(d) zyabwiime abubumbwe bwaNkamu yaBasikusosela Milandu Munkuta; kabiyo

(e) kugwasizya mumabelekelo aabo bamuNkamu yaBasikusosela Milandu Munkuta.

(11) Nabbatule waBasikusosela Milandu Munkuta ukonzya kwaambila Nabbatule waBakapokola kuti apokoole akulangisisya mulandu. Butebuzi mbwatanooli wajana mukupokoola kwakwe aambil Nabbatule waBasikusosela Milandu muNkuta. Kabiyo

Nabbatule waBakapokola uyelede kutobeleyza malayilile aazwa kuli Nabbatule waBasikusosela Milandu muNkuta.

260 Kulyiimkilila akulisanta kwa Nabbatule waBasikusosela Milandu

- (1) Kwiinda muKkata lyaMulawu eeli, Nabbatule waBasikusosela Milandu Munkuta—
 - (a) uli lyiimkilide kabiyo tayelede kuchelezegwa pe mukubeleka kwakwe awumwi muntu; kabiyo
 - (b) weelete kuchita milimu yakwe kalyiimvwilidi akulisanta katayoowi akufwida bamwi bantu luse.
- (2) Nabbatule waBasikusosela Milandu muNkuta uyelede kuchita akumwaya kuluundu ndemeko nzyatobeleyza mukulangisisya aakupokoolwa kwamilandu yabantu.

261 Mbubelede kulijata babelesi baNkamu yaBasikusosela Milandu Munkuta

- (1) Nabbatule waBasikusosela Milandu muNkuta ababelesi bamuNkamu yaBasikusosela Milandu muNkuta beelete kulijata munzila yaambidwe muKkata lyaMulawu eeli ayimwi milawu.
- (2) Taakwe mubelesi waNkamu yaBasikusosela Milandu muNkuta uyelede kuti nachita milimu yakwe—
 - (a) kachita zyakabunga kakweendelezya nyika;
 - (b) kuzuzikizya mpalamo zyakabunga kakweendelezya nyika;
 - (c) kudyamizya ziyanda kuchitwa akabunga kazyakweendelezya nyika zili mumulawu;
 - (d) Kutyola akutalemeka zyeelo angwangunuko zyaampandamunsaka zyanaba uuli muntu.
- (3) Babelesi baNkamu yaBasikusosela Milandu muNkuta tabeelede pe kunjila muzyuuno zyatubunga twazyakweendelezya nyika naakuti imwi mbungano biyo.

(4) Mulawu upangwa aPalyamenti ukonzya kwaamba zimwi zinga zilagwasizya mukuchita kuti babelesi baNkamu yaBasikusosela Milandu muNkuta tabanoonjili munchito amilimu yazyatubunga twazyakweendelezya nyika.

262 Nabbatule waBasikusosela Milandu muNkuta weelete kupa lipoti kuPalyamenti munyaka amunyaka

Nabbatule waBasikusosela Milandu muNkuta weelete kupa Palyamenti lipoti lyazyakachitika mumunyaka woonse, kwiinda muli Silutwe waMutabi waFulumende wakwe. Lipoti eeli lyamunyaka wayinda lyeelede kupegwa Palyamenti mukati kamyezei musanu awumwi kuzwa nuwatalika munyaka mupya.

263 Amwi manguzu aakusosela milandu

Mulawu upangwa aPalyamenti ukonzya kupa manguzu aakusosela milandu kuli bamwi bantu batajaniki muNkamu yaBasikusosela Milandu Munkuta pesi nguzu eezyo tazyeelede kwiimpana pe anguzu zipedwe Nkamu yaBasikusosela Milandi muNkuta mbuuli mbukwaambidwe muChibaka eechi.

CHAANDAANO 14

FULUMENDE WA CHILIKITI AWABBOOMA

NTALISYO

Nikuba kuti kulayandikana kubona kuti:

- (a) kwakwabililwa lukamantano lwanyika yaZimbabwe akulwana zyoonse nzila zinga zilapa kutamvwanana kwabantu akupambuka kwachimwi chipanzi chanyika;
- (b) kugwasizya akunjilingana kwabenichisi mubulelo bwajandabanji munyika yabo yaZimbabwe; kabiyo
- (c) kwaabilwa kweelene kwazibelesyo azilengwa-leza zijanika munyika antoomwe akunjilingana kwabulumbu mumabambe alusumpuko lwabusena;

kweelede kwaba kuselusigwa kwanguzu zyakulela nyika kuzwa kuli fulumende mupati wakujulu kwachisi kuza kuli fulumende waansi kuchilikiti akubbooma munyika yaZimbabwe.

CHIBAKA 1

NTALISYO

264 Kwaabwa kwanguzu zyakulela nyika kuzwa kuli fulumende mupati kusika kuli fulumende waansi, nguzu zipedwe antoomwe amilimu yeelede kuchitwa

(1) Aawo mpukwabonwa kakweelede, nguzu antoomwe amilimu yafulumende, zyaabwa akuselusigwa kumakkansili azilikiti, madolopo mapati antoomwe amabbooma kuti eezi zibela kazikonzya kubelesya nguzu akuchita milimu iyelede kuchitwa munzila iidodonkene.

(2) Impalamo zyakwaabwa akuselusigwa kwanguzu zyafulumende kuzwa kujulu kusika kumakkansili azilikiti, madolopo mapati amabbooma nzezi—

- (a) kupa nguzu kubantu zyakwendelezya bukkale bwabo muzibela zyazilikiti, madolopo mapati amabbooma kabiyo kabanjilingana mukwendelezegwa kwamasena aabo akupa mizeezo mulusumpuko lwamasena aabo;
- (b) kusungwaazya bulelo bwajandabanji, bulelo budodonkene, bubalangala, bukamantene munyika yaZimbabwe mbiizulwa;
- (c) kutilizya akusungwaazya luumuno, lukamantano lwachisi abugodobiime bwanyika yaZimbabwe;
- (d) kubona kuti kweelede bulumbu bwajana cheelelo chakulyeendelezya mubulelo bwabo akusumpula chisi munzila njibayanda;
- (e) kubona kuti kuli kwaabana kweelene kwazilengwa-leza zijanika munyika mbiizulwa amumasena aamuluwa; kabiyo
- (f) kutola zibelesyo antoomwe amikuli iyelede kuchitwa kuzwa kuli fulumende waajulu kuya kuli fulumende wazibela zilaansi kuchitila kuti kupangwe mabeleseyo azyamali muli chimwi achimwi chilikiti, dolopo pati abbooma.

265 Ndemeko zyeelede kujanika muli fulumende wachilikiti, dolopo abbooma

(1) Makkansili azilikiti, madolopo mapati amabbooma ayelede kuti mukati kanguzu nzyaapegwa —

- (a) babona kuti kuli bweendelezi buzikitide mumasena aabo kwiinda mukudodonkania machitilo abweendelezi bwabo munzila iibalangala yakuchita akulemeka ziyandwa abulumbu;
- (b) bachita milimu eeyo njibakapegwa luzutu aKkata lyamulawu eeli naakuti aMulawu upangwa aPalyamenti;
- (c) kuchita milimu yabo munzila itakolonganyi akunjilila mumabelekelo azimwi zibeela zyafulumende;
- (d) babelekela aamwi azimwi zibeela zyafulumende munyika, kapati kwiinda munzila—
 - (i) yakuzibisyania akugwasizyania mumizeezo aatala azimwi zintu nzibeelede kubekelaamwi;
 - (ii) kuchita milimu yabo ipa kuti kube kubekelaamwi akumvwanana;
- (e) kukwabilila luumuno, lukamantano lwachisi abugodobwiime bwanyika yaZimbabwe
- (f) kubona kuti bulumbu buleledwe akweendelezegwa kabotu; kabiyo
- (g) kubona kuti bulumbu bwayimikililwa munzila ibukkutya muzintu nzibuyanda mumasena aabo.

(2) Boonse bayiminini mumakkansili amadolopo amabbooma kweelede kabasalwa aabantu balembesezye kuvoota mumasena aayo;

(3) Mulawu upangwa aPalyamenti uyelede kupandulula mbukweelede kuchitwa kuti kube kubekelana kuli kabotu akati ka fulumende mupati wanyika abafulumende bamumakkansili.

266 Kulijata kwaBabelesi Baluundu wachilikiti mumadolopo mapati amumabbooma

(1) Babelesi bamukkansili yachilikiti, mumadolopo mapati amumabbooma beeplede kulijata munzila yaambidwe muKkata lyamulawu eeli antoomwe ayimwi milawu.

(2) Taakwe mubelesi wamukkansili yamuchilikiti, mudolopo pati amubbooma uyelede kuti naachita milimu yakwe—

- (a) wanjizya zyakamwi kabunga kakweendezya nyika;
- (b) wazuzikizya mpalamo zyakabunga kakweendeleya nyika;
- (c) wadyaamizya ziyanda kuchitwa akabunga kazyanyika zili mumulawu;
- (d) watyola akutalemeka zyeeleo angwangunuko zyaampandamunsaka zyanikuba uuli muntu.

(3) Babelesi bamukkansili yachilikiti, mudolopo pati amubbooma tabeelede pe kunjila muzyuuno zyatubunga twazyakweendeleya nyika naakuti imwi mbungano biyo.

(4) Mulawu upangwa aPalyamenti ukonzya kwaamba zimwi zinga zilagwasizya mukuchita kuti babelesi bamukkansili yachilikiti, mudolopo pati amubbooma tabanoonjili munchito amilimu yazyatubunga twakweendeleya nyika.

CHIBAKA 2

ZILIKITI AMAKKANSILI AAZILIKITI AMADOLopo-MAPATI

267 Zilikiti amabooma amuZimbabwe

- (1) Zilikiti mwigaanwidwe nyika yaZimbabwe nzezi —
- (a) Chilikitika Dolopo pati lyaBulawayo
 - (b) Chilikitika Dolopo pati lyaHarare
 - (c) Chilikitika Manicaland
 - (d) Chilikitika Mashonaland Central
 - (e) Chilikitika Mashonaland East
 - (f) Chilikitika Mashonaland West
 - (g) Chilikitika Masvingo
 - (h) Chilikitika Matabeleland North
 - (i) Chilikitika Matabeleland South; kabiyo
 - (j) Chilikitika Midlands;

migaano yazyozilikitieezi ilipandulwidwe muMulawu upangwa aPalyamenti.

- (2) Mulawu upangwa aPalyamenti —

- (a) weelede kupandulula kugaanunwa kwazilikiti kakuchitwa migaano yamabooma; kabiyo
- (b) kupandulula mbukunga migaano yazilikiti amabooma ilabambululwa;

kwiinda mukupana mizeeo aKkomishini yaNsaluuzyo muZimbabwe abantu bajanika muzilikiti amumabooma alaamigaano iyanda kubambuululwa.

268 Makkansili amuZilikiti zyamumyuunzi amadolopo mapati

(1) Kulikkansili yachilikiti muchilikiti chimwi achimwi akkansili yadolopo pati muchilikiti chadolopo pati limwi alimwi iiwanizya —

- (a) Swichuunoakkansili, wasalwa ampandamayake yamulawu zyabandawukwa kuChibela 272; alimwi
- (b) Bameya abasichuuno, kakutalangwi kuti biitwa biyeni, bamakkansili woense amadolopo mapati azilikiti zyamumyuunzi kubusena oobo; alimwi
- (c) Bachikayintu balikkumi basalwa anzila yakweelenisa kwiiminina kuzwa kumyeelwe ijanwa abiiminini batubunga twazyabuleli kunsaluuzyo yaambwa kukabela (3).

(2) Wachikayintu weelede kusalwa kuti abe umwi wakabunga kakkansili yachilikiti naakuti dolopo pati kakutobelwa kabela (1)(c) naa kaliluzi kuti asalwe kuba Mwiiminini waNg'anda yaBiiminini.

(3) Nsaluuzyo yamakkansili aazilikiti ayamadolopo mapati kweelede yeendelezegwa kakutobelwa Mulawu waNsaluuzyo, wonya weelede ubike lusinizyo lwakuti bachikayintu baambwa kukabela (1)(c) basalwe kumpampikwa lwakweelanisa —

- (a) luyeme kumavoti ajanwa abiiminini batubunga twazyabuleli bwachisi kunsaluuzyo iikamantene lwaBiiminini baNg'nda yaMulawu kuchilikiti echo; alimwi
- (b) luswaanizya bachikayintu bapona abulema.

(4) Chuuno chamwiiminini wakkansili kuchilikiti naakuti kudolopo pati lilokwaambuulwa aatala andilyo —

- (a) kufuka (b) lyakabela (1) chisyaala kiitakwe muntu naa mwiiminini wasiya chuuno chabumeya naa chabusichuuno wakkansili yachilikiti eecho;
- (b) kufuka (c) lyakabela (1) chisyaala kachitakwe muntu naa kwaba zyaambwa kuchibela 129, mbuuli kuti wakali Mwiiminini waNg'anda yaMulawu.

[Kabela kabambilulwa achibeela 17 chaMulawu 2 wa2021]

269 ...

[Kabela kasowegwa achibeela 17 chaMulawu 2 wa2021]

270 Milimu yamaKkansili muzilikiti zyamadolopo mapati

(1) Ikkansili yachilikiti naakuti dolopo pati ilaamulimu wakubona kuti busena bwayo bulookujana lusumpuko lwabantu mubukkale amubuvubi bwabo, kubikkilizya —

- (a) kuchita mabambe akwaayendelezya mukusumpula bukkale abuvubi bwabantu muchilikiti;
- (b) kweendelezya mabambe alusumpuko aafulumende wanyika mbiizulwa mibusena bwayo;
- (c) kuchita mabambe akwaayendelezya alaatala akukwabilila kubotya akujata kabotu zilengwaleza zijanika muchilikiti eecho;
- (d) kusungwaazya kuswaya kwabantu bayanda kubona masena aswaayilwa muchilikiti antoomwe akwaasumpula masena aayo;
- (e) kuchita ndangemusule akulangisisya mabeleseyo azibelesyo zijanika muchilikiti; kabiyo
- (f) kuchita nuuba uuli mulimu , kubikkilizya kupanga milawu, iinga ilapegwa makkansili kwiinda muMulawu upangwa aPalyamenti.

(2) Mulawu upangwa aPalyamenti uyelede kupandulula zyakupangwa, bwiime ababelesi bajanika mukkansili yachilikiti amukkansili lyadolopo pati antoomwe ambubanga baleendelezya milimu yabo.

(3) Bantu bajanika mukkansili yachilikiti amudolopo pati balaabulambe, kabalaamwi naakuti umwi awumwi, bwakubelekela bulumbu bukkala muchilikiti mbubelede kuchitilwa akuchitila fulumende wanyika mbiizulwa nzyayelete kuchitilwa.

271 Makkomiti aamakkansili amuzilikiti zyamumyuunzi amadolopo mapati

Kuchitila kuti abeleke kabotu milimu yawo, makkansili aamuzilikiti amumadolopo mapati akonzya kubumba makkomiti pesi makkomiti aayo ayelede kuzulwidwa abantu baambidwe muchibela 268(1)(c).

[Kabela kabambilulwa achibeela 18 chaMulawu 2 wa2021]

272 Basichuuno bamakkansili amuzilikiti zyamumyuunzi amadolopo mapati

[Mutwe wamakanu wachibeela wabambilulwa achibeela 19(a) chaMulawu 2 wa2021]

(1) Kumuswaangano mutaanzi nikwazwa aakuchitwa nsaluuzyo zyakusala bazulwidi basiyenesiyene nyika mbiizulwa, ikkansili yachilikiti chamumyuunzi naakuti yadolopo pati yeelede kusala sichuuno kuzwa kumazina ngibapegwa aayinda aabili aabantu bakonzya kusalwa—

[kabela kabambilulwa achibela 19(b) chaMulawu 2 wa2021]

(a) akabunga kazyakweendelezya nyika kakajana mavooti manji kwiindila mukusalwa kwabayiminini baNg'anda Yaansi Yamilawu bamuchilikit eecho; naakuti

(b) kuti kakutakwe kabunga kakweendelezya nyika mbuuli mbukwaambidwe mufuka (a), kabunga kakweendelezya nyika kakajana mavooti manji mukusalwa kwabazulwidi bayiminina Ng'anda Yaansi Yamilawu.

(2) Muntu ukonzya kusalwa kuba sichuuno wakkansili yachilikiti chamumyuunzi na dolopo pati kuti kakuli ukonzya kusalwa kuba mwiiimini wamuNg'anda Yaajulu Yamilawu (Seneti).

[Kabela kabambilulwa achibela 19(c) chaMulawu 2 wa2021]

(3) Wofesi yaSichuuno wakkansili yachilikiti chamumyuunzi naakuti dolopo pati njakubelekela luundu pesi lwakwe sichuuno teensi mubelesi waluundu

[Kabeela kabambilulwa achibela 19(d)(ii) chaMulawu 2 wa2021]

(4) Katana talika kubeleka, sichuuno wakkansili yamumuunzi naa dolopo pati yachilikiti uyelede kuchita chikonke kunembo kwaMulembi wakkanisli yachilikiti, chikonke chaklibombya achanlimu wakwe mbuuli mbukwaambidwe muMpampikwa Yatatu.

[kabeela kabambilulwa achibela 19(e) chaMulawu 2 wa2021]

(5) Sichuuno wakkansili yachilikiti chamumyuunzi naa dolopo pati ukonzya kusiya mulimu kwiinda mukuzibisyaa kkansili yachilikiti chamumyuunzi naa dolopo pati lwakwe mwini.

[Kabeela kabambilulwa achibela 19 (e) chaMulawu 2 wa2021]

(6) Sichuuno wakkansili yachilikitichamumyuunzi naa dolopo pati uyelede kusiya chuuno chakwe—

[Kabeela kabambilulwa achibela 19 (f) (i) chaMulawu 2 wa2021]

(a) buzuba kkansili yachilikiti chamumyuunzi naa dolopo pati niyaswaanana kwalutaanzi nikwazwa kusalwa bazulwidi basiyenesiyene munsaluuzyo zyanyika yoonse;

(b) kuti katachikonyi kuba umwi wabayiminini bakkansili yachilikiti chamumyuunzi naa dolopo pati;

(c) kuti kkansili yachilikiti yazuminana kuti agwisigwe kuzwa muwofesi kwiinda mukuzuminana kwabantu basika kuntompa-chaala kwabantu bajanika mukkansili yachilikiti chamumyuunzi naa dolopo pati;

[Mafuka (a) – (c) abambilulwa achibela 19(f) (ii) chaMulawu 2 wa2021]

(d) wagwisigwa muwofesi akabunga kakasalwa kuti kalangelange mabelekelo aakwe mbuuli mbukwaambidwe mukabeela (7).

(7) Mulawu upangwa aPalyamenti uyelede kupandulula zyakupangwa kwakabunga kalyimikilide kakonzya kugwisa basichuuno bamakkansili aamuzilikit zyamumuunzi amadolopo mapati kuzwa mumawofesi, pesi kugwisigwa kwabasichuuno muzyuuno zyabo kweelede kuchitwa kakutobelegwa zezi zitobel—a

[Kabeela kabambilulwa achibela 19(g) chaMulawu 2 wa2021]

(a) kutakonzya kuchita milimu yakwe nkaambo kakusondoka naakuti kulemana;

(b) kutakonzya mulimu wakwe munzila iiyindilide;

(c) kusunda mulandu mupati loko;

(d) kujanwa kalaamulandu ankuta, mulandu ulaachakuchita akuubula bulemu bwakwe, buboli akutabelesya kabotu chuuno chakwe; naakuti

(e) kutyola mulawu achaali kubikkilizya tulawulawu twakabikkwa akkansili.

(8) Sichuuno wakkansili yachilikiti chamumyuunzi naa dolopo pati takonzyi kuzwa achuuno domane kwiinda mumalayilile awambidwe muchibeela eechi.

[Kabeela kabambilulwa achibeela 19(h) chaMulawu 2 wa2021]

273 Zimwi zinga zilaambwa aatala amakkansili amuzilikiti amumadolopo mapti

(1) Mulawu upangwa aPalyamenti weelede wapandulula, kazyeedelana aChaandaano eechi, zyakupangwa antoomwe amilimu yamakkansili yamuzilikiti amumadolopo mapati, kapati aatala —

- (a) akweendelezegwa kwamakkansili aazilikiti amadolopo mapati;
- (b) milimu yabasichuuno bamakkansili aamuzilikiti amumadolopo mapati;
- (c) mifolo amabelekelo abantu bajanika mumakkansili aamuzilikiti amumadolopo mapati; kabiyo
- (d) kunjizigwa milimu, mifolo, mabelekelo akugwisigwa milimu kwababelesi bamukkansili yachilikiti amudolopo pati.

(2) Mulawu waNsaluuzyo uyelede kupandulula, kazyeedelana aazili muChaandaano eechi, kuzuzikiziga kwazimanga zyachitika kubantu batanooli bazwa mumakkansili aazilikiti zyaambwa muchibeela 268(1)(f) akunjila muchuuno chasichuuno kuti wazwa sichuuno, kabiyo chuuno chasyala kachitachikwe mutu chikonzya kuzuzikiziga —

- (a) amuntu uzwa kukabunga kazyakweendelezya nyika kakabikkide ooyo wasiya chuuno naakuti wofesi; kabiyo
- (b) aanze kwabusichuuno, zimwi zyuuno zyeedelede kutolwa amuntu ukozania awakasiya chuuno eecho, kuti wakali mwaalumi ngakunjizigwe mwaalumi kabiyo kuti wakali mwanakazi ngakunjizigwe mwanakazi.

CHIBAKA 3

FULUMENDE WA DOLOPO/WABBOOMA

274 Fulumende/kkansili yadolopo

(1) Kuli makkansili amadolopo aakwiimikilila akweendelezya bukkale bwabantu bajanika mumadolopo munyika yoonse yaZimbabwe.

(2) Makkansili amadolopo ayendelezegwa amakkansili aajisi makkansela basalwa abantu balembezye kuvoota mumasena aayo mubakkala mumadolopo kaazulwidwa abaMeya basalwa naakuti basizyuno, fumbwa zina ndibapegewa.

(3) Misyobo yamakkansili yamumadolopo asiyenesiyene ikonzya kupangwa kabiyo madolopo aabili naakuti kwiinda aabili akonzya kubikkwa mubwendelezi bwakkansili yomwe.

(4) Ziyandikana azyeedelede kutobelezegwa mukuchita nsaluuzyo yabantu baambidwe mukabeela (2) zyeedelede kudondomekwa muMulawu wazyaNsaluuzyo.

(5) Mulawu upangwa aPalyamenti ukonzya kupa nguzu kumaMeya abasichuuno bamakkansili amadolopo, pesi fumbwa Meya naakuti sichuuno wapegwaa nguzu eezi weelede kusalwa abantu bakalembesyas kuvoota mibusena mujanika kkansili eeyo.

275 Kkansili yabbooma yamumuunzi

(1) Kuli makkansili amumuunzi apangwa kwiinda muchibeela eechi, kuchitila kuti ayiminine akweendelezya bukkale bwabantu bamuluzeva.

- (2) Mulawu upangwa aPalyamenti uyelede kupandulula zya —
- kupangwa kwamakkansili amumyuunzi;
 - kusalwa, abantu bakalembesa kuvoota mubooma limwi alimwi, kwamakkansili beelete kweendelezya bukkale bwamabooma awambidwe mufuka (a) aafulu;
 - kusalwa kwabasichuuno, naakuti zimwi zyuuno nzibitwa aazyo, kuti bazulwide makkansili awambwa mufuka (b); kabiyo
 - ziyandikana kuti muntu asalwe kuba umwi wamakkansili awambwa mufuka (b).

(3) Misyobo isiyenesiyene yamakkansili ikonzya kupangwa yamasena asiyenesiyene amumyuunzi, kabiyo aabili naakuti aayinda aabili makkansili akonzya kubikkwa mubweendelezi bwakkansili yomwe.

276 Milimu yamakkansili amumabooma/mumyuunzi

(1) Kwiinda muKkata lyaMulawu eeli amuMulawu upangwa aPalyamenti, kkansili ilaanguzu zyakweendelezya busena, ayilikke, amakkalilo abantu bajanika mubusena muyakapangwa, kabiyo ijisi wonse manguzu akuchita mulimu ooyu.

(2) Mulawu upangwa aPalyamenti ukonzya kupa nguzu amilimu kukkanisili yabooma, kubikkilizya—

- manguzu aakuchita milawu, ayimwi milawu-lawu igwasizya kweendelezegwa kwamasena ngiyakabumbilwa kkansili eeyo;
- nguzu zyakwaamba mali zyeelede kubbadalwa abantu bakkala mubusena oobo kuchitala kuti ijane mali zyakweendelezya akusumpula busena oobo.

277 Kusalwa kuba kkansela

(1) Kusalwa kwamakkansela kweelede kuchitwa —

- munsaluuzyo zyakusala bazulwidi basiyenesiyene munyika yoonse nikusalwa maMeya amakkansela abayiminini bakuPalyamenti antoomwe aMuzulwidi waNyika;
- amukusala kkansela nikutali chiindi chakusala bazulwidi basiyenesiyene kuzuzikizya chuuno chasiigwa awumwi kkansela/bamwi makkansela basiya zyuuno achakufwambaana.

(2) Nsaluuzyo zyamaMeya abasichuuno bamakkansili aamabooma amadolopo, aanze kwamaMeya abasichuuno bapegwa nguzu mpesi kwiinda muchibela 274(5), zyeelede kuchitwa mumusaangano mutaanzi wamakkansili aayo nikwazwa kuchitwa nsaluuzyo zyakusala bazulwidi basiyenesiyene nyika yoonse.

(3) Aanze kwawaawo mpukwambidwe mukabeela (2) naakuti muMulawu upangwa aPalyamenti, maMeya, basichuuno amakkansela bamadolopo amabooma beelete katalika mulimu wabo mubuzuba bwamusana amazuba aane kuzwa buunsi nikwaambiliziga bakazunda munsaluuzyo zyakusalwa kwabazulwidi basiyenesiyene mubakasalwa abalabo.

(4) Mulawu Wabikwa aPalyamenti ulakonzya kuchita kuti kubo nsaluuzyo, kakubelesegwa mpampikwa lwatubunga twazyabuleli bwachisi yakweelanisa yaambwa kukabeela (5), akuti mweelo wamakkumi otatwe kuzwa kumwaanda chabiiminini boonse akkansili mumawaadi ube wabachikayintu.

(5) Lusaluulo lwamakkansela amuzilikitzyakumuunzi amumadolopo mapati lweelede lweendelezegwa kakutobelwa Mulawu waNsaluulo, ooyo weelede wasiniza kuti bantu baambwa kukabeela (4) basalwe munsi ampampikwa yatubunga twazyabuleli bwanyika luyeme kumavoti ajanwa abiiminini batubunga kunsaluuzyo iikamanteneya Biiminini baNg'anda yaMulawu kuchilikiti eecho.

[Kabeela 4 a5 kabikwa achibeelela 20 chaMulawu 2 wa2021]

278 Bulamfu bwachiindi nchibanga balakkala muzyuuno makkansela

(1) Chuuno chaMeya, sichuuno naakuti kkansela wadolopo naakuti bbooma chisyaala kachitachikwe mutnu luzutu kwiinda mumalayilile awambidwe muchibeela 129, aanga mwiiiminini waNg'anda Yamilawu (Palyamenti), fumbwa kwaamba Sichuuno waNg'anda Yaansi Yamilawu naakuti Muzulwidi waSenenti muchibeela 129(1)(k), zinooli kakwaambwa Silutwe waMutabi waFulumende uubona zyabafulumende bazilikiti madolopo amabbooma.

(2) Mulawu upangwa aPalyamenti uyelede kupandulula kubumbwa kwakabunga kalyimikilide kakonzya kuchita milimu yakugwisya aazyuuno maMeya, sichuuno amakkansela, pesi kugwisigwa kwabantu aaba muzyuuno kweelede kuchitwa kwiinda muli zeezi zyaambidwe aansi—

- (a) kutakonzya kuchita milimu yakwe nkaambo kakusondoka naakuti kulemana;
- (b) kutakonzya mulimu munzila iiyindilide;
- (c) kusunda mulandu mupati loko;
- (d) kujanwa kalaamulandu ankuta, mulandu ulaachakuchita akuubula bulemu bwakwe, buboli akutabelesya kabotu chuuno chakwe; naakuti
- (e) kutyola mulawu achaali kubikkilizya tulawulawu twakabikkwa akkansili.

(3) Meya, sichuuno naakuti kkansela wakkansili yadolopo naakuti bbooma takonzyi kuzwa achuuno domane kwiinda mumalayilile awambidwe muchibeela eechi.

279 Meendelezyo aaKkansili yabbooma mumyuunzi

Mulawu upangwa aaPalyamenti uyelede kupandulula zyameendelezyo ayelede kuchitwa amakkansili amuluzeva.

CHAANDAANO 15

BAZULUZI BABULONGO

280 Buzuluzi bwabulongo

(1) Bube bwabuzuluzi bwabulongo, bwiime bwabo amilimu yabo kwiinda mumilawu yansiku /chintu buzibikene zili mumulawu.

(2) Muzuluzi wabulongo ulaabulambe bwakweendelezya tunsiyansiya, milawu yansiku yabulongo amilimu yaMwaami,

281 Ndemeko zyelede kulangisisigwa abazuluzi babulongo

- (1) Bazuluzi babulongo beeled—
 - (a) kuchita milimu yabo kabatobeleya Kkata lyamulawu eeli antoomwe amilawu yamuZimbabwe yoonse;
 - (b) kulemeka tunsiyansiya tulangene abuzuluzi bwabulongo akuchita milimu yabo izuzikizya bube bwabo mbuuli mbubazibikene bazuluzi babulongo muKkata lyamulawu eeli; kabiyo
 - (c) kujata bweelene bantu boonse bali mumasena alaansi lyabo.
- (2) Bazuluzi babulongo tabeelede pe—
 - (a) kunjila mutubunga twakweendelezya nyika naakuti kunjilingana mumilimu yatubunga twazyanyika;

- (b) kuchita zyakabunga kakweendelezya nyika;
- (c) kuzuzikizya mpalamo zyakabunga kakweendelezya nyika; naakuti
- (d) kutyola akutalemeka zyelelo angwangunuko zyaampandamunsaka zyanikuba uuli muntu.

282 Milimu yabazuluzi babulongo

- (1) Bazuluzi babulongo bajisi milimu itobela mumasena aabo mubajanika —
 - (a) kusungwaazya akubona kuti tunsiyansiya twaluundu tulookutobelezegwa, kapati kusungwaazya kwiimikila akujatwa kabotu kwampuli;
 - (b) kutola ntaamo zyakukwabilila akusungwaazya kutobelezegwa kwatunsiyansiya, zyansiku, ngano, azyakatusiila bensiku zijanika muluundu kubikkilizya malende aatondwa;
 - (c) kubona kuti lusumpuko lulookuchitika mibusena bwabo;
 - (d) kwiinda muMulawu upangwa aPalyamenti, kweendelezya busena anyika yamumaluzeva akukwabilila zituzyungulukide azilengwa-leza zyamibusena bwabo;
 - (e) kumana myopyongano zichitika akati kabantu mbibazulwida kakutobelezegwa milawu atunsiyansiya twaluundu lwabo; kabiyo
 - (f) kuchita imwi milimu njibapegw aMulawu upangwa a Palyamenti.
- (2) Aanze kwazyaambidwe muMulawu upangwa aPalyamenti, bazuluzi babulongo bajisi nguzu zyakweendelezya maluzeva/ nyika yamuluzeva naakuti masena ngibapegw kuti beendelezye antoomwe aboonse bantu bajanika mumasena aayo.
- (3) Mukuchita milimu yabo, bazuluzi babulongo tabeelede kunjililwa aabamwi bantu pe naakuti tumwi tubunga nikuba twafolumende, aanze kwawaawo mpukwaambidwe aMulawu upangwa aPalyamenti.
- (4) Mulawu upangwa aPalyamenti uyelede kupandulula mbubelede kulijata bazuluzi babulongo.

283 Kunjizigwa akugwisigwa kwabazuluzi babulongo muzyuuno

Mulawu upangwa aPalyamenti uyelede kupandulula zitobela kawutobelezya tunsiyansiya abukkale bujanika mibusena bumwi abumwi—

- (a) kunjizya muzyuuno, kujana bwiimikizya kubeleka kwabazuluzi babulongo, kusalwa kwabazuluzi nikwaba chimanga antoomwe akugwisigwa achuuno kwabazuluzi babulongo;
 - (b) kupangwa akubusilizigwa kwabwaami; kabiyo
 - (c) kumana myopyongano zyeendelene akunjizigwa muzyuuno kwabazuluzi babulongo, kwiimikizigwa kubeleka kwabo, kusalwa kwabazuluzi babulongo akugwisigwa achuuno kwabazuluzi babulongo;
- pesi—
- (i) kunjizigwa muzyuuno kwabazuluzi babulongo, kugwisigwa achuuno akwiimikizigwa kubeleka kwabo baami kweelede kwachitwa aMuzulwidi waNyika kuuli muzeezo wazwa kuNkamu Yabaami Yamuchilikiti kwiinda muNkamu Yabaami Yanyika Yoonse kiibelekela aamwi aSilutwe waMutabi waFulumende ubona zyabazuluzi babulongo. Zyoonse eezi zyelede kuchitwa kakutobelezegwa tunsiyansiya abukkale bwamuluundu mwajanika mwaami ooyo;

- (ii) mpyopyongano zilaatala akunjizigwa muzyuuno kwabazuluzi babulongo, kwiiimikizigwa kubeleka kwabo antoomwe akugwisigwa milimu kwabazuluzi babulongo zyeede kumaninsigwa aMuzulwidi waNyika kwiinda muNkamu Yabaami Yamuchilikiti , aNkamu Yabaami Yanyika Yoonse kiibelekela amwi aSilutwe waMutabi waFulumende ubona zyabazuluzi babulongo;
- (iii) Mulawu upangwa aPalyamenti uyelede kupandulula kaboutu ntaamo zyeede kutolwa kubona kuti zyoonse zyaambo zyajatwa kaboutu munzila itakwe lusaluulo kabiyo itanjizyi zyaambo Zyatubunga twabulei bwanyika
- (iv) Mulawu weelede kubikka ntaamo zyakukwabilila kuzikatila alimwi akukkalinkana kwatubunga twabulongo antoomwe akulyiimikilila akulisanta kwabo kuzwa kuli zyakweendelezegwa kwanyika mumabelekelo aabo.

284 Mifolo alumwi lugwasyo lupegwa bazuluzi babulongo

(1) Mulawu upangwa aPalyamenti uyelede kupandulula zyaatala amifolo antoomwe alumwi lugwasyo lweelede kupega bazuluzi babulongo kazili zyazumininwa aMuzulwidi waNyika muzeeso ooyo kuuli wazwa kuli Silutwe waMutabi waFulumende uubona zyabazuluzi babulongo.

(2) Mifolo yabazuluzi babulongo iyelede kuzwa kuNkomo Mpati yaFulumende (Consolidated Revenue Fund).

(3) Mifolo yabazuluzi babulongo tiiyelede kuselusigwa pe kuti kabachili achuuno naakuti kabachijatilide chuuno eecho.

285 Kkansili Yabaami Yanyika Yoonse aNkamu Yabaami Yamuchilikiti

(1) Kuli Kkansili Yabaami Yanyika Yoonse ijisi bantu mbuuli mbukwaambidwe muMulawu upangwa aPalyamenti, kiili njakwimikilila baami boonse muZimbabwe.

(2) Mulawu upangwa aPalyamenti uyelede kupanga Nkamu Yabaami Yamuchilikiti, muzilikiti zyoonse aanze kwazilikiti zyamadolopo mapati. Nkamu yabaami eeyi ijisi baami bamuchilikiti eecho.

(3) Kweelede baami bamuzilikiti zyoonse bayimikilwa muKkansili Yabaami Yanyika Yoonse.

(4) Kusalwa kwaMuzulwidi aWumutobela, baKkansili Yabaami Yanyika Yoonse abamwi bajanika mukkansili eeyi kweelede kwachitwa aKkomishimi yaNsaluuzyo muZimbabwe.

(5) Imwi ayimwi Nkamu Yabaami Yamuchilikiti iyelede kusala, kakutobelezegwa Mulawu waNsaluuzyo, baami bayiminina chilikiti muNg'anda Yamilawu Yaajuli kwiinda muchibela 120(1)(b).

(6) Muzulwidi aWumutobela, baKkansili Yabaami Yanyika Yoonse basalwa kuti bakkale muzyuuno eezi kwachiindi chisika kuminyaka musanu kabiyo bakonzya kusalwa kwachibili kwaminyaka iyelene pesi muntu wanjila tubili muchuuno chakuba Mutobeli waMuzulwidi waKkansili Yabaami , ukonzya kwiiimikila kuti asalwe kuba Muzulwidi waKkansili Yabaami Yanyika Yoonse.

(7) Mulawu upangwa aPalyamenti uyelede kupandulula zyaatala—

- (a) akusalwa kwabaami kuti banjile muKkansili Yabaami Yanyika Yoonse antoomwe anzibeelede kuba aazyo azinga zilabakachizya aabo bayanda kusalwa kunjila;
- (b) achikonke cheelede kukonkwa abaabo baami banjila muKkansili Yabaami Yanyika Yoonse antoomwe amuNkamu Yabaami Yamuzilikiti;

- (c) abulamfu bwachindi nchibeelede kukkala muzyuno zyamuKkansili Yabaami Yanyika Yoonse antoomwe amuNkamu Yabaami Yamuzilikiti;
- (d) amifolo, pencheni alumwi lugwasyo lweelede kupegwa Muzulwidi aWumutobela, baKkansili Yabaami Yanyika Yoonse abamwi baami bajanika mukkansili eeyi;
- (e) nzila zyeelede kutobelezegwa mukuchita miswaangano yaKkansili Yabaami Yanyika Yoonse amuNkamu Yabaami Yamuzilikiti;
- (f) akunjizigwa milimu bableesi bagwasizya Kkansili Yabaami Yanyika Yoonse aNkamu Yabaami Yamuzilikiti.

286 Milimu yaKkansili Yabaami Yanyika Yoonse aNkamu Yabaami Yamuchilikiti

- (1) IKkansili Yabaami Yanyika Yoonse kabiyo muli chimwi chilikiti, Nkamu Yabaami Yamuchilikiti ilaamilimu itobela —
 - (a) kukwabilila, kusungwaazya akusumpula bukkale atunsiyansiya twanyika yaZimbabwe;
 - (b) kwiimikilila ziyeeywa abazuluzi babulongo antoomwe akubona cuti buntususu abwiime bwabazuluzi babulongo bulizikitide;
 - (c) kukwabilila akusungwaazya ziyandwa abazuluzi babulongo;
 - (d) kutambula ntongawuko azyaambo zyeetwa kuli mbabo kazizwa kubazuluzi babulongo;
 - (e) kudondolola akubona cuti zilookutobelwa nchito akulijata kwabazuluzi babulongo antoomwe akubagwasizya zyabuzuluzi bwabo;
 - (f) kugwasizya kumana mpyopyongano akati kabazuluzi babulongo naakuti zilaatala abazuluzi babulongo;
 - (g) kuchita milimu isiyenesiyene njibatanooli bapegwa aMulawu upangwa aPalyamenti wabikkwa.
- (2) Mulawu upangwa aPalyamenti uyelede kubona cuti —
 - (a) Kkansili Yabaami Yanyika Yoonse aNkamu Yabaami Yamuzilikiti zyakonzya kuchita milimu yazyo kazilyiimkilide;
 - (b) bantu bablekela Kkansili Yabaami Yanyika Yoonse amuNkamu Yabaami Yamuzilikiti bachita milimu yabo kabotu kabatakwelusulu.

287 Kkomiti yazyabuntususu akulijata kwaBaami

Mulawu upangwa aPalyamenti uyelede kupandulula zyaatala akupangwa kwa kkomiti yazyabuntususu akulijata, bantu beelete kunjila mukkomiti ambiyelede kubeleka kkomiti yazyabuntususu akulijata kwabaami cuti ichite milimu itobela —

- (a) kupanga akubona cuti zilokutobelezegwa zyabuntususu akulijata kwabazuluzi babulongo;
- (b) kumana kutamvwanana akati kwabazuluzi babulongo;
- (c) Kulangisisya ntongawuko/nyontooko zilaatala abazuluzi babulongo.

CHAANDAANO 16

NYIKA YAKULIMA

288 Bupanduluzi bwaChaandaano 16

Muchaandaano eechi—

“nyika yakulima” iwamba mbuuli mbukupandulwidwe muchibeeela 72.

289 Ndemeko zitobelwa mumabelesezyo aanyika yakulima

Kuchitila kululamika bulewusi bwakaliwo mukupana nyika yakulima muchiindi nyika niyakalededwe aamakuwa, kabiyo kweeta masandu mumabelesezyo anyika yakulima akuchita kuti banaZimbabwe babelesye zilengwaleza bweelene, milawu yamabelesezyo akupana nyika yakulima yeelede kutobeleyza ndemeko eezi—

- (a) nyika yakulima nchilengwa chaLeza chibumba chipanzi chalukono lwabana banyika yaZimbabwe;
- (b) kwinda muchibeeela 72, woonse munaZimbabwe ulacheelo chakujana, kujata, kukkanala, kubalesya, kupa bamwi bantu, nyika yakulima kakutlangwi kuti musyobo nzi pe;
- (c) kupana kwanyika yakulima kweelede kuchitwa kakutakwe lusaluulo, kuchitwe bweelene kakutlangwi kuti mwanakazi naakuti mwaalumi sikupewga antoomwe azyiingi zilangililwa aluundu mukupana nyika;
- (d) nzila yakupana nyika yakulima yeelede kusungwaazya kuti bantu babelesye nyika munzila igwasya luundu antoomwe anyika yaZimbabwe mbiizwula;
- (e) kubelisewga kwanyika yakulima kweelede kusungwaazya kujanika kwachakulya munyika, bulondozi buzwide akupanga milimu kabiyo kakukwabililwa akujata kabotu zituzyungulukide kuchitila kuti zyalane lyajuunza lizoobelesye alilayo;
- (f) taakwe mutu uunga uliimwa cheelelo chakubelesya nyika yakulima naakuti kuyaka aanyika njaapegwa.

290 Kwiinkilila nembo kwazyeelo zyafulumende kunyika yakulima

- (1) Yoonse nyika yakulima yakali —

(a) yalembwa muMpampikwa Yamusanu Atubili muKkata lyaMulawu Lyachiindi; naakuti

(b) kalitana beleka pe Kkata lyaMulawu eeli, yakabonwa kuti kwinda muchibeeela 16B(2)(a)(ii) naakuti (iii) muKkata lyaMulawu Lyachiindi;

Iya kunembo kiili mumaanza afulumende.

- (2) Fumbwa kuteendelana akati kazijanika mu —

(a) chizibisyoo chijanika muMpampikwa Yamusnau Atubili muKkata lyaMulawu Lyachiindi; naakuti

(b) chizibisyoo chilaachakuchita anyika yakulima kabiyo chakadindwa kwinda muchibeeela 16B(2)(a)(ii) naakuti (iii) muKkata lyaMulawu Lyachiindi;

Kabiyo mapepa atondeezya kuti ngwani mweni nyika yakulima eeyo naakuti uyelede, kabiyo fumbwa bulewusi bwakachitwa muchizibisyoo eecho, tazikachizyi kubeleka kwakabeela (1) pe naakuti kugwisya cheelelo chafulumende mukuba mweni nyika yakulima eeyo kwiinda mukabeela aako.

291 Kwiinkilila nembo kwazyelelo zyabantu bakkede aanyika yakulima

Kwiinda muKkata lyaMulawu eeli, fumbwa muntu wakakkede aanyika yakulima naakuti wakali kubylesya nyika yakulima naakuti wakajisi mapepa atondeezya kuti njiyakwe nyika yakulima kwiinda mumapepa akubelesya kwachiindi chisyoonto naakuti kwiinda muli chimwi chizuminano afulumende, ulinkilila nembo kabelesya naakuti kakkede aanyika yakulima eeyo kuzwa buunsi nilitalika kubeleka Kkata Lyamualwu eeli.

292 Kukwabililwa kwanzila njibakepegwa aayo bantu bakkede aanyika yakulima

Fulumende weelede kutola ntaamo, kubikkilizya kupanga mulawu, kuchitila kuti bantu bapegwa nyika yakulima bajane lukwabililo luchita kuti balimvwe kabali beni nyika yakulima akwiibelesya munzila yakazuminanwa afulumende.

293 Kupambula kwafulumedne nyika yakulima

(1) Fulumende ukonzya kupambula fumbwa nyika, kwiinda mukupa umwi muntu nyika yakulima kuti ibe yakwe naakuti ajane bubelesya, pesi nyika eeyo yapambulwa kweelede yachitwa boobo kwiinda mundemeko zyaambidwe muchibela 289.

(2) Fulumende takonzyi kupambula akupa uumwi muntu naakuti bana bakwe, nyika zyakulima zyiinda yomwe.

(3) Mulawu upangwa aPalyamenti yeelede kupandulula mpambwido amapedo aanyika yakulima kumuntu afulumende, pesi fumbwa mulawu uwamba booboo uyelede kweendelana andemeko zyaambidwe muchibela 289.

294 Kupambulwa kwanyika yakulima abeni nyika naakuti bakkede mpawo

Kwiinda munzila zyaambidwe aayimwi milawu, mweni nyika yakulima naakuti uukkede aanyika yakulima ulachelelo chakupa umwi muntu chipanzi chanyika, kupa muntu kuti ajane bubelesya naakuti kuuzya cheelelo chakwe chakubelesya nyika yakulima.

295 Kubbadalwa kwabantu bakanyangwa nyika yakulima afulumende muchiindi chakiinda

(1) Fumbwa munaZimbabwe wakanyangwa nyika yakulima afulumende kalitana tanguna kubeleka Kkata lyaMulawu eeli ulachelelo chakubbadalwa, kabbadalwa nyika antoomwe azimwi nzyatanooli wakayaka akuchita aanyika yakulima eeyo njaakanyangwa;

(2) Fumbwa muntu ulaanyika yakulima yakatolwa afulumende kalitana tanguna kubeleka Kkata lyaMulawu eeli kabiyo kakuli cheelelo chakuba mweni nyika yakulima chakali kwabilidwe azizuminano zyakachitwa aakati kaFulumende waZimbabwe aFulumende wayimwi nyika, ulachelelo chakubbadalwa, kabbadalilwa nyika antoomwe azimwi nzyatanooli wakayaka akuchita aanyika yakulima eeyo njaakanyangwa;

(3) Fumbwa muntu, aanze kwawooyo uwambidwe mukabeela (1) naakuti (2), ulaanyika yakulima yakatolwa afulumende kalitana talika pe kubeleka Kkata lyaMulawu eeli ulachelelo chakubbadalwa afulumende, kabbadalwa zintu nzyaakayaka akuchita aanyika yakulima muchiindi niyakatolwa.

(4) Miliyo iliigwa aansi kwazibela (1)(2) a(3) iyelede kulangisisigwa kwiinda muMulawu upangwa aPalyamenti.

296 Kupangwa antoomwe abwiime bwa Kkomishini yaNyika yakulima muZimbabwe

(1) Kuli kkomishini itanootegwa Kkomishini yaNyika yakulima muZimbabwe ijisi bantu batobela —

- (a) sichuuno awutobel a sichuuno; kabiyo
- (b) bantu babili naakuti bayinda babili pesi kabatayindi musanu ababili;

basalwa aMuzulwidi waNyika.

(2) Bantu bajanika muKkomishini yaNyika yakulima muZimbabwe beeled e kuti —

- (a) bakasalwa nkaambo kabuntususu bwabo, kukonzya mulimu aluzibo, kumvvisisisya akuziba kwiindilide muli zyakweendelezegwa akubambwa kwazintu; kabiyo
- (b) kutondeezya kusiyana kwamisyobo yabantu bajanika munyika yaZimbabwe, kapati ziyandwa azipanzi zisiyenesiyene zyanyika yaZimbabwe akusiyana kwamilimu ichitwa abaalumi abanakazi.

(3) Chibela 237 chilabeleka mukugwisigwa kuzwa muzyuuno kwabantu bali muKkomishini yaNyika yakulima muZimbabwe mbuuli kuti nikkomishini iliyimikilide yakapangwa kwiinda muchibela 12.

297 Kkomishini yaNyika yakulima muZimbabwe

(1) Milimu yaKkomishini yaNyika yakulima muZimbabwe njeyi iitobela —

(a) kubona kuti takukwe lusaluulo, kuli kubalangala mukweendelezegwa kwanyika yakulima yafulumende;

(b) kuchita ndangisisyo yamabeleseyo aanyika yakulima chiindi achiindi;

(c) kupa mizeeo kuli fulumende aatala —

(i) akutolwa kwanyika yakulima ili mumaboko abantu kuti ibe mumaboko afulumende igwasizye bulumbu;

(ii) kubona kuti nyika yakulima ilajanika abantu boonse bayanda kwijana , kapati—

A. kugwisigwa kwamisyobo yalusaluulo yoonse mukupana kwanyika yakulima, kapati lusaalulo lulaatala akuti mwanakazi naakuti mwaalumi uyanda kupegwa nyika yakulima;

B. kubona kuti mulawu wabeleka ukasya kupegwa kwamuntu uumwi naakuti mpuli iimwi nyika yakulima iyindilide,

(iii) kubona mabeleseyo anyika yakulima abukomene bwanyika yakulima bweede kupegwa bantu basiyenesiyene;

(iv) kuubya machitilo akulonzya nyika yakulima kuzwa mumaboko aawumwi muntu kuya kuluumbi;

(v) kubona nzila zisiyenesiyene zyakubelesya nyika yakulima antoomwe akubona kuti muntu uyipdwe kwachiindi chilamfu biyeni nyika yakulima;

(vi) kubbadalwa kuli kabotu kweendelene anzyeelede kubbadalwa muntu aansi kwamilawu isiyenesiyene ilaatala anyika yakulima antoomwe azitanooli zyakachitwa akuyakwa aanyika yakulima muntu njaakatolelwa;

(vii) kupegwa kwabantu antoomwe akupambulwa kwanyika yakulima;

(d) kulangisisya akupokoola aatala antongawuko/nyontooko ampyopyongano zilaatala akubona mabeleseyo, kweendelezegwa akupegwa kwabantu nyika yakulima.

(2) IKkomishini yaNyika yakulima muZimbabwe, kwiinda mukupegwa mvumo aSilutwe waMutabi waFulumende wazyanyika yakulima, ikonzya kuchita fumbwa miteto igwasizya kuzuzikizya mpalamo zyaambidwe mukabeela (1).

(3) IKkomishini yaNyika yakulima muZimbabwe iyelede kuchita milimu yayo kwiinda mukutobeleyza malembe aamiteto atanoolembwe aSilutwe waMutabi yaFulumende ubona zyanyika yakulima.

(4) Mukubeleka kwayo Kkomishini yaNyika yakulima muZimbabwe iyelede kutobeleyza ndemeko zyaambidwe muchibeeela 289.

(5) Fulumende atumwi tubunga ambungano zyafulumende muzibeela zyoonse zyanyika, kwiinda mukupanga milawu naakuti kutola zimwi ntaamo, uyelede kugwasizya Kkomishini yaNyika yakulima muZimbabwe mukubeleka kwayo antoomwe akukwabilila kulyiimkilila akulisanta kwayo mumabelekelo aayo alaabuntususu.

(6) Fulumende uyelede kuchita zyoonse nzyakonzya, kwiinda mukupanga milawu naakuti kutola ntaamo zisiyenesiyene, kubona kuti—

- (a) Kkomishini yaNyika yakulima muZimbabwe yakonzya kubeleka kabotu munzila ilisantide akulyiimkilila; kabiyo
- (b) babelesi baKkomishini yaNyika yakulima muZimbabwe babeleka munzila ilaantanganana kabiyo itakwe lusaluulo.

CHAANDAANO 17

ZYAMALI

CHIBAKA 1

MABELESEZYO AA MALI

298 Ndemeko zilaatala amabeleseyo aamali yabulumbu

(1) Ndemeko zitobela zyeede kutebelezegwa mukubelesegwa kwamali yabulumbu munyika yaZimbabwe —

- (a) kweelede kwaba bupalangale mumabeleseyo aamali;
- (b) zyamali yabulumbu zyeede kugwasizya lusumpuko lwanyika, kapati —
 - (i) mukuli wakuliya tekisi yanyika weede kwaabanwa abantu boonse;
 - (ii) mali yajanwa kuzwa kutekisi yanyika yoonse yeede kwaabanwa akati kafulomedne wanyika yoonse abafulomedne bazilikiti abamabbooma; kabiyo
 - (iii) kubelesegwa kwamali kweelede kulanzigwa kulusumpuko lwanyika yoonse, kapati kugwasizya baabo badyamizidwe mubuumi amumasena aabo;
- (c) mukuli antoomwe amabeleseyo aazilengwaleza kweelede kwaabanwa bweelene akati kamazyalane aasunu amazyalane ajuunza;
- (d) mali yabulumbu yeede kubelesegwa kabotu, munzila iibalangala kabiyo iizikitide;
- (e) kubelesegwa kabotu kwamali ngakuchitwe munzila ilaantanganana kiibalangala; kabiyo
- (f) kuchenekwa kwamali yabulumbu antoomwe akubelesegwa kwamali yaluundu ngazichitwe munzila ibalangala munzila iswaanizya akulemeka njando zyachisi chaZimbabwe.

(2) Taakwe tekisi yeede kuliisigwa pe aanze kwakuti nguzu zyakuliisa bantu zyazwa muKkata lyamulawu eeli naakuti muMulawu upangwa aPalyamenti.

299 Kubayila kwaPalyamenti kumabelesesyo akujanwa kwamali afulumende

(1) Palyamenti iyelede kubayila akulangisisya mabeleseyo aamali afulumende antoomwe amaKkomishini, tubunga ambunga zyafulumende zisiyenesiyene muzibela zyanyika zyoonse, kubikkilizya tubunga twakaanzwa kwiinda muKkata lyaMulawu, bafulumende bamuzilikiti, mumabbooma, kuchitila kuti—

- (a) mali zyoonse zibelesegwe kabout;
- (b) mabeleseyo amali woonse aachitwa aleelede kuchitwa; kabiyo
- (c) eeyo ziyanda kubelesegwa bunonooono zichtwe mbubo mbuuli mbukwelede.

(2) Mulawu upangwa aPalyamenti uyelede kuchita kuti Palyamenti ibayile antoomwe akulangisisya mabeleseyo amali mbuuli mbukwaambwa mukabeela (1) aajulu.

300 Kuganunwa kwanguzu zyaFulumende zyakucheneka mali achikwelete chabulumbu

(1) Mulawu upangwa aPalyamenti uyelede kubikka mugaano a —

- (a) kucheneka mali kwaFulumende;
- (b) chikwelete chaFulumende;
- (c) chikwelete amukuli wakuliya chikwelete zyelede kuchitwa aFulumende;

mugaano ooyo tuyelede kwiindwa pe kakutakwe mvumo yazwa kuNg'anda Yaansi Yamilawu.

(2) Mulawu upangwa aPalyamenti uyelede kwaamba nzila azeezyo zyelede kupa kuti Fulumende akwelete.

(3) Mukati kamazuba makumi musanu alimwi kali watola chikwelete fulumende naakuti wachita chizuminano chachikwelete, Silutwe waMutabi waFulumende uubona zyamali uyelede kumwaya akudinda zyaambo eezyo muGazette.

(4) Silutwe waMutabi waFulumende uubona zyamali uyelede kuti—

- (a) tubili naakuti kwiinda tubili amunyaka, wapa lipoti kuPalyamenti aajulu amabelekelo
 - (i) achikwelete chakatolwa afulumende; kabiyo
 - (ii) achikwelete chakazuminanwa afulumende;
- (b) achiindi chimwi nikwaambilwa Palyamenti aatala amali iliwo amali yakabelesegwa kwiinda muchibeela 305, kwelede kwaapegwa lipoti iizwide aatala abwiime bwachikwelete chanyika.

301 Kupegwa mali kwabafulumende bazilikiti abamabbooma

(1) Mulawu upangwa aPalyamenti uyelede kupandulula kabout —

- (a) kwaabanisigwa kweelene kwamali yakubelesya mulusumpuko akati kazilikiti amakkansili amadolopo mapati antoomwe amabbooma;
- (b) fumbwa zimwi mali zyaabanisigwa kuzilikiti akumabbooma , antoomwe anzila zisiyenesiyene zyakwaabanisya mali eezi.

(2) Mulawu upangwa aPalyamenti waambwa mukabeela (1) uyelede kutobeleyza zintu zitobela akati kazimwi zyiingi—

- (a) njando zyachisi choonse;
- (b) fumbwa chaabilo chabikkwa abbazu cheelede kubelesegwa kubbadala chikwelete chanyika azimwi zintu ziyanda kubbadalwa anyika;

- (c) njando zyafulumende wanyika yoonse zilangisisya mpalamo zyanyika;
 - (d) chiyandisyo chakugwasizya bantu munzila zisiyenesiyene, kubikkilizya zyalwiyo, bulondozi, maanzi, migwagwa, magesi kumasena adyaamikizidwe;
 - (e) majanino aamali kuli bafulumende bazilikiti, mumadolopo mapati amumabbooma;
 - (f) ziyanda kusumpulwa azimwi zintu ziyanda mali muzilikiti, mumadolopo mapati amumabbooma; kabiyo
 - (g) kusiyana kwalusumpuko lujanika mumasena asiyenesiyene atoomwe aakati kazilikiti zyanyika.
- (3) Mali ipegwa zilikiti amabbooma munyaka amunyaka tayeelede kuba aansi kwachibela musanu kuzwa mumwaanda (5%) kumali yabulumbu yajanwa anyika yoonse.

CHIBAKA 2

NKOMO MPATI YAFULUMENDE

302 Nkomo Mpati Yafulumende

Kuli Nkomo Mpati yaFulumende iyelede kunjila mali zyafulumende zyoonse mbuuli zijanwa kutekisi, fumbwa nkuyazwa, aanze kwakuti Mulawu upangwa aPalyamenti—

- (a) uzumizya kuti mali ibikkwe muliimbi nkomo yakaanzilwa kuti ibeleke umwi mulimu; naakuti
- (b) wazumizya kuti nkamu eeyo yatambula mali ibelesye mali yoonse naakuti chipanzi chamali yatambulwa kuti izuzikizye mpalamo yazyo.

303 Kugwisigwa kwamali kuzwa muNkomo Mpati yafulumende

(1) Taakwe mali inga ilagwisigwa pe muNkomo Mpati yaFulumende aanze kwakuti iyanda kugwasizya kubbada mulimu wazumininwa kwiinda muKkata lyamulawu naakuti aMulawu upangwa aPalyamenti.

(2) Mali yagwisigwa kuzwa muNkomo Mpati yaFulumende iyelede kubbadalwa kumbungano, kabunga naakuti muntu uyelede kwiipegwa mali eeyo.

(3) Mulawu upangwa aPalyamenti uyelede kupandulula nzila aatala—

- (a) ambikiyelede kugwisigwa mali kuzwa muNkomo Mpati yaFulumende antoomwe azimwi nkomo zyamali yaluundi; kabiyo
- (b) mali ili muNkomo Mpati yaFulumende mbikiyelede kubambwa akubelesegwa kuti izyale iimbi.

304 Zibbadalwa zilangene aNkomo Mpati yaFulumende

(1) Zyoonse mali zibbadalwa zikwelete zyafulumende zyelede kuzwa kuNkomo Mpati yaFulumende

(2) Iluliyo luswaananwa aalo mukubungilizya mali injila muNkomo Mpati yaFulumende nduulumwi luliyo lutaanzi lweelede kuzwa muNkomo Mpati yaFulumende.

(3) Kuchitila zeezyo zyaambwa mukabeela (1)—

“luliyo lulangene aachikwelete” lubikkilizya mali yakazyalwa, kuliigwa kwamali akubbadalwa kwachikwelete antoomwe azimwi mbeleseyo zyamali mukujana chikwelete ibayilwa aNkomo Mpati yaFulumende antoomwe akubbadalwa kwachikwelete.

CHIBAKA 3

KUZUMIZIGWA KWAMABELESEZYO AMALI IZWA MU^NKOMO MPATI YAFULUMENDE**305 Kwaabanisya mali iizwa muNkomo Mpati yaFulumende**

(1) Mwaaka amwaaka Silutwe waMutabi waFulumende uubona zyamali weelete kupa lipoti/ngambo, kuNg'anda Yaansi Yamilawu, ilaatala amali zilangililwa kujanwa ambuzitazooobelesegwe afulumende mumunyaka uuza.

(2) Malangililo akujanwa antoomwe ambelesezyo zyamali zyafulumende kweelede kuyoomwa muNg'anda Yaansi Yamilawu kwiinda mukabeela (1) mubuzuba Ng'anda Yaansi Yamilawu mbuyakkala kakutaniinda mazuba aasika makumi musanu alimwi kawuli watalika munyaka mupya wazyakubelesegwa kwamali. Pesi kuti Palyamenti kiitalookuswaanana mazuba aayo kweelede malembe aayo aayoomwa aPalyamenti mukati kamazuba aali makumi aataku kuzwa buzuba mbuyataanguna kuswaanana Ng'anda Yaansi Yamilawu kuzwa mpuyakamwayidwe.

(3) Malangililo aamali itazoojanwe amalangililo amabelesezyo amali ayeede kujanwa kuzwa kuzibeela zisiyenesiyene zitobela—

- (a) kuliimwi ayimwi Kkomishini yakaanzwa kwiinda muKkata lyaMulawu eeli;
- (b) ku wofesi yaSikulingula Mabelesezyo aMali yaFulumende;
- (c) Nabbatule waBasikusosela Milandu muNkuta;
- (d) Kkansili yaBaami Yanyika Yoonse; kabiyo
- (e) atumwi tubunga twaambidwe muMulawu upangwa aPalyamenti.

(4) Kuti Ng'anda Yaansi Yamilawu yazumizya akutambula malembe alaatala azilangililwa mumbelesezyo zyamunyaka uuza, aanze kwaluliyu luchitwa kuNkomo Mpatti yaFulumende kwiinda muKkata lyaMulawu aMulawu upangwa aPalyamenti, Silutwe waMutabi waFulumende uubona zyamali uyelete kuchita mabambe aKwaaba Mali litegwa lyeelede kunjizigwa muNg'anda Yaansi Yamilawu, kabiyo imalembe amulawu eelyo ayeede kuti—

- (a) lyapandulula aatala amali ijanwa kuNkomo Mpatti yaFulumende kiiliya luliyo lweelede kuchitwa;
- (b) kupa mali kuti eezyo ziyanda kuliigwa ziliigwe kabotu kwiinda muzintu zyeede kuti ziliigwe.

(5) Kuti kakuli mali yabikkwa aabbazu kwiinda muMulawu waKwaaba Mali kili yacheya naakuti kuyandikana kuti kuliigwe mali kuchintu chakata bambilidwe mali pe, Silutwe waMutabi waFulumende uubona zyamali uyelete kuchita aambi mabambe aanjiliko atondeezya mali ilangililwa kuti iyilikwe mpawo kuliigwe. Mpawo mabambe aayo ayeede kutolegwa kuNg'anda Yaansi Yamilawu. Kuti Ng'anda Yaansi Yamilawu yazitambula zyaambwa, Silutwe waMutabi waFulumende uubona zyamali uyelete kupanga Malembe aaMulawu waKwaaba Mali - weelete kunjizigwa kabiyo muNg'anda Yaansi Yamilawu likayoomwe kalipandulula bwiime bwamali iimbi iyeede kuzwa kuNkomo Mpatti yaFulumende.

306 Kuzumizigwa kubelesya mali kiitana kwaabanisigwa

(1) Mulawu upangwa aPalyamenti ukonzya kupa nguzu kuMuzulwidi waNyika kuti azumizye kugwisigwa kwamali kuzwa kuNkomo Mpatti Yafulumende kuti ibeelesegwe kuliya ziyanda kuliigwa zyakatali kulangililwa kuti zizooyanda mali chakufwambaana naakuti zyakatalangililidwe kabiyo zyakatabambilidwe mali yazzo, pesi—

(a) Mulawu upangwa aPalyamenti ooyu tuuyelede kuzumizya kugwisigwa kwamali pe iyinda kamwi achisela kuzwa mumwaanda (one and half percent) yayeeyo yakaabanisidwe mumulawu wakachitidwe chiindi chayinda;

(b) fumbwa mali yagwisigwa kwiinda muMulawu waambwa iyelede kwiilikizigwa kumali yanjiliko ilangililwa kubelesegwa kabiyo yeelede kubikkwa kunembo lyaNg'anda Yaansi Yamilawu kuchitila kuti iyoomwe. Kuti Ng'anda Yaansi Yamilawu yazumina njiliko ilaangililwa, mali eeyo ikonzya kugwisigwa kuzwa kuNkomo Mpati yaFulumende kwiinda mumabambe anjiliko naakuti njiliko yaMulawu waKwaaba Mali

(2) Kuti mMulawu waKwaaba Mali- Appropriation Act yamunyaka wakubelesegwa kwamali kiitana beleka kumatalikilo kwamunyaka wakubelesegwa kwamali, Mulawu upangwa aPalyamenti ukonzya kuzumizya Muzulwidi waNyika kuti ape mvumo yakugwisigwa kwamali kuzwa muNkomo Mpati yaFulumende kuchitila kuti kuliigwe chiyanda kuliigwa chamulimu wafulumende mukati kamyeezi iiine yakutaanguna kwamunyaka wamabeleseyo aamali, pesi—

(a) Mulawu upangwa aPalyamenti ooyu tuuyelede kuzumizya kugwisigwa kwamali pe iyinda fuka lyomwe kuzwa kumafuka otatwe yakaabanisidwe muzilangililo zyakubelesegwa kwamali zyakachitidwe munyaka wayinda;

(b) fumbwa mali yagwisigwa kwiinda muMulawu waambwa iyelede kwiilikizigwa kumali yanjiliko ilangililwa kubelesegwa kabiyo yeelede kubikkwa muzintu ziyanda kuliigwa zisiyenesiyene zyamabeleseyo aamali.

(3) Kuti Palyamenti yamwayigwa kakutana chitwa mabambe akuti fulumende akonzye kuchita milimu yakwe, Mulawu upangwa aPalyamenti ukonzya kupa Muzulwidi waNyika nguzu kuti azumizye kugwisigwa kwamali kuzwa muNkomo Mpati yaFulumende kuti kuliigwe kuchitila kuti milimu yafulumende iye nembo kusikila myeezi itatu kakuli Ng'anda Yaansi Yamilawu yasmaanana kuzwa niyakamwayidwe. Pesi fumbwa mali yagwisigwa kwiinda muMulawu upangwa aPalyamenti ooyu iyelede kunjizigwa muMulawu wakwaaba Mali muAppropriation Act kazili nzintu ziyanda kuliigwa zilyiimvwilidi mumabeleseyo aamali.

307 Kubelesegwa kwamali kutapedwe mvumo

(1) Kuti kakuli kwaboneka kuti yavula mali yakabelesegwa aachintu kutali mbuuli mbukwakaambidwe kwiinda mumabambe awambidwe muchibaka eechi, naakuti mali yabelesegwa achintu chakatapedwe mali kwiinda muchibaka eechi, Silutwe waMutabi waFulumende uubona zyamali uyelede kunjizya Appropriation Bill muNg'anda Yaansi Yamilawu kakuyandwa kunyontooka aatala amabeleseyo akatapedwe mvumo.

(2) IBill yaambidwe mukabeela (1) iyeelede kunjizigwa muNg'anda Yaansi Yamilawu achakufwambaana kakutaniinda mazuba makumi musanu akkumi limwi (60) kuzwa nikwakabelesegwa mali yakatapedwe mvumo.

CHIBAKA 4

KUKWABILILWA KWAMALI ANTOOMWE AMBONO ZYABULUMBU

308 Milimu yabantu bakwabilila mali ambono zyabulumbu

(1) Muchibeela eechi—

“mali yabulumbu” zibikkiliza fumbwa mali yafulumende naakuti iibambilidwe afulumende naakuti fumbwa kabunga /mbunga

yafulumende, kubikkilizya zijanika muzilikiti, mumabbooma amutubunga twafulumende;

“mbono zyabulumbu” zyaamba fumbwa lubono lwafulumende naakuti lubambilwe afulumende naakuti fumbwa kabunga /mbunga yafulumende, kubikkilizya zijanika muzilikiti, mumabbooma amutubunga twafulumende;

(2) Mukuli wamubelesi woonse uubelesya mali yabulumbu kuti akwabilile mali yabulumbu antoomwe akubona kuti yabelesegwa kabetu kabiyo yabelesegwa kuzintu nzyiyede kubellesegwa mali yakazuminanwa.

(3) Mukuli wawoonse muntu uubambinde lubono lwafulumende kukwabilila mbono kuchitila kuti tazisweeki, kujeegwa, kupwachuulwa naakuti kunyonyonwa akutabelesegwa kabetu.

(4) Mulawu upangwa aPalyamenti uyelede kupandulula mbukunga kulafwambaanwa kubonwa kuti tubeela (2) a (3) twatyalwa kabiyo ntaamo zyakuzyotolola muntu ooyo watyola mulawu zyachitwa, mpukwelede sikusunda ukonzya kutegwa aluboozye lubono lwatakanika.

CHIBAKA 5

MUPATI UULANGA MABELESEZYO AA MBONO AMALI ZYALUUNDU

309 Mupati uulanga mabelesezyo aambono amali zyaluundu/ Mupati uulanga mabelesezyo aambono amali zyaluundu antoomwe amilimu yakwe

(1) Kweelede kwaba Nabbatule waKulanga Mabelesezyo aMali yaFulumende uulanga mabelesezyo aambono amali zyaluundu, ujisi wofesi yabulumbu pesi tali uumwi waBabelesi Baluundu.

[Kabeela kakabambululwa aMulawu 2 wa2021]

(2) Milimu yaNabbatule waKulanga Mabelesezyo aMali yaFulumende uulanga mabelesezyo aambono amali zyaluundu—

(a) kulangisisya mabelesezyo antoomwe anzila zyakubambwa kwamali muzibeela amitabi yoonse yafulumende, kuzilikiti, mumadolopo mapati amabbooma woonse.

(b) kuti wakumbilwa afulumende, kulangisisya mabelesezyo amali aakabunga nikaba kali kafulumende;

(c) kupa malayilile akuti kuzyotololwe bulewusi abubeya mukweendelezegwa, kukwabililwa kwamali ambono zyabulumbu;

(d) kuchita fumbwa milimu njanga ulapegwa aMulawu upangwa aPalyamenti.

(3) Bantu babelekela bulumbu naakuti luundu beeledge kutobeeleyza zeezyo zyaambwa aMupati uulanga mabelesezyo aambono amali zyaluundu Mupati uulanga mabelesezyo aambono amali zyaluundu mbuuli mbuyaambidwe mukabeela (2)(c).

310 Kunjizigwa mulimu kwaMupati uulanga mabelesezyo aambono amali zyaluundu/ Mupati uulanga mabelesezyo aambono amali zyaluundu

(1) Mupati uulanga mabelesezyo aambono amali zyaluundu unjizigwa mulimu aMuzulwidi waNyika kazuminana aPalyamenti.

(2) Mupati uulanga mabelesezyo aambono amali zyaluundu/Mupati uulanga mabelesezyo aambono amali zyaluundu kweelede kali muna Zimbabwe wasalwa nkaambo kabuntususu bwakwe kabiyo kweelede kali muntu ukonzya kuchita mulimu

wazyakulangalanga akulangisisya mabelekelo amabelesezyo amali kwaminyaka isika kkumi naakuti kwiinda.

(3) Chiindi ncheeled e kukkan achuuno Mupati uulanga mabelesezyo aambono amali zyaluundu nchiindi chitayindi minyaka musanu awumwi kabiyo tayelete pe kusalwa kuba Mupati uulanga mabelesezyo aambono amali zyaluundu/Mupati uulanga mabelesezyo aambono amali zyaluundu kuti kakuli wakali wabeleka mulimu ooyu kale, kakutobelene naakuti muzidyunku zyaminyaka zisika kukkumi ayibili.

(4) Katana katalika kubeleka mulimu, Mupati uulanga mabelesezyo aambono amali zyaluundu/Mupati uulanga mabelesezyo aambono amali zyaluundu, weeletee kukonka zikonke kunembo lyaMuzulwidi waNyika naakuti umwi muntu wagalwa aMuzulwidi waNyika, zyamulimu akulipeda kunyika yaZimbabwe mbuuli mbukwaambidwe muMpampikwa Yatatu.

311 Kulyiimikilila akulisanta kwaMupati uulanga mabelesezyo aambono amali zyaluundu

Mukweendeleya milimu yakwe Nabbatule waKulanga Mmabelesezyo aMali yaFulume ndwayelede kujana Mupati uulanga mabelesezyo aambono amali zyaluundu/ Mupati uulanga mabelesezyo aambono amali zyaluundu, zyoonse eezi zyeede kuzuminanwa aMuzulwidi waNyika kwiinda mumizeezo izwa kuli Silutwe waMutabi waFulume uubona zyamali.

312 Mufolo waMupati uulanga mabelesezyo aambono amali zyaluundu/ Mupati uulanga mabelesezyo aambono amali zyaluundu

(1) Mulawu upangwa aPalyamenti uyeletee kupandulula mufolo alumwi lugwasyo ndwayelede kujana Mupati uulanga mabelesezyo aambono amali zyaluundu/ Mupati uulanga mabelesezyo aambono amali zyaluundu, zyoonse eezi zyeede kuzuminanwa aMuzulwidi waNyika kwiinda mumizeezo izwa kuli Silutwe waMutabi waFulume uubona zyamali.

(2) Mali yamufolo waNabbatule waKulanga Mmabelesezyo aMali yaFulume Uulanga Mabelesezyo aaMbono aMali zyaluundu iyeletee kuzwa muNkomo Mpati yaFulume kabiyo tayielede kuchesegwa pe kuti kwachiindi choonse nachili aamulimu wakwe.

313 Kugwisigwa mulimu kwaMupati uulanga mabelesezyo aambono amali zyaluundu/ Mupati uulanga mabelesezyo aambono amali zyaluundu

(1) Nabbatule waKulanga Mabelesezyo aMali yaFulume Uulanga Mabelesezyo aaMbono aMali zyaluundu ukonzya kugwisigwa mulimu wakwe kuti kakuli wa —

- (a) wakachilwa kubeleka mulimu wakwe nkaambo kakusondoka naakuti kulemana;
- (b) kukachilwa mulimu wakwe zyiindilide; naakuti
- (c) kusunda kwiindilide.

(2) Silutwe waMutabi waFulume uubona zyamali, kabeleka aamwi akkomiti yaPalyamenti ibona zyamali yabulumbu, uwambilisa Muzulwidi waNyika kuti kuli zyaambo zyakuyanda kugwisigwa Mupati uulanga mabelesezyo aambono amali zyaluundu amulimu wakwe kabiyo zyeedele kulangisisiga kabotu. Muzulwidi waNyika uyeletee kugala kabunga keelede kulangisisya kabotu mabelekelo aNabbatule waKulanga Mmabelesezyo aMali yaFulume uulanga mabelesezyo aambono amali zyaluundu;

(3) Kabunga kagalwa, kwiinda mukabeela (2), keelede kuba abantu batatu bagalwa aMuzulwidi waNyika, kakuli kuti—

- (a) uumwi wabo naakuti bayinda uumwi wakali Jaji; kabiyo

(b) uumwi naakuti uyinda uumwi kubantu batatu naakuti bayinda batatu bagalwa akabunga kali mumulawu kayiminina bantu bachita milimu yakulangisisya mabeleseyo akubambwa kwamali.

(4) Kabunga kaambwa mukabeela (3)(b) keelede kugala bantu banga baambidwe mukabeela aako kuti bakumbilwa kuti bachite boobo aMuzulwidi waNyika.

(5) Kabunga kagalwa kwiinda mukabeela (2) keelede kulangisisya kabotu zyaambo zyakugwisigwa kwaAuditor General/Mupati uulanga mabeleseyo aambono amali zyaluundu kuzwa amulimu, kuti bachita booboo, kweelede bapa zeezyo nzibajana mubulangisisi bwabo kuMuzulwidi waNyika mpawo akupa muzeezo wakuti agwisigwe naakuti tagwisigi Auditor General/Mupati uulanga mabeleseyo aambono amali zyaluundu kuzwa achuuno.

(6) Kabunga kagalwa kwiinda mukabeela (2) kalaacheelole anguzu zyamakkomishini kwiinda muMulawu wakKkomishini yaMfukununo [*Chaandano 10:07*], naakuti fumbwa mulawu uunjila mibusena bwawooyu uliwo.

314 Babelesi mbabeleka aabo Mupati uulanga mabeleseyo aambono amali zyaluundu

Mulawu upangwa aPalyamenti weelede kupandulula aatala akugalwa kwa Bboodi lin jizya milimu bantu babeleka aMupati uulanga mabeleseyo aambono amali zyaluundu/Mupati uulanga mabeleseyo aambono amali zyaluundu mumilimu yakwe, kabiyo kweelede kwaamba aatala—

(a) anzibeelede kubaazyo bantu aabo;

(b) mifolo alugwasyo ndubeelede kupegwa babelesi aaba ambubeelede kulijata amulimu;

(c) kulyiimkilila akulisanta abuntususu mbubeelede kubaabo bantu aaba; kabiyo

(d) bwiime, mabelekelo mabotu bwa wofesi yaMupati uulanga mabeleseyo aambono amali zyaluundu/Mupati uulanga mabeleseyo aambono amali zyaluundu.

CHIBAKA 6

BWIIME BWA CHIBAKA

315 Mawulilo aazintu antoomwe azimwi zizuminano zyafulumende

(1) Mulawu upangwa aPalyamenti uyelede kwaamba nzila zyelede kutobelezegwa mukuyanda kuula zintu zyafulumende amitabi, tubunga ambunga zyafulumende muzibela zyonse zyafulumende zijanika mumasena aandene kuchitila kuti mawulilo azintu abe antanganana, kakutakwe lusaluulo pesi kakuli muzundano usungwaazya kuti bantu bawuzye akuula kabotu zintu.

(2) Mulawu upangwa aPalyamenti uyelede kwaamba ntaamo zinga zilatolwa mukwaambulilana mukujanwa zizuminano zyakuulwa akuuzigwa kwazintu zyafulumende—

(a) zizuminano zibikkilizya banji;

(b) zizuminano zilaatala akuyakwa kwamayake; kabiyo

(c) zizuminano zyaatala akusyigwa kwazilengwaleza zijanika aansi kwanyika kuchitila kuti kakuli bubalangale, buntususu mukuchita akweendelezya zintu eezi munzila isumpula zyaluzundano.

316 Kweendelezegwa kwatubunga twakabumbwa kwiinda mumulawu

Mulawu upangwa aPalyamenti kweelede wapandulula aatala ambukweelede kweendelezegwa tubunga twakabumbwa kwiinda mumulawu, kapati kweelede kwabonwa kuti basilutwe batubunga ooto bapegwa myeenya yakubelekela tubunga

ootu iyendelana amabelekelo aabo. Kupegwa uumbi mweenya kuti babe basilutwe batubunga ooto kweelede kweendelana akukonzya naakuti kukachilwa kwabo mumweenya mutaanzi ngubakapedwe kukweendelezya tubunga ooto.

317 Bbenki Pati lyaNyika yaZimbabwe

(1) Kuli bbenki pati lyeelede kutegwa ndi Bbenki Pati lyaNyika yaZimbabwe, lilaampalamo zitobela —

- (a) kubayila bweendelezegwe amabelesezyo aamali munyika;
- (b) kukwabilila mali yanyika akubona mbiinga ilagwasizya kusumpula buvubi bwanyika; kabiyo
- (c) kupanga akubona mabelekelo amilawu ibona mabelesezyo aamali.

(2) Mulawu upangwa aPalyamenti ukonzya kupandulula zyaatala abwiime amabelekelo aaBbenki Pati lyaNyika yaZimbabwe antoomwe akupa iimbi milimu yalyo bbenkipati eelyo.

CHAANDAANO 18

ZYABIYOBIOYO AZIMWI NJILIKIZYO

CHIBAKA 1

ZYABIYOBIOYO ZILANGENE AMAKKOMISHINI

318 Mabelesezyo aaChibaka 1

Zili muChibaka eechi zilaatala amaKkomishini akaanzwa kwiinda muKkata lyaMulawu eeli antoomwe abantu bajanika mumakkomishini aayo.

319 MaKkomishini tube tubunga tulyiimvwilidi atulikke

MaKkomishini ntubunga tulyiimvwilidi atulikke tulaabantu banjila antoomwe akuzwa muli ntuto, tukonzya kwaanzigwa akwaanza muntu muzina lyato.

320 Bajanika mumakkomishini amabelekelo aabo

(1) Aanze kwawaawo mpukwaambidwe muKkata lyaMulawu eeli, boonse banjila mumakkomishini banjizigwa kuti babeleke kwaminyaka musanu ikonzya kuyungizigwa ayimbi minyaka musanu luzutu.

(2) Bajanika mumakkomishini, aanze kwa—

- (a) maKkomishini alyiimkilide
- (b) Kkomishini yaBubetes
- (c) Kkomishini yaNkaka Buboli muZimbabwe; kabiyo
- (d) Kkomishini yaNyika yakulima muZimbabwe.

bakkala muzyuno zyamulimu kuti Muzulwidi waNyika kachiyanda kuti babewo nkaambo ukonzya kubagwisya mpaayandila

(3) Kwiinda muKkata lyaMulawu eeli, Bayiminini bamuPalyamenti abayiminini bajanika muKkansili yazilikiti amadolopo mapati, mumabbooma amutubunga twafulumende boonse tabakonzyi kusalwa kuti banjile mumakkomishini.

(4) Aawo Kkomishini mpiijiisi sichuuno awutobela sichuuno, bantu aaba kweelede umwi kali mwanakazi umwi kali mwaalumi.

(5) Kabatana talika pe kubeleka, bantu banjila mumakkomishini beelederukonka kunembo lyaMuzulwidi waNyika naakuti umwi muntu wagalwa aMuzulwidi

waNyika. Zikonke zyabo chimwi nchamulimu antoomwe achakulemeka nyika mbuuli mbukwaambidwe muMpampikwa Yatatu.

(6) Bantu bajanika mumakkomishini beeled e kujana mifolo, alumwi lugwasyo lwaamulimu lupegwa babelesi mbuuli mbukutanoowambwe chiindi achiindi muMulawu upangwa aPalyamenti kabiyo mifolo yabo tiyeede kuselusigwa kuti kabachili aamulimu.

(7) Mifolo alumwi lugwasyo lupegwa babelesi aamulimu zipegwa bantu banjila mumakkomishini zizwa muNkomo Mpati yaFulumende.

321 Milimu ameendelezezyo amaKkomishini

(1) Mulawu upangwa aPalyamenti ukonzya kupa iimbi milimu kumaKkomishini kabiyo ukonzya kupa malayilile ambaayeede kubeleka makkomishini fumbwa kulyiimikilila akulisanta kwawo kwalemekwa.

(2) Mulawu upangwa aPalyamenti waambwa mukabeela (1) ukonzya kuzumizya Kkomishini kuti ipe umwi muntu naakuti kabunga nguzu zyakuchita milimu yayo, pesi Kkomishini tiikonzyi kupa manguzu aayo uumbi muntu naakuti kambi kabunga mukuli wayo wakunjizya bantu milimu babelesi bayo naakuti kupa mizeeza aatala akamwi kaambo.

(3) Kwiinda muKkata lyaMulawu eeli, fumbwa chizuminano chachitwa aKkomishini cheelede kuti chazuminanwa amaKkomishina banji baliwo nikuchitwa chizuminano eecho.

(4) Mulawu upangwa aPalyamenti ukonzya kwaamba aatala anzila zinga zilatobelwa aKkomishini mukuchita umwi mulimu wayo, pesi aawo aatakwé nzila.

zyaambidwe Kkomishini ikonzya kupanga nzila zyayo. Nikuba boobo, zyonse nzila zyakuchita mulimu wayo nziyapanga Kkomishini zyeede kubalangala mumachitilo, kazitakwe lusaluulo mukubeleka kwaKkomishini

322 Kupegwa mali kwaKkomishini

Palyamenti iyeede kubona kuti mali iizulide yapegwa kumaKkomishini nkukuti akonzye kweendelezya milimu yawo mbuuli mbukweelede.

323 MaKkomishini ayeede kupa lipoti kuPalyamenti lumwi amunyaka

(1) Woonse maKkomishini kweelede apa Palyamenti lipoti lumwi amunyaka, kwiinda muli Silutwe waMutabi waFulumende ngubabeleka aawe. Lipoti eeyi iyeede kusika kuPalyamenti kutana mana mweezi waMiyoba wamunyaka uli nembo kwamunyaka walipoti eeyo.

(2) Mulawu upangwa aPalyamenti ukonzya kwaamba kuti Kkomishini ilembe aambilipoti aajulu kwayeeyo ngambo njiiyeede kulemba kumamanino kwamunyaka mbuuli mbukwaambidwe mukabeela (1), kabiyo mulawu ooyo ukonzya kwaamba bwiime bwamalipoti aalembwa akati kamwaaka.

CHIBAKA 2

ZYABIYOBIOYO

324 Kubelekwa chalusinizyo kwamilimu yaambidwe muKkata lyaMulawu

Yoonse milimu amikuli yaambidwe muKkata lyaMulawu eeli iyeede kubelekwa munzila izikitide achakufwambaana.

325 Kupegwa kwamali kwatubunga twakalengwa kwiinda muKkata lyaMulawu antoomwe atumwi tubunga

(1) Fulumende kweelede wabona kuti kuli mali iizulide ipiegwa —

- (a) kuma Kkomishini antoomwe atumwi tubunga twakalengwa aKkata lyaMulawu eeli, kuchitila kuti tukonzye kubeleka milimu yato zizikitide;
- (b) kuPalyamenti , kuchitila kuti lwayo antoomwe amakkomiti ikonzye kuswaanana fumbwa chili chiindi mpukwayandikana kuti iswaanane; kabiyo
- (c) kutubunga toonse twafulumende, kuchitila kuti tukonzye kuchita milimu amikuli yato yaambidwe muKkata lyaMulawu eeli.

(2) MaKkomishini antoomwe atumwi tubunga twakapangwa kwiinda muKkata lyaMulawu eeli, kweelede twapegwa mweenya wakuyooma aKkomiti yaPalyamenti aatala amali njikayanda kamwi akamwi kabunga mumwaaka amwaaka.

326 Mulawu wachintu wamanyika aandeene

(1) Mulawu wachintu wamanyika aandeene ubumba chipanzi chamulawu wamuZimbabwe, aanze kwakuti kawudinkaana aKkata lyaMulawu naakuti Mulawu upangwa aPalyamenti.

(2) Kuti kakupandululwa mulawu, nkuta zyoonse atubunga twabumbwa twalubeta kweelede twatola nzila ili mbubombubo mukupandulula mulawu kakweendelana amulawu wachintu wamanyika aandeene uyendelana amulawu wamuZimbabwe, kakulangwa akutola bbazu zimwi zinga zilalangisisigwa mukupandululwa kwakutayendelana kwamulawu ooyo.

327 Zizuminano zyamanyika aandeene

- (1) Muchibela eechi —

“Kabunga kamanyika aandeene” chaamba kabunga kajisi manyika aabili naakuti aayinda aabili aamanyika alilelede naakuti kabunga mujanika bantu bayimvwilidi manyika akalilela aabili naakuti aayinda aabili;

“Chizuminano Chamanyika aandeene” chaamba fumbwa zizuminano zisiyenesiyene zyakachitwa aakati kamanyika naakuti bafulumende bamanyika aandeene naakuti atubunga twamanyika aandeene.

(2) Chizuminano chaManyika aandeene chakachitwa aMuzulwidi waNyika naakuti amuntu wakapedwe mvumo aMuzulwidi waNyika —

- (a) tachaangilili nyika yaZimbabwe pe domane chazuminwa aPalyamenti; kabiyo

- (b) tachibi chipanzi chamulawu wamuZimbabwe pe domane chanjizigwa mumulawu waZimbabwe kwiinda muMulawu upangwa aPalyamenti.

(3) Aanze aazizuminano zyakuboleka mali alusinizyo lwaambuulwa aatala andulo kuzibela 300(3) a (4) chizuminano chitali chizuminano chamanyika aandeene pele —

- (a) kachili chazuminanwa kale naakuti kachili chachitwa aMuzulwidi waNyika naakuti munsi amanguzi aMuzulwidi waNyika akabunga kamanyika amwi yomwe naakuti zyyinda alimwi zipa mukuli wakuti chisi chaZimbabwe chiliye mali; alimwi

- (b) chipa mukuli kuchisi chaZimbabwe kuti chiliye imali tachaangili Zimbabwe kunze kwakuti kwazumiinanwa aPalyamenti.

[Kabeela kabambululwa achibela 21 chaMulawu 2 wa2021]

(4) Mulawu upangwa aPalyamenti ukonzya kwaambwa kuti zyaambidwe mutubeela (2) a (3)—

- (a) tazichitiki pe kuchizuminano chamanyika aandeene wamusyobo nikuba uuli;

(b) zichitike kakuli kwaba kubambululwa kwamalembe kuli chimwi chizuminano chamanyika aandeene nikuba chili chizuminano chakachitwa.

(5) Palyamenti ikonzya, kwiinda muchizuminano, kwaamba kuti fumbwa chizuminano chamanyika aandeene tachiyandi kuzuminwa aanjiyo pe mbuuli mbukwaambidwe mukabeela (2), pele chizuminano eecho tachijatikizyi zizuminano ziyanza kuti—

- (a) kugwisigwe mali kuzwa muNkomo Mpati yaFulumende; naakuti
- (b) kubambululwe fumbwa mulawu wamu Zimbabwe.

(6) Kuti kakupandululwa mulawu, nkuta zyoonse antoomwe atubunga twakabumbilwa kubeteka kweelede twatola bupanduluzi bwamulawu bweendelena achizuminano chamanyika aandeene chaangilila nyika yaZimbabwe, kakulangwa akutola bbazu zimwi zinga zilalangisisigwa mukupandulula kweendelana kwachizuminano eecho.

328 Kubambululwa kwaKkata lyaMulawu

(1) Muchibeeela eechi —

“Malembe aZiyanda kubambululwa muKkata lyaMulawu” chaamba malembe aalatala akubambululwa kwachipanzi chaKkata lyaMulawu eeli;
“*term-limit provision*” chaamba malembe aali muKkata lyaMulawu atondeezya kufwiinsya kwachiindi muntu nchayelete kukkala muchuuno eecho chilookwaambwa.

(2) Mulawu upangwa aPalyamenti ubambulula Kkata lyaMulawu eeli uyelede kuchita mulimu ooyo munzila ifwambaana.

(3) Malembe aZiyanda kubambululwa muKkata lyaMulawu taakonzyi kuyoomwa muNg’anda Yaansi Yamulawu amuNg’anda Yaajulu Yamilawu mbuuli mbukwaambidwe muchibeeela 131 adomane Sichuuno waNg’anda Yaansi Yamilawu wapa chizibisyo chamaazuba ali makumi musanu amakuni aane mupepa lya*Gazette* aatala aZiyanda kubambululwa muKkata lyaMulawu.

(4) Mbatape chizibisyo luzutu Sichuuno waNg’anda Yaansi Yamilawu aatala aZiyanda kubambululwa muKkata lyaMulawu mbuuli mbukwaambidwe mukabeela (3), Palyamenti kweelede yatamba bulumbu kuti buzoope mizeezo yabo aatala azilookuyanda kubambululwa, kwiinda mumiswaangano yabulumbu, kwiinda mumalembe kabiyo miswaangano iyelede yachitwa aPalyamenti kuchitila kupa bulumbu mweenya wakwaamba nzibuyanda bulumbu aatala amasandu ayanda kuchitwa.

(5) Malembe aZiyanda kubambululwa muKkata lyaMulawu ayelede kuzuminwa, buunsi naabalwa kwakumaninsizya muNg’anda Yaansi Yamilawu amuNg’anda Yaajulu Yamilawu, abantu basika kuntompa-chaala yabantu bajanika muliiimwi ayimwi ng’anda yamilawu.

(6) Aawo malembe aZiyanda kubambululwa muKkata lyaMulawu mpaayanda kubambulula zilembedwe muChaandaano 4 naakuti Chaandaano 16—

(a) mukati kamyeezi yotatwe kaali azuminwa, aNg’anda Yaansi Yamilawu antoomwe aNg’anda Yaajulu Yamilawu, malembe masandu alookubambululwa mbuuli mbukwaambidwe mukabeela (5), ayelede kutolwa kulefelendamu yanyika yoonse.

(b) kuti azuminanwa masandu aayo abantu banji kubantu batanooli bavoota boonse mulefelendamu, Sichuuno waNg’anda Yaansi Yamilawu, uyelede kutola malembe aZiyanda kubambululwa muKkata lyaMulawu kuMuzulwidi waNyika, ooyo uyelede kuzumina akusayina mpawaawo.

(7) Katutalangi zimwi zyaambidwe muchibeeela eechi, kuti katulanga kubambululwa kwachiindi cheelede kukkalwa amuntu muchuuno chaamulimu mwabede (term limit provision), kuti kakuli kubambululwa ooko nkwalansya bulamfu bwachiindi cheelede

kukkalwa amuntu muchuuno chakwe aamulimu, zibambululwa eezyo tazimujatijati pe muntu wajanika kali muchuuno kale naachitwa mabambe akubambulula mulawu.

(8) Tubeela (6) a (7) tatweelede kubambululwa chiindi chomwe pe mumalembe aZiyanda kubambululwa muKkata lyaMulawu naakuti tatweelede kubikkwa kunembo lyabulumbu pe kuti kuchitwe lefelendamu muchiindi chomwe.

(9) Chibeela eechi chikonzya kubambululwa luzutu kuti kwatobelezegwa nzila zyaambidwe mutubeela (3), (4), (5) a(6) mbuuli kuti chibeela eechi chijanika muChaandaano 4.

(10) Kuti malembe aZiyanda kubambululwa muKkata lyaMulawu apegwa Muzulwidi waNyika kuti awazumine akwasayina, ayelede kwiinka a—

- (a) setifiketi izwa kuli Sichuno waNg'anda Yaansi Yamilawu, itondeezya kuti nikwakali kuvootwa muNg'anda Yaansi Yamilawu, malembe aZiyanda kubambululwa muKkata lyaMulawu akazuminanwa abantu basika kuntompa-chaala yabantu bajanika muNg'anda Yaansi Yamilawu; kabiyo
- (b) setifiketi izwa kuMuzulwidi waNg'anda Yaajulu Yamilawu, itondeezya kuti nikwakali kuvootwa muNg'anda Yaajulu Yamilawu, malembe aZiyanda kubambululwa muKkata lyaMulawu akazuminanwa abantu basika kuntompa-chaala yabantu bajanika muNg'anda Yaajulu Yamilawu.

329 Kutaanguna kubelesegwa kwaKkata lyaMulawu azitobelwa mukuzubuka

Mpampikwa Yamusunu Akamwi ilaatala akutaanguna kubeleka kwaKkata lyaMulawu eeli, kusweegwa kwaKkata lyaMulawu Lyansiku abweendelezegwe bwakutaanguna kubylesya Kkata lyaMulawu Pya eeli.

CHIBAKA 3

BUPANDULUZI

330 Mbeleseyo yaChibaka 3

Chibaka eechi chibeleka mukupandulula Kkata lyaMulawu eeli aanze kwawaawo malembelo mpaawambide zisiyene.

331 Ndemeko zyabiyobiyo zyabupanduluzi bwaKkata lyaMulawu

Chibeela 46 chilabeleka, aamwi akubambululwa kunga kulachitwa, mukupandulula Kkata lyaMulawu eeli aanze kwaChaandaano 4.

332 Bupanduluzi

MuKkata lyaMulawu eeli “*Mulawu upangwa aPalyamenti*” chaamba—

- (a) malembe amulawu azuminanwa aPalyamenti mpawo azuminwa akusayinwa aMuzulwidi waNyika kuti ube mulawu kwiinda muli zyaambwa aKkata lyaMulawu eeli; naakuti
- (b) malembe amulawu aakaliwo kale muZimbabwe kaali Mulawu upangwa aPalyamenti buzuba nilyakatalika kubeleka Kkata lyaMulawu eeli, kubikkilizya—
 - (i) malembe amilawu yakabambululwa muZimbabwe mu1996 aansi kwaMulawu waStatute Law Compilation and Revision [Chaandano 1:03]; kabiyo

- (ii) malembe amilawu, akatabambululwa nikwakabambululwa imwi milawu yaambwa mufuka (i), pesi yakali kubeleka kale kiili milawu; kabiyo
 - (iii) malembe akazuminanwa aPalyamenti yaZimbabwe nikwakamana kubambululwa kwamilawu yaambidwe mufuka (i) pesi kalitana talika pe kubeleka Kkata lyaMulawu eeli; “nchito yabweendelezi” chaamba nchito zyachitwa mukweendelezya mulimu, kukachilwa kweendelezya mulimu naakuti kukaka kweendelezya mulimu kwamubelesi wafulumende.
- “kubambulula” kubikkilizya kusandula bwiime, kusandula bube, kuyungizya, akuchitola mbuchibede;
- “nsaluuzyo yachitwa kuzuzikizya chimanga” chaamba nsaluuzyo zyachitwa kuti kubikkwe uumbi mwiiminini wabusena nkaambo wakaliwo wakazwa aachuuno;
- “Mwaami” chaamba mwaami mbuuli mbukwaambidwe muChaandaano 15;
“Babelesi Baluundu” ...
- [Bupandulizi bwabambululwa achibeela 22 (a) chaMulawu 2 wa2021]
- “Kkomishini” chaamba kkomishini yabumbwa kwiinda muKkata lyaMulawu eeli;
- “Kkomiti yaNzila Zyakweendelezya muPalyamenti” chaamba kkomiti yazina eeli yabumbwa aansi kwaChibeela 151;
- “Nyika yaluundu” chaamba nyika yakabikkwa kubbazu kwiinda muMulawu upangwa aPalyamenti kiiyendelezegwa kwiinda mumiteto atunsiyansya twachiindi kabiyo kiibelesegwa abantu bazulwidwa aMwaami.
- “Malembe aZiyanda kubambululwa muKkata lyaMulawu” chaamba malembe amulawu ayanda kubambulula zili muKkata lyaMulawu eeli.
- “Nkuta yazyakata lyaMulawu” chaamba Nkuta yazyakata lyaMulawu yakaanzwa kwiinda muchibeeela 162(a);
- “Makani alaachakuchita azyakata lyaMulawu” chaamba makani alaachakuchita aatala akupandululwa kwaKkata lyaMulawu naakuti kukwabililwa kwazili muKkata lyaMulawu;
- “Mulawu watunsiyansya” chaamba mulawu watunsiyansya wafumbwa nikuba uuli musyobo wabantu bajanika muZimbabwe;
- “mulawu wakulijata” chaamba mulawu ugwasisiza basilumamba kuti balijate kabotu aamulimu wabo. Mulawu ooyu ubikkilizya baabo bang bagwasizya basilumamba kwachiindi chifwiifwi mumulimu wabusilumamba;
- “basikukwabilila nyika” chaamba—
- (a) basilumamba bamumaanzi, basilumamba naakuti balwanina kujulu;
 - (b) bakapokola;
 - (c) aabo babamba baange; naakuti
 - (d) fumbwa chipanzi chalengwa kugwasizya luundu kwiinda muMulawu upangwa aPalyamenti kabiyo choompololwa amulawu ooyo kuti mbaasikukwabilila nyika;

“buzuba bwakutalika kubeleka kwaKkata lyaMulawu” chaamba buzuba nilitalika kubeleka Kkata lyaMulawu eeli lyoonse kwiinda mufuka 3(2) lyaMpampikwa Yamusanu Akamwi;

“Mulawu waNsaluuzyo” chaamba Mulawu upangwa aPalyamenti ugwasizya kweendelezegwa kwansaluuzyo mbuuli mbukwaambidwe muKkata lyaMulawu eeli;

“Munyaka wamabeleseyo amali” chaamba myeezi kkumi ayibili kusika kuli Nalupale 31;

“milimu” zibikkikizya nguzu, mibeleko azimwi zichitwa;

“Gazette” chaamba pepatwaambo lyakuzibisya luundu libelesegwa afulumende; “Nsaluuzyo zyakusala bazulwidi banji” chaamba nsaluuzyo zyakusala bazulwidi banji bazibeela zyoonse zyachisi bali mbuuli—

- (a) Muzulwidi waNyika, Mutobeli waMuzulwidi waNyika, Bayiminini bamuNg’anda yaPalyamenti;
- (b) maKkansela bamumabbooma; “Fulumende” kwambwa Fulumente weZimbabwe;

“fulumende” chaamba fulumende waZimbabwe

“Kabunga kalaansi kwafulumende” chaamba kabunga kalyiimikile kajisi milimu yafulumende kabiyo kakalaansi kwafulumende naakuti muntu uyiminina fulumende.

“Ng’anda” aanze kwawaawo mpukwaambidwe chaamba Ng’anda Yaansi Yamilawu naakuti Ng’anda Yaajulu Yamilawu;

“Kkomishini Ilyiimikilide” chaamba kkomishini mbuuli mbukwaambidwe muchibeela 232;

“Jaji” chaamba Jaji waNkuta yazyakata lyaMulawu, Nkuta Yaajulujulu, Nkuta Yaajulu, Nkuta Yazyambelekelano aNkuta Yanjendeleyo;

“Kkomishini yaBubetes” chaamba Kkomishini yabubetes yakaanzwa kwiinda muchibeela 189;

“Mulawu” chaamba—

- (a) nichiba chili chipanzi chaKkata lyaMulawu eeli naakuti Mulawu upangwa aPalyamenti;
- (b) nikuba chili chipanzi chamulawu watulawulawu (statutory instrument);
- (c) fumbwa mulawu utalembedwe pesi uubeleka muZimbabwe kubikkilizya mulawu watunsiyansiya

kabiyo zili mumulawu zyeede kumvwika akuzibikana mbuboobo;

“Simulawu” chaamba muntu ulaavvumo yakubeleka mbuuli simulawu munyika yaZimbabwe;

‘Bboomaa’ chaamba Kkansili mbuuli mbukwaambidwe muChibaka 3 chaChaandaano 14;

“umwi wabo” kakwaambwa—

- (a) muKkomishini naakuti mbunga yakaanzwa aKkata lyaMulawu eeli kazibikkikizya Sichuuno awutobela Sichuuno muKkomishini;
- (b) kabunga kalyiimikilide mumulawu, kkansili yachilikiti, yadolopo pati naakuti umwi muntu wagalwa kuti abe umwi wakabunga—
 - (i) kabunga kalyiimikilide mumulawu, kkansili yachilikiti, yadolopo pati naakuti yaboomaa;
 - (ii) ukonzya kweendelezya kabunga kalyiimikilide mumulawu kkansili yachilikiti, yadolopo pati naakuti yaboomaa;

““Mwiiminini wamuPalyamenti” chaamba Seneta naakuti Mwiiminini wamuNg’anda Yaansi Yamilawu;

“Kkansili yaDolopo pati” chaamba Kkansili yakaanzwa kwiinda muChibela 269 yadolopo pati libumba chilikiti alilikke mbuuli Bulawayo naakuti Harare;

“Silutwe waMutabi waFulumende” chaamba muntu uzulwida mutabi wafulumende;

“Mulawu wachisi” chaamba Mulawu upangwa aPalyamenti naakuti atulawulawu;

“chikonke” chibikkikizya nzumino; “mulandu” chaamba mulandu/criminal offence;

“chiindi chalupyopyongano” chaamba aawo nikoompololwa chiindi chalupyopyongano kwiinda muChibela 113;

“muntu” chaamba muntu lwakwe naakuti mubili wamuntu, muntu uli muchiimo chakabunga;

“Muzulwidi waNyika” chaamba Muzulwidi waNyika yaZimbabwe;

“Muzulwidi waNg’anda Yaajulu Yamilawu” chaamba Muzulwidi waNg’anda Yaajulu Yamilawu kwiinda muchibela 122;

“Kkansili yachilikiti” chaamba kkansili yakaanzwa kwinda muChibela 268 yachilikiti chitali chadolopo pati;

“Wofesi yabulumbu” chaamba wofesi ilaamuntu ubbadalwa afulumende;

“Mubelesi waLuundu” chaamba bupanduluzi bupedwe achibela 199;

[Bupanduluzi bwabikwa achibela 22 (b) chaMulawu 2 wa2021]

“Bazyakukwabilwa kwanyika” chaamba baabo babeleka mukukwabilila nyika kwiinda muChibela 207;

“Mwami kali Seneta” chaamba mwaami uyimkilila bamwi baami muNg’anda Yaajulu Yamilawu;

“Kuswaanana muNg’anda Yamilawu” chaamba kuswaanana kwabayiminizi bamasena mumaanda aamilawu yaansi ayaajuulu;

“Buunsi bwakuswaanana” chaamba buunsi nikuba buli bwamvwiki bayiminini bamumaanda amilawu nibaswaanana mumaanda amilawu obile naakuti yomwe;

“Sichuuno waNg’anda Yaansi Yamilawu” chaamba Sichuuno waNg’anda Yaansi Yamilawu;

“Nzila Zyameendeleyzo aPalyamenti” kuti kazyambwa aazimwi ziyanda kuchitwa zyaamba —

- Ng’anda Yaajulu Yamilawu zyaamba Nzila Zyameendeleyzo aPalyamenti;
- Ng’anda Yaansi Yamilawu zyaamba Nzila Zyameendeleyzo aPalyamenti zyamuNg’anda Yaansi Yamilawu;
- maanda obile kasweenene yaajuulu ayaansi zyaamba Nzila Zyameendeleyzo aPalyamenti zyakachitwa kwiinda muChibela 139;

“Kabunga kalyiimikilide mumulawu” chaamba—

- kkomishini yakaanzwa kwiinda muKkata lyaMulawu eeli; naakuti
- kabunga kali mumulawu kakaanzwa aMulawu upangwa aPalyamenti keendelezegwa abantu bagalwa aMuzulwidi waNyika, Uutobela Muzulwidi waNyika, Silutwe waFulumende waNyika Uutobela Silutwe waMutabi waFulumende, naakuti kkomishini yakaanzwa aKkata lyaMulawu eeli.

“Mpandamayake yaMulawu” chaamba tulawulawu twakaliwo atuchiliwo atuchibumbwa aMuzulwidi waNyika;

Uutobela Muzulwidi waNyika naakuti Silutwe waMutabi waFulumende;

“Muzulwidi wabulongo” chaamba muntu wakagalwa kwinda muChibela

283;

“Zimbabwe” chaamba nyika yakalilela yaZimbabwe;

“Kkomishini yaNsaluuzyo muZimbabwe” chaamba Kkomishini mbuuli mbuyakaanzwa muChibela 238;
“Kkomishini yaZyeelelo zyaBantu muZimbabwe” chaamba Kkomishini mbuuli mbuyakaanzwa muChibela 242.

333 Aawo mpukwadomwa zyaandaano, zibeela, azimwi

MuKkata lyaMulawu eeli, aawo mpukwaadomwa kakutaambidwe zimwi, kakwaambwa—

- (a) Chaandaano, Chibela naakuti Mpampikwa, aawo kweelede kwazibikana kuti kwaambwa Chaandaano, Chibela naakuti Mpampikwa zyaKkata lyaMulawu eeli;
- (b) kabeela, aawo kweelede kwazibikana kuti kwaambwa kabeela kachibela chilokudomwa;
- (c) fuka, aawo kweelede kwazibikana kuti kwaambwa fuka lya Mpampikwa, chibela, kabeela naakuti mbuuli mbukupandulwidwe;
- (d) mwaneefuka aawo kweelede kwazibikana kuti kwaambwa mwaneefuka wafuka naakuti mwaneefuka wadomwa.

334 Mabala aali mubuche awamba bwiingi kabiyo aali mubwiingi awamba mubuche

MuKkata lyaMulawu eeli, mabala aali mubuche awamba bwiingi kabiyo aali mubwiingi awamba buche.

335 Malembe aazili mukati antoomwe amitwe yamakani

Malembe akumataangunino atondeezya Zili Mukati antoomwe amitwe yamakani yazyandaano, zibaka, zibeela azimwi zilembedwe muKkata lyaMulawu eeli teensi nziizimwi zyaKkata lyaMulawu eeli pesi zibikkilidwe kuti kuube kubelesya Kkata lyaMulawu eeli luzutu.

336 Kudomwa kwachiindi

(1) MuKkata lyaMulawu eeli, aawo mpukwaambwa chiindi chibikkidwe mumazuba—

- (a) mpukutegwa chiindi chitalika buansi buteedenene, oobo buansi tabweelede kubalizigwa pe mukubala mazuba aawambwa;
- (b) mpukutegwa chiindi chimana buansi buteedenene, oobo buansi bweelede kubikkilizigwa mukubala mazuba aawambwa;

(2) Kwiinda muKkata lyaMulawu eeli aawo chiindi chakuchita mulimu wategwa uchitwe kwiinda muKkata lyaMulawu eeli, kuti chiindi eecho kachimana muMugibelo, Sondo naakuti mubuzuba bwakulyookezya, chiindi chakuchita mulimu ooyo ngachalomponoka kuyoosika mubuzuba butobela buteensi Mugibelo, Nsondo abuunsi bwakulyookezya.

(3) MuKkata lyaMulawu eeli aawo mpukwaambwa mweezi, kunooli kwaamba mweezi wamazuba ngituzi wakkalenda kabiyo chiindi chategwa chitola myeezi yongane kubalwa kwamyeezi eeyo kweelede kutalika buansi nikwaambwa kuyoosika zuba naazulila mazuba apanga mweezi/myeezi yaambwa.

(4) MuKkata lyaMulawu eeli aawo mpukwaambwa munyaka, kunooli kwaamba munyaka ulamyeesi kkumi ayibili.

337 Kudomwa kwababelesi bamumawofesi

Woonse aawo Kkata lyaMulawu mpulyaamba muntu ubeleka muwofesi abulamfu mbwayelede kukkanala muwofesi eeyo, eezi zyaamba boonse bantu bang adomwa kuti bajane bujatilila kuchita milimu yamuwofesi eeyo.

338 Kudomwa kwaPalyamenti

Woonse aawo Kkata lyaMulawu mpuliyanda ngambo/lipoti naakuti fumbwa malembe kuti atolwe kuPalyamenti, lipoti eeyo naakuti malembe aayo anooli ayeledee kupegwa ng'anda zyobile zyamilawu (yaansi ayakujulu).

339 Kuyanduula akujana busongo

(1) Woonse aawo Kkata lyaMulawu mpuliyanda fumbwa nabani muntu kuti ayanduule lugwasyo lwamizeezo kuzwa kuli bamwi bantu/tubunga, muntu /mubelesi ooyo weeled—

- (a) kwaambila umwi wakwe, kwiinda mumalembe, eezyo nzyayanda kuchita kabiyo ape mweenzinyina luzibo loonse ndwanga ulyanda kuchitila kuti mweenzinyina amvysisizye eezyo ziyanda kuchitwa; kabiyo
- (b) kupa mweenzinyina chiindi chizulide chakuti ape mizeezo amaboneno aakwe;

kabiyo ooyo sikupergwa mizeezo uyelede kwiitobelezya mizeezo njaapegwa awumwi wakwe.

(2) Woonse aawo Kkata lyaMulawu mpuliyanda muntu /kabunga kuti kakumbile busongo kuzwa kuluumwi muntu/kabunga, ooyo sikuyanduula busongo uyelede—

- (a) kwaambila umwi wakwe, kwiinda mumalembe, eezyo nzyayanda kuchita kabiyo ape mweenzinyina luzibo loonse ndwanga ulyanda kuchitila kuti mweenzinyina amvysisizye eezyo ziyanda kuchitwa; kabiyo
- (b) kupa mweenzinyina chiindi chizulide chakuti ape mizeezo amaboneno aakwe aatala azilokwaambwa; kabiyo;
- (c) alangisisizye kabotu mizeezo abusongo mbwaapegwa awumwi wakwe aatala aziyanda kuchitwa;

pesi muntu/kabunga kayanda busongo takaangilwi pe kutola mizeezo/busongo bwazwa kumuntu wali kukumbilwa busongo.

340 Kugalwa kwabantu kuti banjile muzyuuno zyamilimu

(1) Aanze kwawaawo mpukwaambidwe muKkata lyaMulawu ooyu, manguzu ngapedwe muntu kwiinda muKkata lyaMulawu eeli, aakugala bantu kuti banjile muzyuuno zyamilimu zibikkilizya manguzu aakozyania aaku —

- (a) gala lubo muntu ooyo kuti ayendelele nembo kachibelekela muchuuno eecho;
- (b) kugala muntu antoomwe akumusumpula kuzwa achuuno eecho naakuti kumugwisya kumutola kuli chimbi chuuno;
- (c) kugala muntu kuti ajane bujatila umwi muchuuno eecho;
- (d) kugala muntu kuti abeleke muchuuno eecho kuti mwani chuuno wajana busosolosegwa kuti kulangwelangwe mabelekelo aakwe;
- (e) kudondomeka akusianisa kuzwa chiindi achiindi mufolo alumwi lugwasyo lupegwa babelesi nalaamulimu anaasiya mulimu;

- (f) kwiinda muKkata lyaMulawu eeli, kugwisya muntu achuuno chakwe naakuti kujana bumwiimikizya mulimu.
- (2) Aawo bantu babili naakuti biinda babili mpubakagalwa kuti babeleke mulimu womwe nkaambo kakuti umwi naakuti bamwi bakayimikizigwa mulimu, muntu wasyaalila kubeleka muchuuno eecho nguwe mweni chuuno.

(3) Kwiinda muKkata lyaMulawu eeli, Mulawu upangwa aPalyamenti ukonzya kupandulula manjizizyo abantu babeleka kabatobela umwi muntu kabiyo mulawu ooyo uyelede kwaamba aatala amufolo an1t5o7omwe alumwi lugwasyo lupegwa babelesi balaamulimu.

(4) Aawo mpukwagalwa muntu kuti abeleke kali mutobel i wawumwi muntu, ooyo ubeleke kali mutobel i wawumwi muntu ukonzya kuchita milimu yoонse njachita ngwatobela aawo mupati wakwe mpatachikonzyi kuchita mulimu naakuti mpaamukumbila kuti achite mulimu.

(5) Kwiinda muKkata lyaMulawu eeli likonzya kufwiinsya chiindi nchanga ulabeleka muntu mumulimu, muntu utanooli wasiya chuuno chakabikkwa kwiinda muKkata lyaMulawu eeli, kuti kachikonzya ulabona wagalwa lubo kuti anjile muchuuno chakwe.

341 Kusiya mulimu

(1) Fumbwa muntu wagalwa kuti anjile mulimu muchuuno chakaanzwa aKkata lyaMulawu eeli ukonzya kusiya mulimu kwinda mukulemba chizibisyo chiya kumuntu wakamugala kuti anjile mulimu ooyo naakuti kuli baabo bakamusala kuti anjile muchuuno eecho—

- (a) kuMuzulwidi waNyika chizibisyo chakwe chakusiya mulimu uchilanzya kuli Sichuuno waNg'anda Yaansi Yamilawu;
- (b) Muzulwidi waNg'anda Yaajulu Yamilawu naakuti Umutobela chizibisyo chakwe chakusiya mulimu uchilanzya kuMulembi Mupati waPalyamenti naakuti kwaambila Bayiminini bamuNg'anda Yaajulu Yamilawu;
- (c) Sichuuno waNg'anda Yaansi Yamilawu naakuti Umutobela chizibisyo chakwe chakusiya mulimu uchilanzya kuMulembi Mupati waPalyamenti naakuti kwaambila Bayiminini bamuNg'anda Yaansi Yamilawu;
- (d) Seneta chizibisyo chakwe chakusiya mulimu uchilanzya kuMuzulwidi waNg'anda Yaajulu Yamilawu;
- (e) Mwiiminini wamuNg'anda Yaansi Yamilawu chizibisyo chakwe chakusiya mulimu uchilanzya kuli Sichuuno waNg'anda Yaansi Yamilawu;
- (f) mwiiminini wakkansili yachilikiti chamumyuunzi naa wadolopo pati, mulumbe wakuzibisya ulanza kuli sichuuno wakkansili;

[Fuka ligwisigwa achibeela 23 chaMulawu 2 wa2021]

(g)...

[Fuka lisowegwa achibeela 23 chaMulawu 2 wa2021]

(h) Umwi wakkansili yabooma chizibisyo chakwe chakusiya mulimu uchilanzya kuMupati waKkansili.

(2) Kusiya mulimu kwamuntu kuzwa muchuuno chakalengwa aKkata lyaMulawu eeli kutalika buunsi bwaambidwe mumalembe akusiya mulimu kwakwe pesi aawo buzuba achiindi impuzitaambidwe, kusiya mulimu kwakwe kutalika aawo naatambulwa malembe aakwe sikusiya mulimu.

342 Kuchita milimu, azimwi

- (1) Nguzu zyakuchita mulimu zipedwe muKkata lyaMulawu eeli zyelede kubelesegwa aawo mpuzyeellede kubelesegwa.
- (2) Toonse tubunga twakalengwa kwiinda muKkata lyaMulawu eeli tujisi nguzu zyelede kuti tuchite milimu yato mbuuli mbukweelede.
- (3) Aawo manguzu mpaapedwe aKkata lyaMulawu eeli kuti muntu achite mulimu ngwaapegwa, zyoonse zyelede kubawo kuti kubelekeke nga azilazyo muzili mumanguzu ngapedwe.

343 Aawo muntu mpategwaa tachibeleki

Kwiinda muKkata lyaMulawu eeli, bantu tabayelede kutegwa tabachibeleki aawo nibanga bachita chakutambula ndyabukkede (mpencheni) iyendelana amulimu ngubakali kuchita.

344 Bwiingi bwabantu bweenzya muswaangano azimanga zijanika mutubungabunga twakalengwa aKkata lyaMulawu

(1) Fumbwa kabunga kakalengwa kwiinda muKkata lyaMulawu eeli kakonzya kuchita milimu yako nikuba kuti bantu bakabunga aako tabazulide fumbwa aabo baliwo bakonzya kweenzya muswaangano zili mumulawu.

(2) Aanze kwakuti Kkata lyaMulawu eeli naakuti imwi milawu iibona mabelekelo aakabunga aako yaamba zisiyene, pesi kwaambidwe kuti fumbwa kakuli bwiingi bwabantu busika chisela chabantu bajanika mukabunga aako, kakaanzwa kwiinda muKkata lyaMulawu, bantu baliwo bakonzya kweenzya muswaangano mbuuli mbukuyandikana.

- (3) Fumbwa mpukwaambidwe muKkata lyaMulawu eeli aatala amavooti aa—
 - (a) chisela chabwiingi bwabantu pesi kabunga koonse kakajisi bwiingi busika kumweelo unjilwa amweelo wabili.
 - (b) ntompachaala pesi kabunga koonse kakajisi bwiingi bwabantu busika kumweelwe unjilwa a3.
 - (c) buvule bwamavooti asika kuntompa chaala yabantu bajanika mukabunga kumweelew uutanjilwi a 4;

zyeellede kupandululwa kazyamba kuti bwiingi bwamavooti taayelede kuba aansi kwamyeelwe iyinda chisela , ntompachaala naakuti three quarters.

(4) Fumbwa kwaamba bwiingi bwabayiminini bamung'anda zyamilawu (Palyamenti) zyaamba bwiingi bwabayiminini boonse bajanika muPalyamenti kwachiindi echo.

345 Kuteendelana kwazyambwa aamabala muKkata lyaMulawu

Kuti kwaba kuteendelana kwazyambwa aamabala aKkata lyaMulawu, eezyo zyaambwa aamabala achikuwa nzizyo zyeellede kutobelezegwa.

MPAMPIKWA NTAANZI (Chibela 4)

NDEMBELA YAChisi, Lwiimbo Lwachisi, Pande lyachisi a Chidindo chaChisi

CHIBAKA 1

NDEMBELA YAChisi



CHIBAKA 2

Lwiimbo Lwachisi

1. Amunyampule Ndembela Yesu yaZimbabwe
Yakazyalwa aNkondo yaLwaangunuko
Abulowa bunji bwabasilumamba
Tuyitabilile kuli basinkondoma
Ngayilongezegwe nyika yaZimbabwe.
2. Amulange Zimbabwe Yo iidobeedew
Amalundu Amilonga iiyebeka Ngaiwe
Mvula ngaiwe zilimwa zivule Babeleki Bajane, Abantu
Bakkute Ngayilongezegwe Nyika yaZimbabwe.
3. Mwami longezya nyika Yesu yaZimbabwe
Nyika yabaMataata besu Iswe Toonse Kuzwa kuli Zambezi
kuya kuli Limpopo Bazulwidi Babe chitondeezyo
Ngayilongezegwe Nyika yaZimbabwe.

CHIBAKA 2

LWIIMBO LWA CHISI

The musical score consists of two staves of music. The left staff begins with a dynamic of *f*, followed by a measure of *p*, then *mp*, and ends with a dynamic of *s*. The right staff begins with a dynamic of *f*, followed by *mp*, and ends with a dynamic of *s*. Both staves feature various note heads, rests, and square-shaped grace notes.

CHIBAKA 3

PANDE LYACHISI



CHIBAKA 4

CHIDINDO CHACHISI

MPAMPIKWA YABILI (Chibela 87)

KUTYOLWA KWAZYEELELO MUCHIINDI CHAMPYOPYONGANO

Bupanduluzi muMpampikwa Ntaanzi

1. MuMpampikwa eeyi —

“mwaange” chaamba mutu waangwa muchiindi champyopyongano kwiinda mumulawu uubelesegwa kwaanga bantumuchiindi champyopyongano; “mulawu wachiindi champyopyongano” chaamba mulawu ulaatala azyeelede kuchitwa muchiindi chalupyopyongano; “zyeelelo zyaampandamunsaka naakuti ngwanganuko” chaamba zyeelelo angwanganuko zyaambidwe muChibaka Chabili muChaandaano 4; “Kabunga kakulangalanga” chaamba kabunga kaambidwe mufuka 3(1).

Mbuzinga zilaleka kuzuzikizigwa zyeelelo angwanganuko zyaampandamunsaka

2. (1) Mulawu wachiindi champyopyongano ukonzya kuzumizya kuleka kuzuzikizigwa kwazyeelo angwanganuko zyaampandamunsaka pesi kakutobelezegwa akusimatizya zyaambidwe muchibeela 87.

(2) Kuti koompololwa chiindi champyopyongano kwiinda muchibeela 113 kuchipanzi chimwi chanyika yaZimbabwe, kuleka kuzuzikizigwa kwazyeelo zyaampandamunsaka antoomwe angwanganuko takweelede pe kuchitwa munyika yoonse yaZimbabwe, ikapati kwatawompololwa lupyopyongano.

Kabunga kalangalanga zyabaange muchiindi champyopyongano

3. (1) Mulawu wamuchiindi champyopyongano uuzumizya kwaangwa kwabantu muchiindi eecho kweelede wapandulula kubumbwa kwakabunga katanolangisisye milandu yabaange baangwa muchiindi eecho.

(2) Kabunga kalangalanga zyabaange muchiindi champyopyongano keelede kugalwa aMuzulwidi waNyika kapegwu busongo aKkomishini yaBubetes antoomwe akumvwa maboneno aKkomiti ibona Nzila Zyameendeleyo aPalyamenti.

(3) Kabunga kalangalanga zyabaange muchiindi champyopyongano keelede kubumbwa aabantu batobela —

(a) sichuuno unooli nguJaji naakuti wakali Jaji; kabiyo

(b) abambi babili bantu, kakuli umwi wabo —

(i) nguJaji naakuti wakali Jaji naakuti ukonzya kuchita mulimu wabuJaji;

(ii) wakali waba Mejasilitili muZimbabwe kwaminyaka ili musanu ayibili naakuti iyinda waawo; naakuti

(iii) wakabeleka zyabusimulawu kwaminyaka ili musanu ayibili naakuti iyinda waawo muZimbabwe.

Zyeelelo zyabaange

4. (1) Boonse baange bajalilidwe —

(a) beelede kwaambilwa, chakufwambaana mukati kamazuba musanu awabili, eecho chapa kuti baangwe akujalilwa;

(b) beelede kuzumizigwa achakufwambaana —

- (i) kababelesya mali yabo kuti bazuwe mukavwindi asimulawu/loya wabo ngubalisalila; naakuti
 - (ii) kuzuwa mukavwindi asimulawu ngubapegw afulumende kabiyo simulawu ooyo kabbadalwa afulumende;
 - kabiyo beeled e kwaambilwa achakufwambaana zyeelelo zyabo eezi zyaambidwe mufuka eeli; kabiyo
 - (c) mubwaange bwabo kweelede bajatwa mululemeko kabiyo kazitondeezya kuti mbantu.
- (2) Aawo fuka mpuliyanda kuti baange bapegwe luzibo oolu —
- (a) luzibo oolo lweelede kupega kubaange mumulaka ngubamvysisya; kabiyo 130
 - (b) kuti mwaange katakonzyi kubala akulemba , fumbwa malembe ngaapegwa ayelede kupandululwa kabotu kulinguwe kuchitila kuti amvysisya zyaambwa.

Kulangwalangwa kwamilandu yabaange

5.(1) Umwi awumwi mulandu wabaange bajalilidwe uyelede kweetwa kuKabunga kalangalanga zyabaange muchiindi champyopyongano mukati kamazuba kkumi kuzwa buzuba mbubaangwa kabiyo kabunga aaka keelede kwaambilwa zina lyamwaange, busena nkwaajalilidweacheecho chakapa kuti ajalilwe/awangwe.

(2) Mulandu wawoonse mwaange uujalilidwe uyelede kweetwa lubo kukabunga kalangalanga zyamilandu yabaange muchiindi champyopyongano nikwiinda mazuba makumi otatwe kuzwa buzuba nuwakalangidwe mulandu umwi awumwi naakuti mukati kamazuba mache kuti kakuli kabunga kalokulangalanga milandu kaamba booboo.

(3) Kabunga kalangalanga zyabaange muchiindi champyopyongano keelede kulangisisya milandu yeetwa kuli nkako kakatanonoki pe.

(4) Mukulangalanga milandu yoonse kuchitwa aKabunga kalangalanga zyabaange muchiindi champyopyongano, boonse baange beeled e kuzumininwa kulyaambwiida lwabo beni, naakuti kabayanda —

- (a) kwaambwidwa asimulawu ngubapegw afulumende kabiyo kabbadalwa afulumende; naakuti
- (b) kwaambwidwa asimulawu ngubalilangwiida akulibbadalila lwabo beni.

(5) Eezi zyaambwa mumwaneefuka (1) zyamazuba asika kukkumi zilaamba kabiyo kuchiindi chisyoonto chakujalilwa chitasiki kumazuba kkumi. Eezi zilaamba kulaabo baange banga bagwisigwa kaatana mana mazuba kkumi kabali baangwa mpawo baangwa lubo akujalilwa lubo mukati kamazuba kkumi kuzwa nibagwisigwa.

Eeyo zyaambwa aKabunga kalangalanga zyabaange muchiindi champyopyongano

6. Kabunga kalangalanga zyabaange muchiindi champyopyongano keelede kulemba maboneno aako kakapa malembe aayo kuli baabo bakawanga akujalila baange. Malembe aaya aleelede kwaamba kuti mwaange umwi awumwi uyelede kuyanembo kajalilidwe na naakuti agwisigwe mubwaange. Aabo bapegwa malembe

azwa kuKabunga kalangalanga zyabaange muchiindi champyopyongano beelede kutobeleyza zyaambwa amalembe aachitwa akabunga aaka.

Mwaange wagwisigwa tayelete kwaangwa lubo pe kaangilwa mulandu ngwaagwisilwa kale.

7. (1) Mwaange wagwisigwa kuzwa mubwaange/mukujalilwa nkaambo kakuti kwajanika cuti malembe aKabunga kalangalanga zyabaange muchiindi champyopyongano awamba cuti ngagwisigwe nkaambo taakwe bukamboni pe bwakwaangwa akujalilwa kwakwe, tayelete kujalilwa lubo pe kakubelesegwa mulandu ngwaagwisigwa.

(2) Kuchitila cuti fuka eeli limvvisisike kabotu, mwaange uwambwa cuti wajalilwa mulandu ngunguwo ngwaajalilidwe do mane Kabunga kalangalanga zyabaange muchiindi champyopyongano kaamba cuti, mukubona kwako, kubaanga kuluumbi mulandu ngwanga ulaangilwa mwaange ooyu.

Kuzumizigwa kwamwaange cuti abelesye nkuta

8. Mpampikwa eeyi tiiyelede kubonwa aanga itolela mwaange cheelelo chakubelesya nkuta kukaka kwaangwa antoomwe amulandu wakwe muchiindi kuutana langwalangwa aKabunga kalangalanga zyabaange muchiindi champyopyongano naakuti kuuli walangwalangwa kale akabunga aaka.

MPAMPIKWA YATATU

(Zibeela 94, 104, 114, 122, 123, 126, 127, 128, 185, 259, 272, 310 a 320)

ZIKONKE ANZUMINO

Malayilile:

1. Woonse muntu uyelede kuchita chimwi chazikonke, cuti kayanda, ukonzya kuchita nzumino aleke kuchita chikonke kabelesya mabala aapedwe.
2. Kuti muntu wachita chimwi chazikonke eezi naakuti kuchita imwi yanzumino eezi wabelesya mabala asiyene achikonke anzumino, musiyano wamabala aabelesegwa tuukonzyi kuubula bulemu bwachikonke anzumino yachitwa nkaambo zichinoomusungilide sikukonka/sikuzumina eeyzo nzyaakonka/ zumina.

CHIKONKE ANZUMINO YA KULIPEDA A KUSWIILILA

Mebondakonka [naakuti ndazumina] cuti njoosyomeka akulipeda kunyika yaZimbabwe antoomwe akulemeka milawu yaZimbabwe.

Nkaako ndigwasye Leza. [zilasotokwa cuti kakuchitwa nzumino]

Chikonke eechi naakuti nzumino eeyi iyelede kuchitwa kunembo lyamuntu uiuwambidwe mumulawu uyendelana aanzizeezi.

CHIKONKE NAAKUTI NZUMINO CHA WOFESI

Mebondakonka [naakuti ndazumina] cuti ndizooyibelekela Zimbabwe, akulipeda mu wofesi yabu.

Nkaako ndigwasye Leza. [zilasotokwa cuti kakuchitwa nzumino]

Chikonke eechi naakuti nzumino eeyi iyelede kuchitwa kunembo lyamuntu uiuwambidwe mumulawu uyendelana aanzizeezi.

CHIKONKE NAAKUTI NZUMINO YA MUZULWIDI WAN YIKA NAAKUTI BAMUTOBELA

Mebondakonka [naakuti ndazumina] kuti mbuuli Muzulwidi waNyika [naakuti Utobela Muzulwidi waNyika] yaZimbabwe, njoosyomeka kabiyo njooswiilila, kusumpula akukwabilila Kkata lyaMulawu antoomwe ayimwi milawu yaZimbabwe, kabiyo—

njoosumpula zyoonse zigwasya nyika yaZimbabwe antoomwe akukaka zitagwasyi nyika yaZimbabwe;

- njoookwabilila akusumpula zyeelelo zyabantu bamuZimbabwe;
- njoochita milimu yangu munguzu zyangu zyoonse aluzibo ndundaalo loonse.
- ndal ipeda lwangu mukugwas izya bukkale bwanyika yaZimbabwe abantu bayo.

Nkaako ndigwasye Leza. [zilasotokwa kuti kakuchitwa nzumino]

Chikonke eechi naakuti nzumino eeyi iyelede kuchitwa kunembo lyaDuundumuntule waBabesii naakuti kuti katawo, kunembo lyawumwi mubetesi utobela Duundumuuntule waBabesii.

CHIKONKE NAAKUTI NZUMINO YA SILUTWE WA MUTABI WA FULUMENDE

Mebondakonka [naakuti ndazumina] kuti njoosyomeka kunyika yaZimbabwe , mu wofesi yaSilutwe waMutabi waFulumende (Minista) njooswiilila, kusumpula akukwabilila Kkata lyaMulawu antoomwe ayimwi milawu yaZimbabwe, kabiyo; njoogwasizya Muzulwidi waNyika kumupa luzibo abusongo Muzulwidi waNyika yaZimbabwe mbuuli mbuntanoozibone aawo mpuntanookumbilwe kupa mizeezo yangu kuchitila kuti kweendelezegwa kwanyika yaZimbabwe kuchitwe kabotu, kabiyo nsikoyoobbongonona nsiswa zyaambuulwa muKkabbineti naakuti niiba iili nsiswa njindapegwa mukuchita mulimu wangu mbuuli Silutwe waMutabi waFulumende, kabiyo njoochita milimu yangu mukuziba kwangu koonse.

Nkaako ndigwasye Leza. [zilasotokwa kuti kakuchitwa nzumino]

Chikonke eechi naakuti nzumino eeyi iyelede kuchitwa kunembo lyaMuzulwidi waNyika naakuti katawo, kunembo lyaDuundumuntule waBabesii naakuti kunembo lyawumwi mubetesi utobela Duundumunutle waBabesii.

CHIKONKE NAAKUTI NZUMINO YA WUTOBELA SILUTWE WA MUTABI WA FULUMENDE

Mebo.....ndakonka [naakuti ndazumina] kuti njoosyomeka kunyika yaZimbabwe , mu wofesi yaMutobeli waSilutwe waMutabi waFulumende njooswiilila, kusumpula akukwabilila Kkata lyaMulawu antoomwe ayimwi milawu yaZimbabwe, kabiyo; njoogwasizya Muzulwidi waNyika kumupa luzibo abusongo Muzulwidi waNyika yaZimbabwe mbuuli mbuntanoozibone aawo mpuntanookumbilwe kupa mizeezo yangu kuchitila kuti kweendelezegwa kwanyika yaZimbabwe kuchitwe kabotu, kabiyo nsikoyoobbongonona nsiswa zyaambuulwa muKkabbineti naakuti niiba iili nsiswa njindapegwa mukuchita mulimu wangu mbuuli Silutwe waMutabi waFulumende, kabiyo njoochita milimu yangu mukuziba kwangu koonse.

Nkaako ndigwasye Leza. [zilasotokwa kuti kakuchitwa nzumino]

Chikonke eechi naakuti nzumino eeyi iyelede kuchitwa kunembo lyaMuzulwidi waNyika naakuti katawo, kunembo lyaDuundumuuntule waBabesii naakuti kunembo lyawumwi mubetesi utobela Duundumunutle waBabesii.

CHIKONKE NAAKUTI NZUMINO YA MWIIMININI MUNG'ANDA YA PALYAMENTI

Mebo.....Ndakonka [naakuti ndazumina] kuti njoosyomeka kunyika yaZimbabwe, njoosumpula Kkata lyaMulawu antoomwe ayimwi milawu yaZimbabwe, kabiyo ndiloochita milimu yangu nkindi Seneta/ Mwiiminini muNg'anda

Yaansi Yamilawu [*fumbwa zili nzizyo*] mukulipeda kwangu kabiyo muluzibo loonse ndundaalo.

Nkaako ndigwasye Leza. [*zilasotokwa kuti kakuchitwa nzumino*]

Chikonke eechi naakuti nzumino eeyi iyelede kuchitwa kunembo lyaMulembi Mupati waPalyamenti.

CHIKONKE NAAKUTI NZUMINO YA BUBETESI

Mebo.....ndakonka [*naakuti ndazumina*] kuti njoosyomeka kunyika yaZimbabwe kabiyo nkindi muwofesi ya.....Ndiloosumpula akukwabilila Kkata lyaMulawu kabiyo ndiyoyendelezya bululami kabantu boonse munzila ikozyania kakutakwe kuyoowa naakuti kufwida luse bamwi bantu mbuuli mbuuyaambidwe muKkata lyaMulawu antoomwe ayimwi milawu.

Nkaako ndigwasye Leza. [*zilasotokwa kuti kakuchitwa nzumino*]

Aawo muntu uchita chikonke eechi naakuti nzumino eeyi kali Jaji kwelede wachita kunembo lya Duundumuntule waBubetesi naakuti uutobela Duundumuntule wabubetesi. Muli zyoonse zimwi kwelede chikonke eechi chachitwa kunembo lyamuntu uwambidwe amulawu uyendelana amulimu wakwe.

CHIKONKE NAAKUTI NZUMINO YA MWIMININI MU KKANSILI YA CHILIKITI/DOLopo PATI

Mebo.....ndakonka [*naakuti ndazumina*] kuti njoosyomeka kunyika yaZimbabwe , mu wofesi yakuba umwi waKkansili yaChilikiti [*naakuti yaDolopo Pati*], kkansili yachilikiti cha [*wamba zina lyachilikiti*] njoosumpula akukwabilila Kkata lyaMulawu antoomwe ayimwi milawu yaZimbabwe, kabiyo; Njoogwasizya kumizeeo Sichuuno waKkansili yaChilikiti [*naakuti Meya*] wa [*wamba zina lyachilikiti*] mbuuli mbuntanoozibone aawo mpuntanookumbilwe kupa mizeeo yangu kuchitila kuti kweendelezegwa kwachilikiti/dolopo pati kuchitwe kabotu, kabiyo nsikoyoobbongonona nsiswa ziyoomwa mukkansili yachilikiti [*dolopo pati*] naakuti niiba iili nsiswa njindapegwa mukuchita mulimu wangu mbuuli umwi wakkansili yachilikiti , kabiyo njoochita milimu yangu mukuziba kwangu koonse.

Nkaako ndigwasye Leza. [*zilasotokwa kuti kakuchitwa nzumino*]

Chikonke eechi naakuti nzumino eeyi iyelede kuchitwa kunembo lyamuntu uwambidwe mumilawu ilangene aamulimu ooyu.

MPAMPIKWA YANE (Zibela 92, 121, 124, 125 a158)

NZIBEELEDE KUBAAZYO KUTI BANTU BALEMBESYE KUVOOTA

Nzuwelede kubaazyo kuti ulembesye kuvoota

1. (1) Kwiinda mumwanefuka (2) kabiyo afuka (2), muntu ukonzya kulembesya kuvoota mumalembe abasikuvoota bajanika mibusena bwaakagalwa (kkonsitichwensi) kuti kakuli —

- (a) ujisi minyaka isika naakuti iyinda kkumi lilaamusau atutatu; kabiyo
- (b) ujisi bwenichisi bwaZimbabwe.

(2) Mulawu waNsaluuzyo ukonzya kuyungizya zimwi ziyandikana zili mbuuli bukamboni bwampokkala kuchitila kuti bantu balembesye mumalembe aabusena bwabo nhobeni, pesi fumbwa eezyo zyayungizigwa kwelede kazyeedelana aziyandwa aKkata lyaMulawu eeli, kapati chibeela 67.

Kukasigwa kulembesya kuvoota

2. Muntu ukonzya kukasigwa kulembesya kuvoota —

- (a) kuti kakuli ubambidwe muchibbadela chabantu basondokede zili mumulawu upangwa aPalyamenti uubona zyabulondozi bwamuboongo;
- (b) kuti kakuli wakoompololwa ankuta kuti tachikonzyi kweendelezya zintu zyakwe, fumbwa moompololo ooyo kuchibeleka; naakuti
- (c) kuti kakuli muntu wakali wajanika kalaamulandu ujanika muMulawu waNsaluuzyo kabiyo wakoompololwa aNkuta Yaajulu kuti akasigwe kulembesya kuvoota naakuti wakakasigwa kuvoota kwachiindi chaambidwe pesi chiindi eecho chakukasigwa kuvoota tacheelede kwiinda minyaka musanu pe.

MPAMPIKWA YASANU (Zibeela 130 a131)

ZITOBELIZEZWA MUKUCHITA MA BILLS AZIMWI ZYAAMBO MU PALYAMENTI

KUBAMBWA KWAMAFUKA

CHIBAKA 1

KUNJIZYA MAMALEMBE AA KUBAMBA MULAWU, MITWE YANJOOMO AMA PETISHINI

Ifuka

1. Bupanduluzi muMpampikwa Yasanu.
2. Ng'anda Yamilawu nkuyazwa Bill.
3. Bayiminini bang'anda bayeta maBills aMitwe Yanjoomo (Motions).
4. Palyamenti tiikonzyi kuzuwa aatala azya Money Bills naakuti Fiscal motions or petishin aanze kwakuti zyakumbilwa aMutobeli waMuzulwidi waNyika, Silutwe waMutabi waFulumende naakuti Uutobela Silutwe waMutabi waFulumende.

CHIBAKA 2

NGAMBO ZILEMBWA AKKOMITI YAZYAKULANGALANGA MILAWU MU PALYAMENTI

5. Kweenzegwa kwama Bill akati kaMaanda amilawu.
6. Kukazyania kwaMaanda aaMilawu.
7. Ma Bill alaatala azyamali.

CHIBAKA 3

MALIPOTI ZILEMBWA AKKOMITI YAZYAKULANGALANGA MILAWU MU PALYAMENTI

8. Malipoti alembwa a Kkomiti Yazyakulangalanga Milawu muPalyamenti.
9. Malipoti alembwa a Kkomiti Yazyakulangalanga Milawu muPalyamenti aatala ama *Statutory Instruments*.

CHIBAKA 1

KUNJIZYA MABILLS, MITWE YANJOOMO AMA PETISHINI

Bupanduluzi muMpampikwa Yasanu

1. Mumpampikwa eeyi —

“Malembe aakubamba Mulawu waMali” chaamba Bill lilaachakwaamba aatala a—

- (a) kubikka, kuyungizya naakuti kuchesyia mali yatax ibbadalwa
- (a) kuchitila kuti fulumende agwasikane;

- (b) kujana mali kuzwa, naakuti kubikka, kuyungizya naakuti kuchesya mali iyanda kuzwa kuNkomo Mpati Yafulumende naakuti zimwi nkomo zyafulumende;
- (c) kuliya chikwelete chiya kuli fulumende;
- (d) kusola kukachilwa kutolwa kwamutelo iyelede kuti iye kuli fulumende
- (e) kusola mabeleseyo aamali atazumizigwe pe afulumende.

Ng'anda yamilawu kwazwa malembe akubamba mulawu

- 2.(1) Fumbwa Bill likonzya kutaanguninwa muNg'anda Yaansi Yamilawu.
- (2) Fumbwa Bbili, aanze kwaBbili lyaMali, likonzya kutaanguninwa muNg'anda Yaajulu Yamilawu

Bakonzya kutaanguna njoomo yamaBbili

3. Kwiinda muKkata lyaMulawu eeli aNzila Zyameendelezyo aPalyamenti —

- (a) fumbwa Seneta ukonzya kunjizya Bbili muNg'anda Yaajulu Yamilawu naakuti kukosola njoomo yaatala aBbili muNg'anda Yaajulu Yamilawu naakuti kweeta petishini muNg'anda Yaajulu Yamilawu;
- (b) fumbwa Mwiiminini wamuNg'anda Yaansi Yamilawu ukonzya kunjizya Bill muNg'anda Yaansi Yamilawu naakuti kukosola njoomo yaatala aBill muNg'anda Yaansi Yamilawu naakuti kweeta petishini muNg'anda Yaansi Yamilawu;
- (c) fumbwa Mutobeli waMuzulwidi waNyika, Silutwe waMutabi waFulumende naakuti Uutobela Silutwe waMutabi waFulumende ukonzya kunjizya Bill, naakuti kukosola njoomo yaatala aBill naakuti kweeta petishini muNg'anda Yaajulu Yamulawu naakuti Ng'anda Yaansi Yamulawu;
- (d) Fumbwa muntu wanjizya Bill muliimwi Ng'anda Yamilawu ukonzya kuti, nilyazuminwa Bbili eelyo ang'anda eeyo mwaalinjizya walitola kuliimbi Ng'anda Yamilawu.

Palyamenti tiikonyi kuzuwa aatala azyamaBbili aMali naakuti Mabambe aZyaambo aatala aMali naakuti petishini aanze kwakuti zyakumbilwa aMutobeli waMuzulwidi waNyika, Silutwe waMutabi waFulumende naakuti Uutobela Silutwe waMutabi waFulumende

4. (1) Aanze kwakuti bakumbilwa aMutobeli waMuzulwidi waNyika, Silutwe waMutabi waFulumende naakuti Uutobela Silutwe waMutabi waFulumende, taakwe ng'anda yamilawu iinga—

- (a) ilayooma Bbili, nikuba liyanda kubambululwa, lilaachakuchita azyaBbili lyaMali mumeso aMuzulwidi waSeneti naakuti Sichuuno waNg'anda Yaansi Yamilawu;
- (b) yooma mutwe wanjoomo, nikuba mutwe wanjoomo wakabambululwa, ulaachakuchita azintu zitobela mumeso aMuzulwidi waSeneti naakuti Sichuuno waNg'anda Yaansi Yamilawu—
 - (i) kubikka, kuyungizya naakuti kuchesya mali yatax ibbadalwa kuchitila kuti fulumende agwasikane;

- (ii) kujana mali kuzwa, naakuti kubikka, kuyungizya naakuti kuchesya mali iyanda kuzwa kuNkomo Mpati Yafulumende naakuti zimwi nkomo zyafulumende;
- (iii) kuliya chikwelete chiya kuli fulumende;
- (iv) kusola kukachilwa kutolwa kwatax iyelede kuti iye kuli fulumende
- (v) kusola mabeleseyo aamali atazumizidwe pe afulumende naakuti
- (c) ilatambula petishini inga mumeso aMuzulwidi waSeneti naakuti Sichuuno waNg'anda Yaansi Yamilawu, iyanda kuti kuchitwe nikuba chinzi chaambidwe mumwaneeufuka (b)
- (2) Mwaneeufuka (1) takonzyi kubelesegwa kuBbili lyanjizigwa, mutwe wanjoomo naakuti petishini yeetwa aMutobeli waMuzulwidi waNyika, Silutwe waMutabi waFulumende naakuti Uutobela Silutwe waMutabi waFulumende.

CHIBAKA 2

MEENDELEZYO AMALEMBE ABILI

Kweenzegwa kwamaBbili aakati kaMaanda amilawu

5.(1) Bbili lyataangunwa akuzuminwa muliimwi ng'anda yaPalyamenti lyeelede kutolwa kuliimbi ng'anda yaPalyamenti achakufwambaana kabiyo buunsi nilyatolwa kuliimbi ng'anda yaPalyamenti kweelede kwalembwa mumalembe ang'anda nkulyazwa Bill.

(2) Bbili lyeetwa mung'anda yamilawu lyeelede kutaangunwa kuyoomwa achakufwambaana mpawo balizumine mbuuli mbulibede naakuti balibambulule nibatalizumine.

(3) Bbili lyakatumizigwa kuliimbi ng'anda yamilawu kwiinda muli zyaambidwe mufuka eeli, kuti lyaakubambululwa kung'anda eeyo lyeelede lyaboozegwa nkung'anda nkulyakazwide kabiyo eezyo zyakabambululwa muBill kazili zyazuminanwa aMulembi Mupati waPalyamenti. Nikuba booboo ng'anda yamilawu yakatumizizye Bbili lyakabambululwa ikonzya kukaka, kuzumina naakuti kubambulula lubo eezyo zyakaakubambululwa kuliimbi ng'anda yamilawu.

(4) Kuti Bbili lyaboozegwa kung'anda yamilawu yakalitaanguna, kwiinda mulizyaambwa amwaneeufuka (3), mpawo eezyo zyakali zyabambululwa ayimbi ng'anda yamilawu zyakakwa naakuti zyabambululwa lubo ang'anda yamilawu yakataanguna Bbili, imwi ng'anda yakali yabambulula Bill ikonzya kutumizya mulumbe kung'anda yamilawu yakataanguna Bbili kakugwisigwa eezyo zyakali zyabambululwa ang'anda yakatali taanguna Bbili naakuti kakuzuminwa zyakabambululwa ang'anda yakataanguna Bbili.

Kukazyania kwaMaanda aaMilawu

6.(1) Kwiinda mufuka eeli, kuti —

- (a) Ng'anda Yaajulu Yamilawu aNg'anda Yaansi Yamilawu teezyazuminana aatala aziyanda kubambululwa muBill lyakataangunwa aNg'anda Yaansi Yamilawu mukati kamazuba makumi musanu alaamakumi aane (90) Bbili kalili lyanjizigwa muNg'anda Yaajulu Yamilawu;
- (b) Ng'anda Yaajulu Yamulawu aNg'anda Yaansi Yamilawu teezyazuminana aatala aziyanda kubambululwa muBill lyakataangunwa aNg'anda Yaajulu Yamilawu mukati kamazuba makumi musanu alaamakumi aane (90) Bbili kalili lyabweeedezegwa kuNg'anda Yaajulu Yamilawu; naakuti

(c) Bbili lyakataangunwa muNg'anda Yaansi Yamilawu lyakakwa naakuti teelyazumiwa aNg'anda Yaajulu Yamilawu mukati kamazuba ali makumi musanu amakumi aane (90) Bbili kalili lyanjizigwa muNg'anda Yaajulu Yamilawu;

Bbili eelyo likonzya kutumizigwa kuMuzulwidi waNyika kuti likazuminwe akusayinwa muchiimo mbulyakabede nilyakazuminwa aNg'anda Yaansi Yamilawu, aanze kwaziyandikana kubambululwa ziche/ziniini mukuya kwachiindi antoomwe azimwi zyakabambululwa zyakazuminanwa amaanda aamulawu obile.

(2) Kuti, mukubona kwaSichuno waNg'anda Yaansi Yamilawu, Bill lya —

(a) kataanguninwa muNg'anda Yaansi Yamilawu; kabiyo

(b) lyakanjizigwa muNg'anda Yaansi Yamilawu mukati kamazuba makumi musanu amakumi aane (90) kuzwa limwi Bbili lyakataangunwa muNg'anda Yaajulu Yamilawu lyakanjizigwa muNg'anda Yaajulu Yamilawu

kalijisi malembe aakozyania awaayo aali muBbili lyakaliwo kale, aanze kwamasandu maniini loko ayandikana mukuya kwachiindi, mwaneefuka (1) ulabeleka kuBill aali boobo kwabaanga chiindi chamazuba aasika kumakumi musanu amakumi aane (90 days) zyaambidwe mubanabefuka (a) a (c) bamwaneefuka zyaamba chiindi nchaswaanana maanda aamilawu amazuba musanu awatatu.

(3) Bbili lyambidwe mubanabefuka (1) a (2) talikonzyi kutolwa kuMuzulwidi waNyika kuti likazuminwe akusayinwe aanze kwakuti, nikwayinda chiindi chamazuba makumi musanu amakumi aane (90) naakuti mazuba musanu awatatu chiindi chaambidwe mumwaneefuka wakkona, mpawo Ng'anda Yaansi Yamilawu yazuminana kuti Bbili litumizigwe kuMuzulwidi waNyika kuyoozuminwa akusayinwa.

(4) Bbili lyatumizigwa kuMuzulwidi waNyika kuti likazuminwe akusayinwa kwiinda mulizyaambidwe mufuka eeli lyeelede kusindikilwa asetifiketi kuzwa kuli Sichuno waNg'anda Yaansi Yamilawu iiwamba kuti Bill eeli ndelimwi lyakeendelezegwa kwiinda mufuka eeli kabiyo eezyo ziyandikana kuchitwa afuka eeli zyakachitwa mbuuli mbukweelede.

(5) Bbili lyatumizigwa kuMuzulwidi waNyika, kwiinda muli zyaambidwe mufuka eeli, nga lyabwezegwa aanga lyakazuminwa aPalyamenti muchiimo mulyatumizigwa kuMuzulwidi waNyika.

(6) Kuchitila fuka eeli —

(a) Bbili lyakataangunwa aNg'anda Yaansi Yamilawu ngalyatolwa mbuuli Bill lyakanjizigwa muNg'anda Yaajulu Yamilawu mpawompawo mbuuni mbwiiswaanana Ng'anda Yaajulu Yamilawu kuzwa buuni nilyakatumizigwa kuya kung'anda eeyi yamulawu mbuuli mbukulebedwe mumalembe aNg'anda Yaansi Yamilawu kwiinda muli zyaambidwe mufuka 5(1);

(b) Bbili lyakataangunwa aNg'anda Yaajulu Yamilawu ngalyatolwa mbuuli Bill lyakaboozegwa kuNg'anda Yaajulu Yamilawu mpawompawo mbuuni mbwiiswaanana Ng'anda Yaajulu Yamulawu kuzwa buuni nilyakaboozegwa lutaanzi kuza kuNganda Yaajulu Yamilawu kwiinda muli zyaambidwe mufuka 5(3).

(7) Fuka eeli talitobelezegwi pe kukweendelezegwa kwamaBbili aKkata lyaMulawu naakuti Bbili lyaMali.

MaBbili alaatala azyamali

7. (I) (Ng'anda Yaajulu Yamilawu tijisi manguzu aakubambulula Bbili lyaMali pesi ikonzya kukumbila Ng'anda Yaansi Yamilawu kuti ibambulule ziyanda kubambululwa.

(2) Mulembi Mupati waPalyamenti uyelede kubona masandu alokukumbilwa aNg'anda Yaajulu Yamilawu kuti achitwe kuBbili lyaMali kabiyo uyelede kwaatumizya masandu ayanda kuchitwa kuNg'anda Yaansi Yamilawu.

(3) Ng'anda Yaansi Yamilawu iyelede kwalangalanga masandu ngyakakumbilwa kuti iwachite akatumizigwa kuli njiyo kwiinda mufuka eeli kabiyo ikonzya kwaanjizya muBbili lyaMali masandu aayo.

(4) Kuti Ng'anda Yaajulu Yamilawu teeyazumina Bbili lyaMali mukati kamazuba musanu awatatu (8) kiiswaanana kubalwa kuzwa buunsi Bill nilyakanjizigwa muNg'anda Yaajulu Yamilawu, iNg'anda Yaansi Yamilawu ikonzya kuzuminana kuti Bill eelyo ngalitumizigwe kuMuzulwidi waNyika nkaako Bill eelyo likonzya kutumizigwa kuMuzulwidi waNyika muchiimo mulyakabede nilyakazuminanwa muNg'anda Yaansi Yamilawu.

(5) Bbili lyaMali lyatumizigwa kuMuzulwiid waNyika kalili lyazuminanwa kwiinda muli zeezyo zyaambidwe mumwaneeefuka (4)—

(a) ngalyatolwa mbuuli kuti lyakazuminanwa aPalyamenti muchiimo mulyakabede nilyakazuminanwa muNg'anda Yaansi Yamilawu; kabiyo

(b) kuti lyatumizigwa kuMuzulwidi waNyika kuti likazuminwe akusayinwa, lyelede kusindikilwa asetifiketi lizwa kuli Sichuuno waNg'anda Yaansi Yamilawu lyaamba kuti Bbili eelyo lyakazuminanwa kwiinda mufuka eeli.

CHIBAKA 3

MALIPOTI ALEMBWA AKKOMITI YAZYAKULANGALANGA MILAWU MUPLYAMENTI

Malipoti alembwa a Kkomiti Yazyakulangalanga Milawu muPalyamenti

8. (1) Kwiinda muli zyaambidwe mufuka eeli, taakwe ng'anda yamilawu ikonzya kumaninsiza meendelezezyo aBbili lipoti izwa kuKkomiti Yazyakulangalanga Milawu muPalyamenti kiitana balwa mung'anda eeyo yamilawu.

(2) Mwaneeefuka (1) tabelesegwi pe —

(a) kuBbili lyaKkata lyaMulawu; naakuti

(b) fumbwa Bill lyakalembelwa lipoti kale aKkomiti yaZyakulangalanga Milawu muPalyamenti aanze kwakuti Bill eelyo lyakazoobambululwa kuzwa niyakali kulangalanga Kkomiti yaZyakulangalanga Milawu muPalyamenti.

(3) Kuti Kkomiti yaZyakulangalanga Milawu muPalyamenti yakachilwa kulemba lipoti aatala aBill mukati kachiindi chaambidwe muNzila Zyameendeleyzo aPalyamenti naakuti mukati kachiindi chayungizigwa kachili chazuminwa kwiinda muNzila Zyameendeleyzo aPalyamenti, nga kwayeeyelwa kuti Kkomiti yakabona kuti taakwe bubi budinkaana aKkata lyaMulawu pe bujanika muBill eelyo kuti lyaba mulawu nkaako eeyo ng'anda yamulawu iyelede kwiinkilila nembo akuzumina Bill eelyo mbolibede aanga Kkomiti yakapa lipoti yayo.

(4) Kwiinda mabanabefuka (5) a (6), kuti Kkomiti yaZyakulangalanga Milawu muPalyamenti yaamba kuti zimwi zipanzi zyaBbili zidinkaana aKkata lyaMulawu, eeyo ng'anda yamilawu ilokweendelezya Bbili eelyo iyelede kubweza mizeezo yazwa kuKkomiti yaZyakulangalanga Milawu muPalyamenti akuchita mbuuli mbuyaambilwa mulipoti. Ng'anda yamulawu eeyo tiikonzyi kuzumina Bill eelyo lyategwa lijsi zipanzi zidinkaana aKkata lyaMulawu kusikila zyabambululwa zipanzi eezyo zitalomene.

(5) Kuti ng'anda yamilawu yajana lipoti lizwa kuKkomiti yaZyakulangalanga Milawu muPalyamenti mbuuli mbukwaambidwe mumwaneeefuka (4) aatala aBill lyakanjizigwa Mutobela waMuzulwiid waNyika, Silutwe waMutabi waFulumende

naakuti Uumutobela, muntu wakeeta Bill mung'anda yamulawu uyelede kupegwa chiindi chakuti asandule zyaambidwe mulipoti yaKkomiti yaZyakulangalanga Milawu muPalyamenti.

(6) Kuti ng'anda yamilawu yazuminana, kwiinda mulizyaambidwe amumwaneefuka (4), kuti nchobeni zimwi zipanzi zyaBbili zidinkaana aKkata lyaMulawu, Mutobeli waMuzulwidi waNyika naakuti Silutwe waMutabi waFulumeende kuti kayanda ukonzya kutola kaambo kakwe kuNkuta yaZyaKkata lyaMulawu mukati kamazuba kkumi amazuba aane (14 days) kuzwa buunsi ng'anda yamulawu niyakakaka kuzumina Bill eelyo. Pesi kuti Nkuta yaZyaKkata lyaMulawu yatuzumina tupanzi twaBill twali kutegwa tudinkaana aKkata lyaMulawu, ng'anda yamilawu yalikweendelezya Bbili eelyo ikonzya kuzumina Bill eelyo kalijisi tupanzi twakali kutegwa tudinkaana aKkata lyaMulawu.

Malipoti alembwa aKkomiti Yazyakulangalanga Milawu muPalyamenti

9. (1) Kkomiti Yazyakulangalanga Milawu muPalyamenti ikonzya kugwisya lipoti lyayo mung'anda yamilawu kuti yabona kuti zipanzi zidinkaana aKkata lyaMulawu zyabambilulwa, iStatutory Instrument kiitana langwalangwa pe aMaanda aMilawu obile.

(2) Kuti, Maanda aMilawu obile alangalanga lipoti yakazwa ku Kkomiti Yazyakulangalanga Milawu muPalyamenti iwamba kuti muli zipanzi zidinkaana aKkata lyaMulawu muMpandamayake yaMulawu, Mulembi Mupati waPalyamenti uyelede kwaambila baabo bakeetede Statutory Instrument mung'anda yamilawu kuti Statutory Instrument ijisi zipanzi zidinkaana aKkata lyaMulawu nkaako tiikonzyi kuzuminwa. Mutabi wakeetede mpandamayake yamulawu eeyo uyelede kuti mukati kamazuba makumi obile alimwi kali waambilwa, wachita chimwi chazeesi—

(a) walembela kuNkuta yaZyaKkata lyaMulawu kakumbila kuti ilangelange kuti nchobeni na kuli zipanzi zidinkaana aKkata lyaMulawu muStatutory Instrument; naakuti.

(b) Ayibambulule Statutory Instrument yakwe.

(3) Aawo mutabi wakeetede Mpandamayake yaMulawu kuti walembela kuNkuta yaZyaKkata lyaMulawu kakumbila kuti ilangwelangwe mbuuli mbukwaambidwe mumwaneefuka (2)(a), maba,be amulawu ooyo ngawabikkwa kumbali kakwiimikililwa mazembe atazwe kuNkuta yaZyaKkata lyaMulawu.

(4) Kuti nikwamana kulangwalangwa lipoti ya Kkomiti Yazyakulangalanga Milawu muPalyamenti kakuli kwajanwa kuti zimwi zipanzi zyaStatutory Instrument zidinkaana aMulawu uzyala Mabambe aMulawu, Maanda aMilawu obile akonzya kuzuminana kuti zipanzi eezyo zidinkaana aMulawu uzyala Mpandamayake yaMulawu nkaako—

(a) zipanzi zidinkaana aMulawu uzyala Mpandamayake yaMulawu nga tazichibelesi pe; kabiyo

(b) Mulembi Mupati waPalyamenti ulalemba chizibisyu mu*Gazette* achakufwambaana kazibisyu bulumbu eezyo zyakazuminanwa aMaanda aMilawu obile anchizyaamba chizuminano chawo maanda.

MPAMPIKWA YAMUSANU AKAMWI

(Zibela 329 a332)

KUTALIKA KUBELEKA KWAKKATA LYAMULAWU EELI AKUTAMBIKIZYANIA NGUZU KWAMA WOFESI

BWIIME BWAMAFUKA

CHIBAKA 1

NTALISYO

Fuka

1. Katalika kubeleka kwaKkata lyaMulawu eeli.
2. Kusweegwa KwaKkata lyaMulawu Lyachiindi.

CHIBAKA 2

KUTAANGUNA KUBELEKA KWAKKATA LYAMULAWU EELI ANTOOMWE AKUGWISIGWA KWAKKATA LYAMULAWU
WACHIINDI

3. Katalika kubeleka kwaKkata lyaMulawu eeli.
4. Kusweegwa KwaKkata lyaMulawu Lyachiindi.

CHIBAKA 3

NSALUUZYO NTAANZI

5. Kubelesya migano iiliwo kale yazilikiti amakkonsitichwensi.
6. Kulembesegwa kwabasikuvoota.
7. Kukazya masalilo aMuzulwidi waNyika kunsaluuzyo zyakutaanguna.
8. Mulawu wansaluuzyo.

9. Kutambikizyania nguzu kwafulumende
10. Kuyanembo kwamilawu iliwo kale

CHIBAKA 4

KUTAMBIKIZYANIA NGUZU KWAFULUMENDE

11. Bupanduluzi bwamilawu iliwo kale.
12. Nzila Zyameendelezyo aPalyamenti.
13. Babelesi bajanika muzyuuno.
14. Zyaambo zyaatala ansaluuzyo antoomwe abulamfu bwachiindi Muzulwidi waNyika nchayelede kukkala muwofesi.
15. Kweendelela nembo kwamawofesi amwi.
16. Mukwabilili waBulumbu.
17. Kulonzegwa kwamali ili muNkomoMpati Yafulumende yachiindi.
18. Nkuta ameendelezyo azyamulawu.
19. Zyaambo zyaMupati waBasikusosela Milandu Munkuta.
20. Zyeelo zyabantu kulizya Ndyabukkede.

CHIBAKA 1

NTALISYO

Bupanduluzi muMpampikwa Yamusanu Akamwi

1. Mumpampikwa eeyi, aanze kwakuti kazisiyene azyaambidwe mumalembe alokwaambwa —

“buunsi bwakutalika” chaamba buunsi Kkata lyaMulawu eeli mbuli talika kubeleka kwiinda muli zyaambidwe mufuka 3(2);

“milawu iliwo kale” chaamba mulawu uli mumalembe wakali kubeleka kale muZimbabwe buunsi mbulyakatalika kubeleka Kkata lyaMulawu eeli, kuuli muchiiimo chaMulawu upangwa aPalyamenti naakuti Mayake aMulawu;

“mulawu iliwo kale” chaamba mulawu wakaliwo kale naakuti umwi mulawu, fumbwa muchiiimo muwakabede, pesi kuuli wakali kubeleka muZimbabwe buunsi mbulyakatalika kubeleka Kkata lyaMulawu eeli;

“Nsaluuzyo zyakutaanguna” chaamba—

- (a) nsaluuzyo zyakutaanguna zyakusala Muzulwidi waNyika kakubelesegwa Kkata lyaMulawu eeli;
- (b) nsaluuzyo zyakutaanguna zyakusala biiminini bamung’anda yaPalyamenti kakubelesegwa Kkata lyaMulawu eeli; kabiyo
- (c) nsaluuzyo zyakutaanguna zyakusala bantu banjila mumakkansili aamuzilikit, mumadolopo mapati amumabbooma;

“Kkata lyaMulawu Lyachiindi” chaamba Kkata lyaMulawu lyazimbabwe lyakatalika kubeleka mu18 Mukubwekaangala 1980 ambambululo zyamulawu ooyu zyakachitwa zisiyenesiyene;

“zuba lyakudindwa” chaamba buzuba mbulyakadindwa Kkata lyaMulawu eeli mupepa lyaGazeti kwiinda muli zyaambidwe muchibeela 51(5) chaKkata lyaMulawu wachiindi.

Manguzu aMpampikwa Yamusanu Akamwi

2. Mpampikwa Yamusanu Akamwi eeyi ilaamanguzu kuli zyonse zibeela zijanika muKkata lyaMulawu eeli, kapati aawo mpukutamvvisisiki kabotu zyaambwa achimwi chibeela.

CHIBAKA 2

KUTALIKA KUBELEKA KWAKKATA LYAMULAWU EELI AKUSWEEGWA KWAKKATA

LYAMULAWU LYACHIINDI

Kutalika kubeleka kwakkata lyaMulawu eeli

3. (1) Mpampikwa eeyi, antoomwe a —

- (a) Chaandaano 3, chilaatala azyabunichisi bwaZimbabwe;
- (b) Chaandaano 4, kakuli Nzyeelelo Zyaampandamunsaka;
- (c) Chaandaano 5, chilaatala akusalwa kwaMuzulwidi waNyika akutalika kwakwe mulimu;
- (d) Chaandaano 6, chilaatala akusalwa kwaBiiminini bamung’anda yaPalyamenti antoomwe akwiitwa kwaPalyamenti nikwazwa kuchitwa nsaluuzyo akuzumina kwaMuzulwidi waNyika Milawu ipangwa aPalyamenti;
- (e) Chaandaano 7, chilaatala ansaluuzyo, aanze kwazibeela 158, 160 a161;
- (f) Chaandaano 8, chilaatala amulimu antoomwe amanguzu aNkuta yazyakata lyaMulawu;
- (g) Chaandaano 9, chilaatala andemeko zyameendeleyo abulumbu antoomwe abuzuluzi;

- (h) Chibeela 208, chilaatala akulijata kwaBasikukwabilila Nyika;
- (i) and Chaandaano 12, chilaatala aKkomishini yaNsaluuzyo muZimbabwe; kabiyo
- (j) Chaandaano 14, chilaatala abafulumende bamuzilikiti amumabbooma. zitaanguna kubeleka buunsi lyakudindwa kwaKkata lyaMulawu.
- (2) Aanze kwawaawo mpukwaambidwe muMpampikwa eeyi, zipanzi zyoonse zyaKkata lyaMulawu zitalika kubeleka buunsi Muzulwidi waNyika wakasalwa kwiinda muKkata lyaMulawu eeli naatalika mulimu.
- (3) Aakati kabuunsi bwakudindwa abuunsi bwakutalika kubeleka kwaKkata lyaMulawu eeli, zipanzi zyaKkata lyaMulawu eeli zyaambidwe mubanabefuka (a) kuloosika ku (j) zyamwaneefuka (1) zitola busena bwazipanzi zikozyania zijanika muKkata lyaMulawu lyachiindi.
- Kusweegwa kwaKkata lyaMulawu Lyachiindi*
4. Kwiinda muMpampikwa eeyi, Kkata lyaMulawu wachiindi lyasweegwa kuzwa buunsi nilyatalika kubeleka Kkata lyaMulawu eeli pya.

CHIBAKA 3

NSALUUZYO ZYA~~KUTAANGUNA~~

5. Kubelesya migano iiliwo kale yazilikiti amakkonsitichwensi Miganhu yematinhu, yemitunhu neyemawadi sema kwayokusanhu kukaswika hhuba ledusiwa patjena ndiyo inohinga muhalulo dzekutanga.

- Kulembesegwa kwabasikuvoota*
6. (1) Woonse muntu wakalembesezye kuvoota mumalembe akuvoota kalitana talika kubeleka Kkata lyaMulawu eeli unoochilembedwe mumalembe kuchitila nsaluuzyo zyakutaanguna.
- (2) Kuchitila nsaluuzyo zyakutaanguna, Mulembi Mupati waZyakuvoota (Registra General of Voters) ngutanoolembe mazina abasikuvoota antoomwe akubamaba malembe abasikuvoota kalangwalangwa aKkomishini yaNsaluuzyo muZimbabwe.
- (3) Nabbatule waBasikulemba Basikuvoota kalangwalangwa akkomishini yaNsaluuzyo muZimbabwe uyelede kuchita jendengano lyakulembesy bantu basikuvoota antoomwe akubona kuti bantu basika kuzoobona kuti mazina aabo mpaali mumalembe kwamazuba makumi aatatu kuzwa buunsi nilyadindwa Kkata lyaMulawu eeli.

- Kukazya zyakazwa munsaluuzyo zyakusala Muzulwidi waNyika munsaluuzyo zyakutaanguna*
7. Fumbwa wakazyana azyakazwa munsaluzzyo zyakusala Muzulwidi waNyika kunsaluuzyo zyachitwa kutaanguna, kaambo aaka kweelede kamaninsigwa akupetwa kwiinda muli zeezyo zyaambidwe muchibela 93 chaKkata lyaMulawu eeli.

Mulawu wansaluuzyo

8. Nsaluuzyo zyakutaanguna zyelede kuchitwa kwiinda mumulawu wazyansaluuzyo uyendelana azyaambidwe muKkata lyaMulawu eeli.

CHIBAKA 4

KUTAMBIKIZYANIA NGUZU KWAFULUMENDE

Kutambikizyania nguzu kwafulumende

9. Fulumende uubumbwa kwiinda muKkata lyaMulawu eeli nguwe utola chibaka chafulumende wakaliwo kale.

Kuyanembo kwamilawu iiliwo kale

10. Kwiinda muMpampikwa eeyi, yoonse milawu iliwo kale ileendelela nembo kiibeleva pesi yeelede kulangisisigwa kwiinda muKkata lyaMulawu pya eeli.

Bupanduluzi bwamilawu iiliwo kale

11. (1) Aanze kwakuti zilisiyene azyaambidwe chiindi achiindi, zyaambwa mumilawu iiliwo kale aatala a —

(a) Muzulwidi waNyika nga zyaamba Muzulwidi waNyika uubikkidwe kwiinda muli zyaambidwe muKkata lyaMulawu eeli;

(b) Palyamenti kwaambwa —

(i) Ng'anda Yaajulu Yamilawu, aawo mpukwaambwa milimu iichitwa ang'anda eeyi yamilawu ayilikke mbuuli mbukwaambwa muKkata Lyamilawu;

(ii) Ng'anda Yaansi Yamilawu, aawo mpukwaambwa milimu iichitwa ang'anda eeyi yamulawu iteensi yeoyo iwambidwe mu mwaneefuka (1) naakuti mumulawu umwi wapangwa;

(c) Ng'anda Yaansi nga kwaambwa Ng'anda Yaansi Yamilawu;

(d) ...

(e) ...

[Tufuka (d) a (e) tusowegwa achibela 24 chaMulawu 2 wa2021]

(f) Zyamajele kwaambwa Zyamajele aKuzyotololwa Kwabaange;

(g) Kkomishini yaZyamajele kwaambwa Kkomishini yaZyamajele aKuzyotololwa Kwabaange;

(h) Nabbatule waZyamajele kwaambwa Nabbatule wazyaMajele aKuzyotololwa Kwabaange;

(i) Sikulingula Mabeleseyo aMali yaFulumende aNabbatule Uulingula Mmabeleseyo aMali yaFulumende kwaambwa Nabbatule waKulingula Mmabeleseyo aMali yaFulumende

(j) Attorney General kwaambwa Mupati waBasikusosela Milandu muNkuta.

(2) Aawo Kkata lyaMulawu eeli mpulipa nguzu kumuntu kuti naakuti kabunga kuti kapange milawu aatala azimwi zintu, kakuli zintu eezyo zilaambidwe kale mumilawu iiliwo kale yakachitwa abamwi bantu/tumwi tubunga, milawu iiliwo kale ijisi nguzu zikozyania amilawu yakaanzwa kwiinda muKkata lyaMulawu pya eeli.

Nzila Zyameendelezyo aPalyamenti

12. Nzila Zyameendelezyo aPalyamenti zyakaliwo kale kalitana talika kubeleka Kkata lyaMulawu eeli yamuNg'anda Yaajulu aNg'anda Yaansi Yamilawu kusikila zyabambululwa naakuti kugwisigwa kwiindila muKkata Lyamilawu eeli.

Babelesi bajanika muzyuuno

13. Fumbwa muntu wakajisi chuuno mumulimu wafulumende, kalitana talika pe kubeleka Kkata lyaMulawu eeli, uyanembo kajisi chuuno chakwe naakuti kubellesya limbi zina lyawofesi lyakabumbwa amulawu mupya pesi kalyelene awofesi yakwe yansiku. Mufolo alumwi lugwasyo lupegwa babelesi aamulimu zinookozyania anzyaakali kujana kale kusikila bulamfu bwakukkala muwofesi eeyo bwasika mpubumana, kusikila wasiya mulimu, naakuti kwaandwa mulimu.

*Zyaambo zyaatala ansaluuzyo antoomwe abulamfu bwachiindi Muzulwidi waNyika
nchayelede kakkala muwofesi*

14. (1) Katutalangisisyi zyaambidwe muchibeela 92, munsaluuzyo zyakutaanguna kuzwa kutilika kwakubeleka kwaKkata lyaMulawu eeli, antoomwe amunsaluuzyo zitobela zyakusala Muzulwidi waNyika mukati kakkumi lyaminyaka kuzwa kunsaluuzyo zyakutaanguna, basikuvootelwa kuba Muzulwidi waNyika tabeelede kusala uumwi muntu kuti avootelwe kuba Mutobeli waMuzulwidi waNyika.

(2) Achakufwambaana, muntu wasalwa kuba Muzulwidi waNyika munsaluuzyo zyaambidwe mumwanefuka (1) uyelede kugala bantu batayindi bobile pe kuti babe Batobeli baMuzulwidi waNyika, bakkala muzyuuno eezi kwiinda muluse lwaMuzulwidi waNyika.

(3) Aawo—

(a) uumwi Mutobeli waMuzulwidi waNyika mpaagalwa kwiinda mumwanefuka (2), ooyo muntu uba Mutobeli waMuzulwidi waNyika Mutaanzi kakutobelwa zyaambidwe muKkata lyaMulawu eeli;

(b) Bibili Batobeli baMuzulwidi waNyika mpugalwa kwiinda mumwanefuka (2), Muzulwidi waNyika ukonzya kuti kuzwa chiindi achiindi wagala umwi kuti abe Simujatila Chuuno chaMuzulwidi waNyika aawo Muzulwidi waNyika natawo munyika naakuti natachikonzyi kuchita milimu yawofesi yakwe kwiinda mukuchiswa azimwi zinga zilachitika mubuumi.

(4) Katutalangisisyi zyaambidwe muchibeela 101 pesi katulanga zili mubanabefuka (5) a (6), kuti muntu wakasalidwe kuba Muzulwidi waNyika munsaluuzyo zyaambidwe mumwanefuka (1), wafwa, wasiya chuuno naakuti wagwisigwa achuuno—

(a) Uutobela Muzulwidi waNyika naakuti aawo mpukuli Batobela Muzulwidi waNyika babili, ooyo Uutobela Muzulwidi waNyika wakamaninsiza kugalwa kuti ajane bujatila chuuno chaMuzulwidi waNyika kwiinda mumwanefuka (3(b), nguwe ujana bujatila chuuno chaMuzulwidi waNyika kusikila Muzulwidi waNyika mupya watalika mulimu mbuuli mbukwaambidwe mumwanefuka (5); kabiyo

(b) Chuuno chaMuzulwidi waNyika chasyala kachitakwe muntu cheelede kupegwa uumbi muntu wagalwa kuzwa kukabunga kakweendelezya zyanyika kakalaMuzulwidi waNyika wakafwa, wakasiya naakuti wakazwa achuuno.

(5) Kabunga kakweendelezya zyanyika keelede kugala muntu utanjile muchuuno chaMuzulwidi waNyika kwiinda mumwanefuka (4)(b), keelede kuzibisy Sichuuno waNg'anda Yaansi Yamilawu izina lyamuntu ngukagala mukati kamazuba makumi musanu amakumi aane (90 days) kuzwa buunsi chuuno chaMuzulwidi waNyika nichasyala kachitachikwe muntu. Mpawo muntu wagalwa utalika mulimu naamana kuchita chikonke chawofesi eeyi kwiinda muchibeela 94. Sikunjila muchuuno chaMuzulwidi waNyika uyelede kuchita chikonke chawofesi eeyo mukati kamahola makumi aane alaamusunu aatutatu (48) naakuti kakutana yinda mazuba obile kuzwa nikwakazibisigwa zina lyamuntu ooyo Sichuuno waNg'anda Yaansi Yamilawu.

(6) Kuti muntu wali Muzulwidi waNyika wakasalidwe kwiinda mumwaneeufuka wafwa, wasiya naakuti waandwa achuuno, kakuli muntu ooyo taakalikwe kabunga kakweendelezya zyanyika nkaakanjide, Uutobela Muzulwidi waNyika naakuti kabali bibili ooyo wakamaninsizya kujatila chuuno chaMuzulwidi waNyika kwiinda mumwaneeufuka (3)(b), nguwe uutola chuuno chaMuzulwidi waNyika.

Kweendeleta nembo kwamawofesi amwi

15. Katutalangi zimwi zipanzi zyaKkata lyaMulawu Lyachiindi, ma wofesi aatobela aakaliwo kale buunsi lyakudindwa kwaKkata lyaMulawu kwiinda muMpampikwa Yamusunu Atutatu ijanika muKkata lyaMulawu Lyachiindi, kaali ngaaya—

- (a) Muzulwidi waNyika aWutobela Muzulwidi waNyika;
- (b) Nabbatule waBasilutwe baMitabi yaFulumende awutobela Nabbatule waBasilutwe baMitabi yaFulumende; kabiyo
- (c) Silutwe waMutabi waFulumende aWumutobela;

Beendeleta nembo kabaliwo kusikila buunsi Muzulwidi waNyika mutaanzi aansi kwaKkata lyaMulawu eeli watalika mulimu wakwe kabiyo aabo bakajisi zyuno zyaambwa aajulu balasyaala kabali muzyuno zyabo mbuuli mbukweelede.

Mukwabilili waBulumbu

16. (1) Mulawu waMukwabilili waBulumbu [Chaandano 10:18]) wagwisigwa akusweegwa.

(2) Fumbwa zyaambo zyakali kujatwa aMukwabilili waBulumbu kalitana talika kubeleka Kkata lyaMulawu eeli zyeede kutolwa kuKkomishini yaZyeelelo Zyabantu muZimbabwe kuti zikamaninsigwe nkukooko.

Kulonzegwa kwamali iili muNkomoMpati Yafulumende yachiindi

17. Imali zyakeelede kubikkwa muNkomo Mpati yaFulumende, yakabikkidwe kwiinda muKkata lyaMulawu Lyachiindi, iyeede kubikkwa muNkomo Mpati yaFulumende yakaanzwa kwiinda muKkata lyaMulawu eeli.

Nkuta ameendelezyo azymulawu

18. (1) Mufuka eeli —

“ kaambo katanamana kalaachakuchita aKkata lyaMulawu” zyaamba—

- (a) kaambo kalaachakuchita aatala akutyolwa kwazyelelo zyaampandamunsaka mbuuli mbukwaambidwe muKkata lyaMulawu Lyachiindi; naakuti
- (b) fumbwa kaambo kalaachakuchita azyaKkata lyaMulawu mbuuli mbukupandulwidwe muchibeela 332 chaKkata lyaMulawu eeli pya;

kakuli buunsi nilyakadindwa Kkata lyaMulawu eeli kaambo aako kakachili muNkuta Yaajuluju lyaZimbabwe yakaanzidwe kwiinda muKkata lyaMulawu Lyachiindi.

(2) Katutalangi zili muchibeela 166, kwaminyaka musanu ayibili kuzwa buunsi nilyadindwa Kkata lyaMulawu eeli, iNkuta yazyakata lyaMulawu iijisi bantu aaba —

- (a) Duundumuntule waBubetes aWumutobela; kabiyo
- (b) maJaji aali musanu awabili bakuNkuta Yaajuluju;

beeede kukkan kabali boonse kuti baswiilizye kaambo keetwa muNkuta yazyakata lyaMulawu.

(3) Kuti chuuno chawumwi Jaji wakuNkuta yazyakata lyaMulawu chasyaala kachitakwe muntu mukati kaminyaka musanu ayibili kuzwa buunsi

nilyakadindwa Kkata lyaMulawu, chuuno eecho cheelede kuzuzikizigwa kwiinda mukunjizya uumbi Jaji, naakuti kubikka Jaji uujatilide chuuno eecho pesi Jaji ooyo kazwa kuNkuta Yaajulujulu. Pesi kuti chuno chaUutobela Dundumuntule waBubetesи chayanda muntu, muntu ooyo uyelede kunjizigwa kakutobelezegwa chibeela 180(2)(3).

Naa kakuli kuti chuuno chaMutobeli waDundumuntuule waBabesи chaaseme kwachiindi eecho chizopegwа muntu mukwiinda mukutobela chibeela 180 (2) a(3)

[Kabeela kakasekkelwa akabeela 8 kaMulawu 10 wa2017]

(4) Kusikila kwalembwa zyaambo zisiyene kwiinda muMulawu upangwa aPalyamenti—

- (a) miteto ikonzya kupangwa kwiinda muMulawu waNkuta Mpati [Chaandano 7:13] kuti miteto eeyo igwasizye kuubya meendelezyo azintu muNkuta yazyakata lyaMulawu;
- (b) milawu yaNkuta Yaajulujulu ilabeleka, nikuba kuti masandu akonzya kuchitwa aayelete, mumeendelezyo azintu muNkuta yazyakata lyaMulawu kuzyaambo zitavumbidwe amiteto yachitwa kwiinda mumwaneefuka (a);

pesi milawu eeyo iyelede kubeleka muNkuta yazyakata lyaMulawu, iyelede kweendelana azyaambidwe muchibeela 85 aChaandaano 8.

(5) Nkuta Yaajulujulu yaZimbabwe, Nkuta Yaajulu yaZimbabwe, Nkuta Yambelekelano, aNkuta Yanjendelezyo, mbuuli mbuzyakabede muchiindi kalitana talika kubeleka Kkata lyaMulawu eeli, zyakabambilwa boobu Nkuta Yaajulujulu (Sureme Court), Nkuta Yaajulu, Nkuta Yambelekelano (Labour Court), Nkuta Yanjendelezyo aansi kwaKkata lyaMulawu eeli. Pesi fumbwa mizeezo njiyakapa kumilandu atwaambo musule kwakutalika kubeleka kwaKkata lyaMulawu eeli mizeezo eeyo ichibeleka kabiyo ichilaamunse.

(6) Woonse muntu wakali kubeteka milandu muNkuta Yambelekelano amuNkuta Yanjendelezyo kalitana talika kubeleka Kkata lyaMulawu eeli waba Jaji waNkuta Yambelekelano naakuti Nkuta Yanjendelezyo uujana mufolo azimwi zipegwa babcelsi zyeelene aJaji waNkuta Yaajulu. Kabiyo bulamfu bwakukkala muwofesi yamulimu kali Muzulwidi waNkuta Yambelekelano naakuti Nkuta Yanjendelezyo kabukozyania aboobo bwaJaji wakuNkuta Yaajulu.

(7) Inkuta zyaba Mejasilitili, nkuta zyabaami azimwi nkuta zyakapangwa kwiinda mumulawu upangwa aPalyamenti kalitana talika kubeleka Kkata lyaMulawu eeli, zyelede zyeendelela nembo kazibeleka mbuuli zyakabikkwa aMulawu upangwa aPalyamenti kwiinda muchibeela 174, kabiyo zyakaambwa ankuta eezi kalitana talika kubeleka Kkata lyaMulawu eeli zichibeleka kabiyo zichilaamunse.

(8) Fumbwa kaambo katalina maninsigwa keendelana azyakata lyaMulawu—

- (a) kakatana kubetekwa buunsi kalitana dindwa Kkata lyaMulawu eeli, kaambo aako ngakatolwe kuNkuta yazyakata lyaMulawu yakabumbwa kwiinda mumwaneefuka (2);
- (b) kuti kakuli kaambo kakali katalika kubetekwa buunsi nilyakadindwa Kkata lyaMulawu, kaambo aako keelede kutolwa kuNkuta Yaajulujulu, aanze kwakuti aabo beni twaambo bazuminana kukatola kuNkuta yazyakata lyaMulawu yakabambwa kwiinda mumwaneefuka (2), nkaako kuti kwaboobo Nkuta Yaajulujulu ilakatola kuNkuta yazyakata lyaMulawu kaambo aako.

(9) Yoonse milandu, aanze kwayeeyo ilaachakuchita azyakata lyaMulawu, yakatalina maninsigwa munkuta buunsi nilyakatalina dindwa Kkata lyaMulawu eeli ikonzya kwiinkilila nembo kilookubetekwa munkuta eezyo naakuti azimwi zyeelene

nkuta zyakabikkwa aKkata lyaMulawu pya eeli kakunga yakali yatalika kubetekwa milandu eeyo, pesi—

- (a) meendelezyo atwaambo/milandu eeyo ayelede kuba ngawo akali kubelesegwa kale kalitana dindwa Kkata lyaMulawu eeli; kabiyo
 - (b) meendelezyo amilandu/twaambo aawambwa mumwaneeufuka (a) alabeleka kumilandu ilaachakuchita azilembedwe muChaandaano 4 chaKkata lyaMulawu eeli pya.
- (10) Kuchitila zyaambidwe mumwaneeufuka (9)—
- (a) mulandu ulaachakuchita azya criminal case uwambwa kuti wakali watalika kubetekwa kuti kakuli sikutamizigwa wakali watalika kuzumina mulandu wakwe;
 - (b) mumulandu muniini uwambwa kuti wakali watalika kubetekwa kuti kakuli mapepa akwiita sikuksunda kunkuta akali atumizigwa kuli nguwe, naakuti mulandu wakali waba mumalembe eenkuta.

Zyeendelana aNabbatule waBasikusosela Milandu muNkuta

19. (1) Fumbwa zyakaambwa akuchita a Nabbatule waBasikusosela Milandu kuNkuta musule kwabuunsi katlitanatalika kubeleka Kkata lyaMulawu eeli aatala amilandu yaMipati zitolwa kuti zyakachitwa kazichitilwa awofesi mpya yaNabbatule waBasikusosela Milandu Munkuta.

(2) Muntu wakajisi chuuno chaDundumuntuule waBasikusosela Milandu kuNkuta musule kalitana talika kubeleka Kkata lyaMulawu uyendelela nembo muwofesi kali waba Nabbatule waBasikusosela Milandu muNkuta kuzwa buunsi mbolitalika kubeleka Kkata lyaMualwu.

Zyeelolo zyabantu kuli zyaNdyabukkede

20. Cheeelo chakujana penshini chakaliwo kale kalitana talika kubeleka Kkata lyaMulawu kabiyo kabiyo kachili cheeelo eecho chakali kwabililidwe aKkata lyaMulawu lyachiindi, eecho cheeelo cheelete kuya nembo kachizuzikizigwa kuzwa buunsi nilitalika kubeleka Kkata lyaMulawu eeli